





19



Ex Bibliotheca
majori Coll. Rom.
Societ. Jesu

13. 7. d. 11

~~6. 4. 11~~
36 36
0 0
20 16

Paraphrase en lāgage Fran-
 cois des quatre liures des Institu-
 tions forenses, ou autrement practi-
 que iudiciaire, translatez de Latin
 par maistre Iehan Imbert licentié es
 droictz, natif de la Rochelle, & ad-
 vocat a Fontenay le Conte, autheur
 d'icelles Institutions.



A PARIS
 e l'imprimerie de Regnaud Chaudiere,
 & Claude son filz.

1548.

Avec priuilege du Roy.

Cell. Rom Soc. Iesu Cat. miscr. B. 5.

BIBLIOTECA NAZ
 ROMA
 VITTORIO EMANUELE

IL est permis de par le Roy. a Regnaud Chaudiere Imprimeur & libraire iuré de l'vniuersité de Paris, imprimer & vendre les quatre liures des Institutiōs forēses de maistre Iebā Imbert, tant en Latin, que traduičts en Frācois par ledičt Imbert, iusques a cinq ans, a compter du iour que lesdičtz liures seront acheuez d'imprimer. Et defenses a tous libraires & Imprimeurs & autres, de les imprimer ou faire imprimer, vėdre ou distribuer, ne partie d'iceulx, autres que ceulx dudičt Chaudiere, sur peine de cōfiscation desdičtz liures, & amėde arbitraire enuers ledičt seigneur & ledičt Chaudiere.

Par le Roy.

Illustrissimo, ac omnibus vir-
tutum optimarumque artium numeris abso-
lutissimo D. Francisco Oliuario, Galliae Can-
cellario, Ioannes Imbertus salutem.



VOlatius patet, pluribusque prodest officium, Can-
cellarie præstantissime, eo
ut esse, ita semper haberi
solitum est commendabi-
lius. Nam præclare Aristo-
teles ἠθικῶν νικωμαχείων βί-
α, μῆζόν γε ἢ τελείωτερον τὸ τῆ πόλεως φαίνει-
καὶ λαβεῖν, ἢ σώζειν. ἀγαπῆτὸν μὲν γὰρ καὶ ἐνί-
μῳ. κάλλιον δὲ ἢ θεοτερον εἶθαι καὶ πόλεσι.
& M. T. Cicero in celeberrimis illis Offi-
um præceptis, dandam esse operam admo-
, omni ut hominum generi possimus satisfacere. Denique diuus Paulus, cuius (ut pote di-
) multo apud nos superior est authoritas,
sima voce prædicat, ἑλλησί τε, ἢ βαρβάρους,
τε, καὶ ἀνθρώποις, ὁφείλεται εἶμι. Quamobrem
ductus, atque virorum mihi amicissimo-
flagitationibus penè quotidianis euietus,
um cœpi appellere ad nōnullam Institu-
a ij tionum

tionum nostrarum forensium partem in sermonem Gallicum vertendam: vt & qui gallicè solùmmodo nouerūt, haud sint expertes fructus, siquis ex illo nostro labore possit decerpi. Deinde vt iuuenes è scholis in forum prodeuntes, eorum quibus pragmaticæ nostrates formulæ concipi solent, verborum cognitionem *ἀντιστάμενοι* queant adipisci: ne ex eorum ignorantia, aut in fraudem eos quibus consulunt, adducant: aut ipsi fannam & cachinum à rabulis illis curiarum veteratoribus, & (vt aiunt) vitilitigatoribus patiātur. Nam alia quàm quæ palato suo protrita fuerunt, aliis molestius sapere & deterius, ab illis iudicantur. Tum & illud me non minus impulit consilium, vt ingenuæ eorum adolescentum verecundiæ prospicerem, qui sibi non mediocri exhiberi negotium existimant, quum ad illos superciliosos fori magistrōs coguntur accedere, vt ab iis *ἀπὸ τῶν μουσικῶν* earum formularum verba ediscant: aut saltem hac vt eos leuarem crambe, quam apud curias ab iis tantisper oporteret deuoratam, quoad eas voces probè & capere & tenere contingeret. Primum igitur earū quidem Institutionum nostrarum librum Gallica forensi lingua nō solum reddidi, sed vt esset manifestior, interpretis

interpretis & paraphrastæ etiam muneri, nullo
in loco qui postulare id videretur, defui. Quum
autem anxie apud me cogitarem, cuius auspi-
ciis (vti moris est) eas in lucem proferrem lucu-
brationes: mihi quidem in mentē venit, aptius
& mea hercle sententia gratius, quàm tibi, eas
me nūcupare posse nemini. Tu enim primū
eo natus es parente, qui forensē hanc nostra-
ris Reipublicæ partem semper coluit, maxima
cum integritate & celebritate administrauit, &
tandem huic extremum impēdit spiritum: vt
pote qui apud amplissimum illum Lutetiæ Pa-
risiorum Senatum Præses, non sine summo o-
mnium luctu vita functus est, posteaquam te
non solum paternis artibus liberaliter institu-
tum, verū etiam aliis ingenuæ totius encyclo-
pædię disciplinis (quas illi per suorum iniuriam
temporum nancisci non licuerat) & præterea
trium linguarum omnium maximè nobiliū,
Hebraicæ nimirum, Græcæ, & Latinæ, summa
ornatū facultate, in forū veluti prosceniū pro-
duxisset. Quippe quū ex ingenio tuo te ad eos
honores & dignitates, quæ tibi successerunt am-
plissime, natum præfagiret prudentissimè: tibi
hæc potissima earum gerendarum instrumen-
ta voluit cōparata, vt non de his tum assequen-

dis (vt plerisque contigit) laborares quum ad-
ministrationis onus tibi incumberet, sed omnē
animi contentionem in muneribus illis admi-
nistrandis ponerēs. Itaque qui aliis honorū fœ-
licissimus finis fuit, hoc tibi fuit initium. Nam
principio sapientissima heroina Principis no-
stri vt germana vnica, ita omnium huius me-
moriæ nobilium fœminarum decus illustrissi-
mum, te Alēconicæ regionis suæ delegit Can-
cellarium. In qua quidem gerenda prouincia,
virtutis & eruditionis tuæ vis adeò se exeruit,
vt lūculētissimo exemplo celebrem illam Epa-
minondæ sententiam confirmaueris, Mōgistra-
tum vtrique à viro, non autem virum à magi-
stratu ostendi & ornari. Quare Principi nostro
idoneus visus es, quem in consilium suum inti-
mum cooptaret. Tanta autem diligentia, fide,
continētia, istic versatus fuisti, vt omnium ad-
mirationem, nedum benevolentiam tibi con-
ciliaueris: atque veluti quendam diuinum ho-
minem in has terras cœlo delapsū te nullus
non obseruauerit & suspexerit. Iam tuo benefi-
cio plurimi, in hīsque insularū municipes, for-
tunas & libertatem tueri & retinere profiten-
tur, καὶ τοῖς ἐκ τούτου παντὸς λαὸ ὤψυχον αἰτι-
λαβέειν. Quapropter eximio harum virtutū tua-
rum

rum splendore percitus Princeps, opera tua tum
fidei, tum opportuna, amplius sibi & Reipubli-
cæ vtendum censuit: atque Nomophylacis im-
perium, adeoque Francici totius iuris, æqui &
boni tibi concedidit asylum. Igitur quum in
altero magistratu gerendo antecessores tuos o-
mnibus officij numeris facillè viceris: in hoc sa-
nè administrando, omnium quæ ad togam per-
tinēt, sublimissimo imperio, te ipsum in dies cōtē-
dis superare, expectationemque quā de te con-
ceperunt omnes, nō modò sustinere, sed etiam
augere, & interuallo præcurrere longissimo. O-
mnium enim nostrum commoda, vtilitates, sa-
lutemque nō secus ac tua, habes charissima. Et
quanquam illa magnopere me inuitarunt vt
has tibi vigilias dicarem, non tamē segnius ex-
timulauit ex vna & eadem regione ductæ origi-
nis paternæ communis inter nos necessitudo.
Nam illustrissimum illum patrem tuum, ex se
ortum & oriundum vrbs agerque Rupellanus
in maximis suis laudibus iactant & gloriantur.
Quum autem humanissime Cæcellarie, statuis-
sem non prius aggredi reliquos tres Institutio-
num nostrarum libros in Gallicum sermo-
nem vertendos, quàm tuum ea de re oracu-
lum mihi esset redditum: primi harum Institu-
a iij tionum

tionum libri editionem serenitati tuæ offeren-
dā, Reginaldo Calderio chalcographo Parisien-
si, à quo fuerat excusa, vnà cum literis manda-
ueram, quoniam per meipsum id tum confi-
cere bb aduersam valetudinem non licuisset.
Is verò munere suscepto erga tuam amplitudi-
nem se iandiu functum fuisse renuntiavit. Sus-
tinuimus itaque diutius amicorum votis mo-
rem gerere, qui nos de hac trium librorum ver-
sione sapissime nec absque molestia appellita-
bant, si fortè mihi diuinum super re illa iudici-
um & consilium tuum interim posset esse com-
pertum. Sed quum id minimè succederet, siue
per desertam mandati illius nostri fidem, siue
per innumeras easdémque grauissimas occupa-
tiones tuas, tandem coactus fui amicorum pre-
cibus succumbere, hancq; trium librorum pa-
rapbrasim Gallicis verbis in publicum edere:
quam & nomini tuo, perinde atque priorem,
cōsecramus. Te igitur, meritissime Cācellarie,
oramus maiorem in modum, vt pro genuina
tua clementia, hilari fronte has opellas nostras
velis exceptas, tuóque eas earúmque authorem
semper tectum patrocínio: atque perpetuum
nostræ in te obseruatię & cultus sint *μνημόσινον*.
Deum autem optimum maximúmque obse-
cramus,

ramus, summum ut hūc (quò te foeliciſsmè
euexit) dignitatis gradum, Gallicæ Reipublicæ
tibi que proroget, ac diu ſeruet incolumem. Ex
ædibus noſtris Fontenaienſibus.

Τοῦ αὐτοῦ Γ' μῦθετε πρὸς τ' αὐτὸν
δικαιότατόν τε καὶ μεγαλοπρεπῆ
τὸν τ' Κελτίας νομοφύλακα.

Εἰ ἐπ' ἐλαιῶν ἡδίστος ὄμβρος καταπέσῃ,
Αὐταὶ φέρουσι καρπῶν πληθὺς ἄσπετον.
Εἰ δ' ἀπ' ἐλαίων σὺ πατρῶον τὸ νόμα λαβὼν
Εἴ μοι γ' ἀπ' ὄμβρον ἐπὶ κλησὶν ἔχοντ' ἐκ γένους
Σῆς ἐννοίας νῦν ψεκάδ' αὖ μικρὰν ἐπιπάσῃς,
Δέξαδι καρπὸν ἀρκέον πολὺν οἴσεται.

I O A N N I S I M B E R T I

Filij ad Lectorem.

Si quando lætus effuderit ager fructum
Sat copiosum, laudat arator: & tanquam
Gratis sibi donatum, gratulatur. sed
Quem peperit author hic fructum nec insuauē,
Amice lector, tibi si gratus accedat,
Non te suarum præconem cupit laudum.
Hunc legito solum, inque vsus tuos verte:
Sat præmium sibi videbitur magnum
Cepisse, gratis si quod est tibi scriptum,
Id candidè tua sis gratia amplexus.

PREFATION DE

MAISTRE IEHAN IM-
bert licentié es droictz, natif de la Rochelle,
aduocat a Fontenay le Conte, sur les quatre
liures de ses Institutions forenses, ou autres-
ment practique iudiciaire, par luy translatez
de Latin en Francois, au lecteur.



DO V T E S nations presque par
une coustume fort antique et
louable ont tousiours trauaillé a
rediger et mettre par escript,
non seulement les faictz vertueux
de leurs citoyens, mais aussi les
dons de nature donnez a leurs
pays, les manieres de leurs sacri-
fices, et de leur police. Car pour commencer a ceulx qui
ont esté en ce les plus excellens, ceste coustume est comme nee
auecques les Grecz, et les Romains. Parce qu'il n'y ha rien
si legier, voire ridicule, qui soit aduenu en leurs pays, qu'ilz
n'en ayent farci les histoires de leurs pays, et par une grand
copie. Les Hebreux, Egyptiens, et autres peuples barbares
en ont faict semblable. comme nous pouons cognoistre par
un traicté de Plutarche appellé les Paralleles. Mais les Fran-
cois presque seulz par long tēps n'ont rien escript de leurs
choses: non pas qu'il n'y eust bien matiere pour ce faire, ne
qu'ilz n'eussent eloquence et doctrine ad ce suffisante. Car
nous

nous trouuons par les histoires des Grecs & des Latins, que les Gaulois ont fleuri en haults faictz d'armes, & aussi en doctrine & langue, tant Grecque que natieue & peculiaire. Mais ilz ont eu par grād tēps ceste religion, ou superstition, qu'ilz estimoient chose execrable de diuulguer & manifester leurs manieres de faire, tant en sacrifices, que en leur administration de republique, pour deux causes, ainsi que diēt Iulles Cesar on sixiesme liure de ses commentaires. L'une, parce qu'ilz ne uouloient pas que le commun peuple en eust la cognoissance. L'autre, de craincte que si les dictes choses eussent esté escriptes, leur peuple soy confiant en ce qui estoit escript, fust negligent a les mettre en memoire. Et ont si fort tenu ceste coustume, que nous ne trouuons aucun Gaulois du uieil siecle, onquel y auoit tant de gens doctes & eloquēs en Gaule, comme Hercules Celticus, ou de Lyonnois, & les Druides de Chartres, qui ayt escript aucune histoire des siēs, fors un nommé Ditaphorus selon aucunes impressions, ou selon les autres Clitophon: lequel encore ie ne uey iamais, ains seulement i'ay apprins son nom des Paralleles de Plutarche, on chapitre onquel il parle de Brennus & d'une pucelle plebeiane ou roturiere. Mais par la benignité de la diuine prouidence, qui en son temps produict toutes choses, les Gaulois ont peu a peu laissē ceste coustume: & se sont adonnez a escrire leur origine, la suite de leur gent, les beaux faictz d'armes, & autres, & leurs manieres de uiure, non point par moindre abondance que elegance. Et entre autres aucuns ont escript la pratique iudiciaire, de laquelle ilz usoiēt. Et ont les uns escript en Francoiis, les autres en Latin. Mais est aduenueux a ceulx qui les ont escript en Latin, que la barbarie en laquelle ilz estoient lors, nō pas par leur negligēce, mais par la malice du temps, a ostē grāde partie de la grace qui estoit deuee a leurs

leurs escriptz. Car (ainsi que dict M. T. Cicero) nature en une simple espece ne met toutes choses en perfection. Par maniere que comme si elle n'estoit suffisante pour donner a un toute perfection, elle mesle & donne tousiours avec ses grands biens quelque incommodité. D'auantage la plus grand partie de ce qu'ilz ont escript ne se garde plus en pratique, ou bien pour raison de la diuersité du temps, qui apporte chascun iour choses nouvelles: ou parce que ceulx qui sont uenuz apres eulx, ont ueu plus subtilement les choses, & aussi que les meurs se expolissent de iour en iour. A ceste cause puis qu'il a pleu a la diuine bonté nous restituer les lettres Latines, & les tirer comme de captiuité d'entre les mains des Gots leurs ennemis: nous auons estimé que ne ferions pas bien nostre debuoir, si differiōs de mettre peine a repurger les escriptz de noz maieurs susdictz de partie de ceste barbarie: & si nous laissons aussi de communiquer a nostre siecle & a nostre posterité la cognoissance des choses qu'il a pleu a Dieu donner entendre plus perfectement, ou mieulx emender & corriger, aux homes de nostre tēps. Car il n'y ha partie de la police & mœurs d'une republique plus digne d'estre sceue, que celle qui concerne la discipline iudiciaire. parce que si auez regard a l'honnesteté, quelle chose est plus honneste, que apres auoir uaqué long temps a l'estude du droit ciuil aux escholes, mettre son scauoir en lumiere: & l'appliquer au profit & usage commun de tous en ayans affaire? Car certes ceste science, comme toutes les autres, si elle n'est mise en pratique exterieure, elle est manque & debile. Voire requiert plus grand exercitation a ceulx qui y ueulent estre excellens, que nulle autre science. Et si lon cherche le profit de la republique, ou le peut on mieulx trouuer, qu'en iustice? de laquelle nul est, qui ne cognoisse le bien & le fruit, comme du soleil. Et icelle iustice ne peut estre administree

administree sans iugemēs: ains seroit cōme uagant toute seule, & fantelique languissant. Auparſus ſi aucun ayant moins de prudēce regarde a faire le profit de ſa bourse, il ne le peut plus heureuſemēt faire, ne par gaing plus honneſte, que de celuy qui uiuēt de pratique iudiciaire. Car (comme dict Plutar- che) Stratocles & Dromocles ſe inuitans a aller a leurs Palais des plaidz, diſoyent qu'ilz ſ'en alloycnt a une miſtine d'or. Or eſt choſe bien mal ſeant & laide, de ſuyuir les Palais & autres Cours, & ignorer ceſte pratique. Car ainſi que Quintus Mutius reprochoit a ſulpitius, qui combien qu'il plaidast ſouuēt, neantmoins il meſpriſoit l'eſtude du droit ci- uil: & ſi fault entendre que lors pluſieurs oroyent & lai- doycnt, qui n'auoyent cognoiſſance que de l'art oratoire: auſſi combien qu'un perſonage ſoit bien ſcauant en droit ci- uil, toutesfois ſ'il n'eſt exercitē en ceſte pratique iudiciaire, il ne pourra euitier que en plaidant il ne ſoit mocquē & repris de petis ſoliciturs, qui auront frequentē la pratique. D'auan- tage toutes manieres de gens ont affaire grandement de ce- ſte ſcience. Car qui eſt ce qui ha paſſē un iour, qui n'ayt eſtē couuert de quelque petite nuce de proces? Et d'autant qu'un homme eſt riche, il ha auſſi plus de proces. A ce moyen leur ſera grand plaisir & utilitē, ſi par eulx ilz peuuent cognoi- ſtre ce qu'ilz auront affaire en la ſuite de leurs proces. Car ſouuent on eſt aux champs, ou lon ne peut trouuer aduocatx ou autres practiciēs: ou bien le negoce eſt ſi haſtif, qu'on n'ha loyſir d'en conſulter. Parquoy combien qu'ayons prins une grand charge & preſque a nous inſupportable de traicter toute noſtre pratique iudiciaire en langue Latine, & faire qu'il n'y ay aucune barbarie: ſi eſt ce que la charge eſt hone- ſte, utile, & neceſſaire. Et ſi ores ne la puis entierement met- tre a fin: ie m'efforceray faire que ce que i'ay trouuē eſpars en pluſieurs

en plusieurs liures & auteurs, & autres lieux, & tout confus, de le rediger & mettre par ordre, en maniere que nous redigerons en un corps toute la pratique, tant des causes ciuiles que criminelles, a fin que doresenauant on n'ayt peine de l'aller chercher en diuers lieux de plus de cent uolumes, ce que ha tourmenté fort cy deuant plusieurs bons esprit & fort miserablement. Et ferons que par la breueté d'un uolume tant de longs chemins soyent detrenchez, & que la perte du long tēps qu'on y mettoit, cesse: & tellement que presque des le commencement de l'œuvre il ressemble qu'en uoyons la fin. Et apres que l'auons eu mis en Latin, & qu'il ha trouué quelque grace des lecteurs, par maniere qu'il ha esté imprimé par trois fois: nous auons esté requis par plusieurs de nos amis gens scauans, & zelateurs du bien public, de le mettre en langue Francoise. Ce qu'auōs par long tēps differé: d'autant qu'aucuns nous disoyent, ne le trouuer bon. mais finalement nous auons esté uaincu & importunité de prieres des autres. Et auons seulement translaté le premier liure, avecques deliberation de ne tirer plus oultre. Et mesmement aurions encores esté consermez en ceste opinion, au moyen de ce que les trois derniers liures auroient depuis esté traduietz en Francois par maistre Guillaume Lysmandas Conseiller du Roy nostre sire en la Seneschaucee & Cour conseruatoire de Lyon homme docte & eloquēt, & qui ha tressidelement & elegamment faict ladicte uersion, de sorte qu'il me seroit impossible la faire mieulx. Neantmoins nos amis m'ont de rechef importuné de faire autre translation, me donnans entendre que combien que celle qui est faicte soit tresbonne, toutesfois grand nombre de gens scauans la souhaitoyent auoir de nous, parautant qu'ilz estiment qu'elle sortira plus uraye & naturele de nous, dont l'origine

origine est procedee, que d'un autre. Et que bien difficilement aucun peut si bien entendre le sens d'une composition d'autrui, comme de la sienne. Parquoy en acquiesçant a leur requeste, j'ay fait autre traduction desdictz trois derniers liures, & non pas tant traduction que paraphrase ou exposition literale, ou auons ueu en estre mestier. Je n'ay point voulu y mettre les allegations des textes des droictz civil & canon, ne des docteurs: d'autant qu'il m'a semblé estre chose fort mal seant, d'entremesler le Latin avecques le Francois: ainsi que Cicero en son premier liure des Offices disoit qu'il ne falloit mesler le Grec avecques le Latin. Aussi a fin que les gens scauans en Latin, eussent quelque auantage, plus que les autres: car il se trouue des gens si fort deshontez, qu'ilz ont la hardiesse d'insérer non seulement en leurs escriptures des allegations qu'ilz n'entendent point, mais aussi en leurs liures, pour se uendiquer contre uerité le scauoir que non seulement ilz n'ont, mais aussi n'en ont conscience. Et d'auantage a fin que moy mesme ne donne l'occasion que mes Institutions forenses en Latin soyent moins ueues & frequentees: & leur pris & estimation (si aucune est) diminuee. Car en n'adioustant point a ceste translation Francoise lesdictes allegations, a tout le moins ceulx qui en auront a faire, seront contrainctz recourir es Latines. Neantmoins j'ay amené & traduit en Francois toutes les raisons de droict, que j'ay ueu les plus commodés. Et ce j'ay bien voulu cy escrire, pour donner entendre la difference d'entre mesdictes Institutions Latines & Francoises: & le conseil & propos que j'ay eu en l'entreprinse de ceste translation. Laquelle ie uous prie prendre en gré: & y interposer telle censure & iugement, qu'en uos œures uouldriez estre donné.

Paraphrase du premier li- ure des Institutions forenses.



Comme i'aye deliberé de traicter tout l'ordre & procedure des iugemens de la Gaule coustumiere, il conuient en premier lieu que ie baille la definition de Iugemēt: en quoy faisant, ie n'entens garder toutes les reigles d'une uraye & propre definitiō: car toutes definitiōs en droict, sont dangereuses: mais ie le definiray selon qui sert a mon propos.

¶ Definition de Iugement.

Iugement doncques est une disputation ou plaid faict en lieu public destiné pour les plaidz, qu'on nomme vulgairemēt Auditoire. & consiste en trois personnes: un iuge, un demandeur, & un defendeur.

¶ En quel lieu on doibt expedier les causes.

Pource le iuge doibt expedier toutes causes en ce lieu public & auditoire y bailler default alencontre des absens y ayans assignation: sinon que les matieres soient telles, qu'elles doivent estre traictees sommairemēt & de plain, comme matieres non excedēs uingt ou trente solz tournois en action personnelle, ou prouision d'alimens & medicamens. Toutes fois doibt estre baillé en l'auditoire par le iuge default alencontre de l'adiourné en taxation de despens, & les despens taxez en ce lieu mesme. & ainsi en fut dict par arest es grāds iours tenuz a Angiers le xi. iour de Septembre M.D.xxxix. combien qu'il semble que ce soit matiere sommaire. Mais comment lon peut a ce pouruoir, & oster l'occasion & matiere d'appeller

peller si la taxe de despens a esté faicte hors iugement, nous le declairerons cy apres au propre lieu.

¶ Diuision de Iugement.

Tous iugemens & proces sont pourfuyuis en deux manieres: ou ciuilemēt, ou criminellemēt. Nous laissons le iugement mixte, qui est ciuil & criminel: car en cognoissant les autres deux manieres, nous aurons cognoissance du mixte.

¶ Diuision des Actions, & definition d'icelles.

La matiere & cause ciuile est ou personnelle, ou reale: petitoire, ou possessoire. La personnelle procede de contract, ou acte equipollent a contract. En la petitoire est question de la propriété & seigneurie de la chose: en la possessoire, de la possession. Et parce qu'en toutes actiōs ciuiles y a presque mesme & semblable fil de procedure, nous les traicterons toutes par un mesme ordre, fors quand il y aura differēce en la procedure: car en ce cas, en chascun lieu propre & peculier nous mettrons la difference.

¶ Quand il fault mandement du iuge pour faire adiournemens.

Au parauant qu'entreren iugement, il fault que le demandeur face adiourner le defendeur. L'adiournement est baillé ou par mādemēt du iuge, ou de l'office simple du sergēt. & en ce faict a cōsiderer le stile & usance de la Cour en laquelle lon ueult plaider: car en plusieurs cours, comme en celles de la Seneschauce de Poictou, sont determinez & ordonnez certains sergēs es bailliages: & en chascun siege Royal y a plusieurs bailliages: en chascun desquelz y a un sergent Royal, qui peut audeś de son bailliage faire tous adiournemēs, & receuoir offres de retraict, sans mandement de iuge: & ce en son bailliage, & pardeuāt son iuge duquel il est sergent bailliagier. comme au siege Royal de Fōtenay le conte sont trois
bailliages

bailliages, Thalmoudois, Luconnois, & Fontenay: & en chascun d'iceulx y a sergent bailliagier. Les autres sergens Royaux, & generalement crees & ordonnez en ladicte seneschaucee, ne peuuent bailler aucun adiournement, ne faire autre exploict de iustice, sans commission ou mandement de iuge. En plusieurs autres seneschaucees, bailliages, ou gouuernemēs n'y a pluralité ne distinction de bailliages en un mesme siege royal: & en ces seneschaucees ou gouuernemens un sergent ordinaire du siege royal peut par tout le siege faire adiournemēs sans mandemēt de iuge: cōme un serget royal & ordinaire du gouuernemēt de la Rochelle peut par tout ledict gouuernemēt faire adiournemēs, parce qu'il n'y a bailliages distincts, et n'est tout le gouuernemēt pris q̄ pour un bailliage.

¶ Sergens ne peuuent exploicter hors leur ressort.

Mais generalement tous sergens estans hors le territoire & ressort auquel ilz sont crees sergens, ne peuuent bailler adiournemēt, ne faire autre exploict de iustice, combiē qu'ilz ayent commission & mandement de leurs iuges, voire & du iuge du territoire & iurisdiction auquel ilz exploictent: en maniere que n'a gueres la Cour de Parlemēt a Paris receuoit ceulx qui estoient appellans de telz exploicts ainsi faictz hors territoire, comme appellās: & disoit par son arest, qu'il auoit esté mal exploicté & procedé par le sergent, & bien appellé: & condamnoit l'intimé es despens de la cause d'appel. Toutesfois depuis peu de temps enca, elle a changé de stile en cest endroict: car elle ne recoit plus la partie contre laquelle a esté faict tel exploict, a partie appellant: ains dit qu'il n'est receuable, ou que mal & sans grief il a appellé: et le condamne es despens de la cause d'appel, & en l'amende. & sa raison est, que icelle partie n'a interest par quel sergent elle soit adiournee. Mesmement aujourdhu, parce que tous
b ij sergens

sergès par les ordonnāces dernieres sont tenuz de laisser le double de leurs commissiōs, & adiournemēs, comme il sera dict plus amplemēt cy apres: au moyē de quoy la partie n'est plus greuee de aller hors son ressort demander les exploictz du sergent: & parce, ueu que l'interest de la partie cesse, elle n'est receuable cōme appellant. Mais les gens du Roy du lieu auquel a esté faict tel exploict, sont bien receuz cōme appellans d'icelluy exploict: ou bien mōsieur le Procureur general du Roy en la Cour: car le Roy & la chose publique ont interest que l'une iurisdiction n'entreprenne sur autre, n'aucuns des officiers d'icelluy seigneur sur les autres.

¶ Des sergens a cheual du Chastellet de Paris.

Toutesfois les sergens a cheual du Chastellet de Paris ont par priuilege & usance pouuoir de faire exploictz en tout le ressort de la Cour de parlement de Paris, pourueu qu'ilz ayent mandement de iuge: & ne demandēt permission d'exploictier aux iuges des lieux esquelz il ueulent faire les exploictz. Mais les sergens a uerge d'icelluy Chastellet n'ont ceste puissance: ains ne peuuent exploictier que dedens la banlieue de Paris: en laquelle aussi ne peuuent exploictier les sergens a cheual.

¶ Comment on procede contre les sergens exploictans hors leur ressort.

Et s'il aduient qu'un autre sergent exploicte hors son territoire ou ressort: le iuge du lieu auquel il exploicte, apres auoir esté informé sommairement de l'exploict, pourra, ce requerrans les gens du Roy, ou procureur general & fiscal d'icelluy lieu, & la partie ciuile adiournee ioincte avecques eulx, decreter adiournement personnel alencontre du sergēt qui ainsi a exploicté: & ordonner oultre, que le cheual du sergent sera arresté iusques a ce qu'il ait obey a iustice: & icelluy

icelluy sergēt oy sur les charges, & le proces faict, il est condamné en amende enuers le Roy, & enuers partie. Et ce ha lieu, iasoit que le sergent soit de la seneschaucee en laquelle il exploicte, s'il est d'un siege royal d'icelle mesme seneschaucee, & il exploicte en autre siege royal de celle seneschaucee: ainsi que si un sergent de Poictiers executoit au siege de Fontenay: & mesmemēt quand tel sergent execute un decret d'adiournement personnel ou prise de corps hors les metes du siege royal dont il est sergent.

¶ Quand vn sergent doibt demander congé d'exploicter, qu'on dict Pareatis.

sinon que le sergent qui est de mesme seneschaucee, demande permission ou Pareatis au iuge du lieu, d'illec exploicter: auquel cas le iuge a accoustumé l'octrôier. Ou que le sergent royal execute au ressort du siege dont il est sergēt: car il n'est tenu demander lors congé aux iuges inferieurs & subalternes du ressort. D'auātage un sergent en son ressort ne peut a la requeste d'un escholier & par uertu d'un mandement de scholarité & testimoniale adiourner quelcun de son ressort a comparoir pardeuant le conscruateur des priuileges royaux de Poictiers ou d'ailleurs, ou pardeuāt autre iuge que celluy du ressort, sans demander congé au iuge du ressort: autrement il sera condamné en amende, comme cy dessus a esté dict. Mais lon le baille ayseement, en informant de mandement ualable. toutesfois le iuge a accoustumé y appeller les gens du Roy, quand lon ueult adiourner pardeuant les conscruateurs des priuileges des uniuersitez: parce que cela uiēt au detrimēt & diminution des iurisdiccions ordinaires du Roy, & pour obuier a confusion de iurisdiccions.

¶ Quand le sergent ne veult bailler relation de l'adiournement, comment on y pouruoit.

b iij

Aufsi

Aussi es cas esquelz mesmes un sergent peut exploicter hors son bailliage, si le sergēt ne ueult bailler le double de sa commission & de son exploict: le iuge du lieu ou est faict l'exploict, peut bien apres sommaire information telle que dessus, ordonner qu'il sera adiourné pardeuant luy pour bailler ses exploictz, & que iusques a ce qu'il ayt obey, son cheual sera arresté. Quant es autres delictz des sergens, ou bien ilz sont commis en l'execution de quelque mandemēt de iustice: & cōcerne icelle execution: lors le iuge duquel est emané le mandemēt, peut cognoistre & punir d'iceluy delict. Ou c'est un delict, qui ne concerne en rien son office: & le iuge du lieu ou il demeure, en doit cognoistre.

¶ Des sergens du grand Conseil.

Au regard des sergens du grand Conseil, lon a parcydeuant doubté s'ilz peuuent executer les mandemens d'autres iuges, ou lettres royaux dōnees en autres causes que celles qui concernent les causes pendans en icelluy Conseil: iasoit que ledict Conseil n'ayt territoire ne ressort limité, ains qu'il cognoisse & iuge par tout le royaume, et qu'il n'y ayt doute que les arestz & mandemens d'icelluy Cōseil ne puissent par ses sergens estre executez par tout le royaume. Et cōme par uertu d'une lettre royale en forme de mādemēt de debitis, un sergēt d'icelluy Cōseil eust faict cōmādemēt de payer quelque sōme de deniers, le debteur se oppose, & parce que le sergēt ne ueult cesser, il en appelle: l'appel est releué es grādz iours tenuz a Poictiers l'an M.D.XXXI. & n'allegue l'appellant autre grief, sinon que le commandemēt & execution est faicte par un sergēt du grand Conseil, qui n'a pouuoir: & l'intimé oy, fut la matiere mise & appointee au Conseil le VI. iour d'Octobre audiēt an. Plus est a noter, que quand lon ueult faire executer aucun mandement d'un iuge non royal,

par

par ſergens royaux, ou de iuges royaux hors leurs ſeneſchau-
cees: il fault mettre ceſte clauſe, ſi donnons en mandemēt au
premier ſergent de la Cour de ceans, requerant tous autres
ſergens royaux, ou de ſeigneurs haultx iuſticiers, mettre ces
preſentes a execution deue.

¶ Qui expedie les mandemens pour adiourner, &
des adiournemens libellez.

Les commiſſions ou mandemens des adiournemēs ciuilx
parcydeuant eſtoient cōmunemēt prix au greſſe du iuge par-
deuāt lequel lon uouloit faire les adiournemens: & les deſ-
peſchēt les greſſiers ſans le iuge, parce qu'ilx ne cōtienēt grief
aucū. & auoit lō accouſtumē de libeller la demāde par iceulx
mandemens en certaines cauſes, cōme en complaincte, en let-
tres inhibitoires, par leſquelles les iuges royaux cuoquoient
les cauſes de leur iuriſdiction pēdans pardeuāt les iuges d'e-
gliſe. depuis lon a extēdu ce ſtile a toutes autres matieres in-
differentemēt, & meſmement depuis les ordonnāces dernieres
publiees au moys d'Aouſt lan M. D. XXXIX. parce que par
icelles, article CXVI. il eſt ordonné que tous les adiournemēs
pour intenter nouueaux proces, ſeront libellez ſommaire-
mēt, & cōtiendront la demande & moyens d'icelle en brief,
pour en uenir preſtx a deſēdre par le deſendeur a la premie-
re aſſignation. A ceſte cauſe maintenant on propoſe le plus
ſouuent ſa demande au greſſe: & ce requerāt le demandeur,
le iuge par meſme regiſtre ordonne que la demāde ſera ſigni-
fīee au deſendeur, pour y uenir dire ce que bon luy ſemblera.

¶ Des mandemēs des iuges portans cōmandemēs,
& en cas d'oppoſition.

Et baille ſouuēt le iuge en mandement au ſergent de faire
cōmādemēt au deſendeur de faire le cōtenu de la demāde du
demandeur, cōme ſi ia il eſtoit cōdamné: mais il met la clauſe,

b iij Et

Et en cas d'opposition, refus, ou delay, adiournez les opposans, refusans, ou delaïans, a certain & competent iour. auquel cas le cōmandemēt est conuertī en simple adiournemēt. Conuient cy entendre, que nul sergent doibt exploicter par uertu d'un mandement uerbal du iuge, s'il n'est mis par escript. Et pource fut dict par arest de la Cour, bien appellé d'un mandemēt de iuge baillé de uiue uoix, par lequel apres auoir esté informé d'obligation, il commanda a un sien sergēt faire cōmandemēt au débiteur de payer la somme: & en refus, d'arrester son cheual. Et furent faictes inhibitions es iuges du ressort, de non user de telz commandemens uerbaux.

¶ Des confortemains la saisie tenant non obstant opposition ou appellation quelconque.

Lon auoit accoustumé, en Santonge principalement, user d'une clause es cōfortemains, que les seigneurs feodaux obtenoient de la Chācellerie, ou du seneschal de sātonge, ou son lieutenant, pour conforter & corroborer la saisie qu'ilz auoient mis sur aucuns lieux mouuens de leurs fiefz, a default de payemēt de leurs debuoirs feodaux. Par la clause il estoit mandé de conforter leur mainmise: & adiourner les opposans, refusans, ou delai-ïs, pour dire leurs causes d'opposition, refus, ou delay, l'exploict & la saisie tenant non obstant oppositions ou appellations quelconques, & sans preiudice d'icelles. Ce qui n'estoit raisonnable, par deux moyens: Pun, car c'estoit commencer a l'execution. l'autre, car c'estoit proceder non obstant appel es cas esquelz il n'est permis par les ordonnances royaux. Au moyen de quoy sur certain appel interiecté en la Cour de parlement a Paris de l'execution de lettres royaux contenāt icelle clause, l'exploict & saisie tenant &c. la Cour auroit dict mal procedé & executé par le sergent
 executeur

executeur des lettres royaux, & defendu de nō user plus de telles clauses: & fut l'arest donné le x. de May. M.D. XXVI. Aussi telle clause fut reprouuee en cōplainctes par arest donné le XXIIII. de May en icelluy an. En n'a accoustumé ladicte clause estre mise qu'en rescript & ou lettres patentes seelées du grand seel du Roy, & donnees de sa certaine science.

¶ Profit de former le libelle au greffe.

Est a noter qu'il y a double profit a former son libelle ou demāde au greffe, parce que lon ha par mesme registre commission & mandement pour faire faire l'adiournement par autre sergent que le bailliagier. L'autre, parce que quand le demandeur uiendra proposer sa demande, il ne faudra qu'il face inserer par le registre sa demande, ains fera mettre seulement, Proposé & cōclu selon le registre cōtenant sa demande, en date de tel iour, & signé tel. Autrement quand le libelle est contenu par l'adiournement, il fault pour le mieulx faire enregistrer au long sa demāde cōme elle est cōtenue par l'adiournement: car souuent il aduient que lon perd les relations des adiournemens, & lon n'en peut recouurer autres, parce que les sergēs cōmunemēt n'en font registres & minutes.

¶ Enquelz casparcydeuant aussi on vsoit d'adiournemens libellez, & quand on doit commencer proces par vertu de lettres Royaux.

En deux autres cas lon souloit aussi bailler adiournement (comme encores on faict) par uertu de commission ou mandement par escript, c'est ascavoir quand on intentoit un proces par uertu de lettres Royaux: comme il est requis en plusieurs cas: car il cōuient entendre que les restitutions ou releuemens tant de mineurs que de maieurs fraudez & lésés, lesquelles par droit commun pouuoient estre faictes par les

les iuges: ne peuuent en ce Royaume estre faictes par les iuges, sinon que preallablement le Prince par ses lettres, apres narration faicte du faict, en ayt releué, & mādē au iuge que s'il luy appert du faict par tāt que suffire doibue, il adiuge a l'impetrant ses fins & cōclusions, ou le recoiue a prēdre pour raison de ce telles fins & cōclusions que de raison. Et cōbien semblablement qu'un contract ou quelque autre acte soit nul par le seul benefice du droit, & que de droit commun il ne soit mestier de le faire casser & annuller: toutes fois en ce Royaume il fault le faire casser & annuller par lettres Royaux: parce que uoyes de nullité, soit en cōtractz, sentēces, ou autres actes, n'ōt lieu en ce Royaume, ains fault tousiours recourir au benefice du Prince, ou se pouruoir par appel alencōtre des sentences nulles: cōme nous declairerōs cy apres. Pareille mēt il est besoing se pouruoir par lettres Royaux, quand les lieux dont lon ueult faire question, ou les parties contre lesquelles lon ueult agir, sont en diuerses iurisdiccions, a ce que la cause soit commise a un iuge Royal.

¶ Des lettres royaux attributives de iurisdiction.

Et lors lon ne peult a icelluy iuge oster par autres lettres royaux la cognoissance de la cause, et l'attribuer a un autre: ains fault se pouruoir par recusation, appel, ou autre remede ordinaire, ainsi qu'il est decidē par les ordonnances du Roy Loys XII. de ce nom, article XL. Et est defendu par les ordonnances du Roy Charles VIII. article LXVI. que les iuges obeys sent aux lettres royaux, lesquelles ne seront de iustice. Je ne puis en cest endroict me contenir que ie ne inuebe & blasme grandemēt l'auarice de plusieurs aduocatx, qui sans ce qu'il en soit besoing, cōseillēt a leurs parties d'obtenir lettres royaux, a fin de gagner en la facon des memoires d'icelles: car en ce faisant, ilx ne cōseillent et regardēt au profit de leurs parties,

parties, mais au leur propre: & leur ſemble qu'ilz ont bien beſongné, ſi les lettres royaux ont eſté expediees ſclon leurs memoires: iaſoit que ſouuent elles ne ſoient ciuiles.

¶ De l'addreſſe des lettres Royaux.

Mais pour reuenir a noſtre propos, il ne fault oublier que le Roy n'addreſſe iamais ſes lettres a iuges autres que les ſiēs, ou a ſes ſergens: & ne les addreſſe nulle foys aux iuges des iuriſdictiōs ſubalternes ou inferieures, & non eſtās royales. ains ſ'il fault auoir quelques lettres royaux de iuſtice pour faire faire quelque choſe par un iuge non royal en quelque cauſe pendante pardeuant luy, ou autrement: il fault que les lettres ſoiēt addreſſees au premier ſergent royal, & qu'il luy ſoit mandé faire commandement a ce iuge ſur quelque groſſe & grād peine a appliquer au Roy, de faire ce qui eſt mandé par icelles lettres.

¶ Des mandemens de debitis: & de l'exécution d'iceulx.

L'autre cas auquel lon bailloit adiournement par uertu de cōmiſſion par eſcript, & eſtoit l'adiournement libellé, & dōt encores lon uſe, eſtoit, quād par uertu d'un iugé ou inſtrumēt en forme aathentique (lequel aucuns appellēt inſtrument garantig ié) enſemble & par uertu de lettres royaux en forme de mādēmēt de debitis, ou d'un mādēmēt de debitis pris d'un iuge preſidial duquel lon appelle ſans moyē en Parlemēt, lon faiſoit faire par un ſergēt royal cōmādēmēt au débiteur nōmé par l'inſtrumēt ou iugé, de payer la ſomme de deniers y cōte nue: car apres icelluy cōmādement faiēt, ſi le débiteur ſe y oppoſe, le ſergent le recoit a oppoſitiō, & luy baille iour pardeuant le iuge pour dire ſes cauſes d'oppoſition: & neantmoins nonobſtant & ſans preiudice d'icelle, il prend & ſaiſit des meubles du débiteur iuſques a la cōcurrēce de la ſōme deue,

&

& les sequestre & baille en main & garde a homme solua-
 ble, a la charge d'en respondre comme de biens de iustice, &
 de les luy deliurer quand mestier sera. Et si le debteur ap-
 pelle de la saisie & execution faicte sur ses meubles, le sergent
 non obstant l'appel, & sans preiudice d'icelluy, passera oul-
 tre, & déplacera les meubles, & les mettera en main tierce:
 suyuant l'ordonnāce du Roy Charles VII. article XII. par la-
 quelle en toutes executiōs qui sont faictes par uertu d'obli-
 gations passees soubz seel royal, ou autre seel authentique au-
 dedens les limites ou il est authentique, la main sera garnie
 realement & de faict, non obstant oppositions ou appellatiōs
 quelconques, & sans preiudice d'icelles. Et ne sera differé de
 passer oultre pour quelques inhibitions generales, si elles ne
 sont au cas particulieres. Qui doit estre entendu des inhi-
 bitions generales que le sergent fait par uertu du relief de
 l'appel par le debteur interiecté de l'execution. Et les inhi-
 bitions particulieres sont celles que faict le iuge d'appel apres
 icelluy releué, avecques cognoissance de cause, & les parties
 sur ce oyes. Et par ce que ces motz de l'ordonnance du Roy
 Charles, Audedens des limites ou il est authentique, sōt obscurs,
 par les ordonnances dernieres articles LXV. LXVI. &
 LXVII. y a esté baillee interpretatiō: car y est dict, que les let-
 tres obligatoires passees soubz seel royal, serōt mises a execu-
 tion par tout le royaume. Et quant a celles qui sont passees
 soubz autres seaux authentiques, elles serōt aussi executoi-
 res cōtre les obligez, ou leurs heritiers, en tous lieux ou ilz se-
 ront trouuez demourās lors de l'execution, & sur tous leurs
 biens, quelque part qu'ilz soient assis ou trouuez: pourueu
 qu'au tēps de l'obligatiō ilz fussent demourās audedens du
 destroict & iurisdicțiō ou lesdictz seaux sont authentiques.
 Et a ceste fin tous notaires & tabellions sont tennz mettre
 par

contract & ſur peine de priuation de leurs offices, & d'amende arbitraire, les lieux des demourances des contrahens.

Quād le debteur eſt oppoſant, & appellāt, il ne luy fault bailler iour pour dire ſes cauſes d'oppoſition: car l'appel uuidera l'oppoſition: & fault entendre que l'appellant releue, ou l'āticipē. Mais ſi le debteur n'eſt que oppoſant, il luy fault bailler iour pour dire ſes cauſes d'oppoſitiō: & au iour, ſuyuant les ordonnances dernieres article LXVIII. le iuge ordonnera que les biens pris par execution, & autres s'il n'eſt ſuffiſent, ſeront uendus, & les deniers mis entre les mains du creancier, nonobſtant oppoſitions ou appellations quelconques, par prouiſion, en baillant par le creancier bonne & ſuffiſante caution de les rendre, & ſe conſtituant achapteur de biens de iuſtice.

¶ Des faultes commiſes en execution.

Il fault bien prendre regard a ce que les commandemens & execution ne ſoient tortionniers, mais bien & deuement faiēt: car en telles matieres rigoreuſes ou giſt executiō ou ſequeſtration reale, qui dechoit d'un poinēt, ou fait execution pour plus que ne luy eſt deu, il dechoit de toute l'inſtance, & eſt cōdamné es deſpens dommages & intereſt & de l'execution reale, & de ce qui ſ'en eſt enſuyui. & oultre les deſpens dommages & intereſt & ſi alencontre d'icelluy qui eſt maintenu heritier, lon a faiēt faire execution, & neantmoins s'on n'a mōſtrē qu'il eſt heritier: celluy qui a faiēt faire execution, eſt cōdamné en une amende enuers le Roy, & la partie, que le Roy ueult eſtre impoſee pour la calumnie des demandeurs en execution, s'il ſuccumbent: comme auſſi contre les obligē qui n'ont fourny calumnieuſement & ſans cauſe au contenu de leur obligation dedens le temps ſur ce par eux promis & accordē: ainſi qu'il eſt mis par les ordonnances

nances dernieres, article LXXII. & LXXIII. Toutesfois par les ordonnances susdictes article LXXV. il ne doit estre disputé de la ualidité desdictz commandemens, quād il y a terme certain de payer par les obligations, ou par les sentences, iugemens, ou condamnations deuement signifiees.

¶ De la difference des mandemens de debitis de la Chancellerie, & de ceulx que donnent les iuges Royaux ressortissans sans moyen en la Cour.

Conuient scauoir, qu'il y a difference entre les mandemens de debitis obtenuz de la Ch. cellerie, & ceulx qui sont obtenuz des iuges Royaux ressortissans sans moyen en la Cour de Parlement. car par les premiers il est mandé de contraindre les debtors par saisie uente & exploictation de leurs biens, & emprisonnemens de leurs personnes, si a ce sont oī li gex, au payement de toutes debtes qui sont deues a l'impe- trant, dont il apparoiſſe par obligations, instrumēs, ou autres loyaux enseignemens. & en cas d'opposition, refus, ou delay, adiourner les opposans refusās ou delayās pardeuant leurs iuges cōpetens, pour dire leurs causes d'opposition, refus, ou delay, la main du Roy auāt tous œuures suffisammēt garnie, nonobſtans oppositions ou appellations quelconques, et sans preiudice d'icelles. Mais par les mandemens de debitis dōnez par les iuges, il fault declairer expressement la somme qui est duee, & par qui: & ne le peut on obtenir que cōtre un deb- teur a une fois. Et s'ilz sont plusieurs debtors, cōtre chas- cun d'eulx fauldra obtenir du iuge un mandement de debi- tis: car par les ordonnances du Roy Loys XII. article LX. & par les ordonnāces du Roy Francoys premier de ce nom a- present regnāt, faictes sur la distinction des iurisdictiones des iuges Royaux, presidiaux, & preuostaux, article XVI. est pro- hibé

hibé a tous Baillifz, Senefchaux, et autres iuges preſidiaux, de bailler debitis & ſauuegardes en termes generaux. Mais pourtāt ne fault inferer, que leſdictz iuges ne puiſſent bien bailler autres mandemens pour adiourner toutes perſonnes quelconques pour uenir reſpōdre pardeuant eulx ſur quelque choſe: car ilz ont accouſtumé ainſi le faire. Et ueu que par leſd. ſtes ordōnāces il eſt permis ſeulement aux Baillifz, Senefchaux, & iuges preſidiaux bailler leſdictz mandemens, il eſt taiſiblement deſendu aux iuges Royaux, Chaſtellains, ou Preuoſtz, de non les bailler: auſſi n'ont ilz accouſtumé les oſtroier. Toutesſois tous mādemēs de debitis cōuenēt en une choſe, ſcauoir eſt que apres l'an & iour de l'impetration d'iceulx, ilz ne ſont ualables. qui doit eſtre entendu, qu'apres ledict an & iour ilz ne peuuent eſtre mis a execution. mais ſi dedens icelluy temps ilz ſont mis a execution, lon y a regard en tout temps. non pas que lon puiſſe encores apres l'an & iour faire commandement de payer autres debtes par uertu de ceulx qui ſont octroyez en Chancellerie: car quand aux autres il eſt aſſez clair que lon ne peut. Mais ilz ſeruent, touſiours pour le regard des commandemens & execution faicte par uertu d'iceulx dedens ledict an & iour.

¶ Pardeuant quelz iuges on doit adiourner les oppoſans aux commandemens de payer faictz par uertu de lettres obligatoires.

Maintenāt uoyons pardeuant quelz iuges doit lon bailler adiournement par uertu des comandemens de debitis. En ce fault regarder les lettres obligatoires: car ſi par icelles y a ſubmiſſion faicte preciſement a la iuriſdiction & coerctiō ſeulement des Baillifz ou Senefchaux, ou ſi la ſubmiſſion eſt genera-

lement a toutes cours Royales, sera au choix & election du creancier de poursuivre l'execution pardeuāt l'un des iuges nommez en ladicte obligation & submission, Baillifz, seneschaux, Preuostz, Chastellains, & autres iuges: comme il est decisi en l'article XV. desdictes ordonnances faictes sur la distinction de la iurisdiction des iuges Royaux, Presidiaux, & Preuostaux.

Mais si notaires non Royaux, ains les baronnies & chastellenies non Royales passent quelques lettres obligatoires, & y mettent seulement submission a la Cour dōt ilz sont notaires: lors il fault prendre le mandement de debitis du iuge Presidial, au ressort duquel demeure le debteur, & bailler adiournement pardeuāt icelluy mesme iuge. Ce que aussi fault obseruer quand le mandement est donne en Chacellerie. Et si le mandement est octroié d'autre iuge, le debteur peut demander estre reuoié pardeuāt le iuge de son domicile, si autre chose ne l'empesche. Et ainsi en fut dict par arest le XV. de february mil cinq cens uingtneuf. Autrement on donneroit occasion de distraire tousiours un chascun de sa iurisdiction, & faire domiciliaire & ordinaire.

¶ Les seaux aux contractz attributifz de iurisdiction.

Neantmoins sont trois manieres de seaux a contractz priuilegiez en ce Royaume, lesquelz attribuēt cognoissance aux iuges ayās la tution garde & iurisdiction d'iceulx, de tous les differens qui procedent des contractz passez soubz lesdictz seaux alencontre des contrahens, ou leurs heritiers, ou ayans droit & cause: iasoit que les contrahēs soient demourans en quelconque autre iurisdiction & ressort de ce royaume: en maniere que les cōtrahēs s'ilz sont cōuenuz pardeuāt lesdictz iuges, ne peuuent decliner. Lesquelz seaux nous auons

auons tousiours oy tenir estre le scel du preuost de Paris, le scel du conseruateur des foires de Brye en Champaigne en France, & le petit scel de Montpeslier.

¶ Quelles choses sont requises en lettres obligatoires pour les mettre a execution.

Mais toutes lettres obligatoires ne peuuent estre mises a execution selon la forme susdictē, si elles ne contiennent debte claire, liquide & apurée, comme une obligation de dommages & interest: car auant que la faire mettre a execution, il fault faire liquider & estimer par le iuge avecques cognoissance de cause, les dommages & interest. Autre chose est des obligations de moissons de grain, ou autres especes: car iasoit que lesdicts grains & especes ne soient liquidez n'appreciez, lon pourra saisir & faire crieés, & apres faire l'appréciation, par lesdictes ordonnances dernieres article LXXVI. Et comme il est requis obligation contenir debte liquide, aussi est requis que le creancier & debteur soient certains & nommez par les lettres obligatoires. Pour ceste cause comme un cessionnaire, ou ayant transport de quelque debte par uertu de lettres obligatoires d'icelle, instrumēt dudiēt transport, & mandement de debitis, eust faiēt faire cō mandemēt au debteur de payer: le debteur se opposa, & parce que le sergent ne uolut cesser, il en appella: par arest donné le XVI. iour d'Auril M.D. XXXI. l'appel fut conuert y en opposition, & les despens dommages & interest reseruez en diffinitue. Semblablement une femme pour la moytie qui luy appartient par la coustume du pays es debtes deues a son mary, ne peut proceder par execution quand elle n'est nommee par les lettres obligatoires: mais peut bien de-

c mander

mander garnison de main. Combien que le mari ayt baillé quictance du dot de sa femme par luy receu: & que par la loy il y ayt taisible stipulation d'iceul y rendre a la femme: neantmoins es cas de restitution, la femme ne peut proceder par execution cõtre les heritiers du mari, ou contre luy mesme, parce qu'on ne list point en ceste quictance la promesse de ladiète restitution. Dõt cõnient tirer, que on ne peut proceder par execution, sinon pour ce qu'on list en un instrumēt, & non pour les choses y entendues. Mais il fault entendre ceste decision, quand il n'y a obligation precedente de ladiète restitution, comme cõmunement il a accoustumē d'auoir par le contract de mariage, qui est faict auāt la quictāce dudict dot. Car quand il y a obligation precedente de restituer le dot par ledict contract de mariage: & que lors la quictance du dot receu est en forme d'instrumēt authentique, scauoir est signee de notaires: par uertu de ladiète obligation cõtenuē par le cõtract de mariage et de ladiète quictāce, on pourroit proceder par execution. Et par arest donnē le XXII. de Feburier M.D.XXX. un mari fut condāné garnir la main de la moytie d'une debte que debuoit sa femme pour cause du precedent mari qu'elle auoit eu.

¶ Si le cessionnaire & la femme peuuent faire mettre a execution les debtes cedees & appartenās a la femme a cause de la communauté d'entre son feu mari & elle.

Toutes fois ueue l'ordonnāce susdictē par laquelle lon peut executer l'heritier, il semble que le cessionnaire & la femme peuuent bien faire proceder par executiō es cas susdictz. Mais le plus seur, & sans crainte d'aucuns dōmages & interestz seroit, que le cessionnaire & la femme feissent adiourner le debteur,

debteur, & requérir que l'obligation fust declairee cōtre luy executoire a leur profit, & informer promptement & par lettres de leur qualité: comme par les ordonnances dernières artic'e LXXI. il est dict, que l'heritier, ou maintenu estre heritier de l'obligé, peut estre adiourné pour uoir declarer contre luy executoire l'obligation cōsentie par son predecesseur. par semblable raison actiuement le cessionnaire, la femme & l'heritier peuuent user de ce remede.

¶ Si par vertu d'une cedula recogneue, & d'un mandement de debitis, on peut executer.

Lon a faict doubte, parce que par le formulaire des mandemens de debitis de Chancellerie, mis en protocole de Chancellerie, sont mis ces motz: Faictes ioir & payer des debtes, dont il uous apparoiſtra par obligations, cedules recogneues, & autres loyaux enseignemēs: si apres la cedula recogneue, par uertu d'icelle, & d'un mandement de debitis lon pourroit faire executer sus le debteur. il semble que on le peut faire, parce que quant au debteur la cedula recogneue a pareille efficace qu'un instrument passé par Notaires, & qu'il appert aussi bien du deu par telle cedula que par un instrument, lequel ne sert aussi bien que de preuue: car l'execution est faicte principalement par uertu du mandement de debitis, ainsi que le declaire assez le susdict formulaire: lequel ia soit que ne soit authentique, ne de foy, neantmoins si demonstre il l'usage ancienne en tel cas, laquelle facilement ne doit estre changee. Toutes fois la uerité est, que l'on ne peut proceder par execution par uertu de cedula recogneue: car l'execution n'est pas tant faicte par uertu du mandement de debitis, que par uertu de la condamnation, que les Notaires mettent par les obligatiōs, ainsi qu'il appert parce que les docteurs du droit

c ij disent

disent que par les statutz d'Italie un instrumēt garentigié ha execution paree au moyen de la condamnation du notaire. Et ne font mention de telz mandemens de debitis, tellemēt que aucuns scauans personnages tant en droict qu'en pratique, tiennent qu'en France mesmes un sergent en son baillia-ge sans mandement de debitis peut bien mettre a execution lettres obligatoires: Et ay ueu aucuns iuges de grād scauoir, quand estoit obijcé que le sergent n'auoit mādēmēt pour faire l'executiō, ilz ne se y arrestoient: aussi le debteur n'y a interest, car en tous cas il doit, ains est soulagé d'autant de coust et mise. Et seroye bien de ceste opinion, ueu mesmement l'ordonnance susdictē, par laquelle lon ne dispute plus de la ualidité ou inualidité des cōmandemens, quand il y a terme prefix pour payer par les obligations deuement signifiees. D'auantage est contre droict commun de commencer un proces par execution: Et parce l'ordonnance qui permet d'executer obligations, comme contraire au droict commun, ne se doit extendre a autres cas. Aussi par les ordōnances dernieres article XCII. une cedula recogneue n'ēporte que hypothēque. En oultre par les ordonnances faictes sur ladicte distinction des iurisdicțiuni royales, article XVII. il est dict que apres la recognoissance ou uerification faicte d'une cedula pardeuant les Baillifz ou seneschaux, ilz renuoyront les parties pardeuant les iuges chastellains quant a la main garnie, ou principal. ce que l'ordonnāce n'eust mis, si lon eust peu proceder par executiō par uertu de cedula recogneue: car lon ne laisseroit pas la uoye d'execution, pour prendre la uoye d'actiō simple.

¶ Le creancier faict executer l'obligation faicte pour luy par les notaires stipulans pour luy absent: & que l'offre de bailler achapteur de biēs, n'empesche

n'empeſche que le ſergent ne garniſſe la main.

Il n'y a difficulté, que le creancier ne puiſſe bien faire proceder a execution par uertu d'une obligation paſſee par notaires ſtipulans & acceptans pour icelluy creancier abſent: ne auſſi que le debteur ne peut empeſcher que la main de iuſtice ne ſoit par le ſergent garnie des meubles d'icelluy debteur, nonobſtāt qu'il offre bailler plege, & achapteur de biens, attendue meſmement l'ordonnance ſuſdiſte, & auſſi qu'il en a eſté ainſi dict par areſt des le XV. de Februrier M.D.XV. Au moyen dequoy n'a plus lieu la couſtume de la Rochelle, par laquelle ſi le debteur eſtoit oppoſant a l'execution, & qu'il baillaſt achapteur de biens reſpondant de la ſomme comme de biens de iuſtice, le ſergent ne pouuoit prendre ne ſaiſir les biens du debteur. Et parce que auons faiſt mention d'achapteur de biens de iuſtice, & auſſi que par les ordonnances dernieres en un cas deuāt dict eſt mis que la main du creancier ſera garnie de ſon deu, en baillant par luy caution, & ſe conſtituant achapteur de biens de iuſtice: conuient entendre, que quand lon ſe conſtitue achapteur de biens de iuſtice, lon ſ'oblige a rendre la ſomme par emprisonnement de ſa perſonne, ſ'il eſt dict que la ſomme ſera rendue. Et iaſoit qu'un inſtrument n'ayt execution paree, ſi le contrahent n'eſt demourant en la iuriſdiction dont les notaires qui le paſſent, ſont creex, quand la iuriſdiction n'eſt royale: toutesſois pourtant ne laiſſe a faire foy & preuue ualable en tous lieux, tant ſelon droit commun, que par la couſtume du pays de Poictou, parce qu'il eſt de iuriſdiction uolontaire, & non contentieufe. Et parautant que par les ordonnances dernieres article CLXXVIII. eſt dict que apres que les notaires auront deliurē lettre d'un contract,

c iij

ou



ou testament, ilz n'en peuuent plus deliurer d'autres, sans ce qu'il leur soit permis par le iuge, appellez ceulx qui y ont interest, & avecques cognoissance de cause: si le creditier auoit perdu sa lettre obligatoire, il ne pourroit faire proceder par execution par uertu d'une autre lettre, qui auroit esté leuee sans obseruer ladicte forme de ladicte ordonnāce. Mais il seroit bien difficile de monstrier que ladicte lettre fust la premiere, ou seconde, qui auroit esté leuee des Notaires. Et iasoit qu'aucuns disent, qu'on ne peut obliicer a l'execution d'un instrument authentique, exception, que le creditier qui faict faire l'execution, n'a obserué, ne accompli, ce qu'il estoit tenu par l'instrument, ou qu'il y a litispēdēce pour raison de mesme chose: toutesfois en ce y a doubte: car si ores le sergent peut de faict passer oultre, et sans preiudice du dire du debteur garnir la main: neantmoins si le debteur s'opposoit au commandement, & alleguoit lesdictes choses au sergent: ou sans les alleguer au sergent, qu'il les alleguast pardeuant le iuge pour ses causes d'opposition: & que le sergent passast oultre nonobstant ladicte opposition: il me sembleroit que le debteur auroit matiere d'appel. Car quant au premier, si l'exception naist de l'instrument tout ainsi que l'execution, ou actiō, lors l'instrument ne doibt estre mis a execution. Plus il n'est liquide, que le creditier ayt accompli ce qu'il estoit tenu par l'instrument: ce qui est requis auant qu'un instrument puisse estre executé: comme auons dict cy dessus. Et quant au secōd poinct, la litispēdence peut estre telle, qu'elle empescheroit l'execution. car si c'estoit le creditier mesme, qui eust appellé a droict le debteur pour le payement de la somme, il est euidēt qu'il ne pourroit faire proceder par execution pour mesme somme. Mais si le debteur intentoit proces pour estre liberé de la somme, en ce cas s'il n'apparoist promptement de la quittance

Et à ce par instrumēt authentique, ceste litispēdence ne pourroit empeschē l'exécution de l'instrument: car elle seroit presumēe auoir esté faicte calumnieusement pour empeschē ladicte exécution. L'ay ueu aucuns iuges, qui entendoient ladicte ordonnance parlant de bailler iour a l'opposant pour dire ses causes d'opposition, que le sergent quand il y auoit opposition, ne pouuoit garnir la main iusques ad ce que le iuge l'eust ordonné en l'inst'ice de l'opposition. Mais ilz errent: car le sergent peut garnir la main nonobstant l'opposition. Toutesfois il ne peut uēdre les meubles prins par exécution, iusques ad ce, qu'il soit ordonné par le iuge. Et ainsi doibt estre interpretēe ladicte ordonnance. Et ce quant aux exécutions de lettres obligatoires.

¶ Comment on doibt faire adiournemens.

Exposons apresent comment doibuent estre faictz adiournemens. Premièrement le sergent doibt faire diligence de trouuer en personne celluy quil ueult adiourner: & sil peut le trouuer, l'adiournera en sa personne: si non, par cedula attachēe contre la porte du domicile ou il demeure, il luy assignera iour heure & lieu certain, & declaira le iuge, ou autre personne publique, pardeuant laquelle il baillera adiournement a comparoir. Toutesfois lon peut adiourner a comparoir pardeuant un iuge a sa prochaine Cour: car il est notoire quand & en quel lieu lon tient la Cour. Aussi mettera le lieu ou il faict l'adiournement. Aura deux recordz & tesmoings presens, lesquelz il nommera par sa relation ou rapport ou exploit, a peine de dix liures parisis d'amēde, suyuant les ordonnāces dernières article IX. Et sil faict, l'adiournemēt par cedula: il fault quil face iniunctiō a la femme, domestiques ou uoysins de l'adiournē, de luy faire l'adiournement, ou exploit. Combien que parcydeuant les sergens n'eussent accou

stunié de mettre par lesdictes cedules l'iniunctiō susdictē, ne les noms de leurs recordz: toutesfois depuis peu de temps lon leur faict mettre ladicte iniunctiō avecques lesdictz noms: parce que lon dit que a default de ce, certain adiournement a esté declairé nul puis n'agueres par arest de la Cour. Toutesfois encores plusieurs iuges ne s'arrestent a ce, & declaireront neantmoins les adiournemens bons & ualables, pourueu que ladicte iniunctiō & noms des recordz soient mis par le rapport ou exploict baillé par le sergent au demādeur: car ce est seulement requis selon droit commun. Mais certes ladicte obseruance nouuelle est moult equitable, a fin que l'adiourné s'enquiere avecques ceulx auquelz a esté faicte l'iniunctiō, ou lesdictz tesmoings.

¶ Quand on peut bailler adiournemens ailleurs que au domicile.

Quand il est question des droitz ou appartenances d'un fief ou seigneurie noble, & y a chef d'hostel: lō n'est tenu bailler l'adiournement au domicile du seigneur, ains suffit l'adiourner audiect hostel du fief ou seigneurie, & faire iniunctiō aux receueurs du seigneur, ou autres demourans en icelluy hostel, luy faire scauoir l'exploict: & s'il n'y a hostel, & qu'il y ayt postea ou lon ayt accoustumé mettre les assignatiōs & proclamations de iustice, suffira mettre l'adiournement par escript contre ledict postea, & faire iniunctiō au receueur ou procureur ou autre officier du seigneur illec demourant. Semblablement quand il est question de droitz estans des appartenances d'un benefice, & que le seigneur doit residence au lieu du benefice: il suffit a luy bailler l'adiournement en la maison ou lieu dudict benefice, avec semblable iniunctiō que dessus, sinon quand il est question du tiltre & possession du benefice qui est litigieux: car lors il fault adiourner au domicile

tile auquel il reside. Et ainsi en fut dict par arest le ieu dy x. iour de May M.D.XXX. Comme aussi est requis s'il est notoire que le beneficié reside en autre lieu pour l'exercice de quelque office public, comme s'il est Conseillier en une Cour de Parlement pour le Roy. Il suffit aussi bailler adiournemēt au mari en parlant a sa femme en l'hostel du mari, sans laisser cedula contre la porte de l'hostel. Toutes fois il est meilleur de laisser la cedula a la femme, parce que le sergent par les ordōnāces dernieres article xxij. est tenu de laisser la copie de toutes cōmissions Et adiournemēs avec l'exploict aux adiournez. Quand le sergēt adiourne par cedula mise au domicile, il doit mettre par sō rapport, auoir faict deue diligēce de trouuer l'adiourné en sa personne. Lon auoit accoustumé parcydeuant, qu'il suffisoit que le sergent rapportast de uiue uoix au greffe les adiournemens par luy faictz : mais puis n'agueres au moyen de certains arestz sur ce donnez, lon ne recoit plus telz rapportz, ains fault que le sergent les baille par escript, signez de son sing. Et ce est confermé par lesdictes ordonnances dernieres article. XXII.

¶ Comment on doit proceder a faire adiournemens a son de trompe.

Si celluy qu'on ueult adiourner, n'a lors domicile: il fault bailler requeste au iuge pardeuāt lequel on le ueult faire conuenir: Et par icelle remonstrer ladicte absence: Et qu'il commette au premier sergent de sa cour ou autre sergent de faire inquisition de ladicte absence avecques les uoifins du lieu ou il souloit demourer auparauant qu'il s'absentast: Et icelle inquisition faicte, qu'il l'adiourne en personne, si apprehendé peut estre. sinon, a son domicile, si on le peut scauoir. sinon, par cry public Et son de trompe au lieu ou il souloit demourer,

heritiers simples, uiennent auant, & y serōt receuz: dōt nous parlerons cy apres plus amplement.

¶ De la creation des sergens.

il fault entendre que selon droit commun le iuge bailloit un sergent en chascune cause: & falloit que celluy qui auoit baillé le premier adiournement en une cause, cōtinuast a faire les exploitz & necessaires en toute la cause. Mais apresent cōbien qu'aucuns iuges puissent creer sergens en leur iurisdiction, comme les iuges des barons, seigneurs chastellains, & autres ayās iurisdiction haulte, moienne, ou basse, & aucuns iuges chastellains royaux: toutes fois par l'ordonnāce du Roy Loys XII. article CLIII. les iuges royaux estās presidiaux ne peuuent creer sergens, ains appartient seulement au Roy a creer sergens royaux es bailliages & Seneschaucees Royales,

¶ Sergens peuuent continuer les exploitz faictz par autres sergens.

D'auantage auourd'huy quand un sergent a commencē quelque exploit en une cause, un autre sergent peut faire les autres exploitz requis en celle cause, selon toutes fois la modification mise cy dessus au commencement. Voire si un exploit a esté commencē par un sergent, & qu'il faille le faire a diuers iours, ou en diuers lieux, il peut estre paracheué par autre sergēt: & aceste fin aucuns sergens uoyans ne pouuoir, ou ne uoulans parfaire l'exploit, comme criees & saisies, mettent par leur exploit, que leurdict exploit sera par eulx ou autres sergens paracheué. Neantmoins quand icelle clause n'y seroit mise, un autre sergēt le pourroit bien faire: car il ha la mesme qualite d'office public, & n'y est eleue industrie de personne. En oultre selon droit cōmun le notaire qui auoit expedie les premiers registres de l'expedition

tion d'une cause par le commandement du iuge, debuoit continuer a escrire toutes les autres expéditions d'icelle cause.

¶ Vn greffier, & vn commis de luy pour signer.

Maintenant il y a greffiers ordonnez en chascune iurisdiction, & par les ordonnances du Roy Loys XII. article cxxx. en chascun siege royal doibt estre mis un greffier pour enregistrer les expéditions des causes, & escrire tous autres actes de iustice. Lequel greffier ne peut auoir qu'un commis pour signer en son lieu. Parquoy le iuge ne peut commettre autre greffier, que celluy qui est ordinaire: et qui a esté commis par le seigneur de la iurisdiction, sinon qu'il soit recusé pour iuste cause. Et en ce cas encores le iuge en commet un autre, a la charge de respondre au recusé des emolumens de la cause, qu'e auroit le greffier, s'il n'estoit recusé. Et si le Roy adresse au iuge quelque commission, il doibt preudre son greffier ordinaire, ainsi qu'il a esté dict par plusieurs arestz tant de Paris, que de Bourdeaux. Autrement les greffiers ainsi prins sont condannez rendre au greffier ordinaire les emolumens par eulx receus, & mettre entre ses mains les registres des expéditions par eulx faictes, en leur deduisant leur frais salaires & uacations faictz pour lesdictes expéditions.

¶ Tous iugemens sont ou par contumace & absence des parties, ou en leur presence.

Parce que tous iugemens sont faictz & agitez ou bien l'une des deux parties presete, et l'autre absete, ou toutes les deux presentes: traictons premierement, comment on procede quand une des parties est absente: & puis nous parlerons de l'ordre de

de l'autre procedure. Il uault mieux doncques commencer a traicter de la procedure qu'on faiet quand le defendeur est absent: car il a de coustume soy laisser mettre en default plus souuent que le demaendeur. Or si le defendeur default, il est requis que le demandeur face enregistrer la cause, & qu'il face mettre sa comparition, & demande default au iuge: qui luy sera octroie.

¶ Des defaultz avec tout le profict, ou defaultz simples: & du premier adiournement avec intimation, ou sans intimation.

Mais pour scauoir s'il doit demander default avec tout le profict, & icelluy faire iuger, qu'on appelle en la Cour de Parlement a Paris Default simple: ou bien s'il prendra seulement default, & mandement de faire adiourner le defaillant sur ledict default & avec intimation, que y uienne, ou non, sera procedé nonobstât son absence: il est necessaire aduiser si le defendeur a esté adiourné par ledict premier adiournement avecques intimation, ce qu'on a de coustume mettre par le mandement ou commission de l'adiournement: ou si ledict adiournement n'a esté faiet & baillé avecques ladicte intimation. Et s'il a esté faiet sans intimation, il fault prendre default, & mandement d'adiourner sur default, & avec intimation. Et si ledict adiournement a esté faiet avecques intimation, fault prendre default avec tout le profict, qu'on appelle en aucuns lieux Default simple. Au moyen de quoy est requis que declairons les causes esquelles par le mandement du premier adiournement lon a accoustumé mettre que le defendeur sera adiourné avec intimation: ou bien quand il n'est mestier de mandement, le sergent de son office peut bailler adiournement avec intimation.

En

¶ En quelles matieres on faiſt faire le premier adiournement avec intimation.

Premierement d'icelles cauſes eſt, ſi lon faiſt bailler adiournement pour uoir taxer deſpens, ou en autre chef d'execution de ſentence, ou quand on baille adiournement pour uenir proceder ſur une complaincte en cas de nouuellete pour le regard du ſequeſtre, & fourniffement d'icelle complaincte. Plus ſi lon adiourne le debteur pour uenir garnir la main de la ſomme contenue par lettres obligatoires eſtans en forme authentique.

¶ Les inſtrumens pafſez ſoubz Cours d'eglife, n'ont garniſon, execution, ne hypotheque.

Car il conuient noter, que iaſoit qu'un inſtrument paſſé par un notaire de Cour d'eglife, face foy, quand il eſt paſſé en preſence de deux teſmoins es lieux ou il n'eſt requis deux notaires : toutesfois lon ne peut par uertu d'icelluy auoir garniſon de main: car telz inſtrumens n'emportēt hypotheque, ne execution, ne conſequemment garniſon, qui eſt maniere d'execution. Et eſt aſcauoir que ce qu'ilz n'emportent hypotheque n'executiō, eſt que lō ne peut par uertu d'iceulx conclure hypothecairement, ne auſſi proceder par execution. Et la raiſon eſt, parce que les notaires eccleſiaſtiques n'ont iuriſdiction quant a realité es biens temporelz, non plus que leurs iuges d'eglife qui les creent: & hypotheque & executiō concernent realité.

D'auantage lon faiſt bailler le premier adiournement avec intimation aux commiſſaires, qui par uertu d'une ſentence ont eſté commis a regir & gouverner immeubles ſoubz la main du Roy: car par uertu du premier default telz cōmiſſaires ſont declairez contumax, & condannez a rendre cōpte. mais ſera mandé par icelle cōdamnation les adiourner
ſur

sur default & avec intimation pour rendre compte avecques le reliqua: & s'ilz se defaillent, seront cōtrainctz a ce faire, & rendre leur compte par prinse de corps. & a ce est la coustume du pays de Poictou formelle en l'article CCCLXIII. & de ceste matiere nous parlerōs plus amplemēt cy apres.

¶ Des asseurtez.

semblablement lon baille le premier adiournemēt avec intimation en matiere de asseurté, scauoir est quand lon faiēt adiourner pour donner asseurté. Car si au iour assigné l'adiourné se default, le iuge donne default avec le profiēt: & en ce faisant apres que le demādeur a iuré la doubte, asseurté luy est dōnee par le iuge, & est mis le demandeur en saufcon duiēt de la Cour, et ordōne le iuge que ce sera notifié au defail lant. Et peut lon demander & bailler asseurté par procureur ayāt pour ce faire mandement special. Et a ce est formelle la coustume dudiēt pays de Poictou article ccclvi. & ccclviij.

Aussi lon donne le premier adiournement avec intimation, quand lon adiourne le debteur a la requeste du creancier apres les criees parfaites des biens immeubles du debteur, pour uoir interposer le decret au profiēt du dernier encherisseur sur iceulx biens criez. Pareillement quand lon adiourne l'accusé a comparoir en personne par uertu du decret de l'adiournement personnel, suyuant le contenu en icelluy decret, lon adiourne quant & quant avec intimation pour uenir respondre a la prouision des alimens & medicamens, si le demandeur est blessé. Et s'il est question d'homicide, lon faiēt adiourner avec intimation, pour uenir respondre a la prouision pour faire prier Dieu pour l'ame du defunct occis. Semblablement quand la femme plaide contre son mari pour la repetition de son dot & mariage, il est adiourné a la requeste d'elle avec intimatiō, pour respondre a la prouision d'alimēs,

&

Et deliurance de deniers pour la poursuyte du proces que entend la femme contre luy requerir.

Reigle generale pour bailler adiournement avec intimation.

Et telle maniere d'adiournemēt avec intimatiō, a lieu quād lon intente action en matiere prouisionale contre ceulx qui pendant le proces doibuent faire prouision d'alimens & medicamens, ou d'alimens seulement, a la partie demanderesse: ou bien quand ce pourquoy on appelle une partie, empesche ou retarde grandement la poursuyte d'une cause ia meue & intentee: cōme si par uertu d'un compulsoire donné en quelque matiere, lon faict commandement a un notaire de bailler en forme quelque contract par luy receu, & il est refusant, lon luy faict bailler adiournement avec intimation, pour dire ses causes d'opposition, refus, ou delay, & en oultre proceder comme de raison. Semblablement quand on a faict constituer quelcun prisonnier, ou faict saisir ses biēs, & il est opposant, il faict adiourner avec intimation les parties a la requeste desquelles l'exploict a esté contre luy faict, pour uenir proceder sur sadiete opposition, & avec intimation quād a la deliurance de sa personne, ou des choses saisies. Ou quād quelcun s'est opposé ad ce qu'on ne prinist ou uendist par execution aucuns biens, & a la requeste de celluy qui faict faire l'execution, l'opposant est adiourné avec intimation pour dire ses causes d'opposition: & s'il n'a comparu, apres default contre luy donné avec tout le profict, en adiugeant icelluy est declairé contumax & forclos & debouté de sadiete opposition, & ordonné que l'execution sera paracheuee. En oultre par les ordonnances dernieres article XCII. le debteur peut estre adiourné avec intimation pour recognoistre l'escripture & sing, ou le sing seulement de sa cedula: & par uertu du
d premier

premier default est declairé contumax, & la cedula tenue pour recogneue: & emportera hypotheque du iour de la sentence, cōme si elle auoit esté confessee. Pareillement quād celluy qui se uult porter heritier avecques benefice d'inuentaïre, a faiēt scauoir par cry public, comment il se ueult porter ainsi heritier, & que si aucū se uulēt porter heritiers simples, comparoissent a certain iour heure & lieu pardeuant iuge cōpetent, qui sera nommé, & avec intimation, que y uienēt on non, sera procedé a declairer celluy qui faiēt faire les proclamations, heritier avecques lediēt benefice, suyuant les lettres royaux par luy a ceste fin obtenues.

¶ Comment on se doit porter heritier avec benefice d'inuentaïre.

Car celluy qui en ceste qualité se ueult fonder heritier dedēs l'an & iour apres le deces de celluy duquel il ueult estre heritier, doit obtenir lettres royaux adreßans au iuge royal du lieu auquel le defunēt sera decedé: par lesquelles sera permis & octroïé a l'impetrant, que par benefice d'inuentaïre deuement faiēt par lediēt iuge, il se puisse porter pour heritier du defunēt, prendre & apprehender par icelluy inuentaïre tous les biens & successions tant en meubles que immeubles demeurez du deces du defunēt, sans que pour les debtes obseques & funerailles du defunēt, icelluy exposant puisse estre contrainēt payer aucune chose oultre la ualeur du contenu en icelluy inuentaïre: pourueu qu'il ne se soit immiscé a prendre aucune chose de ladiēte succession comme heritier simple, & qu'il sera tenu bailler caution suffisante d'accomplir le contenu du testament du defunēt iusques a ladiēte ualeur desdiēt biēs: & que s'il apparoißt aucun du lignage du defunēt, qui se ueuille porter heritier simple, il y sera receu. Sera oultre mandé au iuge, que soubz icelluy inuentaïre ladiēte
caution

caution preallablement receue, il face iouyr & uſer l'impetrant pleinement & payſiblement deſdictz biens & ſucceſſion. Et que contre la teneur des lettres grace & octroy il ne moleſte ne empesche, ne face ou ſouffre l'impetrant eſtre moleſté, empesché, ou aucunement endommagé. Toutesfois ſi lon n'eſt dedens l'an & iour a compter dudiect deces, le Prince en releue par meſmes lettres: mais fault exprimer le temps qui eſt paſſé depuis l'an & iour, & quelque iuſte cauſe de reſtitution ou releuement. Et combien que lon ayt accouſtumé uſer ſeulement en ce cas d'adiournement general, & a ſon de trompe & a cry public en la maniere cy deſſus declairee: neantmoins le plus ſeur eſt, que ſ'il y a aucuns lignagiers que lon cognoiſſe, & qui ſoient demeurans pres, ſcauoir eſt au dedens le meſme Bailliage ou ſeneſchaucee que l'impetrant, qu'ilz ſoient adiournez particulièrement.

¶ La maniere de proceder au iugement du default venant de l'adiournement donné avec intimation.

En ces adiournemens baillez avecques intimation, ſi l'adiourné ſe default, lon baille au demandeur preſent au iour & lieu aſſigné, default alencontre du defaillant avec le proſiect que de raiſon. mais parce qu'il eſt grief, & que lon en adiuſte le proſiect, lon a accouſtumé communement bailler lediect default ſauf trois iours, ou autre temps, ſelon la diſtance du lieu ou a eſté baillé l'adiournement, qualité des perſonnes, & matiere, & la ſaiſon de l'annee. Et apres le temps dudiect ſauf eſcheu, le demandeur produit ce que bon luy ſemble, & ſa demande du proſiect dudiect default pardeuers le greffier, qui porte le tout pardeuers le iuge: lequel ueue la production du demandeur preſent, baille ſa ſentence,

d'ij par

par uertu de laquelle il declaire le defaillant contumax, & n'estre plus partie qui face a receuoir a empescher les fins & conclusions du demandeur: & les luy adiuge: & condamne le defaillant es despens du default, & de ce qui s'en est ensuyui, telx que de raison: & en aucuns lieux en amende enuers la Cour, ou il y a amende pour chascun default. Ne doit le iuge bailler sa sentence le iour mesme auquel eschoit l'adiournement, quand n'a esté par l'adiournement assignee heure certaine d'icelluy iour, ains doit attendre pour le moins au lendemain. Et si l'heure certaine a esté determinee audiect adiournement, iasoit qu'aucuns tiennent que apres l'heure passe le iuge peut bailler sa sentence: toutesfois il a esté iugé au contraire par la Cour de Parlement a Paris, & qu'il fault aussi en ce cas laisser passer tout le iour auant que donner sentence. Et en aucunes Cours de ce pays de Poictou on ne deliure pas le default le iour mesme auquel eschoit le iour de l'adiournement, quand il n'est baillé au iour de Cour: mais on attend a faire encores appeller le defaillant au iour de la prochaine Cour. Ce qui est bien raisonnable. car par l'ordonnance du Roy Loys XII. article CXXXIII. les iuges Royaux auant que se leuer de leurs sieges, doibuent faire publier tous les defaultx ce iour par eulx donnez: & les defaultx des presens serot rabatus en procedant en cause. Et lesdicts iuges leuez, ilx ne seront plus rabatus sans cause legitime, ne sans appeller la partie qui l'a obtenu. Et si le defaillant uient dedens le temps du sauf, & demande le default contre luy donné estre rabatu, ou estre reuocé du default, il le sera, mais payera neantmoies despens ordinaires, scauoir est de deux solx six d. tournois en aucunes iurisdiction, en autres de cinq solx, & en autres de sept solx six deniers tournois pour la reuocatiō ou rabat dudiect default. Et ce a lieu quand
ores

ores la cauſe eſt conteſtee. Et combien que ce ſemble eſtre rigoureux, attendu que le temps du ſauf eſt introduict en la faueur du deſaillant: toutesſois il eſt bien equitable, parce que quand lon eſt receu a purger la demeure en actes iudiciaires, lon doit refundre l'intereſt de la partie pour le retardement du proces, au lieu duquel intereſt lon baille leſdictz deſpens ordinaires. Et ſi le deſaillant ne payoit deſpens pour eſtre reuoké du default, il auroit double profit de ſa contumace: car il auroit retardé la poursuyte du proces, & ſeroit receu a proceder nonobſtant ſon default ſans en payer aucunne peine. Et apres le ſauf paſſé, le deſaillant eſt encores receu a rabatre le default, iuſques a ce qu'il ſoit iugé: mais c'eſt en payant les deſpens du default, & de ce qui ſ'en eſt enſuyui, ſcavoir eſt les fraiz que le demandeur a ia faitz pour drefſer ſa production pour faire iuger ledict default. il y a diuerſité d'uſance de bailler mandemens d'adiournement avec intimation: car aucuns iuges apres que le demandeur leur a expoſé ſa demande ou requiſitoire, baillent mandement d'adiourner pour uenir reſpondre a la demande, & avec intimation que de raiſon, ſimplement & generallyment. & preſque tous iuges royaux inferieurs ont accouſtumé octroier ainſi telz mandemens. Mais la Cour & meſſeigneurs des requettes du Palais a Paris ont accouſtumé d'exprimer & mettre ce qu'ilz feront ſi l'adiourné ne comparoiſt, & mettent ceſte clause, Et avec intimation que le deſendeur compare ou non, ſera procedé nonobſtant ſon abſence a la reception des teſmoings comme de raiſon, ou a faire autre choſe que le demandeur requiert eſtre faicte, laquelle ilz declairent nommeement. Et ceſte uſance derniere eſt plus ſeure & plus approuuee que la premiere. Eſt a noter que le iuge ne doit bailler mandement d'adiourner avec intimation, & moins le ſergent

bailler tel adiournement, de son simple office sans mandemēt ou commission, si la matiere n'est de la qualité de celles dessus mentionnees.

¶ Quand on doit appeller d'un default donné avec tout le profit.

Autremēt si le iuge baille default, & adiuge le profit d'icelluy, l'adiourné peut appeller dudict default, & de tout ce qui s'en est ensuyui: ou bien appeller seulemēt de la sentence cōtenant l'adiudication du profit dudict default. Mais ne fault appeller dudict default iusques a ce que le profit en soit adiugé: car il n'est faict grief a l'adiourné auparauāt ladiete adiudicatiō. Et ia soit que Balde en certain lieu des Feudes ait tenu que lon peut appeller de telz mandemēs d'adiournemens avec intimatiō, si la matiere n'y est subiecte: toutesfois en ce royaume ce n'est receu. car par les ordonnances du Roy Charles VII. articles XIII. & XIII. est dict que si lon appelle de l'exécution du mādemēt d'un adiournement simple, l'executeur passera oultre nōobstāt ledict appel a bailler ledict adiournement: & le iuge pardeuant lequel sera baillé icelluy adiournement, procedera en la cause principale non-obstant ledict appel: & ce en matieres ciuiles. Aussi l'adiourné n'est greué par ledict mandemēt ou adiournement iusques a ce que lon ayt baillé default, & d'icelluy adiugé le profit: comme auons ia dict.

¶ Des matieres esquelles il fault obtenir deux defaultz pour auoir sentence par contumace.

Après qu'auons ueu des matieres esquelles par uertu d'un seul default le demādeur obtiēt gaing de cause par cōtumace, disons apresent des matieres esquelles est requis obtenir deux defaultz pour auoir gaing de cause par cōtumace. Et cōuiēt cy entendre qu'au parauāt les ordōnances dernieres publiees

au mois d'Aoust l'an M. D. xxxix. il falloit regarder si la matiere estoit priuilegiee, ou nō: car es matieres priuilegiees estoient seulement requis deux defaultz: l'un d'adiournement simple, & l'autre d'adiournement avec intimation, contenant la demande du demandeur.

¶ Quelles causes estoient priuilegiees auant les ordonnances dernieres.

Et estoient matieres priuilegiees, causes de cōplaincte, de adueu, de recognoissance de cedula, de requestes personnelles & hypotheques conioinctement, ou diuisement: qui estoient la uraye actiō personnelle & hypothecaire, par laquelle lon cōclud au payement de quelque debte, ou a deguerpiment des choses obligees audict payement. D'auantage est cause priuilegiee dation de tuteur, ou curateur. Et est besoing entēdre, que s'il fault bailler tuteur a un pupille estat au dessus d'age de douze ans, si c'est femelle: et si c'est masle, au dessus de quatorze ans: on doit faire adiourner les parēs, amis, & uoysins des defunctz pere & mere desdictz enfans, pour leur uenir elire & nommer tuteur. Et s'ilz sont au dessus ledict aage, fault faire adiourner lesdictz enfans o l'auctorité de leur curateur a donner, & lesdictz parēs, amis, & uoysins: scauoir est lesdictz enfans, pour uenir demander tel curateur que bon leur semblera: & lesdictz parens, amis, & uoysins, pour uenir elire & nommer ledict curateur. Et conuient y obtenir deux defaultz contre les defaillans. Et si le mineur, maieur toutesfois de xij. ou xiiij. ans, se laisse deffaillir, il est condanné es despens des defaultz. Mais quand il y a proces ia encommencé avecques un mineur maieur de douze ou quatorze ans, lon ha de coustume de le pouruoir de curateur en la cause, de la personne de son procureur en icelle cause.

d iij semblablement

semblablement estoient priuilegiees les causes d'appel, causes pour le reliqua d'un compte, d'une cōmission procedant d'exécution de sentence. Aussi quādle creancier auoit faict arrester quelque somme de deniers deue a son debteur, & faisoit adiourner celluy entre les mains duquel la somme auoit esté arrestee ou saisie, pour uenir declairer la quantité de ladiète somme, & icelle deliurer au creancier. Autres causes estoient priuilegiees en aucunes Cours, & es autres Cours non. Et quant aux autres matieres simples & ordinaires, conuenoit y obtenir quatre defaultz auāt qu'auoir gaing de cause par contumace auant la cause contestee: au segond desquelz defaultz le demandeur inseroit sa demande, & la iuroit: & l'adiournement sur le tiers default estoit baillé auec intimatiō: & le quart default estoit baillé auec tout le profict. Mais par lesdictes ordonnances dernieres article XXIIII. est dict qu'en toutes matieres ciuiles & criminelles esquelles lō auoit accoustumé user de quatre defaultz, suffira d'y en auoir deux bien & deuement obtenuz par adiournement faict a personne ou au domicile: sauf que les iuges ex officio pourront ordonner un troysiesme default, si lesdictz adiournemens n'ōt esté faictz a personne, & ilz uoyēt que la matiere y fust disposce. Au moyen dequoy i'ay proposē de ne declairer icy les matieres d'adueu et requestes personelles et hypotheques, lesquelles i'auoye traictē en cest endroiēt en ces presentes cōposees en latin, & imprimees ia deux fois auant lesdictes ordonnances dernieres: ains les reserue a traicter cy apres ou ie traicteray de la maniere de former complainctes & reintegrantes: parce aussi qu'en cel lieu il n'est si seant qu'il sera en l'autre. mais es Institutiōs latines il m'auoit cōuenū traicter en ce passage lesdictes matieres, pour l'intelligēce d'icelluy.

¶ Comment

Comment on donne ſentence par contumace
apres deux defaultz.

Doncques apresent apres les deux defaultz bien & deu-
mēt uenuz & entretenuz, produira le demandeur ſes deux
defaultz & exploictz des adiournemens dont ilz procedēt,
enſemble ſa demande, & les tiltres qu'il aura pour monſtrer
du contenu en icelle, ſi aucuns il a. Le tout ueu, le iuge par uer-
tu deſdictz defaultz qu'il dira auoir trouuē eſtre bien ue-
nuz & entretenuz, declarera le deſaillant contumax, &
n'eſtre plus partie qui face a receuoir a empescher les fins &
concluſions du demandeur: & deboutera & forclorra le de-
ſaillant de toutes exceptiōs & deſenſes qu'il pourroit auoir:
& par meſme moyen ſuyuant leſdictes ordonnances dernie-
res article XXVI. ſ'il uoit que le demādeur n'a informē ſuf-
fiſamment par les tiltres produictz du contenu en ſa deman-
de, il ordonnera que le demandeur uerifiera plus amplement
ſa demāde par teſmoings & tiltres: & apres l'enqueſte fai-
te ſera le deſaillant adiournē pour uoir produire lettres &
tiltres, bailler contredictz ſi bon luy ſemble, & prendre ap-
pointement en droit, ſans ce qu'il ſoit beſoing l'adiourner
pour bailler ſon ny, comme parcydeuāt lon faiſoit en la Cour
de Parlement, & aux requestes du Palais a Paris. Mais ſi le
iuge uoit que le contenu de la demande ſoit amplement ueri-
fiē par les tiltres produictz, il ordonnera ſeulement que le de-
ſaillant ſera adiournē pour uoir produire lettres & tiltres,
& y bailler contredictz ſi bon luy ſemble, & prendre ap-
pointement en droit. Et par leſdictes ordonnances article
XXVII. eſt dict, que auparauant que donner aucunes ſenten-
ces contre les deſaillans contumax, & non comparens, le de-
mādeur ſera tenu faire apparoir du contenu en ſa demande.

CS'il

¶ S'il fault condamner le contumax es despens des defaultz auant que donner sentence diffinitive.

Dõt ce pouuons inferer, que le iuge ne doit condāner le defaillant es despens des defaultz par l'interlocutoire, par laquelle il ordōne que le demandeur ucrifiera sa demande, ains doit attēdre a la diffinitive. Et ainsi en a esté dict par arrest de la Cour de Parlement a Paris, uoire auant les ordonnances dernieres. Toutesfois aucuns iuges ne laissent pourtant encores de present a cōdamner es despens des defaultz par ladicte interlocutoire. Et mesme la Cour de Parlement, & mes seigneurs des requestes depuis ladicte ordōnāce cōdānēt encores es despēs desdictz defaultz, comme i'ay ueu par plusieurs arrestz, & sentēces. Et se fondēt en ce que selon droict commun, en quelque maniere que puisse estre, soit que le contumax soit condanné, ou soit absou, il doit estre condanné es despens des defaultz & contumace, pour n'auoir obey a droict quand il y a esté appellé. Mais ne seroys d'opinion, eu regard a ladicte ordonnance derniere, que si le demandeur n'informoit de rien, que le contumax ne deuroit estre condanné es despens des defaultz, puis que ladicte ordonnance dit que lon ne doit donner aucune sentence si le demandeur n'informe. Aussi qu'en ce cas il appert qu'a tort le demādeur a faiēt conuenir le contumax. Et pource lesdictz arrestz & sentences portans condamnation desdictz despens sont soustenables, d'autant que lors il n'appert pas encores, que le demandeur ne informera de sa demande: ains on presume, qu'il en informera, parautāt que par mesme moyen on luy en adiuge preuue. D'auantage il fault que le contumax soit puny de sa contumace, pour n'auoir comparu.

¶ Le iuge n'eſt contrainct adiuger le profit des defaultz ſur le champ.

Et iſoit que par ladicte ordonnance le iuge ne doibue bail-
ler aucune ſentence auant que le demandeur informe de ſa
demande : pourtant ne fault inferer que le iuge ſoit tenu
d'ordonner ſur le champ apres le dernier default par luy don-
né, que le demandeur informera : car il fault qu'il uoye les
relations des adiournemēs, pour ſcauoir ſi les defaultz ſont
bien uenuz : ce qu'il n'eſt contrainct faire ſur le champ : auſſi
qu'il ne le pourroit commodeemēt faire, parce que ce pēdant
lon ne feroit rien en la Cour. Auſſi aiment mieux les iuges
ne le uider & ordonner ſur le champ, a fin d'en auoir eſpi-
ces : car ilz n'en pourroient prendre ſ'ilz le uuidoient ſur
le champ.

¶ Comment doibuent eſtre les adiournemens garentiz.

Eſt neceſſaire ſcauoir pour l'intelligence de la couſtume
de ce pays de Poictou ſur ceſt endroiēt, que par icelle, article
CCCXXXI. eſt dict, qu'il conuient que chaſcun des adiour-
nemens ſur default en matieres ſimples, contiēne quinzai-
ne, & ſoit garenti par ſerment de deux teſmoings . ce que
aujourd'huy n'eſt meſtier, que leſdictz adiournemens ſoient
garentiz par ſerment de deux teſmoings : ſcauoir eſt, qu'ilz
ſoient oys pardeuant un notaire, & que le notaire baille acte
de l'atteſtation des teſmoings, comme lon faiſoit parcydeuāt :
car ce ſtile a eſté aboly par areſt de la Cour.

¶ Adiournemens ſur default, en quelles matie-
res doibuent contenir quinzaine.

Mais quant au terme de quinzaine, ie ſeroye d'aduis qu'es
matieres qui ſont priuilegiees, & doibuent eſtre ſommaire-
mēt traictees, & y a peril en la demeure, que lō ne ſeroit tenu
de

de bailler terme de quinzaine par Padiournemēt sur default, & avec intimation: ains qu'il suffiroit bailler terme competent selon la distance des lieux, facilité de chemins, & saison du temps. Et quant aux matieres simples, ie penseroye qu'il conuiint encores bailler ledict terme de quinzaine.

¶ Difference entre les matieres priuilegiees,
& simples.

Il y auoit aussi une autre difference par ladicte coustume, article CCLXIII. entre les matieres priuilegiees, & simples: car le cōtūmax n'estoit receuable en matiere priuilegiee a opposition alencontre de la sentence donnee par contumace: & en matiere simple il estoit bien receuable.

¶ Si le contumax est receuable a se opposer a l'exécution de la sentence contre luy dōnee, ou non.

Mais a present il y a doubte si en matiere simple mesme le contumax seroit receuable a opposition: car par lesdictes ordonnances dernieres article XXXI. lon ne peut mettre au neant une sentēce donnee par forclusion, mais seront uuidees les appellations, an bene uel male, par appellation uerbal, ou proces par escript, selon que la matiere y sera trouuee disposee. Par semblable raison semble que le contumax ne doibue estre receu a ladicte opposition, attendu que par icelle en effect la sentence est mise au neant taisiblement, combien que lon ne le die expressement. Mais il y a (selon mon iugement) diuersité de raison entre sentences donnees par forclusion, & donnees par contumace: car celles qui sont donnees par forclusion, monstrent plus grand contemnement & desobeissance a iustice, que celles qui sont donnees par contumace proceedens de default auant la cause contestee: car il ne fault que deux defaultz, mais il fault bien souuent cinq ou six forclusions, comme de faire preuue par tesmoings, de bailler obiect, de

e produire, & de bailler contredict.

II Si l'adiournement eſt valable quand il eſt baillé au procureur de la partie qui a comparu vne fois.

Disputation a eſté meue, ſcauoir ſi le defendeur ou le demandeur a une fois comparu par procureur, & apres il ſe default, ſi on le pourra faire adiourner en perſonne de ſon procureur auant la cauſe conteſtee. Aucuns diſoient qu'on le pouuoit faire: & ſe fendoient en ce qu'à la Cour de Parlemēt lon en uſe ainſi, & qu'il y a deciſion a ce formelle, que quād le maiſtre ou partie a eſté une fois adiournee, & elle a comparu par procureur, il ſuffit adiourner le procureur a ce qui ſera deſlors en auant a faire. Les autres tenoient qu'il falloir encores adiourner la partie iuſques a ce qu'il y euſt eu cōteſtation en cauſe: & ie ſuis de ceſt aduiſ: car le procureur n'eſt ſeigneur de la cauſe, que par la conteſtation d'icelle: par maniere que par la couſtume de ce pays de Poictou, article ccc-xxvij. ſi la cauſe a eſté conteſtee avecques le procureur, & la partie apres ſe defaille, elle eſt forcloſe de faire ce qu'elle deuoit faire a l'aſſignation en laquelle elle ſe default, & luy ſera baillee aſſignation en perſonne de ſon procureur pour proceder ad ulteriora iuſques a l'appoinctement en droit: comme nous declairerons plus amplement cy apres. Mais ſi la cauſe a eſté conteſtee avecques la partie ſans procureur, & apres ne compare, il la fault contumacer par default. Toutes fois en certaine appellation interiectee du gouuerneur de la Rochelle, ou ſon lieutenant, i'aſoit qu'il y ayt auſſi expreſſe couſtume a la Rochelle, que ſi la partie eſtoit defaillant, il la falloir contumacer par default: il fut dict par la Cour, que lon procederoit par forcluſions apres la cauſe cōteſtee. Au moyen dequoy ie ſeroye d'aduiſ que nonobſtāt ladiète

ladiète coustume de Poictou, quand ores la cause auroit esté contestee auecques la partie, que lon procedast a la contumacer par forclusions. Mais apresent il est facile d'obuier a ces difficultez, parce que les parties sont tenues d'elire domicile des la premiere assignation qu'elles cōparent: comme nous traicterons plus diffusément cy apres. Neantmoins i'ay bien uoulu traicter ladiète altercation & disputation, parce qu'il peut aduenir que les parties n'aurent eleu domicile auant la contestation en cause.

¶ Le iuge peut bailler adiournement a la partie en personne de son procureur.

Mais il est notoire que le iuge en expediant la cause, peut bailler assignation au defendeur en personne de son procureur a certain lieu, iour, & heure, uoïre hors & loing du lieu ou est le proces pendant, pour uoir faire la monstree des lieux contentieux. Aussi peut bailler aux parties en personnes de leurs procureurs assignation pour uoir faire collocations, uidimus, ou copies ou extraictz de pieces. & de ce cas dernier en fut dict par arest le. x. de May M. D. XXI. & y a coustume formelle a la Rochelle quant a ces deux cas: & aussi que le procureur peut estre adiourné pour uoir produire tesmoins. Toutesfois ie ne la trouueroye bonne, ne que lon en deust user en autre pays en ce cas: parce qu'il y a ordonnance formelle, qui ueult expressement que la partie soit adiournee, pour uoir produire tesmoins, & qu'il ne suffit d'adiourner son procureur. Neantmoins nous usons en ce pays de Poictou, que si l'une partie produit en presence du procureur de l'autre en iugement a l'audience & expedition de la cause, ses tesmoins, qu'il suffit, sans que la partie y soit adiournee. Et ce cas ainsi que les autres susdictz sont permis pour raison de l'auctorité iudiciaire: aussi que le iuge scaura

ſcaura bien arbitrer le temps & delay qu'il faudra bailler pour ladiſte aſſignation. Pour ceſte cauſe un ſergent ne pourroit bailler en ces cas aſſignation au procureur de la partie, ſcavoir eſt pour voir faire monſtree, & collations, uidimus, copies ou extraictz, hors le lieu auquel eſt le proces pendãt: car il ne pourroit ſi bien conſiderer le temps & delay, que le iuge. Mais le ſergent peut bien bailler aſſignation au procureur a comparoir au lieu ou eſt le proces pendant, pour voir faire collations, copies ou extraictz: car lon faiſt cela communement apres la conteſtation en cauſe, & n'eſt non plus grief au procureur, que de comparoir a autre aſſignation de la cauſe. Toutes fois le ſergent ne peut bailler au procureur aſſignation pour voir faire monſtree, parce que plus ſouuent les lieux contentieux ne ſont aſſis au lieu auquel eſt le proces pendant. Neantmoins en la Cour de Parlement, quand un procureur a une fois cõparu, lon peut faire bailler a la partie en perſonne de ſondict procureur par la Cour ou cõmiſſaires cõmis par icelle ou par les huiſſiers adiournemens neceſſaires en la cauſe, pourueu que ce a quoy ilz ſeront adiournez, ſe doibue faire en Paris: car ſ'il ſe debuoit faire hors ladiſte uille, il faudroit que les cõmiſſaires de la Cour & cõſeilliers d'icelle baillaſſent ladiſte aſſignation a la partie en perſonne de ſondict procureur.

¶ Comment les loix ciuiles & Imperiales parlans des procureurs, doibuent eſtre entendues.

Il conuient entendre que les loix Imperiales parlans des procureurs, ne doibuent eſtre entendues des procureurs qui aujourd'huy ſont propre uacation de comparoir en iugement pour les parties: car iceulx ſont reputez pour aduocatx: parce meſmement, que iaſoit que quelcun ne puiſſe eſtre contrainct

contrainct a prendre charge de procuration d'autrui, toutesfois les procureurs practicans auioird'huy es Cours & sieges peuuent estre contrainctz a prendre la procuration d'une partie: ainsi comme un aduocat est compellé conseiller & plaider pour une partie: car a prédre largement, ilz sont aduocatx: uoires auioird'huy leur auctorité est si accreue en ce royaume, qu'il fault qu'un aduocat, tant scauant soit il, capte leur beneuolence s'il ueult gagner en son estat, parce qu'ilz baillent les causes aux aduocatx mesmement en aucuns lieux de ce royaume, & se ingerent a faire escriptures, intenditx, & cōtestations en causes, & les recoiuet a ce aucuns iuges, doubtons qu'ilz ne feussent assez diligens a leur auancer leurs espices des sentences, ou leur faire bailler les sacx des parties, s'ilz ne les receuoient a ce: combien que les ordonnances Royaux le prohibēt. Neantmoins les aduocatx ne perdēt auioird'huy leur noblesse pour exercer l'office d'aduocat, ou un procureur la perd: non pas que ie pense que leur office soit uil, ainsi qu'aucuns ont uolu dire en interpretāt les loix: car (cōme i'ay dict) les droictx disposās des procureurs, ne s'ētēdent des procureurs auioird'huy practicās es Cours, ains doibt on les entēdre des receueurs, ou autres ayās l'administratiō des biēs d'autrui: lesquels receueurs, ou administrateurs, fors ceulx qui sōt creēx par le Roy ou par la iustice, cōme tuteurs ou curateurs, sont office uil, car en ce sont comme seruiteurs: ainsi qu'il est aisé d'entēdre par une decisiō de Barthol, par laquelle il dit que l'adiournement baillé du cōmencement au procureur, uault pour contumacer le seigneur ou maistre, en tant que touche le premier decret, qui selon droict commun estoit baillé contre les defaillans: dont lon ne use point de present: car l'adiournement ne pourroit du cōmencemēt estre baillé a un procurcur iudiciaire, partant que lon

ne

ne pourroit scauoir comment il est procureur de la partie, s'il n'auoit auparauant comparu pour elle. Dont sensuit que cela doit estre entendu du receueur, ou ayant l'administration des biens ou d'une maison de la partie. Anciennement (comme dict mōsieur Budé en ses annotations sur le digeste neuf) lon appelloit les procureurs, cognoissans le droict de sa partie: & aduocatx anciennemēt estoient tous ceulx qui estoient presens avecques la partie en iugement, fut ce seulement pour luy faire compagnie, iasoit qu'ilz ne fussent scauans pour playder.

¶ Le default duquel on a payé despens a partie, s'il peut seruir avecques vn autre default pour obtenir sentence de contumace, ou non.

Est requis en ce lieu entendre que parcydeuant lon auoit accoustumé user, que iasoit que le defaillant eust payé les despens d'un default, qui sont ordinaiemēt le registre & le salaire du sergēt qui a baillé l'adiournemēt sur default: toutesfois ledict default seruoit avecques autres pour obtenir sentence par contumace: & pour ceste cause lon auoit accoustumé mettre par le registre par lequel lon cōdamnoit es despens enuers la partie, & en amende du default enuers la Cour, qui est de sept solx six deniers, ou de cinq solx en aucunes Cours, ceste clause: la force du default tenant quant a iuger par uertu d'icelluy. & ce est conforme au droict commun. mais puis n'agueres lon dit auoir esté donné arest, par lequel une sentence de contumace n'a pas esté trouuee bonne, au moyen de ce qu'il y auoit un des defaultx par uertu desquelz elle auoit esté donnee, pour lequel la partie auoit esté cōdamnee es despens & en l'amende, & les auoit payé. A ceste cause pour obuier a doubte, uault beaucoup mieux qu'il soit reserué a faire droict des despens du default en diffinitive, &

c attendre

attendre a les faire taxer avec les autres despens du principal: car celluy qui a obtenu ledict default, ne peut rien perdre, s'il est reserué a faire droict des despens en diffinitive: car si ores il perd sa cause, neantmoins luy fault adiuger les despens dudit default.

¶ Quand l'une ne l'autre partie compare au iour du premier adiournement qui n'eschoit a iour de Cour: si le default que l'une des parties prend a la prochaine Cour ensuyuât, est bon & valable.

Faiet a entendre si l'une ne l'autre des parties ne compare au iour assigné, n'est baillé default, ains l'adiournement est comme non aduenue, tellement que par le moyen d'icelluy n'y a aucune litispence. Mais quand l'une des parties compare au prochain iour de droict ensuyuant, & qu'elle prend default alencontre de l'autre non comparât: lon faiet difficulté, si le default est valable, parce qu'il n'est donné le iour auquel l'adiournemēt pendoit & escheoit. Aucuns tiennent qu'il est valable, & disent que si l'adiournement est donné au iour que la Cour n'a accoustumé estre tenue, qu'il se continue au premier iour de droict, & que tient la Cour. & ainsi en use lon en la Cour ordinaire de Poictiers: & me semble bien bon. Les autres tiennent le contraire, parce que si l'adiournemēt est baillé a certain iour pour uoir faire quelque acte, & il ne se faiet a ce iour, l'acte est nul. Et pour ceste cause ie seroye d'aduis pour obuier a toute doubte, que lon ne se arrestast a ce default ainsi obtenu a iour ou il ne pendoit rien: car combien que selon droict commun l'adiournement baillé a iour incertain, tienne, parce qu'il se entend que lon compare le plustost qu'il sera possible apres l'adiournement,

nement, & que l'adiournement meſme donné a certain iour, contient deux choſes, ſcauoir eſt de comparoir au iour prefix, & comparoir ſimplement : & parce combien qu'il ne compare au iour prefix, il doit comparoir par apres: toutesfois nous ne receuons point telz adiournemēs baillez a iour incertain : mais bien receuons l'adiournement qui eſt baillé au prochain iour de droit, ou a la prochaine Cour de quelque ſiege ou iuriſdiction, combien qu'il ne ſoit ſpecialement declairé : partant que lon a accouſtumé touſiours de tenir les Cours ordinaires a certain iour. Et quant ores elles ſont ordinaires, & ne les tient lon a certain iour, neantmoins eſt notoire a quel iour elles doibuent eſtre tenues: car lon met les aſſignations au poſteau du lieu ou lon les doit tenir: comme lon faiſt communement es aſſiſes des iuriſdictions ſubalternes, & non royales..

Semblable difficulté y a quand deux parties comparent au iour aſſigné, mais ne font aucune expedition, ſinon que prendre acte de leur comparition, ou bien prennent expedition, mais n'y a aſſignation priſe pour uenir proceder en la matiere: car ſi au prochain iour de droit apres, l'une prend contre l'autre default, l'autre pourra dire qu'il n'y pendoit rien. A ceſte cauſe quand il a eſté omis de prendre aſſignation en faiſant l'expedition, le iuge (ce requerant l'une partie) en preſence du procureur de l'autre ordonne que l'autre uiendra proceder ſelon le dernier appointemēt au prochain iour de droit. Toutesfois en la Cour de Parlement apres la premiere preſentation, qui doit eſtre faiſte au greſſe des preſentations, lon peut faire mettre la cauſe au roolle: & ſi l'une ou l'autre des parties ne compare, le preſent aura ſon exploict cōtre l'absent, ſans ce qu'il y ayt autre cōtinuation, cōbiē que le roolle ſoit extraordinaire: car le roolle eſt publié

e ij auant

auant que lon en playde, qui emporte assignation taissible a ceulx qui y ont leurs causes: ou si lon ueult faire quelque autre expedition, lon baille requeste a la Cour, laquelle baille commissaires a la barre, & la fait lon signifier au procureur de partie aduerse, & bailler iour pour uenir proceder sur l'entertainment: & le plus souuent lon ne met iour, car il s'entend qu'au leuer de la Cour lon se trouue a la barre pardeuant les commissaires, pour faire expedition sur la requeste.

¶ Des oppositions baillees & faictes a ce que aucuns defaultz ne soient iugez, & si on peut les iuger nonobstans lesdictes oppositions: & s'il n'y a comparition au iour assigné sur l'opposition par l'opposant mesmes, si ce nonobstant partie aduerse peut faire iuger le default.

Autrefois est aduenue une difficulté touchant ceste matiere, qui estoit telle. Le demandeur auoit obtenu un default avec le profit contre le defendeur: dont aduertie le defendeur se oppose a ce que le default ne soit leué & deliuré au demandeur: & si leué estoit, qu'il ne soit iugé. Et le plus souuent l'on a accoustumé faire telle opposition au greffe, & est baillé par icelle en mandement par le iuge au premier sergent de signifier ladicte opposition, & d'adiourner partie aduerse pour proceder sur icelle a certain brief iour. Toutesfois est meilleur prendre la prouision deuant le iuge: car ueue l'opposition il ne peut plus iuger le default iusques a ce qu'il soit decisi de ladicte opposition. Doncques le demandeur fait signifier ceste opposition audict defendeur, & luy bailler adiournement a certain iour pour uenir proceder sur ladicte opposition, & au principal. Au iour assigné le demandeur & defendeur se defaillent.

defaillent. Neantmoins le demandeur fait iuger le default, pour raison duquel auoit esté faicte ladicte opposition: & icel le taise, le defendeur se porte appellant de la sentence donnée par uertu dudiect default. L'appellant pardenant le senechal de poictou ou son lieutenant playde, qu'il estoit opposant, & son opposition susdicte signifiée a partie aduersè, & partant ne pouuoit plus faire iuger son default. L'intimé dit que l'appellant luy auoit faict donner iour sur ladicte oppositiõ, & pour proceder au principal, & qu'il n'auoit point cõparu a ce iour: & parce estoit l'opposition & l'adiournement pour non aduenü & non faict. L'appellant repliquoit, que iasoit que l'adiournement fust pour non aduenü, toutes fois ladicte opposition demouroit en son entier, laquelle il conuenoit premierement faire uider que iuger lediect default. Et fut diect par sentence qu'il auoit esté bien appellé de ladicte sentence donnée par uertu dudiect default: & pense qu'il fut bien iugé par ladicte dernière sentence.

¶ Defaultz ne peuuent estre iugez apres l'an & iour qu'ilz ont esté baillez.

Conuient aussi noter qu'apres an & iour a cõpter du date de default donné, lon ne peut faire iuger le default, ne en tirer aucun profit: noires ne en auoir les despens: ne la Cour en demander l'amende: car ce sont edictz penaux, qui apres an & iour n'ont uigueur, & se en doit lon ayder & les mettre a execution dedens l'an & iour.

¶ Qui est requis pour faire iuger defaultz.

Pour faire iuger defaultz & congex, il fault que celluy qui les a obtenu, face sa demande en brief, par laquelle il fera narration succincte des defaultz, & declairera les iours esquelz ilz ont esté donnez. Conclura a ce que le defaillant soit

elle se defaillit, ledict arest fut contre elle declairé executoire, & fut condamnée es despens tant par le premier que par le second arest contre elle donnez.

¶ Comment on procede a contraindre le benefice a faire les reparations de son benefice.

Cōbien que parcydeuant quand les eglises ou maisons d'un benefice estoient en ruine, lon auoit accoustumé de user que a la requeste du procureur du Roy, ou du procureur fiscal du patron dudit benefice, ou du seigneur en la iurisdiction duquel il est assis, estoient faictes informations des ruines par un sergent, appellé avecques luy un notaire de Cour layez & icelles ueues par le iuge, il commettoit gens expertz a ce, pour luy rapporter quelle somme de deniers seroit biē necessaire pour mettre lesdictes eglises ou maisons en decent & bon estat: ueu lequel rapport avecques les informatiōs, ce requerrant ledict procureur, il ordonnoit que le possesseur titulaire du benefice seroit adiourné avec intimation a certain iour pardeuāt luy, pour se uoir condamner a faire les reparations necessaires de son benefice, ou bien mettre entre les mains de bons & suffisans cōmissaires certaine somme de deniers que ledict iuge arbitroit, pour estre employee & cōuertie esdictes reparations par les commissaires, & pour ce uenir accorder d'iceulx. Et si ledict beneficié ne comparoissoit au iour, le iuge donnoit default contre luy avec le profict: & en icelluy adiugeant bailloit sentence selon ladicte demande dudit procureur: & ordonnoit que ledict beneficié seroit contrainct a ce par saisie du temporel de son benefice. Mais par arest donné es grans iours tenuz a Angiers le xij. iour de Septembre l'an M. D. xxxix. fut dict bien appellé par un beneficié d'une pareille sentēce: parce qu'il falloit cōtumacer le beneficié par

deux defaultz auant que donner ladicte sentence, non pas que aupsus ladicte forme de proceder ne fust bonne.

¶ Comment on procede contre le demandeur defaillant auant contestation en cause.

Nous auons declairé comment lon deuoit proceder alencontre du defendeur absent & contumax: reste a mōstrer de present comment lon doibt proceder alencontre du defendeur absent & contumax. auquel cas, & quand la cause n'est cōtestee, si le demandeur se default au iour de l'adiournement baillé a sa requeste, & que le defendeur compare, le iuge baille au defendeur alencontre dudiect demandeur default & cōgé avec tout le profit que de raison, sauf quelque temps, cōme de huitaine ou autre temps selon la qualité de la matiere. mais si une fois le demandeur a comparu, & apres il se default a une autre assignation, le iuge ne baille pas default & congé es Cours royales & inferieures, ains seulement ordonne apresent qu'il sera adiourné sur default, & avec intimation, parce que par les ordonnances dernieres ne sont requis en toute matiere que deux defaultz: & apres le temps dudiect sauf escheu & passé, le defendeur produira sa relation de l'adiournement a luy baillé, & demande dudiect profit, par laquelle il cōclura a ce qu'il soit enuoyé absou de l'instance, avecques despens dommages & interestz: ce que par le iuge luy sera octroyé & adiugé.

¶ Le defendeur est enuoyé de l'instance, & non de l'action du demandeur defaillant: & quelle difference y a entre les deux.

Faiect bien a cōsiderer que le defendeur n'est enuoyé de la demande ne action du demandeur, ains de l'instance seulement:
car

car nonobſtant la ſentence portant abſolution de l'instance, le demandeur eſt bien receuable a intenter nouvelle action & instance pour raiſon de meſme choſe que celle qu'il demandoit & pourſuyuoit en ladiſte premiere instance.

¶ Le defendeur adiourné en taxation de deſpēs, eſt enuoyé des deſpens, ſi le demandeur default au iour aſſigné, ſelon la couſtume de Poictou.

Toutesfois par la couſtume du pais de Poictou article cccxii. ſi celluy qui a faiſt adiourner quelcun en taxation de deſpens, ſe default au iour baillé a ſa requeſte: l'adiourné comparāt obtient default & congé contre luy avec tout le profit, & par uertu d'icelluy eſt enuoyé licētié & abſou des deſpēs: qui eſt une choſe fort rigoreuſe, attēdu meſmemēt qu'en la Cour de Parlement l'adiourné en taxation de deſpens n'eſt enuoyé d'iceulx par uertu du congé qu'il obtient alencontre de celluy qui l'auoit faiſt adiourner, ains eſt enuoyé ſeulement de l'instance de l'adiournement, & ſa partie aduerſe cōdamnee en ſes deſpens de ladiſte instance, ainſi comme il eſt eſcript audict ſtile de la Cour.

¶ De la difference des congez & defaultz donnez en la Cour de Parlement, & de ceulx qui ſont donnez es Cours Royales.

Auſſi eſt a noter que ce que nous appellons es Cours royales & inferieures default & congé, lon le nomme en la Cour de Parlement congé ſimplemēt: & emporte gain de cauſe. mais ce que en la Cour de Parlement lon nomme congé & default, eſt ce que nous nommons es Cours royales & inferieures

rieures le premier default, qui contient la demande de celluy qui l'a obtenu, & mandement d'adiourner le defaillant sur default, & avec intimation.

¶ On ha regard au tēps du default dōné, & non au temps du sauf, s'il n'est rabatu dedens les dict temps, & que le default soit iugé.

semblablement n'est a omettre, que quand il est baillé default & congé sauf quelque temps, & que dedens ledict temps ledict default & congé n'est rabatu, s'il est question de temps substācial, cōme de l'an & iour du retraict lignagier, ou autre temps semblable: icelluy temps commence a courir des le iour du default donné, & non du iour auquel eschoit le sauf: car puis que le defaillant a esté negligent de s'ayder de la grace dudict sauf dedens le temps d'icelluy, il ne s'en peut plus ayder icelluy sauf passé. & ainsi en a esté dict par arrest de la Cour.

¶ De la contumace apres contestation en cause.

ensuit apres auoir traicté de la contumace des demandeur & defendeur auant la cause contestee, que maintenant nous uoyons de la contumace d'icelles parties apres la contestation de cause. Et en la maniere de proceder en ceste contumace n'y a differēce entre le demandeur & defendeur: car si l'un ou l'autre se default apres cōrestation en cause faicte, ou qu'il ne face ce qu'il doibt faire par l'appoinctement dernier, il est donné default contre luy: & uen icelluy & la procedure, ce requerant la partie comparant, le defaillant est forclos de ce qu'il auoit a faire: & est baillé adiournement par le iuge au procureur du defaillant si ledict procureur est present en Cour, pour proceder ad ulteriora: comme si la partie deuoit

deuoit faire enqueſte d'edens certain temps, & qu'il fuſt ia paſſé, & que l'autre partie eut faict ia ſon enqueſte: ſi celluy qui deuoit faire enqueſte, ſe default au iour que pēd l'expeditiō de la cauſe, & que ſon procureur ſoit preſēt, il ſera forclos de faire ſon enqueſte, ſauf quelque temps: le quel ſauf lon a accouſtumé bailler en tous autres aētes iudiciaires. Et ordonne le iuge qu'il baillera obiectz, ou bien que les parties produiront a la prochaine Cour enſuyuant, & procedera lon ainſi cōtre le defaillant par forcluſions des autres expeditiōs iudiciaires, comme de produire, bailler contredictz, & ſaluations, iuſques a l'appoinctement en droit. Et combien que le procureur ſoit preſent en Cour pour autres parties ou autres cauſes, toutesſois ſ'il ne ueult comparoir pour la partie, ou faire ce qu'il doit faire ſuyuant le dernier appoinctement: on peut dōner default contre la partie preſent ſon procureur dedaignant de reſpondre ou proceder: car ſi la partie meſme eſtoit preſent, & ne uouloit cōparoir ou proceder en ſa cauſe, on donneroit default contre elle a default de proceder, & la forcloreroit on de ce qu'elle auroit a faire. Et ſi le procureur du defaillant eſt abſent, le iuge ordonnera que l'expedition ſera ſignifiée audict defaillant, & icelluy adiourné pour cōſtituer nouueau procureur en la cauſe: a fin que lon ne ſoit plus en peine de faire ſignifier les expeditiōs au defaillant en ſa perſonne, ou a ſon domicile: cōme nous dirons plus amplemēt cy apres. Et iaſoit que la couſtume de ce pays de Poictou ueuille que ſi la cauſe eſt cōteſtee auecques la partie ſans procureur, & elle defaille, il ſoit requis de la cōtumacer par defaultz, ainſi que deſſus eſt ia dict: toutesſois ie ne ſeroye d'aduiz de tenir ceſte forme de cōtumace, parce qu'en pareille couſtume qui eſt en la uille de la Rochelle, elle a eſté reprouuee par areſt: & meſmemēt en fut donné areſt le xij. de ſeptembre mil
cing

cing cens xxxi. es grās iours tenuz a Poictiers, & dict qu'il seroit procedé par forclusions. aussi la Cour en use ainsi.

¶ On ne doit forclore le defaillant sinon de ce qu'il debuoit faire par le dernier appointement precedent.

Il fault bien auoir regard que le iuge ne forclore & ne deboute le defaillant sinon de ce qu'il auoit a faire a l'assignation a laquelle il est defaillant: comme s'il auoit a produire, que le iuge le deboute de produire, & nō pas de bailler cōtrediēt: autrement le defaillant auoit matiere d'appeller de la forclusion: & ainsi en fut dict par arest esdictz grās iours le xxvi. de Septembre l'an susdict. Et ce sont les remedes pour punir la contumace d'une partie: car au regard des premier & second decretz introduictz contre les contumax par le droit commun, apresent n'ont plus de lieu. Quant aux autres remedes pour contraindre a satisfaire a l'appointement ou sentence du iuge, nous en dirons cy apres.

¶ Comment nous prenons selon nostre stile la cause estre contestee.

Mais sur ce propos fault estre aduerti, que nous ne prenōs la contestation en cause comme plusieurs docteurs de droit civil & canon la prennent. car ilz disent la cause estre contestee, quand le defendeur a defendu seulement. mais nous prenons la contestation en cause, quand le defendeur a defendu, & le iuge baillé son appointement par dessus, ou bien a escrire, informer, & produire, ou bien a escrire & a produire, ainsi que cy apres declairerons plus copieusement.

A fin de poursuyuir l'ordre entrepris, puis qu'auōs expedie
la

La maniere de proceder a contumacer l'une ou l'autre partie de faillant, soit au ant, ou apres la cause contestee: uenōs apresent a expliquer le fil & ordre de la procedure que nous obseruons quand les deux parties contendens en proces, sont presens.

¶ De la proposition de la demande, & de l'utilité de l'inserer par le registre du greffier.

En premier lieu le demãdeur propose sa demande selon l'exploict de l'adiournement baillé au defendeur, s'il a esté libellé, suyuant les ordonnances dernieres. Et est pour le mieux de faire encores inserer entierement la demande au registre du greffier, parce que lon perd bien souuent les relations des adiournemens, & ne peut on les recouurer des sergens, parce qu'ilz n'en retiennent rien communement: mais lon trouuera tousiours la demande au greffe, si une fois elle y a esté enregistree.

¶ Il n'est mestier exprimer le nom de l'action.

Auiourd'huy en proposition de demande & action, en ce royaume nous gardons la disposition du droit canon: car il n'est mestier d'exprimer le nom de l'action que lō intente, mais suffit tellement declarer le faict, que lon en puisse tirer bonne conclusion du droit du demandeur. & n'est tenu le demandeur bailler a ses despens au defendeur le registre de sa demande, ne le double d'icelle, quand il propose en iugemēt: mais quand l'adiournement est libellé, il fault par les ordonnances dernieres laisser le double de l'adiournement au defendeur. Aussi en la Cour de Parlement lon baille a partie aduerse en premier lieu le double des exploictz.

¶ La maniere de proposer en matiere de complainte en cas de saisine & de nouuelleté.

selon

Selon qu'auôs promis faire, il est requis que declairôs icy la maniere de proposer en matiere de cōplaincte en cas de saisine & nouuelleté laquelle nous gardons apreset, parce qu'elle n'est gueres cogneue a ceulx qui n'ont frequēté la pratique, cōbien qu'ilz soient scauās en droit: & est fort souuēt practiquee: & est la forme d'y proposer, telle, que le demandeur maintient que a certains bōs & iustes tiltres a dire & declairer en temps & lieu, il est seigneur & possesseur des lieux & choses contentieuses, & en possession & saisine d'en prēdre & percevoir les fruietz, & en disposer a son plaisir, & de garder contredire & empescher que le defendeur n'en prenne & recoiue les fruietz, & n'y face luy ou autre aucun exploit oultre le gré & uolunté du demandeur, & s'il auoit esté faict au contraire, de le faire reparer & remettre au premier estat & deu par iustice, ou autrement deucement: & que d'icelles possessions droictz & saisines le demandeur & ses predecesseurs aucteurs ont iouy par X. X X. X X X. & XL. ans, & par tēps immemorial, que que soit, par tēps ualable & suffisant a bōne possessiō auoir acquise, & droict d'icelle garder & retenir, & mesmement par les an & iour & exploitz derniers precedens ledict trouble, au ueu & sceu du defendeur, & de tous autres, sans y auoir aucunement esté empesché. Ce nonobstant puis an & iour enca le defendeur auroit faict l'exploict dont on se deult & complainct: lequel exploit il fault declairer particulièrement, & dire que ledict exploit auroit esté faict en troublant & empeschant le demandeur en ses droictz possessions & saisines indeument & de nouuel. A ceste cause conclud le demandeur a ce qu'il soit maintenu et gardé en sesdictz droictz possessions & saisines & a recreance pendant proces, comme ayant le plus clair & apparent droict, & a sequestre en

cas de debat, & a despens dommages & intereſtz. Mais ſi le demandeur uoit qu'il puiſſe auſſi aiſement iouyr que le deſendeur, ou que autrement le ſequeſtre ne luy ſoit utile, ne le requerra.

Aucunes fois, & quand la matiere n'eſt de conſequence, lon faiet le propoſe plus brief: car le demandeur propoſe ſeulement en complaincte pour le trouble & empeschement a luy faiet puis an & iour enca par le deſendeur en la poſſeſſion ſaiſine & iouyſſance d'un tel lieu en prenāt & emportāt les fruietx, iaiſoit que le demādeur & ſes predeceſſeurs en ſoiēt poſſeſſeurs d'an & iour & autre temps ſuffiſant: & apres ce conclud comme deſſus. Et en aucunes Cours quād lon forme la complaincte ainſi en brief, le iuge ordonne (ce requerant le deſendeur) que le demandeur baptizera & mettra au greſſe plus au long ſes poſſeſſions. Mais il me ſemble que cela eſt ſuperflu: car le demandeur apres par ſes eſcriptures met & declaire au long ſes poſſeſſions.

¶ On peut former cōplaincte par lettres Royaux.

Parfois lon obtient lettres royales en forme de cōplaincte: par leſquelles apres narration faiete des droitx poſſeſſions & ſaiſines de l'impetrant, il eſt mandē au premier ſergent royal auquel cōmunement telles lettres ſons adreſſees, qu'il adiourne les parties a comparoir pardeuant luy ſur le lieu contentieux, & qu'il maintienne & garde l'impetrant en ſes droitx poſſeſſions & ſaiſines: & en cas d'oppoſition reſus ou delay, adiourne les oppoſans reſufans ou delayans pour dire leurs cauſes d'oppoſition reſus ou delay, & uoir plus amplement maintenir le demandeur en ſes droitx poſſeſſiōs & ſaiſines ſi meſtier eſt: & en oultre proceder cōme de raiſon. Et en ce cas ſi le deſendeur adiournē ne compare au lieu aſſignē, le ſergent baillera default contre luy au demādeur comparant,

comparant, & maintiendra uerbalement le demandeur en ses droictz possessions & saisines, & apres baillera adiournement audict defaillant en la maniere si sdict e pardcuant iuge cōpetent, auquel lon a accoustumé cō. estre la cognoissance par les mesmes lettres royaux de complaincte. & s'il compare, & se oppose, sequestrera uerbalmēt la chose cōtentieuse, & luy baillera adiournement pour uoir maintenir ledict demandeur.

¶ Que c'est ramener a effect la complaincte sur le lieu, & qu'il sert.

Et ceste maniere de faire nous appellons communement ramener la complaincte a effect sur le lieu: & sert bien, principalement quand lon ueult intenter complaincte pour raison du possesseur d'un benefice: car la complaincte est reputee formee des le tēps qu'elle est ainsi ramenee sur le lieu. Aussi ceulx qui pretendront droict au benefice, ne pourront pretendre cause d'ignorance de l'exploict ainsi faict sur le lieu du benefice. Toutesfois il me semble quant au premier effect, que la complaincte est tenue pour formee des ce qu'elle est signifiee au defendeur, si elle est libellee: & quil suffit en iceluy cas qu'elle soit signifiee, & adiournemēt baillé par uertu d'icelle au defendeur pour sur icelle uenir proceder, iasoit que le iour de l'adiournement eschoit apres l'an & iour: car l'adiournement libellé interrompt prescription. En oultre sert de ramener la complaincte a effect sur le lieu, partant que en ce cas n'est plus mestier de faire mōstree du lieu au defendeur.

¶ Des trois chefs de complaincte.

Pour declaration de ce que dessus, conuient entendre que la cōplaincte ha trois chefs: scauoir est le sequestre & fournissement de complaincte: qui est le reſtabliſſement des fruietz perceuz des choses contentieuses l'an & iour auparauant la complaincte

complaincte formee, & depuis entre les mains des commissaires, qui sont commis sequestres desdictes choses pendant proces. L'autre chef est la recreance des choses contentieuses: & doit estre adiugee a celluy qui ha le plus clair & apparent droit, pour desdictes choses iouyr soubz la main du Roy aussi pendant proces. Le tiers chef est la maintenue, que aucuns appellent autrement plain possissoire: & est le chef principal de la complaincte. en quoy aucuns errent: car ilz pensent que le principal de la complaincte soit le petitoire: ou par le contraire le principal de la complaincte ne cõcerne en rien le petitoire.

Pour quelles choses on peut former complaincte, & de complaincte pour raison de dixmes.

Et combien que selon droit ciuil lon face difficulté, si pour raison d'une rente, ou prestation annuelle lon peut former complaincte, toutesfois nous suyons l'opinion des Canonistes, qui tiennent que non seulement pour raison d'une rente, mais aussi de tous autres droit & incorporelz lon peut intenter complaincte: voire que les droit & fussent spirituelz & ecclesiastiques, comme benefices, dixmes, & droit de presentation ou patronage. Et iasoit qu'un Curé n'ayt possédé les dixmes prediales & mixtes en aucunes terres de sa paroice, neantmoins il peut former complaincte, parce que de droit commun il est fondé de droit & possession de les auoir & leuer en toute sa paroice: & qui plus est, s'il n'en auoit iamais leué en sa paroice, si toutesfois autre ne les y prenoit, il pourroit former complaincte contre les possesseurs de terres pour raison de ladicte dixme des fruietz: laquelle dixme est auourd'huy la douzieme partie
f des

des fruietz en ce pays de Poictou: car en iouyssat des autres emolumens & fruietz de sa cure, il conserue sa possessiō quāt aux autres emolumens a luy appartenāz dōt il ne iouyst. Mais si autre que luy les leuoit, comme les pretendāz infeodees, ou par priuilege apostolique, & qu'il en fust en possession de temps suffisant, & pour le moins d'an & iour, le Curé ne se pourroit pouruoir par complaincte, mais intenteroit action simple.

¶ De complaincte pour raison de rente.

Et si lon forme une complaincte pour raison de la cessatiō ou discontinuation du payement d'une rente, il fault declairer par la complaincte les lieux pour raison desquelz on la pretend: & fault prouuer en proces que lon est en possession de l'auoir & prendre pour raison de ces lieux: autrement lon succumberoit. Et pour ceste cause comme lon eust formé complaincte pour raison de la cessation du payement d'une rente deue sur une maison, & le defendeur apres la monstree faite d'icelle maison, eust defendu, & eussent les parties esté appointees a faire preuue, & eust le demandeur informé & prouué auoir esté payé de la rente l'an & iour precedēt la cessatiō, & cōbien que ses tesmoins ne deposassent icelle rēte auoir esté payee pour raison de la maison mōstree, toutes fois il eust esté maintenu & gardé en ses droictz possessions & saisines de la rente, & condāné le defendeur es despens dommages & interestz, dont il eust appellé en la Cour: il auroit esté dict par arest, qu'il auoit esté mal iugé, & en emendant le iugement, enuoyé l'appellant de la complaincte du demandeur. Et de ce la raison est bonne: car puis qu'il auoit désigné & monsté particulierement la maison, & qu'il n'auoit monsté la rente auoir esté payee pour raison d'icelle, il deuoit succumber. Vray est que si quelcun paye une rente a
certaine

certaine perſone ou eglife, il eſt preſumé la payer pour raiſon de tous ſes biens. mais ueu que ce demandeur auoit deſigné le lieu, il deuoit dechoir. Lon ne peut pretendre eſtre en poſſeſſion d'eſtre payé d'une rente, ſinon que lon die qu'elle eſt due pour raiſon des immeubles, & non a cauſe de ſes perſonnes: car les perſonnes ſont aujourd'huy liberaes, & ne ſont ſubiectes a taille ou autre preſtation annuelle pour le regard d'icelles, ſinon au Roy noſtre ſouuerain ſeigneur. Et pour raiſon de ces rentes foncieres, on ſe peut adreſſer contre le poſſeſſeur & detenteur des lieux baillez & arrentez pour icelles rentes: iasoit que le preneur, ou ſes heritiers ne ſoyent excuſez, & renduz non ſoluables. ce qui n'a lieu en rente conſtituee a prix d'argent. car il fault ſe adreſſer contre celluy qui la coſtituee, ou contre ſes heritiers premicrement que ſe pouuoir adreſſer contre le tiers poſſeſſeur des biens obligez a la rente.

¶ De complaincte pour raiſon du boicellage,
qui eſt un deuoir pretendu par aucuns
Curez.

A ce moyen comme un Curé euſt formé complaincte pour raiſon du boicellage ou meſtiuage, qui eſt un droit qu'aucuns Curez pretendent, ſcauoir eſt d'auoir & prendre de chaſcun feu & meſnage de paroice un boicau de bled par chaſcun an en la ſaiſon de meſtiue, ou a la ſainct Michel, & qu'il euſt bien monſtré ſa poſſeſſion, & de tiltre & accord faiet avecques les paroiciens de ſa paroice, & ſes predeceſſeurs Curez, & euſt obtenu par ſentence la recreance, dont les paroiciens ſe fuſſent portez appellās: la Cour par ſon areſt en emédant le iugement auroit adiugé au Curé la recreance pour eſtre payé de chaſcun paroicien ayant feu & meſnage,

f ij &

& tenant immeubles & heritages en ladicte paroice. Mais
 quand les Curez pousuyuent ce boicellage par action petitoi-
 re, lon n'a de coustume leur adiuger, sinon qu'ilz monstrent
 d'accord ou transaction sur ce faicte avecques leurs prede-
 cesseurs Curez & les paroiciens, quelque iouissance de long
 temps qu'ilz preuuent en auoir eu. Et ce me semble estre bien
 raisonnable: parce que ce boiceau de bled est a presumer a-
 uoir esté .plustost payé pour aumosnes & suffrages, que pour
 obligation: & a ce moyen de liberalité ne fault tirer cōtrain-
 ète: & mesmement quand la cure est opulente & suffisante
 pour entretenir & nourrir le Curé: car en ce cas n'y a pro-
 pos es Curez d'en demander, parce que l'office du uray pa-
 steur (comme ilz doibuent estre) est de tondre ses ouailles, &
 non leur arracher la peau: ce qu'ilz font en prenant ce boi-
 ceau: car ilz ont tel paroicien auquel ilz en deburoient plus-
 tost donner, que d'en prendre: mais neantmoins on le con-
 trainct de payer comme un autre: & ce pendant les Curez
 mettent la coulpe sur leurs uicaires. Ilz n'auroient point ce-
 ste cause d'excuse, si la deliberation des deputez par nostre
 sainct pere le Pape pour l'aduertir des abus de l'Eglise, estoit
 executee en cest endroict, & autres, esquelz elle est tressain-
 ète, dont lon se esmerueille qu'encores lon n'a cōmencé a l'e-
 xecuter. Depuis a esté donné arest par la Cour de Parlemēt
 a Paris entre les paroiciēs du Chasteau D'olonne en Poictou,
 appellans du Seneschal de Fontenay le conte d'une part, & le
 Curé dudiect lieu, d'autre part. Par lequel arest par le moyen
 de l'appel formé par monsieur le procureur general du Roy
 monsieur Bruslart, le proces estāt sur le bureau, fut dict, l'ap-
 pellation & ce dont auoit esté appellé mis au neant. Et en
 emendant le iugement, lesdictz paroiciens furent enuoyez
 absoultez de la complaincte contre eulx formee par lediect
 Curé

Curé pour raiſon dudiect droiect de boicellage, & condamné le Curé es deſpens de la cauſe principale, & ſans deſpens de la cauſe d'appel, iaſoit que lediect Curé euſt monſtré de poſſeſſion de plus quarante ou cinquante ans du payeniēt dudiect debuoir de boicellage: & qu'il euſt produiect tranſaction & accord ſur ce faiect entre les predeceſſeurs deſdictz Curé & paroiciens. Toutesſois la Cour ſix ou ſept ans auparauant auoit adiugé au Curé des Magnis Raynier pres Luczon, la recreance d'un ſemblable debuoir de boicellage.

¶ De complaincte pour raiſon d'office de quelque iuriſdiction.

Mais pour reuenir a noſtre propos, il eſt beſoing noter, que pour raiſon des offices des iuriſdictions inferieures, & autres que royales, quand ilz ſont oſtez par les ſeigneurs meſmes qui les ont baillez, ou leurs ſucceſſeurs: ceulx auſquelz ilz ſont oſtez, ne peuuent former complaincte cōtre ceulx qui les oſtent, car ilz ſont reuocables a uolunté du ſeigneur. & ainſi en a eſté dict par arreſt le xij. iour de Iuillet M.D. XIII. & encorq̃ es grans iours tenuz a Poictiers le xxij. iour de Septembre M.D. XXXI. & par ce moyen celluy qui les tient, eſt ueu les tenir precairement des ſeigneurs. Et ſelon droiect lon ne peut former complaincte contre ceulx dont lon tient precairement, pour raiſon de la choſe, tenue de luy precairement. Et iaſoit que celluy qui tient a precative, puiſſe bien former complaincte contre tous autres que cōtre celluy dont lon tient: toutesſois ſi un des officiers deſdictz ſeigneurs eſt troublé en l'exercice ou iouiſſāce de ſon office par autre que par ſon ſeigneur, ou de luy ayant cauſe, il ne forme point complaincte, ains ſon ſeigneur la forme: car il ha principal intereſt pour la conſeruation de ſa iuriſdiction dont depend lediect office.

¶ Esquelz cas on peut former complaincte contre le seigneur qui a osté l'office par luy donné.

Toutesfois si ledict office est donné pour remuneration des seruices faictz, ou en fauëur de mariage, ou pour autre cause onereuse, ledict office n'est reuocable. Semblablement les offices Royaux ne sont reuocables, & ne peuuent estre ostez sinon pour delict commis par les officiers, & declaration premicrement faicte desdictz delictz, & priuation par sentence. Mais toutesfois il fault que a la mutation du Roy ilz obtiennent confirmation du Roy successeur. Voire les substitutz mis par les officiers royaux ne peuuent estre reuokez ne ostez, sinon pour delict. Et peuuent exercer leurs substitutions, apres le deces de leur maistre, iusques ad ce que le Roy ayt pourueu a l'office en chef. Aucuns extendent ce cy es offices qui sont cōserez par les Princes du sang Royal. Et de faict se meut proces entre deux parties pour raison de l'office du Bailly de Dunois. L'une des parties disoit que le feu Archeuesque de Tbolose oncle & curateur du seigneur de Dunois & de Longueuille auoit donné ledict office a son pere & a luy & au suruiuant d'eulx deux pour les bons seruices que son pere auoit faict a la maison dudit seigneur de Dunois, & sans ce que le suruiuant d'eulx deux fust tenu demander aucune cōfirmation, & que ledict seigneur mesme auoit eu pour agreable, approuué, & cōfermé ledict don. L'autre disoit que ledict seigneur de Dunois estoit dece dé, & que le seigneur de Guise tuteur du filz dudit feu seigneur de Dunois, l'auoit pourueu dudit office, et qu'il l'auoit peu faire, parce que les offices dudit seigneur & autres sont reuocables a uolūtè: aussi que l'autre n'auoit eu ne prins cōfirmation apres le deces de son pere. Au contraire estoit dict

dict par l'autre, que ledict office n'estoit reuocable, parce qu'il estoit donné pour remuneration de seruices, & qu'il n'estoit mestier de confirmation, parce qu'il y auoit clause expresse derogante par ledict don, comme dict est. La Cour des grans iours tenuz a Angiers le xxiiij. iour de septēbre M.D.xxxix. apres auoir oy les parties en leurs playdoiers, appoincte quant au principal la matiere au conseil, & que neantmoins pendant proces par maniere de prouision, & sans preiudice des droictz des parties, celle a laquelle premierement auoit esté faict ledict don, iouyroit dudiect office. Toutes fois il est plus usité en ce royaume auiourd'huy, que celluy qui est premierement pourueu de l'office, se oppose ad ce que l'autre ne soit institué en l'office, ne mis en possession d'icelluy: & si on passe oultre, il en appelle, comme il fut faict on cas cy dessus recité.

¶ Complaincte sur complaincte n'a point de lieu, ains se fault opposer a la complaincte.

Est necessaire scauoir, que celluy qui s'est une fois opposé a une complaincte, si pendant le proces est troublé en sa possession de la chose contentieuse, il ne peut former complaincte pour raison dudiect trouble a luy faict en icelle mesme chose. Voire & si la complaincte est formee par autre, & cōtre autre, & que quelcun se pretende possesseur de la chose cōtentieuse entre les autres parties: s'il est aduertí de la cōplaincte formee, il se doit rendre seulement opposant, & non former cōplaincte nouuelle. Et si ignorāt ladiecte cōplaincte d'entre les autres parties, il auoit formé cōplaincte, & qu'il luy
f iij apparoiſſe

apparoisse iudiciairement de ladicte autre complaincte : il doibt declairer comment ignorant ladicte complaincte il en auoit formé une autre, mais pour obuier a la multiplicité de parties demanderesses il conuertit sa complaincte en opposition, & que par uoye d'opposition il entend poursuyure ses droictz & possessions. Et ce luy peut grandement seruir, par ce que si le demandeur ne prouue en matiere de complaincte, comme en autre matiere, le defendeur est absou.

¶ Comment doibt estre entendu que cas sur cas n'a point de lieu.

Aussi y a aucun commun proverbe en pratique, que cas sur cas, n'a point de lieu, par maniere que si une chose a esté saisie pour une cause, on ne la peut plus saisir par apres pour une autre cause, iusques a ce qu'il soit decisi de la premiere saisie. & en y a un exemple notable es decisions de Parlemēt de Grenoble composees par Guidon Pape, en la question ccccxxviii. mais parce qu'il est esloigné du present propos, ie ne le reciteray point icy, mais cy dessoubz en lieu commode. Toutesfois il ne fault pas entēdre, que si un fief ou chose tenue noblement, est saisie pour la debte de celluy auquel elle appartient, que le seigneur dont elle est tenue ne la puisse bien saisir pour les causes par lesquelles luy est permis saisir par la coustume: mais en ce cas le seigneur doibt demander congé au iuge, par auctorité duquel elle estoit premierement saisie, ainsi qu'il est escript au stile de Parlement composé en Latin, au tiltre des fiefz.

¶ Quand on doibt demander sequestre.

Plus est a considerer, que lon doibt demander sequestre auāt la cause contestee: car apres icelle contestee lon n'est plus receuable a le demāder: comme il est traicté audiēt stile de Parlement, en Latin, au tiltre des cas de nouuelleté. Et la cause est que

eſt que le ſequeſtre eſt ordinairement prohibé de droit : & pour ce facilement lon perd la faculté de le demander : car aiséement la choſe reuiet a ſa premiere nature, & lon eſt ueu facilement renoncer aux choſes qui nous competent & appartenent de droit ſpecial. D'abundāt le ſequeſtre eſt cōme une exception dilatoire, laquelle ne ſe peut propoſer apres la cauſe conteſtee. Mais quand le ſequeſtre a eſté une fois requis par la complaincte comme lon a accouſtumé, i'auoit que le defendeur ayt defendu & conteſté cauſe quant au principal & recreance ſans faire mention du ſequeſtre, lon le peut demander apres la cauſe conteſtee, & requerrir que le defendeur y defende : car c'eſt un chef de la complaincte : & la conteſtation ſur un des cheſx, ne preiudicie aux autres cheſx.

¶ Le ſergent ou executeur de bulle ne peut que faire ſequeſtre verbal, & bailler poſſeſſion verbalement auant cognoiſſance de cauſe.

Au parſus tout ainſi qu'un ſergent ne doit ſequeſtrer que uerbalement, auſſi un executeur de bulles d'un benefice, quand il met en poſſeſſion par uertu d'icelles, ſ'il y a oppoſition, il ne doit mettre en poſſeſſion realement, ains uerbalement ſeulement, ſans preiudice de l'oppoſition. Et pource qu'un tel executeur realement & de faict auoit mis en poſſeſſion, l'oppoſant ſ'en ſeroit porté appellant comme d'abus formelement en la Cour de Parlement, & auroit obtenu par areſt d'icelle donné le xix. iour de Februrier M.D.xxix. Voire ne peut tel executeur excommunier.

¶ En defendant en la complaincte, on trouble le demandeur.

Pour mettre

Pour mettre fin a ceste matiere, iasoit qu'au stile de la Cour de Parlement composé en latin, il soit escript, que necessairement il fault mettre en la complaincte, que de nouuel le demandeur a esté troublé: toutesfois Aufre commentateur dudiect stile, dit que ce n'est pas requis de droict. Aussi selon l'usage du iourd'huy, le demandeur ne decheroit de sa complaincte pour auoir seulement omis lediect mot, pourueu qu'il monstrast sa possession de l'an & iour precedent la proposition de la complaincte: car quant au trouble, n'est mestier le monstrer, si le defendeur a defendu par contraires possessions, parce que en defendant il trouble: mais bien est mestier monstrer le trouble, quand le defendeur dit n'auoir point troublé le demandeur, & ne uoloir empescher ses droictz possessions & saisines luy estre adiugees.

¶ Si maintenue presuppose trouble, ou non.

Et fault entendre, que aucuns disent que si le defendeur dit qu'il consent la maintenue, il confesse auoir troublé: & aussi que si le iuge maintient & garde, qu'il presuppose trouble: & que consequemment les despens dommages & interestz sont cogneuz pour le demandeur: & que quand le defendeur dit n'auoir fait trouble, le iuge doit faire inhibitions & defenses au defendeur de non troubler le demandeur. Mais ie ne seroye de cest aduis: car le mot maintenir, n'emporte qu'il a esté fait trouble, ains plustost que la partie craint estre troublée. D'auantage lon ne se arreste de present a ces petites & legieres formalitez: & regarde lon le fond de la matiere, & l'interest de la partie aduersé qu'elle ha en ces omisions de formalitez: & si elle n'y ha interest notable, l'on n'y ha regard, attendu signement que des le temps des Empereurs qui ont fait les constitutions du Code, les formules des actions furent abolies: & que quant a les proposer, suivons le droict Canon, comme a esté dict cy dessus.

De

¶ De reintegrande.

L'opportunité du lieu suade & requiert que nous traitons icy semblablement la manière d'intenter reintegrandes dont nous usons auioird'huy : car quant est de l'interdict vnde ui, par le droict introduict pour recouurer la possession dõt lon a esté spolié, il n'est pas si en usage que la reintegrande, parce que l'interdict recuperatoire de possessiō ha lieu cōtre celluy qui par force deiecte & spolie de la possession, ou ha pour agreable la spoliatiō faicte par autrui en son nom & a son aduoc. Mais la reintegrande ha lieu contre tous qui iniustement detiennent & occupent : & peut estre formee par tous qui a droict & bōne cause tenoient & exploictoient auāt la spoliatiō. D'aduātage ledict interdict n'est baillé que quand lon est spolié & deiecté de la possession des immeubles, & non des meubles, sinon quand les meubles estoient en fond ou maison dont le spolié estoit possesseur. mais la reintegrande peut estre intentee pour la spoliation de quelque meuble, iasoit qu'il ne fust en la maison laquelle le spolié possedoit. Il y a d'autres differences entre ces deux remedes, qui sont traittes en droict : mais parce qu'elles ne viennent souuēt en practique, ie les laisse. Ceste reintegrande peut estre formee & commencee en deux manieres : car lon peut la former ciuilemēt & simplemēt, cōme une autre actiō ciuile : ou bien auoir lettres royaux ou mandemens de iuge competent, adressant au premier sergent, par lequel luy est mandé que appelé un notaire auecques luy, il se informe diligemment & secretement de la possession & spoliation du demandeur de la chose dont est question, pour l'information faicte estre portee ou enuoyce par luy feablement close & sellee pardueurs ledict iuge, pour y estre donnee telle prouision que de raison. Et l'information rapportee pardueurs les ges du Roy & le iuge, st baillé decret

decret d'adiournement personnel, ou prinse de corps selon la qualité des excez qui ont esté commis en faisant ladiète spoliation: & aupaſus lon y procede comme en une autre matiere criminelle. Les conclusions en ceste matiere de reintegration, sont, que apres que le demandeur a narré comment il estoit a bons & iustes tiltres, a declairer en tēps & lieu, possesseur de telle chose que le defendeur l'a spolié depuis an & iour enca: cōclura ad ce, qu'il soit reintegré en sa possession & saisine d'icelle chose, & a despēs dōmages & interestx. Mais n'est point necessaire, que le demādeur prēne possession d'an & iour auant la spoliation: ains seulement, qu'il estoit possesseur on temps de la spoliation. Toutesfois selon droict canon ce remede peut estre intenté pour le recouurement de la chose a soy appartenant, uoire apres l'an & iour de la spoliation: & n'est remede possessoire, ains dure perpetuellement iusques a trente ans. Neantmoins nous n'en usons pas ainsi, ains en usons comme cy dessus auons dict. Car par l'ordonnance derniere article LXII. la reintegrande & la recreāce sont equiparees ensemble, quāt ad ce que les sentēces portās adiudication d'icelles, sont executoires nōobstans oppositiōs ou appellations. dont est a inferer, que toutes les deux ne concernent que la possession. Pource que cydeuant auons reserué a declairer la maniere que nous gardons de present a intenter ou former adueux & requestes personnelles & hypotheques, & qu'auons ia traicté la maniere de proposer en complainctes & reintegrandes, il sera bien scant en ce lieu, que nous y exposons la forme de proposer esdictx adueux & requestes.

¶ De la maniere de former adueuz.

Et pour premierement parler d'aduou, parce que c'est un remede possessoire, qui compete pour meuble: il a de coustume estre formé en ceste maniere, scauoir est, que le demandeur trouue moyen de uoir la chose mobiliere qu'il ueult aduouer, & en presence d'un sergent declaire qu'il est seigneur & possesseur d'icelle chose, & l'aduoue, & requiert le sergent qu'il l'ayt a sequestrer, & mettre en main tierce. & si le defendeur & detenteur est present, & ne die rien, le sergent sequestrera la chose realement & de faict, & luy donnera adiournement pour seuenir contraduouer. Mais s'il s'oppose ou contraduoue, le sergent ne sequestrera pas la chose, ains baillera adiournement pour dire ses causes d'opposition ou contraduou, & pour respondre au sequestre requis, & avec intimation quant a icelluy sequestre. Toutesfois en aucuns lieux, comme en la uille & gouuernement de la Rochelle, le sergent sequestre realement & de faict nonobstant opposition ou appellation, & sans preiudice d'icelles, & somme de contraduouer: & s'il ne se contraduoue dedens la huitaine, il ne se peut plus contraduouer, & est la chose deliuree a celluy qui a faict l'aduou. Mais ceste coustume ne doibt estre extendue a autre pays, parce qu'elle est contraire au droict commun, partant que de droict sequestration est prohibee, & ne peut estre faicte sans cognoissance de cause. Mais si lon ne peut uoir la chose que l'on ueult aduouer, il fault faire adiourner le detenteur d'icelle, pour l'exhiber, & avec intimation: parce que ce n'est qu'un preparatoire: & l'exhibition faicte, le demandeur aduoue la chose, & conclud ad ce qu'elle luy soit rendue & deliuree.

¶ Deliurance doibt estre faicte au possesseur qui auoit la chose aduouee auparauant l'aduou, en baillant caution.

Neantmoins

Neantmoins celluy qui auparauant l'adueu estoit réellement & de faict possesseur & detenteur, doit auoir deliurance de la chose par maniere de prouision, & sans preiudice des droictz des parties pendant proces, en baillant par luy caution de la rendre en fin de cause, s'il est dict que faire se doieue, pourueu qu'il requiere ladiete deliurance ou recreance.

¶ Si en adueu on traite la proprieté avecques la possession.

En ceste matiere d'adueu, cōbien qu'elle soit possessoire, toutesfois parce que selon droict la possession des choses mobilières est uile, c'est adire que lon n'en tient grand cōpte; lon traite de la proprieté & seigneurie du meuble, scauoir est, a qu'il appartient des deux contendens: ensemble & de la possession: cōme il est donē a cognoistre en l'article cccxxxiiiij. de la coustume de ce pays, ou est dict, que quāt a la demāde simple ioincte a l'applegement, y conuient quatre defaultz: car par la demande simple ne peut estre entendue autre chose que l'action petitoire. Toutesfois par les ordonnances royaux est prohibē d'accumuler & poursuiure le petitoire & possessoire ensemble. Mais il faudra entendre ladiete prohibition, quand il est questiō de choses immeubles, & nō de meubles, pour sauuer ladiete coustume: laquelle toutesfois n'est grandement a sauuer: parce qu'il semble que la demāde simple soit superflue quād elle est ioincte a l'adueu: car lon pourroit aussi bien deduire la proprieté que la possession sans que ladiete demande y fut ioincte, cōme lon faict en cōplaincte pour conforter seulement la possession. Neantmoins on pourroit dire qu'il seruiroit a une fin de conioindre la demāde simple avecques l'adueu: car quand ladiete demande simple seroit ainsi ioincte, & qu'il

qu'il seroit decisi des deux chefz ensēble, celluy q y auroit succumbé, ne pourroit plus intenter action & demande petitoire alencontre de celluy qui auroit obtenu sentēce pour raison de la chose mobiliere comprinsē par la sentence: ou si ladiēte demande simple n'auoit esté ioincte a l'adueu, celluy qui auroit succumbé en l'adueu, pourroit pour raison d'icelle chose encores intenter action petitoire, comme lon peut faire apres la sentence donnee en matiere de complaincte.

¶ Si vn colon ou fermier peut former adueu pour les fruietz de sa ferme ou de son bail.

De ce peut isir un doubte, si un colon ou fermier est biē receuable a former adueu pour raison des fruietz de la chose qu'il tient a ferme ou louage: car aucuns disent qu'il peut le former, & y ioindre la demande simple: parce qu'il peut agir par action simple de uendication pour lesdictz fruietz, & par icelle en demander restitution selon equité: iasoit que par rigueur de droict il ne le peut faire, mais debuoit agir contre celluy duquel il tient a ferme, ad ce qu'il eust a agir pour lesdictz fruietz, & les luy faire rendre. Aussi qu'ilz disent qu'un fermier peut former complaincte ad ce qu'il soit maintenu en la iouissance de sa ferme: pourueu qu'il la forme contre autres que contre celluy dont il tient a ferme: car ilz s'accordent bien qu'il ne la peut former contre celluy duquel il tient: & que comme lon peut former complaincte pour tous droictz incorporelz, que aussi lon peut former complaincte pour ce droict de iouissāce: et qu'il peut estre maintenu en cest estat de iouissāce, auquel il seroit trouuē auoir esté au temps du trouble a luy faict. Les autres tiennent qu'il ne peut former adueu pour lesdictz fruietz nō pl⁹ q cōplaincte
pour

pour le trouble: car il ne possède aucunement: & que sans auoir possession lon ne peut intenter adueu ne complaincte: car l'adueu & complaincte sont semblables, & celluy y obtient, qui est possesseur. Et seroye de cest aduis, & cōseilleroye plustost que le fermier se pourueust par reintegrande, attendu mesmement qu'aujourd'huy par les ordonnances dernieres les sentences donnees en reintegrandes, sont executoires nonobstant l'appel, cōme en complainctes: & qu'il est sans doute qu'il peut former reintegrande pour lesdictz fruietz par les raisons cy dessus deduietes ou nous auons parlé de reintegrande.

La forme d'adueu anciennemēt obseruee par les Romains estoit, que la chose mobiliare exhibee pardeuant un magistrat ou iuge du peuple Romain, celluy qui uouloit aduouer, tenoit la chose, & disoit telles parolles: Je dis que ceste chose m'appartient par le droict des Romains. Et si l'aduerse partie ne contraduouoit, ains consentoit, ce estoit appelé cession & transport faict en droict, scauoir est en iugement: & le iuge deliuroit la chose a l'aduouant.

¶ Des requestes personnelles & hypotheques, & la maniere de conclure esdictes requestes.

Nous auons dict assez de la matiere d'adueu: uoions de la matiere des requestes personnelles & hypotheques. Il fault auant toute œuure entendre que sont requestes: car il y a requestes personnelles, requestes hypotheques, & requestes personnelles & hypotheques conioinctemēt: & tout cecy en aucuns lieux n'est appelé que admonition, comme a la Rochelle, & se conuiennent en nom, comme en effect: car admonition de payer, & requeste de payer, est tout un. Mais requeste personnelle est, quand l'action personnelle est seulement intentionnee: scauoir est que le demādeur propose pour auoir payemēt de

de sa debte. Requeste personnelle & hypothecque, est quand le demandeur conioinct l'action hypothecaire avecques la personnelle: cōme quand il propose ad ce que le defendeur ait a le payer, ou a deguerpir & luy delaisser par hypothecque ce qu'il tient des choses obligees & hypothecquees pour le deu. Requeste hypothecque ha pareilles cōclusiōs, sinon que lon demande que telz lieux soient declairez affectz & hypothecquez au payement de telle somme, & que le defendeur qui les tient, ayt a les deguerpir, comme dessus, si mieux il n'aime payer la somme. & n'y a difference sinon que les requestes personnelles & hypothecques peuuent estre formees cōtre l'obligé au payement, ou son heritier & bientenant. Mais si lon ueult agir contre le bientenant de l'obligé, cestascavoir contre le detenteur des choses hypothecquees au payemēt du deu, & que ledict bientenant ne soit heritier: il fault intenter la requeste hypothecque seule, qui est l'action hypothecaire pure sans la personnelle.

¶ En quelz cas on peut former requestes.

Lon peut former ces requestes par uertu de cōtract en forme authentique, sentence ou iugé, cedula recogneue, testament & douaire: combien qu'il n'y ayt expresse obligation des biens quant au testament ou douaire, comme il est dict par la coustume de Poictou article cccxlvi. Et le douaire en Poictou est la tierce partie des immeubles qu'auoit le mari au temps de sa benediction nuptiale, dont la femme peut iouyr durant sa uie seulement: cōme est mis par ladicte coustume article cccij. Et peut lō poursuiure par lesdictes requestes personnelles & hypothecques dependens d'icelle, l'un ou plusieurs des heritiers & bientenans de l'obligé, par protestation que si par l'une ou par aucunes des parties defendereffes lon est payé & satisfait, de se deporter des autres: cōme il est mis par ladicte cou-

stume article cccxlvj. Mais pourtant lon ne pourroit pas poursuiure les heritiers, & autres tierces personnes bien tenâs ensemble: car lesdictes tierces personnes ont benefice de droict qu'ilz ne peuuent estre cōuenuz iusques a ce que l'obligé ou son heritier soit premier excus & rendu non soluable, sinon quand il y a renüciation d'ordre & de discussion, & autres cas notez de droict.

¶ Lesdictes requestes sont d'estroict droict: & en quelles matieres qui dechoit d'un poinct, dechoit de toute l'instance.

sont lesdictes requestes d'estroict droict, tellement que qui dechoit d'un poinct en icelles, il dechoit de l'instance seulement, fors quand il y a plusieurs poinctz & articles separez, ou plusieurs arrirages de rente: esquelz cas celluy qui dechoit d'un poinct, ne dechoit des autres, s'il a protesté par sa demãde qu'il forme pour chascun poinct et article, ou pour chascun arrirage une requeste. Et la raison pour laquelle elles sont d'estroict droict, est (selon mon opinion) parce qu'il y a en icelle sequestration des choses obligees, scauoir est contre l'obligé ou son heritier, incontinent: & contre un tiers bien tenant, apres la monstree faicte des lieux obligez, & ce en informant de iuge: mais leur doibt estre faicte deliurance & main leuee en baillant par eulx caution de payer s'il est dict que faire se doieue: ainsi qu'il est mis par ladicte coustume articles cccxliij. & cccxliiij. Laquelle coustume est maintenāt abroguee quant a l'obligé ou son heritier: car par l'ordonnance derniere la main du credeur est garnie pendant proces, cōme auons dict cy dessus. Or par le stile de ce royaume toutes matieres esquelles gist sequestration, sont odieuses, & d'estroict droict: au moyen dequoy qui dechoit d'un poinct, dechoit

choit de toute l'instāce seulemēt. Et ad ce est formelle la coustume de la Rochelle article xxviij. Et en ce nous gardons quelque peu du droict commun, par lequel celluy qui demandoit trop, decheoit de l'instance, Et estoit condamné au triple. Mais en autres matieres que celles qui sont odieuses, ou esquelles gist sequestration, qui demande trop, ne perd sa cause: car si en action personnelle simple ie demande cinquāte liures, Et ne me sont deux que uingt Et cinq, ie gaigneray ma cause, Et me sera le defendeur condamné payer les uingt Et cinq, Et les despens. Autre chose seroit en action reale: comme si ie demādoye que le defendeur eust a me laisser iouyr d'une piece de terre, Et ie ne monstre en proces estre seigneur que d'une moytié, la moytié me sera adiugee, Et les despens cōpēsez, c'est adire que le demandeur Et defendeur n'aurōt point de despēs. Et ce est semblablement gardé en matiere de cōplaincte, ia soit qu'il y escheie sequestration. toutesfois quant au sequestre Et execution d'icelluy, qui feroit sequestrer plus qu'il ne doit, il decherroit de toute l'instance meue sur l'excessiue té dudit sequestre, soit par uoye d'oppositiō, ou appellation.

¶ Requestes hypotheques peuuent estre formees pour rentes foncieres.

Pareillement il est commun en pratique, que lon peut inter requestes hypotheques pour une rente fonciere cōtre icelluy qui tient le fond pour raison duquel elle est due: cōbien que lon ne monstre d'obligatiō par escript, ains seulemēt que la rente est fonciere, Et pour raison dudit fond.

¶ Si vn des teneurs de partie des lieux subiectz a vne rête, peut estre cōuenu pour le total de la rête.

Mais la difficulté est, si l'un des teneurs de partie du fond subiect a icelle rente, peut estre conuenu pour toute la rête. Et certes nous tenons que par action hypothecaire lon peut con-

g ij clure

clure contre l'un des tenanciers au payement de toute la rente, parce que l'hypothèque est totalement sur toutes les choses obligées, & sur chascune partie d'icelles: & mesmement quand le fond originalement auroit esté arrenté a une seule personne: car lors il n'est pas equitable, que pour la qualité des successeurs, la primitiue obligation soit changée. Et cōbien que ie sache bien par plusieurs fois auoir esté iugé selon ceste usance par scauans personages, toutesfois ie ne uouldroie suiure ceste opinion, signamment en ce pays de Poictou, auquel y a coustume formelle article lxxx. ou il est dict, que si une rête ne porte fief & iurisdiction, chascune partie du fond n'est subiecte au total de la rente. Parquoy attendu que chascune partie n'y est subiecte par ladicte coustume, comment peut lon faire que lon intente action hypothecaire pour raison d'une chose qui n'est subiecte a hypothèque du total de la rête? & que l'hypothèque puisse changer la nature & qualité de la chose, cōtre la disposition de la coustume? Aussi que selon droit telle rête est diuidue pour la portion des lieux subiectz a icelle. Mais ie seroye bien d'aduis, que contre celluy qui a prins a rente, ou contre ses heritiers lon peut bien demander le total de la rente par action hypothecaire a l'un, iasoit qu'il ne teint que partie de la chose arrentée: parce qu'il y a une obligation generale contre le preneur, & son heritier. Et tout ainsi que lon peut poursuiure l'un des heritiers hypothecairement, a ce qu'il ayt a payer le total d'une dette par une fois deue, semblablement il est raisonnable que lon le puisse poursuiure hypothecairement pour le total d'une rente. Toutesfois en ce pays de Poictou il ne faudroit pas conclure a ce que le preneur des lieux ou ses heritiers ayent a delaisser par hypothèque leurs biens obliger pour ladicte rente, ains seulement les biens baillez & arrentez pour ladicte rente: car par la

la couſtume de cediect pays article xliij. quand aucun prend quelque fond a rente, iaſoit qu'a la continuation d'icelle il oblige generalemēt tous ſes biens, neantmoins il peut expondre lediect fond, & renoncer a icelluy, & ſe deſcharger de ladiecte rente. Mais ſelon droiēt commun en exponſant, ou renonceant au fond, le preneur d'icelluy ou ſon heritier ne ſe deſchargeroit de la rente, ſ'il y auoit obligation generale de tous biens. Et oultre par la couſtume de cediect pays article xliij. celluy qui fait ladiecte exponſion, doit laiſſer la choſe en tel eſtat qu'elle puiſſe porter la rente, & payer les arriera- ges eſcheux, enſemble l'arriera- ge du prochain terme a eſchoir, ſinon que lon face ladiecte expoſion le iour que ſeroit deue ladiecte rente. Autrement lon n'y ſera receu.

¶ Les arriera- ges d'une rente pour l'annee de l'exponſion ſont entierement deuz, mais pour l'annee de l'admortiſſement d'une rente ilz ſont deuz pro rata.

Toutesfois par le droiēt commun, quand lon ueult admortir quelque rente, lon n'eſt tenu de payer l'arriera- ge de l'annee en laquelle lon admortit, ſinon pro rata du temps eſcheu d'icelle annee. Eſt a noter, que ſi la rente eſt hypothecaire, & cōſtituee a pris d'argent ſur certain fond, lon ne peut conuenir pour icelle le tiers poſſeſſeur dudiect fond, ſcauoir eſt qui n'eſt preneur, ne heritier du preneur, ſinō que lediect preneur & ſes heritiers ſoient premierement renduz excus, & non ſolua- bles. Mais quand la rente eſt fonciere, il n'eſt meſtier faire ladiecte excuſion: car lon peut ſ'adreſſer en premier lieu cōtre le poſſeſſeur dudiect fond.

¶ Si apres auoir formē demāde ſimple, on peut accumuler l'action hypothecaire.

S'eſt meue altercation, ſi apres que le demandeur a formē

demãde simple, s'il est receuable a inteter actiõ hypothecaire, & icelle cumuler avecques ladiete demãde simple: cõme si le demãdeur auoit faiet cõuenir l'ũ des heritiers du defunct pour le total payemẽt de la debte du defunct, & l'heritier consent payer sa part, & auparsus defende: quoy uoyãt lediẽt demãdeur, declare qu'il forme requestes hypotheques, ou intete actiõ hypothecaire. le defendeur dit qu'il y a uariation & mutatiõ de sa demãde, & par ce n'est receuable a intenter ou cumuler ladiete actiõ. Et en ce cas me semble qu'il y est biẽ receuable, mais qu'il doibt estre cõdãné es despẽs iusques la, mesmement si le defendeur cõsent lors les fins & cõclusions dudict demandeur: car par la appert que si le demandeur du cõmencement eust intenté ladiete actiõ hypothecaire, le defendeur eust aussi bien consenti. Mais quand le defendeur persiste, il ne peut auoir les despens, sinon pro rata de ce qu'il auroit plus frayé & despendu que si lediẽt demandeur eust du commencement intenté ladiete actiõ hypothecaire, comme s'il luy fault faire autres expeditiõs ou defenses que celles qui ont esté auparauant faietes. Et peut lediẽt demandeur poursuiure les deux actiõs ensemble. Mais si le demandeur auoit premierement intenté actiõ simple contre aucun comme heritier d'un defunct obligé, & puis aduertý qu'il n'estoit heritier, declare qu'il intente contre luy comme bien tenant du defunct, actiõ hypothecaire: lors il me sembleroit qu'il ne seroit receuable, sinon qu'il se desistast de la demande simple: car en ce cas c'est une actiõ autre que la premiere, & parce ne se peuuent cumuler: & doibt le defendeur estre entierement condanné es despens de la premiere demande iusques au iour de ladiete actiõ hypothecaire intentee. Semblablement touchant ceste matiere hypothecaire est suruenu un grand doubte. Vn des heritiers du debteur est conuenu par le creditur en actiõ hypothecaire, pour le total de la

debte due par le defunct, par uertu d'un instrument authentique: par la sentence il y est condanné, en luy cedant par le creditur les actions, qu'il ha contre les autres heritiers. Parapres ledict heritier par uertu de la cession desdictes actions, faict conuenir un de ses coheritiers pour le total de la debte par action hypothecaire, deduction toutesfois faicte de sa portion hereditaire. Le defendeur offre payer sa portion hereditaire: & quant auparsus defend, disant que s'il auoit payé plus que sadiete portion, par le moyen de la cession desdictes actions, il intenteroit incontinent proces contre le demandeur, qui par uertu de la cession qu'il luy feroit de ses actions, seroit contrainct de luy rendre ledict parsus qu'il luy auroit payé, mise hors ladiete portion du defendeur. & ad ce moyen debuoit estre absout pour euitter tel circuit & reflexion. Le demandeur replique, & dict que sans propos luy auroit esté faicte ladiete cession desdictes actions, s'il ne pouuoit conuenir un de ses coheritiers seul pour le total. & que tout ainsi, qu'il auoit esté conuenu pour le total par le creditur, il ayant le droict d'icelluy creditur, pouuoit faire le semblable. Toutesfois le demandeur par sentence est debouté de sa demande quant audiect parsus, mise hors sa portion: dont il appelle, & relene son appel en la Cour de Parlement a Paris: ou il consulte sa matiere avecques les plus scauans & notables aduocatx de ladiete Cour, & trouue auoir bonne matiere d'appel, & faict faire ses griefx, desquelx il fournist. Neantmoins il perd sa cause par arest, dont ledict aduocatx font plaincte, par maniere qu'icelle uenue a la notice de la chābre ou le proces auoit esté uuidé: ladiete chambre delegue un des Cōseilliers d'icelle, pour entēdre des aduocatx le motif de ladiete plaincte: lesquelx soustiēnt leur plaincte, s'accordēt d'en scauoir l'aduis

d'un des plus notables & anciens aduocatx de la Cour, qui fut de mesme aduis, quel'Arest de ladicte Cour. & s'en contenterent lesdictx aduocatx. Et ce me semble suffire pour cognoistre comment lon doibt proposer sa demande es matieres les plus communes en pratique.

¶ Il n'y a aucun delay auant cōtestation en cause se fors le delay de garentiz.

Mais auant que passer oultre, il fault entendre qu'auāt les ordonnances dernieres le demandeur & defendeur auoient deux dilations, qu'ilx pouuoient prendre en quelque partie de la cause qu'ilx uoloient. Apresēt par lesdictes ordonnances il est dict que le defendeur n'aura aucun delay auant cōtestation en cause, que delay de garent. Parquoy auourd'huy le demandeur & defendeur n'ont lesdictes dilations: & par ce moyen fault que le demandeur propose incontinent sa demande apres la comparition du defendeur. Toutesfois les iuges baillent encores delays aux parties en tous endroictx de la cause qu'ilx uoyent estre equitable: mais c'est moyennant despens, aucunesfois ordinaires, aucunesfois plus grans, & a leur arbitrage.

¶ Quand aucune de plusieurs parties cōdamnees en despens pour faire quelque chose, ne la fait dedens le temps, & les autres la font, ladicte partie delayant doibt entierement. lesdictz despens.

Et quād ilx sont plusieurs defēdeurs, & le iuge les cōdāne en despens, moyennant lesquelx il leur baille terme de faire quelque chose, comme de fournir d'escriptures, ou de produire, & l'un d'eulx ne produit, il doibt entierement les despens, cōmie aussi il les doibt quand le iuge le condāne en d'spens pour n'estre prestx de faire ce qu'ilx doibuent faire, sauf s'ilx le font

font dedens quelque temps: car en tous ces cas le proces est autāt retardé pour la demeure de l'un, comme si tous auoiet esté en demeure.

¶ Qu'on doibt faire quand partie allegue compromis ou promesse de non proceder, ou trās-
action final: & comment se doibt entendre
que tous iugemens sont absolutoires.

Et combien que le defendeur ou demandeur allegue compromis & promesse de non proceder, ou accord & transaction final: toutesfois s'il n'en informe par escript authentique, le iuge appoincte qu'il procedera en la cause selon l'appoinctement dernier donné en icelle: & neantmoins ce requérant celluy qui a proposé le compromis ou accord, il ordonne que celluy qui l'a proposé & allegué, en informera: & la partie aduersé au contraire, si bon a elle semble. & s'il en informe, le iuge ordonnera que l'accord ou compromis tiendra, & sortira son effect: & condamnera celluy qui l'aura nié, tant es despens de la contestation faicte sur ladicte niance, que de ce qui a esté faict en la principale cause depuis l'allegatiō dudiēt accord ou compromis & promesse de non faire poursuite de proces. Et y a bien difference s'il y a compromis & promesse de non proceder & poursuiure quant & quant, ou s'il n'y a que seul compromis: car au premier cas celluy qui a nié, est condāné es despens tant du principal depuis poursuiui, que dudiēt incident. Et en l'autre cas il n'est condamné qu'aux despens de la contestation faicte sur ladicte niāce. Et iasoit qu'il y ayt compromis, toutesfois lon peut bien encores poursuiure, s'il n'y a promesse de non poursuiure: & s'il y a peine mise au compromis, lon ne peut pas tendre a fin de nō proceder, iusques a ce que ladicte peine soit payee: mais il la fault demander par action & instance separee. A
ceste

ceste cause est bon qu'apres l'accord faict sur un proces ia meue
 & pendant, si l'une des parties craint estre surprise par l'autre,
 qu'elle le declaire au iour de la prochaine assignation
 d'apres ledict accord ou compromis: car si elle ne comparoit,
 & ne le declairoit. l'accord ou compromis n'empescheroit pas
 que l'autre n'eust default contre elle. & si par uertu du default,
 l'autre partie obtenoit sentence, le defaillant n'auroit
 matiere d'appeller d'icelle, parce qu'elle debuioit comparoir,
 & l'alleguer: & qu'au moye de ce qu'elle ne l'a allegué, le iuge
 a eu matiere de donner sentence par le moyen de ladiete
 contumace: aussi que tous iugemens sont absolutaires, c'est
 adire qu'il fault en auoir yssue par auctorité de iustice: non
 pas toutesfois que lon ne puisse accorder d'un proces intenté
 sans le congé du iuge: mais si la partie poursuit nonobstant
 l'accord, le iuge y faict expedition comme s'il n'estoit point
 interuenue. Combien qu'il semble que a la reale uerité la partie
 qui contreuient a l'accord, ne doibue auoir profit de sa
 malice, & que par ce moyen lon doibue receuoir la partie appel-
 lant a informer du faict dudiect accord en la cause d'appel,
 & ce pendant superseder le iugement. Toutesfois attendu
 que quand tel faict est proposé en la cause principale, lon
 ne differe pour ce la poursuite du proces: consequemment la
 poursuite de la cause d'appel ne doit estre differee pour le-
 dict faict allegué. Et par ce moyen le iuge sans preiudice du-
 dict faict uuyde la cause d'appel. Mais le remede est, q̄ celluy
 contre lequel est donnee la sentence, s'oppose a l'execution d'i-
 celle, ou a la taxe des despens. Vray est, que nonobstāt son op-
 position, & sans preiudice d'icelle & dudiect faict, la sen-
 tence sera executee tāt en principal, que despens: mais aussi
 le iuge adiugera preiudice dudiect faict.

¶ De election de domicile, & constitution de procureur.

Pource que par les ordonnances dernieres article xxiiij. les parties au iour de la premiere comparition, ou par procureur suffisamment fondé, doibuent declairer ou elire leur domicile au lieu ou les proces sont pendens: autremēt a default de ce auoir deuement faict, elles ne sont receuables, & seront deboutees de leurs demandes, defenses ou oppositions respectiuellement: traictons en cest endroict de ladicte election de domicile, & constitution de procureur: combien qu'en ce present œuure composé en Latin nous n'en traictions en ce lieu, ains apres les exceptions declinatoires exposees.

Et premierement uoyons comment doibt estre interpretee ladicte ordonnance: car desia lon faict doubte, & en use lon diuersement, parce que les aucuns disent qu'il suffit elire domicile au ressort du lieu ou est le proces pendant: comme si le proces est pendant en la Cour ordinaire de la Seneschaucee de Poictou a Poictiers, il suffit d'elire au ressort dudit Poictiers: & qu'il n'est requis que lon elise en la uille de Poictiers. Et ainsi en use lon en ladicte uille. Les autres tiennēt qu'il est besoing elire en la uille ou autre lieu ou est le proces pendant, & ne suffit elire au lieu du ressort: & en ceste maniere en use lon a Fontenay le côte: & suis d'aduis que ainsi doibt estre entendue ladicte ordonnance, & sont a ce formelx les termes d'icelle, partant qu'elle dit qu'il fault declairer ou elire domicile au lieu ou est le proces pendant: car ce mot declairer, doibt estre entendu que ceulx qui ont domicile au lieu, suffit qu'ilx le declairent: & ceulx qui n'en y ont, fault qu'ilx y elisent domicile.

Si vne

¶ Si vne partie elit domicile, si vn tiers avecques lequel na esté faicte ladicte electiō, s'en pourra bien ayder, ou mesme partie en autre instance.

Toutesfois si lon a eleu domicile en une matiere, autres parties en autre instance ne se peuuent ayder de ladicte election de domicile: ne aussi mesmes en la cause d'appel lon ne peut s'ayder de l'electiō de domicile faicte en la premiere instance, fust ce entre mesmes parties, sinon que la premiere instance & cause d'appel fussent agitees en mesme uille ou lieu.

¶ Si plusieurs defendeurs sont tenez elire domicile en mesme maison.

Et s'ilz sont plusieurs demandeurs ou defendeurs, ilz ne sont tenez d'elire domicile en mesme maison: mais peuuent elire en diuerses maisons au lieu ou est le proces agitē: car les uns se fient en aucunes personnes, ausquelles les autres ne se confient, quant a leur faire scauoir les adiournemens ou autres exploictz qui serōt faictz aux domiciles eleuz. & ainsi en a esté dict par arest es grans iours tenez a Angiers l'an M.D.xxxix. Et si en matiere criminelle lon a eleu domicile avecques le procureur du Roy: ceulx qui se uouldront rendre parties en la cause, se pourront ayder de ladicte election de domicile.

¶ De l'adiournement donné pour constituer nouveau procureur.

Au regard de la constitution de procureur, lon est tenu constituer un procureur en la cause, mesmement en matiere criminelle, quand les parties de la uoye extraordinaire sont mises en l'ordinaire. Et si le procureur constitué meurt, lon peut faire adiourner la partie pour constituer nouveau procureur, & proceder au principal de la matiere, voire apres que lon

lon auroit conclud comme en proces par escript en la cause d'appel en la Cour de Parlement, parce qu'il peut encores aduenir qu'il y aura quelque expedition a faire en la cause. Et si celluy qui est adiourné en ceste maniere, se default, il fauldra le contumacer comme s'il estoit adiourné simplement pour proceder, & ce pour le regard du principal. Mais pour le regard de l'adiournement baillé pour constituer nouveau procureur, il me semble qu'il suffit d'un default qui soit donné avec le profit, ou simple, selon le stile de la Cour ou est le proces pendant: & que par uertu d'icelluy default le iuge ordonnera que le contumax constituera procureur audict lieu & Cour dedens quelque temps, qu'il luy plaira presire: car c'est un preparatoire: & en tous preparatoires lon ha de coustume regulierement donner sentence de contumace par uertu d'un default.

¶ De reuocation de procureur.

Combien que selon droit commun il fust leu & permis auant la cause cōtestee, a uolunté reuoker son procureur, & apres la cause contestee, pourueu qu'il y eust aucune des causes lesquelles sont declairees par le droit, & que lon le fist scauoir a la partie aduerse: neantmoins apresent une partie en tel endroit de la cause qu'elle uouldra, pourra reuoker son procureur, en le faisant signifier a son procureur, & a sa partie aduerse: & aussi comment elle a constitué un autre procureur au lieu du reuoké, duquel nouveau procureur elle declaira le nom & surnom: ainsi qu'il est dict par les ordonnances de la Cour publiees le iij. iour de Decembre l'an M. D. XXXIII.

¶ Quelz procureurs sont receuz sans procuration.

Aussi selon droit commun un procureur n'estoit receu a comparoir

comparoir sans procuration, de laquelle a ses despens il deu-
 uoit bailler le double a partie aduerse. Auioird'huy il est re-
 ceu a comparoir sans procuration, pourueu qu'il soit procu-
 reur ordinaire en la Cour : uoir l'acte ouquel il compare, re-
 quist il mandement special: mais il sera ordonné qu'il se fe-
 ra, aduouer, & fournira l'adueu ou procuration generale ou
 speciale selon l'exigence du cas, dedens certain temps, a peine
 de despens dommages & interestz en son nom priué: ou bien
 que ce qui a esté faict, sera nul: ou bien a peine de default cō-
 tre celluy pour lequel a esté comparu, qui sera prins & don-
 né du iour de la comparition, selon ce qui sera plus expediēt
 a la partie aduerse, & aussi eu regard a la qualité de la ma-
 tiere: ou bien a peine de despens ordinaires de la Cour pour
 le retardement du proces seulement. Semblablement iasoit
 que par ladiete ordonnance lon doibue dechoir de sa deman-
 de ou defenses a default d'elire domicile a la premiere compa-
 rition : toutesfois les iuges ne l'obseruent si estroittement,
 mais baillent un delay pour uenir elire domicile, a peine d'e-
 stre decheu de son dict droit & cause. Et quand le procureur
 informe de procuration, il n'est tenu en bailler un double aux
 despens de sa partie a partie aduerse.

¶ Clause reprouuee en procuration.

Mais il fault prendre garde, que la procuration ne cōtien-
 ne que celluy qui constitue procureur, promette simplement
 auoir agreable ce qui sera faict par son procureur, sans met-
 tre ceste clause, scauoir est, ce qui bien & deuement sera ge-
 ré par son dict procureur: car si en ce cas le procureur faisoit
 quelque chose laquelle ne deuoit estre faicte, ne preiudicieroit
 a celluy qui l'a constitué. Pareillement une procuration pour
 acquiescer a quelque sentence, ne doibt contenir ces motz, ac-
 quiescer a la sentēce si faire se doibt, ou semblables, ains doibt
 y auoir

y auoir le mot acquiescer simplement. Et combien que la procuration ayt du blanc pour y employer les noms des procureurs, & que le nom de celluy qui l'ha n'y soit descript, toutesfois il est bien receuable a comparoir par uertu d'icelle: & aussi par uertu d'un blanc seellé signé de notaires. car celluy qui baille telles pieces, se confie de celluy auquel il les baille: & est presumé luy bailler puissance d'escrire oudict blanc ce qu'il neult. Voire si celluy qui ueult comparoir, ha les pieces de la matiere, il doibt estre receu a comparoir, en promettant se faire aduouer dedens certain temps, & fournir de lettre d'adueu, ou de ratification. Et ce doibt estre entendu pourueu que partie aduerse debate la procuration: car si elle ne la debat, elle est bonne: tellement que iasoit que le procureur ainsi constitué ayt faict quelque chose qu'il ne deuoit faire, toutesfois la sentence donnee avecques ledict procureur, ne peut pour ceste cause estre rescindée ne corrigee que par appel. Aussi en aucunes Cours lon faict difficulté de receuoir une procuration, si le constituant ne promet expressement par icelle payer le iugé. Mais ie pense que nonobstant l'omission de ladicte clause, une procuration seroit bien receuable, parce que les clauses qui communement sont mises es instrumens, si elles sont omises, toutesfois elles doiuent estre censees & reputées comme y mises & apposees.

¶ De adueu & ratification d'une chose faicte par le procureur.

semblablement eschoit regard ad ce que quand un procureur consent quelque chose qui requiert mandement special, & il ne le met auant, que iuge ne donne lors presentement sa sentence suiuant ledict consentement: mais qu'il ordonne que dedens certain temps ce procureur se fera aduouer dudit consentement

consente ment: & l'adueu faict, pourra seurement dōner sentence: & si l'aēt e que lon fait, doibt estre accompli dedēs certain temps, il fault que l'adueu & ratification soit faicte dedens icelluy temps.

¶ De recusation contre les iuges.

Après qu'auons declairé ce qui concerne les election de domicilie, & constitution de procureur, il est besoing de traicter des recusations: parce que le plus souuent il aduient qu'après la premiere comparition l'une des parties recuse le iuge: & aussi quand la matiere y eschoit, il fault ce faire auant toute œuvre, & que y faire autre expédition: car par l'expédition que lon y feroit, lon approuueroit la personne du iuge pardeuant lequel elle seroit faicte.

Celluy doncques qui ueult recuser, doibt selon les ordonnances dernières es x. xi. xij. xiiij. & xv. articles desdictes ordonnances proposer ou bailler par escript ses causes de recusatiō. Et si la partie aduerse est presente, le iuge doibt ordōner qu'elle y respondra, & dira ce que bon luy semblera. Et si la dictē partie les contredit, disant qu'elles ne sont receuables ne ueritables, & le iuge uoit qu'elles ne soient receuables, scauoir est que combien qu'elles fussent ueritables, toutes fois elles ne seroient legitimes ne suffisantes de droit pour le recuser: lors pourra le iuge declairer lesdictes causes de recusation non receuables: & ordonner que nonobstant icelles il passera oultre: & s'il y en a appel, ledict iuge recusé ne pourra pas passer oultre, mais fauldra demander audience pardeuant celluy qui a accoustumé de tenir le siege en son absence, soit lieutenant particulier, ou le plus ancien aduocat, & requerir que celluy qui a recusé, procède au principal de la matiere. Et si le lieutenant particulier ou le plus ancien aduocat ne sont illec presens, il fauldra prendre cōmissiō de l'un d'eulx pour faire adiourner

adiourner pardeuāt luy la partie recusant pour proceder au-
dict principal: auquel le recusant sera tenu de proceder non-
obstant l'appel par luy interiecté de ce qu'il a esté debouté
de sesdictes causes de recusation. Mais si le iuge recusé trou-
ue les causes de recusation legitimes & receuables, il dira par
son appoinctement qu'il sauue & reserue aux parties de se
prouuoir comme de raison. Et lors sera prinse commission du
lieutenant particulier ou plus ancien aduocat pour faire ad-
iourner pardeuāt luy le recusant pour proceder sur lesdictes
causes de recusation, & au principal dela matiere: & au iour
assigné, ce requerant partie aduersé du recusant, sera prefix
& baillé delay par ledict lieutenant particulier ou plus ancien
aduocat pour faire preuue desdictes causes de recusation: &
ce pendant neantmoins ordonnera que ledict recusant proce-
dera audict principal. Et si auedes du delay le recusant ne ue
risie ses causes de recusation: apres icelluy delay escheu &
passé, le iuge sans autre declaration ne forclusion debouterà
le recusant de ses causes de recusation. lequel recusant pour
chascun faict de recusation calumnieusemēt proposé, es Cours
souueraines, c'est adire de Parlement, sera condamné en uingt
liures parisifs d'amende, moytie enuers le Roy, & moytie en-
uers la partie: & es Cours & iustices Royales inferieures en
dix liures aussi par moytie comme dessus. A ceste cause lō ne
peut auoir lettres royaux, & par icelles recuser un iuge &
faire cōmettre la cognoissance a un autre iuge: & ha lon bō-
ne matiere d'appeller de l'exécution desdictes lettres: comme il
fut baillé arest en la Cour le cinquiesme iour d'Aurir mil cinq
cens trente.

¶ Lon n'est tenu a la purgatiō que faict le iuge
des causes de recusation contre luy proposée,
par serment.

h

Et

Et combien que les causes de recusation dependēt du faict & conscience & cognoissance du iuge recusé, comme si lō dit qu'il est au conseil de la partie aduersē, il ne s'en peut pas purger par serment, & ce faict, debouter le recusant de ses causes de recusation: ains doit proceder selon la forme iusdicte. Et quand par requeste presentee a la Cour lon a recusé l'un des Conseillers de la chābre en laquelle est distribué le proces, il fault coter & mettre par inuentaie ladicte requeste, ainsi qu'il est declairé par les ordonnances du Roy Loys douxieme, article xxxviiij.

¶ Jusques a quand on peut recuser.

Et peut lon bailler ladicte requeste le proces estant sur le bureau, pourueu qu'il soit dict par icelle que les causes de recusation sont de nouveau uenues a la notice & cognoissance de celluy qui baille ladicte requeste: comme il est dict par les ordonnances du Roy Charles viij. article lxiiij.

¶ Cause de recusation baillee par les ordonnances royaux.

Et y a une cause de recusation mise par les ordonnances du Roy Loys xij. article xxxviiij. scauoir est que lon peut recuser un Conseiller de la Cour, si l'une des parties plaidoyans a baillé un benefice audict Conseiller, ou a ses enfans, freres, ou cousins germains: ou bien si ledict Conseiller, ou l'un de sesdicts parens tient d'une desdictes parties aucun office fermé ou intitulé.

¶ Incompetence de lieu & de temps.

sensuit ce uuydé & expédié, que le defendeur aduisē s'il est conuenu en temps ou lieu incompetent: scauoir est quant au lieu, s'il luy est suspect: & quant au temps, si c'est dedens les uacations de mesties, ou de uendenges. car combien que le defendeur ne soit tenu comparoir en lieu suspect, ne audict temps:

temps: toutes fois il uault mieux qu'il compare, & qu'il allegue le lieu luy estre suspect, ou le temps n'estre competent: comme au temps de feries de mesties ou uendenges: & requiere estre renuoyé en lieu ou temps deu & competent, offrant y proceder: & demandera avecques ce les despens dommages & interestz de l'assignation.

¶ Quand l'adiournement mal faict est purgé par comparition.

Car iasoit que celluy qui compare, n'est plus receuable a dire qu'il n'est deuement ne bien adiourné, & qu'il purge tout le default de l'adiournement selon l'ordonnance du Roy Philippes faicte en l'an mil trois cens quarante & trois: toutes fois ce doit estre entendu du uice ou default qui seroit interuenu en faisant l'exploict ou adiournement: comme s'il n'auoit pas esté faict presens recordz, ou par cedula avecques iniunction: ou bien que lon eust assigné trop brief iour pour comparoir: car en ces cas par la comparition faicte au iour, lon purge le default ou uice de l'adiournement. Mais quand il y a autre uice en l'adiournement qui depéd d'ailleurs que de ce qui est interuenu en faisant l'exploict, come es cas cy dessus touchez, scauoir est quand lon baille adiournement a cōparoir en lieu suspect, ou en tēps incōpetent, ou come si en matiere de retraict lignagier lō bailloit l'adiournemēt sur refus de l'offre dudiect retraict apres l'ā & iour, lors par la cōparitiō que lō feroit au iour, lō ne purgeroit le uice de l'adiournemēt. toutes fois quand lon seroit cōuenu ou adiourné en lieu ou tēps incōpetēt, il ne se fauldroit porter appellāt du default qui seroit doné en icelluy tēps ou lieu, sinon que par uertu d'icelluy se fust ensuiui sentence portāt preiudice au defaillāt: car en ce cas lō se pourroit porter appellāt du default, & de ce qui s'en seroit ensuiui: parce que lors le grief seroit cōsōme.

h ij ou

ou bien fault attendre que la partie qui a obtenu le default, demande les despens d'icelluy, & que le defaillant les empesche parce que ledict default ne seroit bien uenu ne obtenu: & si on le condānoit es despens dudit default, lors se pourroit porter appellant dudit default, ensemble de ladicte condamnation de despens. Et conuient scauoir que matieres de complainctes ou reintegrandes peuuent estre intentees durāt uacations de mestiuies ou uendenges, & mesmement une complaincte en matiere beneficiale. & ainsi en fut dict par arest le vij. iour d'Aoust M. D. XXV. Toutesfois aucun ne peut estre adiourné durant lesdictes feries pour uoir proceder a l'execution de certaine sentence nonobstant l'appel interiecté d'icelle comme estant desert. Et cōme le Preuost de Paris par uertu d'un default donné durant lesdictes feries, & d'un autre bien donné, eust declairé que certaine sentence par luy donnee seroit executee, & en eust le condanné appellé, il auroit esté dict par arest doné le ij. iour de May M. D. XXXII. qu'il auoit esté mal iugé.

¶ De demander edition de lettres.

Le defendeur uoyāt estre bien adiourné, & en lieu & tēps competant, doibt bien regarder la demande du demādeur: & si le demandeur uiēt auant comme soy disant auoir trāsport, ou bien qu'il face mention par sa demande de quelques pieces ou tiltres, & que en iceulx il fonde sa demande: le defendeur requerra que le demandeur ayt a les eder & mettre auāt: & dira n'estre tenu de proceder iusques a ce qu'il les ayt mis auant. Toutesfois si le defendeur se purge par serment qu'il ne les ha lors presentement, & qu'il ne les pourroit recouurer promptement: le iuge doibt ordonner que le defendeur procedera & ira auant sans preiudice de ladicte edition: & que neantmoins le demandeur edera lesdictes lettres

tres & tiltres dedens certain temps, sinon quand il est question d'un transport par uertu duquel le demandeur intente son action: car en ce cas il le fault eder en premier lieu, & auant que le defendeur soit tenu aller auant: fors quand le demandeur diroit n'auoir ledict transport par escript, & offreroit le monstrier par tesmings: car en ce cas fault que le defendeur procede au principal de la matiere: & requérant le defendeur, le iuge pourra forclorre le demandeur de plus en pouuoir informer par escript.

¶ Es despens de quelle partie doibt estre faicte edition de lettres.

Et quand le demandeur fonde sa demande en instrumens, & qu'il en fait mention par icelle, lors il doibt faire l'edition desdictz instrumens a ses despēs, & non du defendeur. Mais quand il n'en faict point mention, & que le defendeur demā de edition de quelques tiltres concernans la demande, comme si le defendeur demande edition de la lettre de constitution de la rente dont on demande payement: en ce cas l'edition doibt estre faicte aux despens du defendeur: lesquelz despēs sont les fraiz faictz pour chercher lesdictz tiltres, & pour les enuoyer ou apporter au lieu ou est le proces pendant. Et sont lesdictz despens deux, iasoit que le demandeur ne face aucune edition, pourueu qu'il se purge par serment en iugement en sa personne ou par procuration speciale, qu'il a faict deue diligēce de chercher lesdictz tiltres, & qu'il n'en a trouuē aucuns.

¶ Quelles personnes sont tenues informer de leurs qualitez auant entree de plaid.

Toutesfois conuient scauoir que une mere intentant proces comme tutrice naturelle de ses enfans, n'est tenue d'informer ne a l'entree ne en la poursuite de la cause de l'acte.

de ladiète tutele. Mais un autre tuteur ou curateur est tenu de monstrier sa lettre de tutele ou curatele une fois en la cause, si requis en est. Et a ce est la coustume de ce pays de Poictou formelle. Pareillement un beneficié qui poursuit quelques deniers deuz a son benefice, ou pour raison des dommaines d'icelluy, il n'est tenu d'informer du tiltre ou collation qu'il ba dudiét benefice: ne semblablement un mari qui agit pour les droictz de sa femme, ne un pere qui poursuit les droictz de ses enfans, ne sont tenuz informer de leurs qualitez a l'entree du plaid: toutesfois est necessaire qu'ilz declairent par leur demande leurs qualitez: car autremēt ilz seroient uenx auoir intenté l'action en leur nom priué, Et en seroit enuoyé le defendeur avecques despēs, sauf a eulx de se pouruoir par autre action en ladiète qualité comme de raison.

En oultre est a noter que selon droict commun le demandeur en action petitoire, scauoir est de reiuēdication, pouuoit requerir que le defendeur eust a declairer s'il possedoit la chose contentieuse, Et pour quelle portion: mais de present ce n'est obserué: car le defendeur en defendant la cause est ueu se cōfesser possesseur de la chose.

¶ Le defendeur est tenu de declairer si & quelle portion il tient des lieux subiectz a la rente de laquelle on fait question.

Toutesfois es requestes du palais le demandeur peut requerir que le defendeur declaire si Et pour quelle portion il tiēt les lieux subiectz a la rente dont est question en la matiere: Et est tenu le defendeur de declairer auant que defendre, ou en defendant: Et l'ay ueu garder Et faire quelque fois pardeuant aucuns iuges Royaux: Et ce est moult equitable: car le demandeur a grād peine peut estre certain de la qualité Et portion que le defendeur tiendra des lieux affectz a la rēte.

De

¶ De monstree ou ueue, & esquelz cas n'est
choit ueue.

Auparſus le defendeur doit conſiderer par le teneur du propoſé, ſi l'acſion eſt reale, ou poſſeſſoire, ou perſonnelle. Et ſi elle eſt petitoire, ou poſſeſſoire, le defendeur requerra monſtree ou ueue luy eſtre faiſte de la choſe contentieuſe, & l'ordonnera le iuge, ſinon qu'il ſoit queſtion d'une acſion uniuerſelle, ou de choſe dōt facilement lon ne puiſſe faire moſtree: cōme ſi lon fait queſtiō d'une ſucceſſion uniuerſelle, ou d'une maiſon noble auecques ſes appartenāces & dependances: car au premier deſdict cas n'eſt adiugee aucune moſtree: & en l'autre cas lon adiuge monſtree de la maiſon noble ſeulement ſans les appartenances. Toutesfois en ce pays de Poictou, auquel y a couſtume formelle es articles cxxiij. & cxxiiij. que celluy qui fait hommage lige d'aucun fief, ſ'il n'y a hoſtel, ou choſe qui face chef d'hommage: ou quand l'hommage eſt plein: doit bailler par declaration particuliere a ſon ſeigneur feodal toutes les choſes de ſon fief. Il me ſemble que ou il ſeroit queſtion d'un hommage lige non ayant hoſtel ou chef d'hommage, ou d'un hommage plein: en ces cas il faudroit faire monſtree des choſes particulieres du fief, parce qu'il eſt facile a en faire monſtree. mais ſ'il eſt queſtion d'un fief lige, il ſuffit monſtrer l'hoſtel, parce que par la couſtume ſuſdicte lon n'eſt tenu de bailler par declaration les choſes dudiſt fief particulièrement, ains ſuffit dire par ſa declaration, que lon tient un tel hoſtel noble & ſes appartenances. Et en paſſant ie ueulx bien uous aduertir, que ceſte couſtume doit eſtre entendue quāt a la declaration que la couſtume ordōne eſtre baillee a muance de ſeigneur, ou de uaſſal: car le ſeigneur peut bien cōtraindre ſon uaſſal par acſion a bailler par declaration par le menu ce qu'il tient de luy: & ay ſceu que ainſi

en a esté dict par arrest de la Cour. Aussi nous uoyons tous les iours que les seigneurs barons ou chastellains par uertu de lettres Royaux contraignent leurs uassaulx & tenans par hommage lige, a leur bailler par le menu par declaration ce qu'ilz tiennent, quand lesdictz seigneurs ueulent faire un papier terrier. Pour reuenir a nostre propos, semblablement il n'eschoit monstree des lieux, quand il est euident & notoire que le defendeur est bien acertainé des lieux contentieux: comme quand il demeure en la maison dont est proces: on bien si le defendeur a demandé un delay pour sommer ses garens, ou s'il a allegué litispence pour raison de mesme chose, & en a esté forclos, parce que en l'instance pour raison de laquelle il obijce litispence, estoit question d'une autre action, & separee de celle dont a present est question: comme si en l'autre instance lon agissoit possessoirement, & en la presente petitoiement. Autre chose seroit s'il auoit esté forclos de ladicte litispence parce que la chose dont est question, n'est celle dont estoit proces en l'autre instance: car en ce cas il pourroit demander encores monstree, parce qu'il appert qu'il n'est certain de ladicte chose contentieuse, d'autant qu'il auroit allegué ladicte litispence, pensant que ce fut mesme chose: & parce que c'estoit une autre, il en auroit esté debouté. Pareillement celluy qui s'est opposé a une complaincte, ne peut demander monstree de la chose pour laquelle la complaincte a esté formee, non plus que celluy qui a demandé delay de garend, car il est autāt bien certain de la chose contentieuse que l'autre. Toutesfois au siege royal de Xainctes lon garde que lon peut demander monstree iusques ad ce que le defendeur ayt defendu, parce qu'ilz disent que la monstree n'est pas tāt faicte pour certifier le defendeur, que pour instruire & certifier le iuge a fin qu'il puisse donner sentence plus certaine.

Mais

Mais ſi l'action eſt perſonnelle, le defendeur ne peut demãder monſtree, i'asoit qu'il ſoit queſtion d'une choſe immobiliãre: cõme ſi le demandeur conclud ad ce que le defendeur ayt a le faire & ſouffrir iouyr de la terre que le demãdeur luy a louee ou affermee, ou uẽdue: car lors le defendeur ne peut pretendre cauſe d'ignorance, attendu que c'eſt de ſon faiẽt. Et en ce cas ſi le defendeur le requiert, le iuge ordonne que le demãdeur baillera par declaration les choſes que lon demãde, meſmement ſ'il eſt queſtion de pluſieurs choſes, ſinon qu'il ſoit queſtion d'une choſe uniuerſelle, cõme des meubles ou des acquieſt de quelque perſonne cede & transporte: car lon n'eſt tenu les bailler par declaration au defendeur, parce qu'il fault uuyder premierement le droit, ſcauoir eſt a qui appartient l'uniuerſalitẽ, comme de meubles, ou de acquieſt. & en l'execution de la ſentence ſi le demandeur l'obtiẽt a ſon profit, il baillera par declaration par le menu les meubles ou acquieſt. Et ainſi l'obſerue lon en matiere poſſeſſoire ou reale, ſcauoir eſt qu'il n'eſt beſoing en la premiere inſtance declarer par le menu les choſes comprinſes ſoubz l'uniuerſalitẽ, ains on en attend l'execution de la ſentence. Auſſi il pourroit aduenir que la declaration ſeroit ſuperflue, ſcauoir eſt ſi le defendeur eſtoit enuoyẽ abſolũ. Mais ſi le demandeur demande nne rente fonciere conſtituee pour raiſon des domaines a luy obuenuz par ſucceſſion de ſes pere & mere, on pays de Poitou, il fault que le demandeur face monſtree d'aucunes choſes immeubles, parce que comme nous auons dict cy deſſus, on n'eſt tenu de payer une rente, ſinon tant qu'on tient les lieux baillez a rente. D'auantage il fault, qu'il ayt quelque choſe ad ce que tel transport ou arrentemẽt puiſſe ſubſiſter. Et ſi le defendeur requiert monſtree, & le demãdeur l'empẽſche, & le iuge ordonne qu'elle ne ſera faiẽte, & le defendeur en appelle,

appelle, cest appointement n'est pas reparable en diffinitive, & n'est tenu le defendeur de proceder nonobstant son appel. A ce moyen le demandeur pourra requerrir a fin que la poursuite de sa cause ne soit retardee, ne empeschee, qu'il luy soit permis de faire ladicte monstree nonobstant ledict appel, & sans preiudice d'icelluy: ce que le iuge luy doit permettre. & le semblable doit estre faict, si le defendeur debat la monstree de nullité, ou d'autre uice.

¶ La maniere de faire monstree.

Quand par le iuge la monstree des lieux est adiugee a estre faicte, le demãdeur peut requerrir assignation estre baillee a la partie ou son procureur a cõparoir a certain lieu iour & heure pour d'illec aller sur les lieux cõtentioux: ou si mieux aime, le demãdeur fera bailler ladicte assignation par un sergēt au defendeur. Et si le defendeur cõpare a l'assignatiõ, & sur les lieux, le demandeur cõparant monstrera audict defendeur la chose contentieuse, & la confrontera de deux confrontatiõs ou aboutissãs pour le moins en presence du sergēt: & luy declarera que c'est la chose qu'il entēd faire contentieuse. Et si le defendeur ne cõpare a l'assignation a luy baillee, le sergent baillera cõtre luy default au demãdeur ce requerāt, & dira que nonobstant icelluy il se transportera sur les lieux cõtentioux. & de faict se y trãsportera avecques le demãdeur, & luy monstrera le demandeur les lieux contentieux, & declarera que lesdictz lieux sont ceulx qu'il entēdoit monstrer au defendeur si presēt y eust esté. & les cõfrontera de deux aboutissans comme dessus. Et fault qu'il y ayt deux recordz ou tesmoings presens tant a l'expedition de l'assignation de la mōstree pour aller d'illec sur les lieux, que pour la uoir faire realeniēt & de faict sur lesdictz lieux. Et fera le sergent son
rapport

rapport ou proces uerbal de la monstree, lequel rapport de luy signé il baillera aux parties, si par elles en est requis.

¶ Quon doit faire au iour que la monstree est rapportee.

A la prochaine expedition le demãdeur rapportera a Cour le proces uerbal de ladiète monstree, & le mettera auant, & requerra que le defcendeur aille auant, & defende, ou die ce que bon luy semblera. lequel sera tenu d'aller auãt sur le chãp sans auoir delay pour en uenir. Et s'il dit qu'il ne tient toutes les choses monstrees, & ne les entend faire contentieuses, & n'y auoir faièt exploièt: lors le demandeur requerra la partie en laquelle le demandeur aura declairé ne pretendre droièt, luy estre adiugee sans preiudice du parsus: quant auquel il x demoureront en proces.

¶ De desseuree.

Ion auoit accoustumé parcydeuant d'user en ce cas de desseuree: qui estoit que le demandeur requeroit monstree de la partie du fond qu'il ne uouloit cõtendre: & luy estoit adiugee. Mais c'estoit chose superflue: car le demãdeur qui intente action, doit estre certain de la chose qu'il demande: & en ce faisant, il retarde sa matiere: au moyẽ dequoy apresẽt lon n'en use gueres.

¶ Du delay de garẽdz: & si le delay de monstree est tollu par les ordõnances dernieres, ou non.

Quand la monstree a esté faiète & rapportee en iugemẽt, le defcendeur requiert delay pour appeller ses garẽdz: & luy est seulẽmẽt baillé un delay pour ce faire, selon la distance des lieux dont il cõuient appeller les garẽdz: car tous autres delays, soit d'aduís, absence, attente de conseil, sont aboliz par les ordonnances dernieres article xviij. sinon que pour euidente & grande cause le iuge peut bailler un delay pour tous au defendeur

defendeur, iasoit que l'adiournement soit libellé. De ce ont prins aucuns coniecture que le delay pour faire la monstree, est aboly: mais ie ne trouue bonne leur opinion: car la monstree est ordonnee pour le fondement du iugement, & non seulement pour le defendeur, mais aussi pour l'instruction du iuge.

¶ La maniere de sommer & adiourner en gariment & requeste formelle.

La maniere de somer et appeller le garēd, c'est qu'il luy fault faire signifier le registre de la demande du demandeur: & si monstree a esté faicte, luy confronter la chose contentieuse selon les confrontations de la monstree, & le sommer de uenir porter gariment en la matiere, & l'adiourner pour ce faire pardeuant le iuge du lieu ou est le proces pendant. & est le plus seur de laisser un double du registre du proposé ou demande du demandeur & de la monstree, parce que aucuns sergens ne scauent pas bien delairer la substance du registre de la demande & monstree. Et pource que nul ne compare en l'adiournement a luy baillé en gariment s'il ne ueult, & n'est tenu de payer aucuns despens ne amende de default qu'il faict, aumoins sinon apres qu'il est succumbé en la requeste formelle contre luy intentee, faulte d'auoir prins le gariment: de present lon a amené un siile, que l'adiourne le garēd pour porter garimēt en telle matiere que lon declaire, comme dict est: & en cas de refus ou delay de prendre le gariment, pour uenir respondre a la requeste formelle que lon entend intenter a ce que le garēd ayt a descharger celluy qui l'appelle en gariment du proces auquel il l'appelle, & icelluy proces faire cesser, & le desintresser de la poursuite ia faicte & a faire. Car quand l'adiournement est ainsi faict, si l'adiourné en garimēt se default, celluy qui l'appelle,

pelle, fait ſes proteſtations cõtre luy de tous ſes deſpens dom-
mages & intereſtz qu'il ha eu & aura a default de ce que
l'adiourné n'a prins le garimēt de luy: & neãtmoins propoſe
ſa demãde en requête formelle ſelon ſon exploiēt dudiēt ad-
iournement. Le iuge donne default, & ordonne qu'il ſera ad-
iourné ſur default, & avec intimation pour nenir reſpondre
a la requête formelle: car par leſdictes ordonnances article
xxi. il ne faut que deux defaultz en matiere de recours de
garēdie: & par uertu d'iceulx apres la uerification du cõtenu
de ſa demande, ſera donnee ſentence contre le deſaillant.

¶ En quelz cas on eſt receu a prendre le garimēt
formel, & le garenti mis hors proces.

ſi l'adiourné en gariment compare, il doit auoir un delay
ſ'il le requiert, pour appeller autre garend, & commiſſion li-
bellee, ſuiuant leſdictes ordonnances article xix. Et ſ'il uult
prēdre la garēdie, il y doit eſtre receu, & le deſēdeur enuoyé
hors de Cour, en tant que le garend luy portera bon garimēt,
pourueu que la matiere ſoit reale, ou poſſeſſoire, & que la cau-
ſe ne ſoit cõteſtee. Mais ſi la matiere eſt perſonnelle, ou que la
cauſe ſoit cõteſtee, la partie aduerſe peut empescher que le
deſendeur ne ſorte hors de Cour & de proces: & n'eſt le ga-
rend receuable en ce cas que a aſſiſter en proces avecques cel-
luy qui l'a appellé en gariment.

¶ A quelle fin eſt bon que le garenti demeure en
proces, & quand l'exécution de la ſentence ſe
faict contre le garenti comme contre le ga-
rend.

Et cõbien que le deſendeur qui a appellé en gariment, puis-
ſe ſortir de proces, neantmoins ſ'il doubte que celluy qui a
pris le gariment, ſoit pour colluder ruezques le demãdeur,
il ſera pour le mieulx qu'il demeure en proces aſſiſtent avec-
ques

ques celluy qui a prins de luy le garimēt: car s'il s'en alloit du proces, la transaction que celluy qui auroit prins le garimēt, feroit avecques partie aduerse, nuiroit & preiudicieroit a celluy duquel auroit esté prins le garimēt: comme aussi la sentence donnée contre le garend, est executoire contre le garanti, tout ainsi que contre le condāné, sauf des despens dommages & interestz, dont la liquidation & execution se fera contre le garend seulement, suiuant lesdictes ordōnances article xx. pourueu que le garend soit soluable pour lesdictz despens dommages & interestz: car s'il n'est soluable, l'execution s'en fera contre le garanti. & sera bon en ce cas d'appeller le garanti a la taxation & liquidation desdictz despens dommages & interestz pour y comparoir si bon luy semble, pource que lon entend auoir recours contre luy, pour autant que le garend n'est soluable.

¶ Quand on doit faire monstree au garend.

Quand l'action est reale ou possessoire, & le defendeur n'a eu monstree de la chose cōtentieuse, & neantmoins prēd delay de garend, & l'appelle: celluy qui est ainsi appelé en gariment, peut demander que le defendeur luy face monstree, s'il n'est appelé pour porter gariment de chose qui soit de son faiēt: car si c'est de son faiēt, comme s'il a uendu la chose, il ne peut demander monstree. Et est a imputer au defendeur, qu'il n'a requis monstree auant que prendre delay de garend, & pourceil ne peut plus requerir monstree apres ledict delay de garend par luy prins: comme dict est cy dessus.

¶ Le garend ne peut rien dire pour empescher la poursuite du principal, sinon demander delay pour attaire autres garendz iusques ad ce qu'il ayt prins le gariment.

Et n'est le garend receuable a rien dire pour empescher la poursuite du proces principal d'entre le demãdeur & defendeur, iusques ad ce qu'il ayt prins le garimẽt: car il n'est encores partie: fors qu'il peut seulement par l'eslĩctes ordonnãces requerrir delay pour amener & attraire autres garendz.

¶ Iusques a quel temps on peut sommer en gariment.

Et iasoit que celluy qui est poursuiui pour raison de quelque fond, ou deuoir real, ne soit seigneur du fõd, ains l'exploĩcte seulemẽt, toutesfois il est bien conuenue, & ne peut requerrir estre enuoyẽ, ains fault qu'il appelle a garend celluy au nom duquel il exploĩcte. Et peut lon sommer en gariment, iusques a ce que la matiere soit en droict, voire en la cause d'appel, & intenter requeste formelle, parce que l'appellẽ a garẽd peut encores asister au proces, & alleguer faĩctz nouueaux, & les prouuer, & faire nouuelle productiõ: & ne sera en ce empeschẽ pour la publication de l'enqueste faĩcte en la premiere instance. Vray est que le tout se doit faire sans retardement du proces principal, & que l'assistent ne le peut retarder, si partie aduerse ne le ueult: mais la partie aduerse ne le doit empescher, a fin qu'il ne soit en peine d'obtenir deux sentences pour'une. Et oultre doit l'assistent refondre les despens des responses, preuues, ou contredictz que partie aduerse fera au cõtraire desdictz faĩctz nouueaux, preuue d'iceulx, ou productiõ nouuelle. car cõme il est equitable, que un tiers ne soit priuẽ de sõ droict facilemẽt, aussi est raison q̃ ce soit sans l'interest d'autrui. Et seroit la partie aduerse grandement interessee & endommagee, s'il luy falloĩt faire a ses despens nouuelles responses, & preuues, & nouueaux contredictz. Et ainsi en a estẽ dict par arest.

Et si on n'ha prins requeste formelle du cōmencement apres auoir appellé ses garendz, & qu'ilz se sont defailliz, ou repudié le gariment, & celluy qui les a appellé a perdu sa cause, il peut poursuir lesdictz appellez en gariment par action hypothecaire, s'il ha obligation de biens pour ledict gariment, ad ce que son auteur ayt a le desintresser & rendre indemne dudict proces, tant en principal, que accessoire, si mieulx il n'ayme deguerpir par hypothèque au demandeur les biens affectz & hypothèquez. Et ainsi ay ueu iuger par iuge bien docte & experimenté: lequel oultre par sa sentence ordonna, que les biens hypothèquez seroient mis en crie, & uendus au plus offrant & dernier encherisseur, a fin que des deniers qui en isteroient, fust satisfait de sondict interest. ce que ie trouue un peu bien rigoureux: ueu que l'interest n'estoit encores liquidé.

¶ Quelles personnes doibuent estre appellees en gariment.

Et ne suffit appeller en gariment le procureur fiscal ou general d'une Baronnie, Chastellanie, ou autre seigneurie en un proces qui seroit pēdāt en autre Cour que en celle du seigneur Barō, Chastellain, ou autre: ains cōuiēt adiourner les seigneurs en la maniere predictē au traicté des adiournemens cy dessus.

¶ En quelz cas le procureur general ou fiscal peut preiudicier a son seigneur.

Car un procureur fiscal hors la Cour de sa seigneurie ne peut preiudicier a son seigneur, sinon qu'il face quelque acte dependant de son office, & concernant la iurisdiction de sa seigneurie, cōme demander les obeissances, & reuoy des causes appartenā a la iurisdiction de sadicte Cour: car en ce cas il peut preiudicier a son seigneur.

Quand

¶ Quand le demandeur doit demander delay de garendz.

Le demandeur semblablement quand il a oy les defenses du defendeur, peut demander auant que contester cause, un delay pour appeller garend: que nous appellons en pratique appeller garend en replique. Et y sera tout ainsi procedé, comme quand le defendeur appelle garend.

¶ Peine de n'auoir appellé garēdz dedēs le delay.

Et si celluy qui a prins ledict delay, n'a appellé ou faict adiourner son garend, & qu'il n'informe de relation de l'adiournement: en ce cas la partie aduersē peut demander les despēs dudiect delay frustratoire, qui sont communement les despens ordinaires de la Cour ou est le proces pendant.

¶ Des despens preiudiciaux.

Et ces despens sont nommez despens preiudiciaux: car ilz doibuent estre payez auāt entrée de plaid, & que celluy qui les doit, soit receu a rien dire a la prochaine assignation de la matiere: & si celluy auquel ilz sont deuz, ne les demande a la prochaine expedition, ilz sont couuertz, c'est adire qu'il ne les peut plus demander par preiudice, scauoir est auant que celluy qui les doit, soit receu a rien dire. mais celluy auquel ilz sont deuz, pourra demander au iuge qu'il luy soit permis de proceder par executiō pour lesdictz despens sur celluy qui les doit: & le permet le iuge. Et peut le iuge, s'il a omis a condamner la partie en ces despens preiudiciaux, cōme pour auoir mué sa demande, ou pour auoir innoué & attenté pendant proces, encores faire la condamnation desdictz despens iusques a diffinitue. mais il fault sur ce oyr la partie aduersē, qu'on ueult condamner, parce que ce sont interlocutoires: qui se peuuent reuoquer, & retracter, en faisant raison des despēs de la retractation: & aussi se peuuent elles reparer en ce qui y a esté omis.

¶ Purgation de demeure n'est receue pour rabatre despens : & qu'on ne peut auoir double profit d'un default.

Et sont telz despens deux generallyment quand l'une des parties ne faict ce qui est ordonné par le iuge, dedens letēps prefix: & iasoit qu'elle jist ce qui est ordonné, le lendemain après le temps escheu & passé, toutesfois elle ne laisseroit de payer lesdictz despens: sinon qu'il y eust forclusion de faire ce qu'elle estoit tenu faire, ueu le default, ou negligence: car en ce cas il ne seroit equitable que la partie negligent fust punie de la forclusion, & de la peine desdictz despens: ne que partie aduerse eust ce double profit de ladiète negligence, & luy suffist de auoir ladiète forclusion.

¶ Quand apres le gariment prins on peut reuenir au garenti qui a esté mis hors proces.

Et iasoit que aucun ayt prins le garimēt formel d'une des parties, s'il se default, ou ne fournit a l'appoinctement du iuge, la partie aduerse peut requierir que le garenti soit adiourné pour uenir proceder en la cause selō les derniers arremēs: & le iuge l'octroye, parce que le garenti n'est enuoyé hors de Cour & de proces sinon partant que le garend portera bon gariment: ce qu'il ne faict quand il se default, & ne obeyt a l'appoinctement du iuge.

¶ Il fault soy adresser en gariment alencōtre de celluy dont on ha droit immediatemēt, & non contre celluy dont son aucteur ha droit.

sur ce passage a esté autrefois meue ceste difficulté. si ie uous ay uēdu quelque fond, uous le uēdez a un tiers, qui est mis en proces pour raison de ce fond. il m'appelle en garimēt, ie default au iour, ou repudie le gariment. apres il agit contre moy en recours de garendie. ie defendz & dix qu'il ne se

se pouuoit adresser a moy, parce qu'il n'a contracté avecques moy. Il replique & dit auoir cōtracté avecques celluy qui ha cause de moy, & auquel i'estoye tenu porter garimēt, & que pour euitier circuit, il se peut adresser a moy. ie duplique allegant qu'il ne se peut adresser a moy, parce que auourd'huy auant que lon se puisse adresser au tiers possesseur des biens obligez, il fault auoir rendu excus & n'en soluable le principal. Et furent aucuns scauans aduocatx de cest aduis, qu'il falloit s'adresser en gariment & recours de garēdie a celluy duquel immediatement lon ha droict & cause.

¶ Erreur en practique de faire adiourner sur default & avec intimatiō en garimēt: & que lon ne paye despens de defaultz en garimens.

Il y a un erreur en practique qui se commet ordinairement en ces matieres: car aucuns apres que leur garend s'est defailli au iour assigné pour porter gariment, ilx le font adiourner sur default & avec intimation en gariment: ou ilx debueroient intenter requeste formelle en la maniere susdictē: car s'il y auoit plusieurs defaultz donnez en telx adiournemēs en gariment, l'adiourné en gariment ne seroit tenu en payer despens n'amende: car en adiournement en gariment lon ne compare qui ne ueult.

¶ En prenant delay de garend, on approuue la iurisdiction.

Auparauant que le defendeur prenne delay de garend, il fault qu'il aduise & considere s'il est bien cōuenu: car apres qu'il auroit prins ledict delay, il ne pourroit pas demander son reuoy pardeuāt son iuge, parce que lon approuue la iurisdiction en laquelle lon demāde ledict delay. Pource seble que ie debuoye premieremēt traicter des renuoyx, que de traicter

des garendz. Toutesfois la cause pour laquelle ie l'ay ainsi faict, est a fin que par ordre ie traictasse toutes les exceptions, dont l'une & la premiere est l'exception declinatoire: ce que n'eusse faict, si i'eusse traicté premierement des renuoyz, que d'auoir traicté des garendz.

¶ Des renuoyz, & fins declinatoires: & en quelles matieres on doit conuenir le defendeur pardeuant le iuge de son domicile.

Or pour uenir aux renuoyz en action personnelle, le defendeur doit estre conuenu pardeuant le iuge de son domicile, uoie si l'action ensuit la chose dont est question: ou bien si elle naist de la coustume escripte du pais ou de la region, comme en matiere de retraict lignagier, la faculte duquel est dōnee par les coustumes presque toutes de ce royaume: iasoit qu'aucuns fassent une distinction, scauoir est quand lon fait le retraict a celluy qui a acquis, que lors il fault necessairement le faire conuenir pardeuant son iuge domiciliaire, & que lon ne peut le faire conuenir pardeuant le iuge du lieu ou la chose est assise. Mais quand lon uient par retraict contre celluy qui est tiers possesseur, & a acquis la chose du premier possesseur, & que lors l'action est beaucoup plus reale qu'en l'autre cas: lon peut faire conuenir le possesseur de la chose pardeuant le iuge du lieu ouquel est situee la chose, ou bien pardeuant son iuge domiciliaire.

¶ En matiere de retraict lignagier ou doit le defendeur estre conuenu: & qui est iuge competent en action reale.

Toutesfois ie seroye d'aduis qu'en l'un ou en l'autre cas lō deburoit tousiours faire conuenir en retraict lignagier le defendeur refusant l'offre pardeuant son iuge domiciliaire: car en tous cas il ne peut lors dire qu'il soit mal cōuenu, soit l'ac-

tion

ction personnelle, ou reale: car il est cler qu'en action reale lon peut faire conuenir le defendeur ou bien pardeuant son iuge domiciliaire, ou bien pardeuant le iuge du lieu ou est la chose situee. Toutesfois en reinte grande, parce qu'elle sent plus de personnalité que de realité, partant qu'il est question de spoliacion, le defendeur doit estre conuenu pardeuant son iuge domiciliaire.

¶ Quel seigneur peut demander le renuoy ou obeissance de la cause: & que les iurisdicions en ce royaume sont patrimoniales.

Et combien que le defendeur consente playder pardeuant iuge competent, neantmoins le seigneur en la iurisdiction duquel le defendeur demeure, peut demander le renuoy, si l'action est personnelle. Et si elle est reale, le seigneur de la iurisdiction en laquelle la chose est assise, peut demander le renuoy de la cause. le quel renuoy en ce pays de Poictou est nommé obeissance, quand l'inferieur iuge demande pardeuant son seigneur le renuoy. Et n'y a difference, si la cause est contestee, ou non: car en quelque estat qu'elle soit, pourueu qu'il n'y ayt sentence diffinitive donnee, ledict seigneur peut demander le renuoy: iasoit qu'il fust question d'un cōtract passé soubz autre Cour ou iurisdiction: parce que les iurisdicions en ce royaume sont patrimoniales. Et pour ceste cause il n'est permis uoire auecques lettres royaux distraire quelcun de deuant son iuge ordinaire.

¶ Deux remedes pour se pourvoir alencontre des lettres royaux enervatiues de iurisdiction.

Il est uray que celluy qui le distraict, ne perd pas sa cause, comme il deuroit selon droit cōmun. Mais il y a deux remedes pour y pourvoir: lun, que celluy qui est ainsi distraict, peut se porter appellāt de l'exectiō de telles lettres royaux, quād

lon luy baille adiournement par uertu d'icelles, & declairer l'appel au sergent, & le requerrir de l'emploier par son proces uerbal, & prendre de luy ledict proces uerbal signé. & n'est lors mestier de comparoir pardeuāt le iuge, pardeuant lequel il est adiourné: ou bien si l'adiourné n'en appelle lors de l'adiournement, il peut comparoir au iour a luy assigné, & declairer qu'il compare seulement pour dire & declairer qu'il est appellant de l'exécution desdictes lettres royaux. Autrement le default qui seroit contre luy donné, seroit ualable. L'autre moyen est, que l'adiourné peut aller pardeuant le iuge au iour prefix, & demander estre renuoyé pardeuant son iuge ordinaire, lequel il declairera.

¶ Des despens de l'adiournement baillé pardeuant iuge incompetent.

Et ce remede est meilleur & plus seur que l'autre: car en usant de ce second remede, il ne se met en danger de l'amen- de du fol appel. Aussi qu'il ha par ce moyen ce qu'il deman- de, scauoir est son renuoy, comme il auroit par le moyen du- dict appel. Et si ha les despens de l'adiournemēt a luy baillé pardeuant ledict iuge incōpetent, qui parfois les adiuge, mais souuent il sauue & reserue a en estre faict raison par celluy auquel il renuoye: ou bien, & qui est le plus usité, il reserue lesdictz despens en diffinitue.

¶ Quand on ne peut demander son renuoy sans l'adionction du procureur de sa iurisdiction.

Toutesfois quand le defendeur est conuenu pardeuāt son iuge superieur & de ressort, & il est reuoyé pardeuāt son pre- mier iuge, il n'ha aucuns despens, & ne sont reseruez: car il est bien conuenu, tellement qu'il ne peut lors demander estre reuoyé pardeuant son premier iuge, si le procureur de la sei- gneurie a laquelle il doibt estre renuoyé, ne demāde avecques luy

luy le renuoy ou obeissance: il ne doit estre renuoyé: par maniere que comme un defendeur & le procureur de la seigneurie eussent demandé certain reuoy, & eust le demandeur prins terme d'en uenir, & le seigneur de ladicte seigneurie ce pendant fust decedé, au moyen dequoy ledict procureur d'icelle seigneurie eust declairé ne uouloir persister en son renuoy, & neantmoins le iuge les eust renuoyé, le demandeur en appella, & gaigna sa cause es grans iours tenuz a Angiers le Lundy xiiij. de septembre M.D.XXXIX.

¶ Le seigneur peut demander le renuoy de son subiect en la cause d'appel interiecté par son subiect du deny du renuoy: mais ne peut appeller dudit deny, s'il n'a requis le renuoy.

Et iasoit que le seigneur ou son procureur n'ait demandé le renuoy de son subiect, & que son subiect soit appellant du deny du renuoy, le seigneur en la Cour de Parlemēt peut en plaidant demander le renuoy de la cause: mais il ne peut appeller du deny du renuoy, s'il n'a requis le renuoy avecques son homme.

¶ Le subiect peut poursuiure son appel du deny du renuoy sans son seigneur, si ledict seigneur l'a vne fois requis.

Et si le seigneur & son homme ont une fois demandé le renuoy, & qu'il leur ayt esté denié: combien que le seigneur n'en appelle, neantmoins son subiect en pourra appeller, & poursuiure seul son appel sans son seigneur.

¶ Difference en la maniere d'alleguer incompétence.

Il y a difference grande, si en proposant declinatoire, le defendeur dit seulement qu'il n'est de la iurisdiction du iuge par
i iij devant

deuant lequel il est cōuenu, ains d'autre iurisdiction, qu'il doit declairer, & parce mal conuenue, & requiere estre enuoyé auecques despens: ou s'il demande estre renuoyé pardeuant son iuge auecques despens. car quand au premier cas s'il est renuoyé de l'adiournement, il fault que le demandeur propose de nouveau sa demande. Et par ce moyen si ce pendant la complainte ou autre action intentee expire, le demandeur en est debouté par fin de non receuoir: car l'adiournement baillé pardeuant iuge incompetent, ne perpetue point l'action, & n'interrompt prescription.

¶ Quand en faisant renuoy, l'instance est renouee.

Mais la Cour de Parlemēt iugeant d'equité, quand elle uuy de telles causes contre celluy qui estoit demandeur, elle a acoustumé de renuoyer la cause auecques ceste clause, sans ce que l'action soit ou puisse estre perie. Mais en l'autre cas quād le defendeur demande simplement son renuoy pardeuant son iuge, & qu'il luy est octroyé, son action est renouee: & n'est plus mestier de la proposer plus.

¶ Le iuge pendant le proces de deux seigneurs demandans le renuoy, ne peut cognoistre du principal.

Et s'il y a deux seigneurs de diuerses seigneuries qui demandent le renuoy: le iuge auquel ilz demandent ledict renuoy, ne peut pēdant proces dudit renuoy d'entre lesdictz seigneurs, cognoistre de la cause principale de laquelle est demandé le renuoy.

¶ Quand le defendeur peut demander son renuoy sans l'adiunction du seigneur.

Et quād le defendeur est cōuenue pardeuant un iuge Royal du ressort duquel il n'est, ou quand il est conuenue pardeuant

un inferieur non estant son iuge: il peut demander son renuoy sans l'adiunction du procureur de la seigneurie a laquelle il est subiect: comme si un du ressort de Fontenay est conuenu pardeuāt le seneschal de Poictou ou son lieutenant a Poictiers. Mais cecy doit estre entendu, quand le proces est pendant en pays coustumier: car quand c'est au pays de droict escript, l'homme ou subiect peut demander son renuoy sans son seigneur: cōme il fut dict par arest a Paris le xi. de May M.D. XXX. sinon que ledict subiect ayt prorogé iurisdiction.

¶ Quand on adiuge preuue sur le renuoy.

si les parties s'accordent du domicile du defendeur, ou de la iurisdiction en laquelle est la chose assise, le iuge doit uuyder le renuoy sur le chāp, sans en faire un proces par escript. Mais si elles ne s'en accordent, le iuge peut ordonner qu'elles en feront preuue tant par tesmoins que par tiltres dedens certain temps. Et ont accoustumé les iuges le plus souuent limiter le nombre des tesmoins, comme iusques a cinq ou six.

¶ Si le defendeur peut estre releué d'un acte approbatif de iurisdiction.

Et si le defendeur a fait quelque acte iudiciaire approbatif de la iurisdiction incompetent, & il soit appellant du renuoy, il peut auoir lettres royaux pour estre releué dudit acte, pourueu qu'il n'y ayt eu quelque approbation expresse, ou cōtestation en cause: comme si le defendeur auoit demandé & eu delay de garendz, par lequel il est ueu approuuer la iurisdiction, ainsi que dessus est dict. Et ce fut confirmé par arest donné es grās iours de Poictiers le xix. iour d'Octobre M.D. XXXI.

¶ Le lieutenant ciuil ne peut cognoistre des causes crimineles, ne le criminel des ciuiles.

Pour scauoir qui est iuge competent, est a noter, parce que

que en plusieurs sieges la iurisdiction criminele est eclipsee & ostee de la ciuile, que le Lieutenãt ciuil ne peut cognoistre des causes crimineles, ne le criminel des ciuiles, uoire y eust il lettres royaux portans commission a eulx adressans. Toutesfois la Cour parfois commet des causes crimineles aux iuges ciuilz : signamment quand les criminelz ont erré en la facon du proces criminel.

¶ Des causes dont la cognoissance appartient aux iuges royaux, & non a autres.

Toutesfois il y a certaines causes & cas royaux dont la cognoissance en appartient aux iuges royaux, en sorte que les autres iuges n'en peuuent cognoistre. Aussi il y a autres cas desquelz les iuges royaux cognoissent par preuention, en maniere qu'ilz ne sont tenuz en faire renuoy: mais auant que les iuges royaux ayent preuenu, les autres iuges ordinaires non royaux en peuuent cognoistre, & ne les peuuent les iuges royaux euoquer.

¶ Les iuges royaux peuuent euoquer les causes dont la cognoissance leur appartient, non autres.

Mais quant aux autres cas royaux, combien qu'ilz soient premierement intentez pardeuãt les iuges non royaux, neãtmoins ce requérant le procureur du Roy, les iuges royaux chascun d'eulx en son ressort les peuuent euoquer. & entre iceulx cas sont premierement les causes qui touchent le domaine du Roy, ou ses tailles & aydes. Plus, les causes des francz fiefz, & admortissemens des choses tenues du Roy mesmement lesquelles sont transportees a gens d'eglise, ou uiennẽt en autre mainmorte. Oultre, s'il est question de quelque commission ou priuilege baillé par lettres patentes du Roy. Ou s'il y a proces des domaines & droictz d'une eglise

eglise de fondation Royale, & laquelle ha lettres patêtes de garde gardienne du Roy : car chascun iuge Royal cognoit en son ressort des droictz & domaines de ladicte eglise assis & estans en son ressort, non pas d'autre ressort, iasoit que les lettres de garde gardienne soient adressans a quelque iuge Royal particulierement, & specialement.

¶ Comment doit estre faicte euocation de cause.

Et est l'euocation faicte par le iuge Royal par un mandement ou prouision signé de luy & de son greffier. Et quand elle est faicte au grād Conseil ou en la Cour, elle est faicte par lettres patêtes du grand seel & a double queue, octroyees par le Roy. Et celluy qui procure ladicte euocation, est tenu faire porter les sacz & pieces de la matiere qui sont pardeuant le iuge duquel lon euoque la cause.

¶ Le Seneschal peut euoquer la cause pendant pardeuant son Chastellain estant de mesme seigneurie, & non d'autre : & quand le iuge superieur ha cognoissance sur son inferieur.

Et iasoit que par la coustume de ce pays de Poictou article vi. le seneschal du seigneur Barō ou Chastellain puisse euoquer les causes pendans perdeuant le iuge Chastellain ou preuost son inferieur, & de mesme seigneurie, auāt cōtestation en cause, & s'il y a cause legitime, laquelle icelluy seneschal est tenu exprimer par ses lettres d'euocation: qui est une forme generale a toutes euocations: toutesfois le seneschal ne peut pas euoquer une cause pēdāt en la Cour d'autre seigneurie, laquelle ne n'appartiēt audiēt mesme seigneur Barō, iasoit que ladicte Cour & seigneurie soit tenue dudiēt Barō, & que les appellatiōs de ladicte Cour ressortissent pardeuāt lediēt seneschal: parce que ce seroit en la puissance du seigneur superieur de
diminuer

diminuer la iurisdiction de son inferieur, & aussi que sur icelle le seigneur superieur n'a iurisdiction qu'en cas de ressort, qui est par appel. Ne semblablement les iuges royaux n'ont iurisdiction sur les Barons ne es terres d'iceulx, sinon es cas de ressort, qui est en appellations. & pour ceste cause fut dict par arrest donné es grans iours de Poictiers le x. iour d'Octobre M.D.xxxi. qu'il auoit esté mal procedé par le lieutenant general de Poictiers ou son assesseur, qui auoit euoqué une cause pendant pardeuant le seneschal d'une seigneurie ressortissant audict lieu de Poictiers.

¶ Cas auquel on peut appeller omisso medio.

Et si le seneschal du seigneur Baron duquel est la cause euoquée, n'en faict compte, & ce nonobstant cognoisse de la cause, & l'une des parties appelle dudit seneschal, l'appel ne doit pas estre releué pardeuant ledict iuge moyen qui a decerné ladicte euocation: car il cognoistroit en sa propre cause: mais il doit estre releué au cas susdict en la Cour de Parlement, ledict moyen iuge laissé. Et combien qu'aucuns tiennent que quand lon appelle comme de iuge incompetent, lon peut laisser le moyē iuge, et releuer pardeuant le superieur du moyē: toutesfois ie ne seroye d'aduis de l'entendre sinon au cas cy dessus declairé, ou autre semblable, ou le iuge moyen auroit interest en la cause. & ainsi en fut dict & decisi par arrest du x. iour d'Auril l'an M.D.XXI.

¶ Quand on peut appeller a la Cour de Parlement d'un appoinctement donné par les Eleuz.

Mais si quelcun estoit conuenu pardeuant les Eleuz qui cognoissent des tailles aydes & equiualens du Roy, pour raison de quelque cause qui ne touchast lesdictes tailles aydes ou equiualens, & il requist estre renuoyé pardeuant son iuge ordinaire, & le renuoy luy fust denié, il pourroit se porter
appellant,

appellant, & releuer son appel en la Cour de Parlement a Paris: & ne seroit en ce cas adstrainct releuer pardeuant messieurs les Generaux & Conseillers sur le faict de la iustice a Paris: cōbien que regulieremēt & en toutes matieres d'appel qui concernent lesdictes tailles aydes ou equiualeus, il faille releuer pardeuāt eulx: car au cas presnt milite & ha lieu la raison deuant dicte: scauoir est que mesdictz seigneurs les Generaux y ont interest. Et ainsi a esté tenue une appellation interiectee desdictz Eleuz pour bien releuee en ladicte Cour de Parlement, & l'intimé condāné enuers l'appellant es despens de la cause dudiect appel qui auoit esté interiecté du deny d'un renuoy faict par lesdictz Eleuz.

¶ Les causes esquelles y a preuention entre les iuges Royaux, & autres.

Quant es causes esquelles il y a preuention entre les iuges Royaux & autres inferieurs, lesdictes causes sont causes de cōplaincte en cas de saisine et de nouuelleté, par maniere que les iuges des seigneurs tenans en perrerie n'en peuuent demander le renuoy: iasoit que les choses dont est question, & le defendeur soient de leur iurisdiction, quand elles sont intētees pardeuant le plus prochain iuge Royal.

¶ Le iuge du prochain siege Royal cognoit des causes priuilegiees dont la cognoissance en appartient au Roy alencontre des iusticiables des iurisdiccions tenues en perrerie.

Mais si elles ne sont intētees pardeuant le plus prochain iuge Royal, ilz peuuent requerir icelles estre renuoyees pardeuant le plus prochain iuge Royal. A ceste cause comme quelques subiectz de la principauté de la Roche suryon tenue en perrerie, eussent esté conuenuz en complainctes pardeuant le Seneschal de Poictou ou son Lieutenant a Poictiers
pour

ponr raison de quelque chose situee au dedens ladicte principauté, & eussent lesdictz defendeurs avecques le procureur fiscal de ladicte principauté demadé le renuoy estre faict audict lieu de la Roche suryon, lequel leur eust esté denié, lesdictz procureur & defendeurs en auroiēt appellé. Mais par aduis de notables aduocatx de la Cour de Parlement a Paris, ilz prennent lettres royaux, par lesquelles leur appel est mis au neant, & est mandé au iuge duquel il auoit esté appelé, de les renuoyer pardeuant le plus prochain siege Royal, qui est en la uille de Fontenay le conte. Lesdictes lettres sont presentees, & l'enterinement requis: qui est consenti quant a l'appel mis au neant, mais au renuoy sont debatues. Le Seneschal de Poictou ou sondict lieutenant en deboute les demandeurs esdictes lettres royaux quant a ce chef dudict reuoy: dont ilz appellent, & obtiennent par arest: & fut le renuoy faict audict Fontenay.

En oultre les iuges royaux cognoissent d'execution de testament quant es laiſ aux causes pitoiables seulement: comme aussi en peut cognoistre l'Euesque ou so Official: ainsi que fut dict par arest le xiiij. de Decembre M.D.XV. toutesfois ledict Euesque ne peut cognoistre de ce qui en depend, comme si lon demande son interest, parce que le laiſ ou legat n'a esté payé dedens temps. Et pource le iuge d'eglise qui decerne citation cōtre les executeurs de testamēt, doit mettre par la citation ceste clause, scauoir est, quāt es laiſ faictz aux piteuses causes contenus par ledict testament. autrement l'executeur ha matiere de se pouruoir par appel cōme d'abus de Poctroy & execution de ladicte citation. Et ainsi en fut dict par arest le xxij. de Feburier M.D.XXIX. il y a plusieurs autres causes dont la cognoissance appartient aux iuges royaux: mais parce qu'elles sōt a plein specifiees & declarees par les ordonnances

ordonances royaux faiçtes ſur la diſtinction de la iuriſdiction des iuges preſidiaux reſſortiffans ſans moyen en la Cour de Parlement, & des iuges Chaſtellains & preuoſtaux, faiçtes le xix.iour de iuing l'an M.D.XXXVI. et publiees en la Cour le xvi.iour d'Auril l'an M.D.XXXVII. apres paſques, leſquelles ſont imprimees: ie ne les ay point uolu tranſplanter ne transporter en ces preſentes: parce auſſi qu'elles n'euffent peu y eſtre plus briefuement redigees par eſcript, qu'elles ſont par leſdictes ordonances, quequeſoit, ſans en oſter quelque choſe de ſubſtance. Auſſi y a autres cauſes dont la cognoiſſance en appartient aux iuges royaux: mais parce qu'el les concernent les matieres crimineles, nous reſeruons a les traicter avecques icelles matieres.

¶ Eſquelz cas vn clerc peut eſtre conuenu par deuant vn iuge lay.

Il me ſemble qu'il ſera bien a propos traicter icy les cauſes eſquelles les preſtres & clercs peuuent eſtre cōuenux pardeuant les iuges royaux & autres iuges layx ſelon la commune & ancienne uſance de ce Royaume: & ſont leſdictes matieres en premier lieu quand il eſt queſtiō d'action reale ou poſſeſſoire, iaſoit que lon traicte de la poſſeſſion d'un benefice ou d'autres choſes ſpiritueles: plus matieres de Regales, matieres d'affeureté quād les gens d'eglise ſont trouuez en iugement, & lon demande contre eulx affeureté: autrement ſ'ilx ne ſont trouuez en iugement, il les fault conuenir en affeureté pardeuant leur iuge d'eglise. En oultre ſont bien conuenux leſdictx gens d'eglise pardeuant les iuges layx en matieres d'in iures dictes ou faiçtes en Cour laye, ou a ſergent lay en exerçant ſon office, ſi le demandeur tend ſeulement a reparation pecuniaire. Auſſi pour recognoiſtre ou nier leurs ſings,

ou pour les arrierages de quelques rentes feodales ou foncieres, iasoit que les arrierages soient personclx. d'auantage pour la reparation des maisons & dommaines de leurs benefices, ou pour les aumosnes & autres charges reales de leurs benefices non faictes, ou pour porter tesmoingnage en cause ciuile, ou pour rendre & restituer la chose a eulx baillee comme depositaires de iustice par ordonnace de iuge lay, ou pour rendre compte d'une tutele a eulx baillee par les iuges layx, ou d'autres negociations seculieres qu'ilz ont publiquement exercé, comme fermes: ou pour reprendre ou repudier un proces auparauint pendant auecques une personne laye a laquel le ilz ont succédé: ou s'ilz ont procuré transport leur estre faict d'aucune chose en fraude de la iurisdiction laye, scauoir est pour oster la cognoissance de la cause ia meue pour raison de ladiete chose pardeuant le iuge lay. Ou s'ilz ueulēt impugner & debatre quelque acte iudiciaire faict par un iuge lay. Et cōbien qu'en ce cas ilz soient ueux estre plus demandeurs que defendeurs: toutesfois a la uerité ilz sont defendeurs.

¶ Des matieres de regales.

Pource que nous auons parlé de regales, & que la matiere d'icelles n'est pas commune, conuient exposer qu'est ce que le droit de regales. Fault entēdre que ledict droit est, qu'il y a certains eueschez & archeueschez en ceroyaume, lesquelz sont de fondation royalle, & sont les fiefx & dommaines de la fondation tenux de la couronne a foy & hommage: & quand ilz sont uacans, le Roy ou ses officiers de par luy commettēt commissaires pour en prēdre & perceuoir les fruietx profietx reuenux & emolumens tant qu'ilz seront uacans, & que le successeur ayt esté receu par le Roy ou ses deputēz aux foy & serment deūx & accoustumēx. Et ce pendant

dant si uacquent aucuns benefices ou offices, qui soient en la collation de l'Euesque ou Archeuesque, le Roy les confere. Et doibuent telles matieres de regales estre intentees en la Cour de Parlement. Et peuuent estre meues possessoirement, ou petitoirement, comme autres matieres : scauoir est possessoirement, dedens l'an & iour : & petitoirement, dedens trente ans.

¶ Vn prestre ou clerc ne peut estre cōdamné par vn iuge lay a garnir la main apres la recognoissance de la cedula.

Et quant a ce que les prestres ou gens d'eglise sont tenuz recognoistre leur sing & escripture pardeuant le iuge lay: toutesfois ne fault pource entendre qu'ilz puissent estre contrainctz par le iuge lay garnir la main auant qu'ilz soient renuoyez pardeuant leur iuge, s'ilz requerēt icelluy renuoy: car un lay mesme conuenu pardeuant iuge incompetent, apres la recognoissance doibt estre renuoyé pardeuant son iuge quant a la garnison de main, selon les ordonnances faictes sur la distinction des iuges presidiaux & preuostaux article xvij.

¶ L'action hypothecaire ioincte a la personnele n'empesche le renuoy d'un clerc pardeuant son iuge d'eglise.

Ne pareillement un hōme d'eglise soubz couleur de l'action hypothecaire contre luy intentee pour raison du tēporel qu'il ha en la iurisdiction du iuge lay pardeuant lequel il est cōuenu pour le payemēt de quelque debte, ou en autre actiō personnele, doibt estre debouté du renuoy qu'il demande pardeuant son iuge ecclesiastique: car pour autant que l'action est personnele, l'action hypothecaire a icelle conioincte ne change point la nature de la personnele, laquelle ueult que le defen-

deur soit conuenu pardeuant son iuge domiciliaire : car les personnes sont plus d'unes que les choses, & par ce moyen elles doibuent tirer à soy les choses, non les choses les personnes. Mais quand l'action seroit seulement hypothecaire, & qu'elle ne pourroit rien auoir de personnalité : lors le prestre seroit bien conuenu pardeuant le iuge lay : car celle action est reale, en laquelle le prestre est bien conuenu pardeuant le iuge lay.

¶ Le iuge lay faict inuentaire des meubles d'un prestre, & les seelle.

Peut semblablement le iuge lay seeller & engrauer ses seaux sur les coffres, armoires, & portes des maisons du defunct prestre, & faire inuentaire des biens meubles & tiltres d'icelluy.

¶ En quel cas le iuge lay cognoit du droit de patronnage.

Aussi peut le iuge lay cognoistre du droit de patronnage quand en est question entre deux personnes layes, ou que la personne laye est defenderesse. Ou quand le droit de patronnage compete pour raison d'un chastel, ou chastellainie, ou pour cause d'un autre fief. car ainsi que le fief est chose temporelle, aussi le droit de patronnage y adnexé, est temporel.

¶ En quelles matieres l'homme lay peut estre conuenu deuant le iuge d'eglise.

Comme le prestre en certains cas peut estre conuenu pardeuant le iuge lay, aussi l'homme lay en certains cas peut estre cōuenu pardeuant le iuge d'eglise : scauoir est quand il est question de mariage, ou pour l'accomplir, ou pour le rompre. Voire si quelque personne laye est citee pour cōsummer en face

ce de ſaincte eglise le mariage qu'on dict eſtre encommencé, & pour nourrir l'enfant, en oultre pour conſtituer dot: il eſt bien conuenu pardeuant le iuge eccleſiaſtique, comme eſtant ladiete nourriture, & conſtitution du dot acceſſoires du mariage. et ainſi en a eſté dict par areſt. Toutesfois ſ'il n'eſt queſtion que de la ſeparation du liēt pour cauſe de lepre, le iuge lay en peut cognoiſtre. Plus le iuge d'eglise peut cognoiſtre quand il eſt queſtion des autres ſacremens de l'eglise, ainſi qu'il eſt dict par leſdictes ordonnances dernieres article iij. Ou quand il eſt queſtion de decimes, leſquelles ſont cenſees choſes ſpiritueles, & ne ſont infeodees: car ſi elles ſont infeodees, elles ſont reputées choſes temporeles & prophanes. Et en doit en ce cas le iuge lay cognoiſtre: autrement non. Et ne ſuffit pour en retenir la cognoiſſance par le iuge lay, alleguer qu'elles ſont infeodees, mais eſt requis en faire preuue ſommairement: ce que lon faiēt le plus ſouuent par les ſiefx & adueux anciens, qui ont eſté rendux aux ſeigneurs deſquelx leſdictes dixmes infeodees ſont hommagement tenues. Auſſi ſil eſt monſtré, que en l'année du deces du ſeigneur deſdictes dixmes, le ſeigneur duquel le ſief eſt tenu, a leuē leſdictes dixmes comme infeodees & adnexeas audiēt ſief. Et ſi le iuge d'eglise entreprend cognoiſſance deſdictes dixmes infeodees, le iuge royal competent en pourra euoquer a luy la cauſe. Eſt a noter que les gens d'eglise ne peuuent prendre ne quereller dixmes ou primices ſinon des choſes dont anciennement ilx ont accouſtumé en auoir, & meſmement des menus fruiēt, ainſi qu'il eſt contenu par aucunes ordonnances anciennes, & a eſté decisi par pluſieurs areſtx de la Cour. & de ce y a ordonnance du Roy Philippes quart de ce nom es ordonnances imprimees en Latin apres le ſtile de Parlement, & recueil des areſtx de maiſtre Iehan le coq.

Ne peut aussi le iuge d'eglise cognoistre contre un homme lay pour droict ou debuoir de sepulture: ne contre un procureur lay, qui patrone pardeuant icelluy iuge ecclesiastique, sinon des choses qui touchent le proces agité pardeuant luy, & l'instruction ou decision d'icelluy. Toutes fois il ne peut cōtraindre l'homme lay consierge & geolier de ses prisons, a représenter les prisonniers qu'il auroit laissé aller, par maniere que un consierge lay qui s'estoit porté appellant comme d'abus de l'oëtroiy & executiō d'un decret de citation personnelle cōtre luy baillé par le iuge d'eglise pour auoir laissé euader aucuns ses prisonniers, gaigna sa cause par arest donné es grās iours de Poictiers le xviij. iour de septembre M.D.XXXI.

¶ L'homme lay se peut porter appellant comme d'abus de la sentence contre luy donnée par le iuge d'eglise es cas desquelz il ne peut cognoistre, iasoit que volontairement il ayt procedé pardeuant luy: mais il paye les despens de la procedure volontaire.

Exceptez lesdicts cas des sacremens, & des dixmes non infeodees, le iuge d'eglise ne peut cognoistre contre la personne laye: ains combien que es autres cas elle eust plaidé uoluntairement pardeuant luy, neantmoins elle se peut porter appellant de la sentence contre elle baillée comme d'abus: & obtiendra en son appel. uray est qu'elle sera cōdamnee es despens de la procedure uolontaire faicte pardeuant ledict iuge, & le tout mis au neant, & les parties renuoyees pardeuant le iuge royal competent.

¶ Quelz Prelatz ou Euesques peuuent decerner citation contre personnes layes en action personnelle,

perſonnele*, & de ceulx deſquelz le faiſt n'eſt receu.

Et ſur ce conuient entendre qu'il y a aucuns Eueſques ou autres Prelatz eccleſiaſtiques de ce royaume, qui ſont en poſſeſſion de cognoiſtre alencontre des gens layes en actions perſonneles, & eſt le faiſt de leur poſſeſſion receu par la Cour, c'eſtaſcauoir que parci-deuant on a interiecté appel comme d'abus de l'entreprinſe de la cognoiſſance de telles matieres perſonneles faiſte par leſdictz prelatz: & en deſendant en la cauſe d'appel, ilz ont allegué leur dicté poſſeſſion. ſur quoy les parties oyés la Cour de Parlement les a appoincté au conſeil, & depuis n'en a eſté donné areſt. Et quant a eulx par les ordonnances dernieres articles i. ij. & iij. leur eſt deſendu par maniere de prouiſion de ne-bailler ne-delixer aucunes citations uerbalement ne par eſcript pour faire citer les ſubiectz du Roy purs layz eſdictes matieres & actions pures perſonneles, ſur peine d'amende arbitraire. Et eſt pareillement deſendu aux dictz ſubiectz de ne faire conuenir les layz pardeuāt leſdictz iuges eccleſiaſtiques deſdictz prelatz en actions pures perſonneles, ſur peine de perdition de cauſe, & d'amende arbitraire.

¶ Des Eueſques ou Prelatz deſquelz le faiſt eſt receu.

Mais il y a d'autres prelatz qui ont obtenu areſt avecques le procureur general du Roy ſur ladiſte poſſeſſion par eulx pretendue de cognoiſtre de actions pures perſonneles contre les perſonnes layes. Et iceulx les peuuent faire citer ou conuenir pardeuant eulx: mais fault que par leurs citations ilz declairent la cauſe de l'action, a fin que lon puiſſe cognoiſtre ſi ueritablement l'action eſt perſonnele: comme il eſt dict par les ordonnances du Roy Loys xij. article xlvj.

COn se peut pouruoir par deux manieres alen-
côte des citations dōnees contre gēs layes.

Et si autrement lesdictz prelatz ou les autres qui n'ont
obtenu arest, decernent citation personnele contre les lays,
uoire en actions personnelles : on se peut pouruoir alencon-
tre d'icelles par deux manieres. l'une, en appellant comme
d'abus du decret & execution desdictes citations : & sera
dict par la Cour qu'il a esté mal decreté octroyé & executé,
& bien appellé comme d'abus : & l'intimé condamné es
despens de la cause d'appel, & en l'amende a l'arbitration
de la Cour.

La forme des lettres inhibitoires & euocatoi-
res que decernent les iuges royaux pour rai-
son des causes pendans pardeuant les iuges
d'eglise, lesquelles appartiennent aux iuges
royaux.

L'autre moyen de y pouruoir est plus facil, & sans crain-
te d'amende d'appellation. c'est que le procureur du roy &
la partie citee obtiennēt un mandemēt du iuge royal du res-
sort audedens lequel est le siege du prelat ecclesiastique qui a
decreté la citation, par lequel mandement le faict narré le
iuge royal euoquera la cause a luy: fera inhibition & defense
au demandeur de ne poursuiure le defendeur pardeuant le-
dict iuge d'eglise, a certaine grosse peine : & mandera l'ad-
iourner a competent iour pour uenir proceder en la matiere
principale. Et si la partie citee ne ueult plaider pardeuant le-
dict iuge royal, ains ueult estre renuoyee pardeuant autre iu-
ge: ne sera mandé adiourner le demandeur pour uenir proce-
der sur la matiere principale, ains sur le renuoy qu'entend le
defendeur requerrir luy estre faict pardeuant son iuge: car au-
trement le defendeur approueroit ledict iuge royal, & ne
pourroit

pourroit plus demãder son rēuoy. Et s'il ueult proceder pardeuant le iuge royal, il pourra demander la procedure faicte pardeuant le iuge d'eglise, estre cassee, & de nouueau la matiere estre commencée. mais en ce cas il paiera les despens de la procedure uoluntaire faicte pardeuant le iuge d'eglise, cōme dict est. & s'il ueult proceder selon les derniers arremēs de la Cour d'eglise, faire le pourra, & ne deuera en ce cas repondre aucuns despens.

¶ De l'anullation & cassation de la procedure faicte en Cour ecclesiastique.

semblablement le demandeur qui a faict conuenir un lay pardeuant le iuge d'eglise, pourra par uertu d'un mandemēt obtenu par le procureur du Roy seul, ou par ledict procureur & par luy, faire euoquer par le iuge royal la cause pendant pardeuant le iuge d'eglise: & si le mandement est obtenu par le procureur du Roy seul, les demandeur & defendeur ne se deueront aucuns despens de la procedure faicte en Cour d'eglise: toutesfois pourra le defendeur requerir cassation de la dicte procedure. en payant les despens d'icelle, non pas le demandeur, mais bien le procureur du Roy, iasoit que les parties se accordassent de proceder selon les arremēs de Cour d'eglise: car le Roy ha interest pour l'emolumēt de son greffe. Par quoy par cideuant quand le demãdeur uouloit empescher que le defendeur ne peust demander son renuoy pardeuant son iuge, il le faisoit cōuenir en Cour d'eglise, & puis a la requeste du procureur du Roy seul il faisoit euoquer la cause pardeuant le iuge royal, que bon luy sembloit. Et lors ne pouuoit plus le defendeur decliner du iuge royal. mais ce a esté corrigé par plusieurs arestz de la Cour de Parlement de Paris, car c'estoit un moyen indirect pour distraire les parties de leurs iurisdiccions ordinaires.

COn ne peut estre forclos de declinatoire par les iuges royaux ou inferieurs par vertu d'un default.

Aussi lon auoit accoustumé que si le defendeur ne comparoit au iour de l'euocation, le iuge royal bailloit default contre luy avec tout le profit: & en icelluy adiugeant ordonnoit que la cause demourroit pardeuant luy. & parapres le defendeur n'estoit plus receuable a demander son renuoy. A ce moyen semblablement ce a esté reformé par les arestz de ladicte Cour: & est le defendeur de present receu a demander son renuoy, nonobstant le premier uoire le deuxiesme default, iusques ad ce que par uertu d'iceulx sentēce soit baillce contre luy par contumace, & ordonné que le demandeur fera preuue du contenu en sa demande: car telle sentence equipolle a litiscontestation: & par ce moyen forclost le defendeur de la fin declinatoire. Et ne peut le iuge royal plustost ne auparavant telle sentence expressement ne taisiblement forclore de ladicte declinatoire: & s'il en forclooit, le defendeur auroit bonne matiere d'en appeller. Toutesfois quand une cause est en premiere instance intentee en la Cour de Parlement a Paris, & des requestes du Palais: par uertu du premier default on est forclos de declinatoire. Semblablement lon auoit accoustumé de faire adiourner l'Official en cas de refus pardeuant le iuge royal: mais ce a esté corrigé par arest des grāz iours tenuz a Poictiers le xi. de septembre M.D.XXXI.

CLes iuges doibuent voir les citations auant que decerner inhibitions.

Plus par l'ordonnance du Roy Loys xij. article lxxv. est prohibé a tous iuges temporelz de ne decerner inhibitions contre les ecclesiastiques, sans premier auoir ueu les citations, & par icelles cogneu que la cognoissance leur en appartient.

Et

Et doiuent exprimer les cauſes de leurſdictes inhibitions: autrement n'y ſera obey.

¶ Quelles cauſes peuuent euoquer les iuges roys aux, quãd elles ſont pendans pardeuant le iuge d'eglise.

Mais peut le iuge temporel euoquer la cauſe pendant pardeuant le iuge eccleſiaſtique, ſi elle depend ou eſt connexe a celle qui eſt pendant pardeuant icelluy iuge temporel, & luy inhiber d'en cognoiſtre: & ainſi fut dict par areſt le v. iour de Mars M.D.XXX.

¶ Le iuge d'eglise doit obeir aux inhibitiõs du iuge Royal quant a ſurſcoir la cognoiſſance de la cauſe.

Et doit le iuge d'eglise ſuperseder apres l'inhibition a luy faiete, iasoit qu'elle fuſt iniuſte, ſi la cauſe par icelle eſtoit expri mee. Mais il ſe peut porter appellant de ladiete euocation & inhibition comme d'abus: & en fut donnẽ areſt le xi. iour de Mars M.D.XXX.

¶ Des priuileges des eſcholiers quant a leur fur & iuriſdiction, & qu'il y a deux manieres de conſeruateurs des priuileges des eſcholiers.

Il ne ſera point eſloigné de propos de traieter icy du priuilege du fur & iuriſdiction des eſcholiers eſtudians en uniuerſitẽ fameuſe, parce qu'il uient ſouuent en uſage. Conuient a ce moyen ſcauoir qu'il y a deux manieres de cõſeruateurs des priuileges des uniuerſitez, qui peuuent & doiuent cognoiſtre des cauſes des eſcholiers eſtudians en icelles uniuerſitez. Les uns ſont conſeruateurs des priuileges Royaux, les autres ſont conſeruateurs des priuileges apoſtoliques. Les premiers ſont ordonnẽs par le Roy, les autres par le Pape.

Quel

¶ Quel temps d'estude est requis pour obtenir testimoniale.

L'escolier a ce qu'il puisse iouyr du priuilege d'escolier, il fault qu'il ayt estudié & residé en uniuersité fameuse par six mois auant qu'auoir obtenu testimoniale du recteur: ainsi qu'il est dict par les ordonnances du Roy Loys XII. de l'an M. CCCC. LXXX. XVIII. & XIX.

¶ Difference quand l'escolier intente son action en son nom priué, ou comme ayant transport: & des transportz faictz aux escoliers, & des personnes qui les peuuent faire, & du temps auquel ilz doibuent estre faictz.

Et si un escolier intente action, il fault regarder s'il l'intente en son nom priué, ou comme aiant transport: & semblablement s'il se rend partie en une cause intetee, & en demande le renuoy: car il n'est permis a un chascun de faire transport a un escolier, ains seulement de pere au filz, de frere au frere, de l'oncle au nepueu: comme il est dict par lesdictes ordonnances. D'auantage le transport doit estre faict auant l'action intetee: car apres icelle intetee, par le transport qui en est faict, la iurisdiction ia eleue ne peut estre muee. Et ne peut lon transporter a un escolier les arrirages d'une rente, sans transporter le principal de la rente. Neantmoins a esté donné arest: par lequel a esté declairé ualable un transport faict par une mere a un sien filz escolier, du droit qu'elle auoit de prendre une terre acquise en son fief par prelation feodale, ou les uêtes & honneurs, combien qu'elle n'eust point transporté le fief.

¶ De l'ordonnance de ne tirer plus loing que de quatre iournees par les escoliers.

L'escolier ne peut aussi tirer sa partie pardeuant le conservateur

seruateur royal du Puniuersité laquelle n'est du ressort de la Cour de Parlement auquel demeure sa partie: cōme une personne demeurant au ressort du Parlement de Paris, ne peut estre conuenue a la requeste d'un escholier pardeuant le conseruateur des priuileges royaux de l'uniuersité de Tholose, parce qu'elle est d'autre Parlemēt. Mais audedens les metes & limites du ressort de la Cour de Parlement la partie peut estre conuenue a la requeste de l'escholier pardeuant le conseruateur des priuileges royaux de l'uniuersité situee audedens ledict ressort plus loing que quatre iournees: car la partie de Poictou ou de la Rochelle peut estre conuenue par l'escholier pardeuant le conseruateur des priuileges royaux de l'uniuersité de Paris, ou d'Orleans. Mais pardeuant un conseruateur des priuileges apostoliques ne peut estre aucū tiré plus loing que de quatre iournees a cōpter du lieu de son domicile iusques en l'uniuersité ou il est conuenue.

¶ De demander pareatis au iuge ordinaire auant que adiourner son iusticiable pardeuant le conseruateur d'une vniuersité.

Et auant que faire conuenir la partie, le sergent doit exhiber au iuge du lieu le mandement de scholarité & testimoniale de l'escholier, & demander permission de faire l'adiournement: & s'il le fait autrement, lon pourra a la requeste du procureur du Roy ou du seigneur du lieu & de la partie obtenir du iuge du lieu en monstrant l'exploict du sergent, descret d'adiournement personnel contre le sergent, avecques mandement de saisir le cheual du sergent iusques a ce qu'il ait obey a iustice. Toutesfois les iuges ordinaires tolerent par conuenance telz adiournemens communement, combien qu'il ne leur ait esté demandé permission.

Comment

¶ Comment l'escolier doit demander le renuoy d'une cause pendant pardeuant le iuge ordinaire.

Et quand un escolier ueult demander le renuoy d'une cause contre luy intentee estre fait pardeuant le conseruateur de son uniuersité, il y a grand difference: ou bien s'il y uient en son nom priué, ou bien comme ayant transport: car s'il uient en son nom priué, il fault qu'il face apparoir sommairement de son interest, s'il est possible. qui doit estre entendu selon la commune pratique, par serment de l'escolier. Mais s'il uient comme ayant transport, il fault que son cedent, scauoir est celluy duquel il ha droit, face serment deuant le iuge ou est la cause pendant, & l'escolier pardeuant son iuge, que le transport est du total, & non de partie: plus, qu'il est fait sans fraude ne simulation: & qu'il est fait pour reuenir entierement au profit de l'escolier sans rien en reseruer: comme il est dict par lesdictes ordonnances du Roy Loys XII. & par la limitation de la Cour faicte sur lesdictes ordonnances le xvij. iour de May M. CCCC. XCIX. & doit estre fait ledict serment en leurs personnes, ou par procuration speciale: & fault que le transport, le mandement de scholarité, & la testimoniale soient exhibez. Et tout ce doit estre aussi obserué quand l'escolier comme ayant transport ueult faire conuenir pardeuant son conseruateur sa partie. Autrement lon pourra proceder contre le sergent en la maniere cy dessus declairee.

¶ Comment se doit pouruoir l'escolier alens contre des inhibitions faictes par le iuge au sergent de non renuoyer la cause.

Et fault que l'escolier, soit en son nom priué, ou comme ayant transport, se adioigne a la cause, & face les autres choses susdictes,

ſuſdictes, & demande le renuoy de la cauſe, & face ſommer le iuge par un ſergent Royal de faire ledict renuoy. ſi le iuge ne le fait, l'eſcholier pourra appeller du refus ou deny, ou biẽ la faire renuoyer par le ſergent, ſi le iuge ne luy faiet inhibition de non faire renuoy de la cauſe: auquel cas il appellera de ladiete inhibition & dudiect deny: mais n'appellera point du refus que faiet le ſergent de faire ledict renuoy: car le ſergent ha matiere d'obtemperer a ladiete inhibition.

¶ L'eſcholier ſe doit ioindre auant conteſtation en cauſe.

Eſt neceſſaire faire ladiete adionction & demander ledict renuoy auant la cauſe conteſtee: autrement lon n'y ſera plus receu.

¶ Quelles matieres l'eſcholier ne peut faire renuoyer.

Il n'eſt permis aux eſcholiẽrs ſe ioindre en toutes matieres, & en demander renuoy eſtre faiet pardeuant leurs conſeruateurs: & meſmement ſi le procureur du Roy eſt partie, ou ſil eſt queſtion des droictz feodaux de quelque ſeigneur.

¶ Par quel temps les eſcholiẽrs doibuent iouyr de leur priuilege de fur.

Ne doibuent ſemblablement les eſcholiẽrs iouyr de leurdict priuilege durãt tout le temps qu'ilz ſeront eſcholiẽrs & reſidẽs es uniuerſitez: car ceulx qui eſtudient en Grammaticque, Dialectique, & Phyſique, n'en iouyſſent que par quatre ans: ceulx qui eſtudient en droict Canon, ou Ciuil, par ſept ans: & ceulx qui eſtudient en Theologie, par quatorze ans. Et au regard des regens, ilz en iouyront tant qu'ilz regenteront, ſans limitation de temps. Et ſ'ilz ont regētẽ par uingt ans continuellement, iouyront perpetuellement dudiect priuilege en reſidant & demeurant en ladiete uniuerſitẽ. Mais
ſ'ilz

Ilz sont absens par six mois de l'université, ilz ne iouyront
 dudict priuilege. Et si au temps de l'action intentee ilz estoient
 urays escholiers, & qu'après ilz se absentent par six mois,
 le defendeur pourra dire qu'il n'est tenu proceder pardeuant
 ledict conseruateur, qui a ia cogneu de la cause, attendue la-
 dicte absence: car si pendant le proces pardeuant ledict con-
 seruateur, il appert qu'il n'est uray escholier, & de la qualité
 susdicte, ledict escholier decherra entierement du droit & ac-
 tion par luy pretendue, & sera condamné es despens de la
 partie, & en l'amende enuers le Roy. Et a ceste cause si l'es-
 cholier perd sa cause, en laquelle il est partie comme aiant
 transport, & en appelle: sa partie aduersé peut faire anticips
 per le cedent ensemble & ledict escholier en la cause d'appel.
 Et si le cedent demande les despens comme follement anticipi-
 pé, l'anticipant les peut empescher disant que le transport est
 frauduleux. Et en pareil cas par arest données grans iours
 de Poictiers en l'an M.D.XXXI. fut dict, que auant que fai-
 re droit des despens de la folle anticipation, l'anticipant in-
 formeroit de la fraude par luy alleguee. Et en quelque par-
 tie de la cause que ce soit, on peut par lettres royaux mainte-
 nir le transport frauduleux, & demander le renuoy de la cau-
 se estre faict pardeuant le iuge ordinaire. Et ainsi en a esté
 dict par arest du vij. iour de Mars M.D.XXIX. Et ne fault
 pas seulement que l'escholier soit estudiant de six mois auant
 qu'il iouysse dudict priuilege: mais fault que la testimoniale
 soit datee de six mois auant qu'il se aide de ladicte testimo-
 niale, soit pour faire adiourner, ou pour faire reuoyer: & ainsi
 en fut dict par arest le xiiij. iour de Ianuier M. D. XXXII.
 Toutes fois presque en toutes les Cours conseruatoires, ilz
 usent du contraire: & leur suffit, qu'il soit contenu par la-
 dicte testimoniale, que l'escholier a estudié par six mois: tant
 ilz

litz fauorisent a Pampliation de leur iurisdiction. Et si un escholier forme complaincte contre aucun pardeuant son iuge & conseruateur, & un autre escholier d'autre uniuersité forme aussi complaincte contre le mesme defendeur pour raison de mesme chose, pardeuant le conseruateur de son uniuersité, comme il aduient souuent en matiere benefeciale: le defendeur peut se porter appellant de l'octroy & execution de la derniere complaincte, & relouer en la Cour, & y bail-
ler requeste pour reigler les parties de iuge pour cognoistre du principal. Et a la Cour accoustumésur le different des iuges renvoyer les parties pardeuant le iuge royal du lieu auquel est assis le benefice. Et si l'escholier d'une uniuersité fait conuenir pardeuant son conseruateur un escholier d'autre uniuersité, l'escholier defendeur peut demander estre renuoyé pardeuant son conseruateur. Et si deux escholiers d'une uni-
uersité, & un tiers d'autre uniuersité l'empesche & deman-
de la cause demourer pardeuant son conseruateur: la cause doit estre renuoyee pardeuant le conseruateur de l'uniuersité, ou les deux escholiers sont estudians. comme il fut dict par arest du douziésme iour de Iuillet M. D. XXVI.

Est a noter, que combien que par la pragmatique sanction lon doibue auoir recours au superieur sans moyen, pour se plaindre de quelque tort en Cour ecclesiastique: toutes fois si un escholier est cité en Cour d'eglise, il peut faire citer le demandeur pardeuant son iuge conseruateur des priuileges apo-
stoliques, pour apporter les exploictz de la citation a luy baillee pour comparoir pardeuant le iuge d'eglise: & requerrir que defense luy soit faicte de non le traicter pardeuant le iuge d'eglise. Et comme quelque fois certaines parties avecques le procureur general du Roy en la Cour se fussent porté appellans de telle ou semblable citation decernee par
le

le cōseruateur desdictz priuileges apostoliques comme d'abus, la Cour de Parlement a Paris parties oyés en la cause d'appel, les appoincté au conseil, parce qu'il fut remōstré que autrefois en cas semblable la Cour auoit appoincté les parties au conseil.

¶ De ceulx qui ont leurs causes commises pardeuant messeigneurs des requestes du Palais a Paris.

Il sera bien seant & conuenable, traicter suiualement du priuilege de ceulx qui ont leurs causes commises pardeuant messeigneurs des requestes du Palais a Paris, comme les Conseillers, aduocatx, procureurs, greffiers, & huisriers, qui ont tous faict le serment a la Cour, & y seruent actuelement: & pource les sollicitours en la Cour ne iouyssent dudit priuilege. & ainsi en fut dict par arest le xxiiij. iour de Decembre M.D.XXI. Plus iouyssent dudit priuilege les commēsaux du Roy & de la Roynie, & officiers de leurs hostels y seruans aussi actuelement, & aucuns Archeuesques, Euesques, Abbez, chapitres & collieges de gens d'eglise, qui par oētroi & priuilege du prince y ont leurs causes commises: car toutes lesdictes personnes peuuent faire conuenir leurs parties aduerses pardeuant mesdictz seigneurs des requestes, ou se ioindre es causes meues pardeuant autres iuges esquelles ilz ont interest, & les faire renuoyer pardeuāt mesdictz seigneurs des requestes, comme un escholier pardeuant son iuge.

¶ Si la qualité du committimus des requestes est nyee, n'en fault informer pardeuāt le iuge ordinaire, & sans autre discussion fault qu'il renuoye, sauf a debatre le renuoy pardeuant mesdictz seigneurs. Autre chose est du renuoy d'un escholier.

Et si ne fault que lesdictes personnes informent de leur interest sommairement, ne aussi de leur priuilege pardeuant le iuge auquel ilz demandent le renuoy d'une cause: mais doibt le iuge renuoyer la cause pardeuant mesdictz seigneurs des requestes, sauf a debattre le renuoy pardeuant eulx: & ce pour raison de leur auctorité, & qu'ilz sont du corps de la Cour de Parlement: aussi que les Chancelliers n'ont accoustumé bailler lettres de committimus sinon a ceulx qui en doibuent user. Mais quant au renuoy demandé par un escho'lier, lon peut l'empescher en allegant le transport estre contre l'ordonnance, ou que la testimoniale n'est datee de temps suffisant: & en peut le iuge auquel lon demande le reuoy, cognoistre, pour & a fin de l'oëtroier, ou denier.

¶ Quelles personnes doibuent auoir clause speciale en leur committimus.

Quand a faire faire le renuoy par uertu de committimus, il y a difference entre les personnes qui usent du committimus, & en l'impetration d'icelluy: car les aduocatx & procureurs de Cour ne peuuent par uertu d'un committimus en termes generaux, faire reuoyer une cause pendant pardeuant autre iuge, que le Preuost de Paris ou son lieutenant. Mais s'ilz ueulent faire renuoyer une cause pendant pardeuant un autre iuge, il fault qu'ilz ayent un committimus avec clause speciale pour ce faire. & ainsi en fut dict par arest donné le viij. iour d'Auril M.D.XXI. auant pasques. Toutes fois les Conseillers de la Cour, & autres personnes priuilegiees susdictes peuuent par uertu de committimus en termes generaux se joindre en la cause, & faire faire le renuoy.

¶ Renuoy doibt estre faict auant cōtestation en cause, & de quelles causes doibt on faire renuoy a mesdictz seigneurs des requestes.

¶ Neantmoins

Neantmoins quelque personne priuilegiee que ce soit, ne peut faire reuoyer une cause ia cōtestee. Et fault aussi que les causes soiēt telles qu'en puissent cognoistre mesieurs des requestes, scauoir est personneles, ou possessoires Et quant aux personneles, qu'elles excedent dix liures: ainsi que lon a accoustumé mettre es committimus par expres.

¶ CRēuoy doit estre faict par le cōseruateur par deuant mesdictz seigneurs desdictes requestes.

Et semblablement si ceulx qui ont leurs causes cōmises par deuant mesdictz seigneurs, sont conuenux ailleurs en action personnele, ilz peuuent bien faire euoquer ou renuoyer la cause aux dictes requestes, voire que la cause fut pendant par deuant un cōseruateur des priuileges royaux d'une uniuersité: parce que leur auctorité est plus grand que celle d'un cōseruateur: car ilz sont du corps de la Cour de Parlement. Mais si ceulx qui ont leurs causes commises esdictes requestes, se uouloient ioindre seulement aux matieres personneles intētees contre autres parties, & pour raison des contractz faictz avecques lesdictes autres parties, qui ne concernent aucunemēt ceulx qui ont leurs causes commises ausdictes requestes: ilz ne pourroient les faire euoquer par deuant mesdictz seigneurs des requestes, au moyen de ce qu'en action personnele on n'est receu que a soy असिस्तेr, & non a prendre le gariment formel. Et ainsi en fut dict par arest es grans iours de Poictiers le xxv. iour de septembre M.D.XXXI. au faict & cas duquel arest un gentilhomme ayant ses causes commises aux requestes, se seroit असिस्ते & ioinct en une matiere pēdant en Cour d'eglise, ou estoit un hōme d'eglise pour suiui pour quelque somme de deniers dont il estoit plege. ledict gentilhōme pour ses causes d'asistement disoit que ledict hōme d'eglise estoit son plege, & par uertu de son committimus fait

fait faire commandement par un ſergent au iuge d'eſliſe de renuoyer la cauſe auſdictes requeſtes: & pource qu'il eſt reſuſant, le ſergent l'a renuoyé: dont la partie aduerſe appelle le comme d'abus: & ſur ledict appel interuint ledict areſt. Biē peuuent les fermiers deſdictes perſonnes priuilegiees faire cōuenir leurs debtours a cauſe de leurs fermes pardeuant meſdicts ſeigneurs: comme fut dict par areſt le v. de Feburier M.D.xxx. Toutes fois ie conſeilleroie plus que le ſeigneur ou maistre ſe adioigniſt au proces avecques ſon fermier: car lors il ſeroit ſans doubte. Ne peuuent leſdicts ſeigneurs des requeſtes cognoiſtre de l'action pure hypothecaire & reale, cōme il fut dict par areſt le xix. iour d'Aouſt M.D.XXX. mais cognoiſſent bien de action perſonnele & hypothecaire conioinctes enſemble: car la perſonalité en icelle eſt plus puiſſant que realité. En oultre ne peuuent cognoiſtre des droictz feodaux, ou le ſeigneur eſt partie: uoire ſi lon en traittoit par actiō perſonnele, ſi nō que le ſeigneur euſt ſes cauſes commiſes aux requeſtes ſuſdictes, & ſe rendiſt partie: car en ce cas la cauſe ſeroit renuoyee auſdictes requeſtes, & en cognoiſtroient leſdicts ſeigneurs deſdictes requeſtes. & ainſi en fut dict par areſt au proſict de monſieur de Vendosme le xxij. iour de Iuing M.D.XXX. Et ce peut eſtre exemplifié en actiō de exhibition de contractz des choſes acquiſes au fief de quelque ſeigneur: car ladicte action eſt perſonnele, parce qu'elle eſt baillee par la couſtume, combien qu'elle eſt en partie reale. ou bien ſi le ſeigneur ayant ſeſdictes cauſes commiſes demandoit quelque debuoir feodal a ſon uaſſal, parce que c'eſt action perſonnele: car elle deſcend ou des conuenances du fief, ou de la couſtume du pays. Autre choſe ſeroit ſi le ſeigneur ageoit contre autre ſoy pretendanſt ſeigneur, ad ce que aucun droict luy fuſt declaire appartenir ſur le uaſſal: car lors l'action eſt

l ij pure

pure reale. Vray est que aucuns ont voulu dire que si le uassal escholier a fait son hōmage, & payé les debvoirs feodaux, ou offert ce faire, & demande a ses seigneurs feodaux, ou au superieur par main souueraine, auoir recreance ou deliurance de son fief, & au proces disent lesdicts seigneurs qu'il ne luy doibuent faire recreance, ne le receuoir a faire son hōmage, pource parauēture qu'il en ont ia receu un autre, & il soit mestier entrer en contestation: l'escholier uassal pourra faire renuoyer la cause pardeuant son conseruateur. Et semblablement & par plus forte raison un homme qui auroit ses causes commises es requestes, pourroit en ce cas faire reuoyer la cause ausdictes requestes, & la y faire retenir. Toutesfois il me semble & a plusieurs autres du contraire: car le uassal ne peut rien faire au priedice de la iurisdiction de son seigneur, ne icelle empirer: ce qu'il feroit, s'il contraignoit son seigneur d'aller plaider hors sa iurisdiction. Et ne y fait rien au contraire, dire que ce auroit lieu quād le uassal voudroit nyer le debvoir feodal: car ladicte raison de la deterioratiō & diminution de la iurisdiction, milite en autre cas, cōme en cas de la denegation du debvoir feodal. D'auantage quād le procureur du Roy s'est ioinct & rendu partie pardeuant le iuge Royal ordinaire, ia soit qu'un priuilegié se y adioingne, & qu'il face renuoyer la cause esdictes requestes: neantmoins parpres mesdicts seigneurs desdictes requestes ont accoustumé la reuoyer pardeuant ledict iuge royal, & condāner le priuilegié qui a fait faire le renuoy ausdictes requestes, es despens, voire en cause ciuile. Et ainsi fut il fait en la cause que le seigneur Doulnes demandeur & requerant l'enterinement de certaines lettres royaux de oētroi de faire poursuiure alens contre des Maire Escheuins & bourgeois de Fontenay le conte, le procureur du Roy ioinct avecques eulx defendeurs pardeuant

deuant le seneschal de Poictou ou son lieutenant a Fontenay le conte. en laquelle cause mesire Francoys descars cheualier seigneur de la Vauguion, & lors seigneur de Fontenay le conte a cause de madame sa femme, se rendit partie, & requist la cause estre renuoyee pardeuant mesdictz seigneurs des requestes par uertu de son committimus. ce qui fut faict. Toutesfois depuis ledict renuoy fut debatue pardeuant eulx, par maniere que ladicte cause fut encores reuoyee pardeuant ledict seigneur Seneschal de Poictou, ou sondict lieutenant, & ledict descars condamné enuers ledict demandeur es despens dudict reuoy. Pareillemēt & par plus forte raison, si le procureur du Roy est partie en quelque matiere de reintegratiō intentee par uertu des informations faictes sur les exces, ias soit ques il y a aucun priuilegié, il faille que le iuge ordinaire le renuoye pardeuant mesieurs desdictes requestes : toutesfois si l'une des parties pardeuant mesdictz seigneurs debat ledict reuoy, & requiert la cause, entāt que touche la criminalité, estre renuoyee pardeuāt ledict iuge ordinaire: ledict renuoy sera faict pardeuant ledict iuge, tāt par le moyē que le procureur du Roy est partie, que aussi qu'il est plus facile de faire instruire le proces criminel pardeuāt le iuge ordinaire, que pardeuant mesdictz seigneurs des requestes, & y a beaucoup moindres fraiz : & ainsi en fut dict par arest le xxvij. iour de Nouembre M.D.XXI. Toutesfois s'il est question d'un attentat faict au preiudice du proces pēdant pardeuāt mesdictz seigneurs des requestes, & que in iceluy faisant il y ayt eu exces faictz, mesdictz seigneurs ont accoustumé en retenir la cognoissance. Plus la Cour de parlemēt a accoustumé cognoistre des matieres esquelles est question de benefice uacant en regale. Et si telles matieres estoient intentees pardeuāt le iuge ordinaire, le procureur general du Roy

les pourroit faire euoquer en ladiète Cour. Mais quant aux autres matieres dõt la cognoissance n'appartiēt a mesdiēt^x seigneurs des requestes, ne a ladiète Cour de Parlemēt, lediēt procureur general du Roy les fera renuoyer tousiours pardeuant les iuges ordinaires, quand ores les parties s'accorderoiēt de plaider pardeuant mesdiēt^x seigneurs des requestes, ou en ladiète Cour, ou les causes y estre rēuoyees: cōme il est diēt par les ordōnāces du Roy Loys xij. arti. xliij. & xliij. Et faiēt ascauoir que par lesdiētes ordonnances lon ne peut user desdiētes lettres royaux de committimus, apres l'an & iour de l'impetration d'icelles, & sont surannees, ainsi que les mandemens de protection de scholarité, & autres lettres royaux de iustice: & conuient renouueller lesdiētes lettres de committimus tous les ans.

¶ Du profit du default donné contre celluy a la requeste duquel est faiēt le rēuoy, & du default donné contre sa partie aduerse.

Et si au iour du renuoy celluy qui le a faiēt faire, ne compare, lon donne default cōtre luy: & par uertu d'icelluy il est declairé contumax, & la cause renuoyee pardeuant le premier iuge. Et si celluy alencontre duquel est faiēt le renuoy, se default: il estoit pareillement parciēuāt declairé cōtumax, & forclos de demander la cause estre renuoyee ailleurs, & condamné es despens. mais ie doubteroye que ce stile apresent n'eust lieu par le moyen de l'ordonnance derniere, par laquelle lon ne peut bailler aucune sentēce contre le cōtumax, iusques ad ce que le demandeur ayt informé du contenu en sa demande: dont iay traicté cy dessus amplement. Et parce ie croiroye que si c'estoit le demādeur qui eust faiēt faire le rēuoy, sans doute il ne pourroit auoir lediēt profit dudiēt default contre le defaillāt non plus que s'il l'auoit faiēt conuenir

uenir pardeuāt autre iuge: ainsi qu'auōs dict cy dessus. Mais il ne aduient pas souuent que le demandeur face faire le renuoy: car il seroit condanné es despens de la procedure faiēte pardeuant le premier iuge: & plustost le demādeur faiēt cōuenir de plain pardeuant mesdictz seigneurs des requestes: auquel cas il est certain qu'il n'ha autre profit du premier default, sinon qu'il auroit pardeuant autre iuge. Mais si le defendeur faisoit faire le renuoy, & le demandeur se defaillloit, ie penseroye que le defendeur pourroit auoir ledict profit de default contre ledict demandeur, scauoir est que ledict demādeur seroit forclos de ne pouuoir demander la cause estre renuoyee ailleurs, & condanné es despens du default: car nous ne sommes es termes de l'ordonnance derniere susdictē: car ne pourroit ledict defendeur estre tenu d'informer d'autre chose que du renuoy pour auoir adiudicatiō de sondict renuoy, dōt il faiēt apparoir par escript en obtenant ledict default: car quāt a estre enuoyé de l'instāce, ie feroye doubte: parce qu'il y a une fois comparition par le demandeur en la matiere: & quād il y a cōparu une fois, il n'est plus cōtumacé par un seul default es Cours royales & inferieures: cōbiē que en causes d'appel en la Cour de Parlement, nonobstant que l'appellant ayt comparu, neantmoins s'il n'est prest de plaider, il y a cōgé contre luy s'il ha releué: & par uertu d'icelluy est declairé contumax: mais es Cours royales il conuient obtenir deux defaultz cōtre l'appellant comme contre l'intimé: iasoit que tous appellans soient demandeurs.

¶ Messieurs des requestes & conseruateurs ne cognoissent des causes d'appel interiectē des executeurs de leurs sentences

Aussi cōuient scauoir, que mesdictz seigneurs des requestes ne les conseruateurs des priuileges royaux octroyez aux

uniuersitez ne cognoissent point des causes d'appel quād ores l'appel seroit interiecté du sergent executeur de leurs sentences. Et si mesdictz seigneurs des requestes ou leurs enfans ont proces en matiere pcrsonnele ou possessoire, les maistres des requestes ordinaires de l'hostel du Roy en auront cognoissance en leur auditoire a Paris: comme il est dict par l'ordonnance du Roy Loys xij. article xlv.

¶ Des matieres esquelles on ne peut decliner de fur & iurisdiction.

Reste maintenāt a declairer les matieres esquelles n'ha lieu aucū renuoy, obeissance, ou declinatoire. Et premicrement suiuant l'ordonnance derniere article xcij. celluy qui est adiourné en sa personne en cognoissance de cedula, sera tenu la cognoistre ou nyer en sa personne, ou par procureur specialement fondé, pardeuant le iuge seculier en la iurisdiction duquel il sera trouué, sans pouuoir alleguer aucune incompetence: Et ce auāt que partir du lieu ou les parties serōt trouuees. autrement la cedula sera tenue pour confessée pour un seul default, Et emportera hypotheque des le iour de la sentence, comme si elle auoit esté confessée. Dont appert que pour cognoistre ou nyer, le debteur n'est pas bien conuenu au lieu ou il doit faire le payement, ou au lieu ou la cedula a esté faicte, si n'y est trouué.

¶ Quelles personnes sont tenues recognoistre ou nyer le sing & escripture faictz par autres.

Viēt icy a noter qu'apres la recognoissance faicte si le demandeur requiert garnison de main, le defendeur peut requerr estre renuoyé pardeuant son iuge, comme cy dessus a esté par nous dict, ou auons traicté des cas esquelz les gens d'eglise peuuent estre conuenuz en Cour laye: Et ainsi en fut dict par arest le xvi. iour d'Octobre M.D.XXXI, es grans iours
tenuz

tenuz a Poictiers. Et cōbien que les cedules ne soient du faict
ue du sing & escripture du defendeur, neantmoins il est te-
nu recognoistre ou nyer, comme un heritier le sing du defunct:
la femme le sing de son feu mari, ou encores uiuant: les reli-
gieux & successeur Abbé le sing du predecesseur Abbé: le
maistre le sing de son faicteur.

¶ Les quittances d'un commis en office public
font foy sans qu'autrement elles soient reco-
gneues.

Mais si c'est un officier publique qui commette un cōmis
a l'exercice de son office, il n'est point mestier luy faire reco-
gnoistre le sing ou escripture de son commis concernāt l'offi-
ce ouquel il est commis: car les quitāces par luy baillees, ou
autre escripture de luy touchant son office, faict foy & preu-
ue comme un instrument passé par notaires: & ainsi en a
esté dict par arrest donné par les generaux Conseillers sur le
faict de la iustice a Paris. En aucuns lieux toutesfois lon use au-
tremēt: car lon appelle a droit l'heritier, ad ce qu'il ayt a di-
re les causes pour lesquelles il entēd empeschier que le deman-
deur ne uerifie le sing du defunct, ou bien pour cognostre ou
nyer ledict sing, ou luy uoir permettre icelluy uerifier pa tes-
moings. Et toutes lesdictes manieres reuiennēt a un: car l'he-
ritier n'est appellé en cognoissance sinon a fin qu'il n'ayt oc-
casion de dire au demandeur que sans propos il s'est mis en
fraix de uerifier la cedula, & que s'il l'eust appellé pour la
cognostre, il l'eust cogneue. Mais le stile d'appeller a droit
pour cognostre, est encores meilleur: car c'est chose de grand
honte & deshonneur, nyer le sing du defunct duquel lon est
heritier ou successeur: & pour ceste cause facilement lon ne
uient pas a nyer ledict sing: ou si lon est appellé pour uoir
estre permis uerifier le sing, lon le permet & cōsent aysement.

¶ On doit recognoistre ou nyer la cedula, iasoit que le iour du payement ne soit escheu : & de la protestation qu'on faict en recognoissant, qu'on recognoist sans approuuer le contenu.

Lon est tenu recognoistre la cedula auant que le terme soit escheu. & iasoit qu'en recognoissant lon die que l'on recognoist le sing ou escripture sans approuuer le contenu: toutes fois en recognoissant lon approuue le contenu. car ladicte protestation est contraire a l'acte, & ce quant a la garnison de main seulement: mais quant au principal le contenu n'est point approuué: car lon peut alleguer moyens pour l'impugner, cōme qu'on a signé ou escript par erreur, ou circonuention.

¶ Esquelz cas on n'est tenu cognoistre ou nyer.

Il ya certains cas esquelz lon n'est tenu de cognoistre ou nyer: comme si la cedula n'emporte obligation, comme quand elle est faicte sans cause. Toutes fois il peut aduenir que combien qu'elle ne porte cause, toutes fois lon est tenu la cognoistre ou nyer, comme quand elle sert pour adminicule, scauoir est que la cause est prouuee quelque peu d'ailleurs, & aussi eu regard a la qualité des parties, cōme entrē marchā, certes lon peut estre contrainct cognoistre ou nyer, non pas purement & simplement, mais a telle fin que de raison. Pareillement lon est tenu cognoistre ou nyer, si par la cedula il n'est point escript que le sing apposé en pied ou l'escripture est de celluy qui confesse debuoir. neantmoins en ce cas, comme au precedent, lon seroit tenu cognoistre ou nyer a telle fin que de raison. D'auantage lon n'est point tenu de cognoistre ou nyer en matiere possessoire benefciale aucune escripture, comme quitances, fermes, & autres semblables, iusques a ce que la recreance soit uuydee: car uen que par les ordonnances
royaux

royaux on la doit uuyder par tiltres, ſi lon eſtoit tenu cognoiſtre ou nyer, au cas de nyāce il ſenſuiueroit que lō pourroit monſtrer du contraire par teſmoings: & par ce moyen indirectement lon receueroit preuue de teſmoings cōtre l'ordonāce. & ainſi fut dict par areſt le xxij. iour de May M.D. XXVI. Toutesfois il ſemble a aucuns que ce eſt bien dur, & que l'inconuenient ſuſdict pourroit bien eſtre tollu, quand lon contraindroit ſeulement a cognoiſtre ou nyer, & en cas de nyance lon differeroit la uerification iuſques apres la recreance uuydee: car il peut aduenir que celluy contre lequel on demande cognoiſſance, cognoiſtra: & ce ſeruira a partie aduerſe pour la iuſtification de ſon tiltre.

Or pour uenir a noſtre principal propos, lon ne peut ſemblablement decliner quand lon eſt conuenu pour declairer pour quelle part & portion lon eſt heritier du deſunct: car il fault faire la declaration auant qu'eſtre renuoyé pardeuant ſon iuge. Et conuient que celluy qui appelle a droit, pour auoir ladicte declaration, exprime & declaire la demande qu'il ueult intenter auant que le deſendeur ſoit tenu faire declaration: ſcauoir eſt comme ſ'il demandoit declaration pour quelle part & portion il eſt heritier, pour ce faiēt auoir payement de la ſomme de cent eſcutz deue pour cauſe de preſt, pour la portion qu'il declairera eſtre heritier du dict deſunct: & la declaration faiēte, il ſera renuoyé pardeuant ſon iuge. En oultre quand un notaire eſt adiourné par uertu de compulſoire pour ayder a une des parties contendens en certain proces pardeuant luy d'aucuns contractz & par luy receuz, & il eſt reſuſant de ce faire: ou bien ſi le iuge interloque que quelques perſonnes ſeront adiournées pour l'inſtruction du proces: en ce cas le notaire, ou autres perſonnes ainſi adiournées ne pourront decliner.

Au moyen dequoy ceulx qui sont appellez pour uoir pour-
 uoir de curateur au mineur en la cause pendant pardeuant
 le iuge, ne peuuent decliner sa iurisdiction: ne le seigneur on
 fief duquel le mineur est demourant, n'en peut demander le
 reuoy ou obeissance, car c'est un preparatoire. Et le plus sou-
 uent on ha de coustume, de ordonner curateur le procureur
 qui est pour le mineur en la cause. Toutes fois quand il est que-
 stion de pouruoir de tuteur a un mineur, pour l'adiourner
 pour repredre ou repudier un proces pendant en Parlement,
 on ha lettres royaux adressans au premier sergent royal,
 par lesquelles est mandé faire pouruoir le mineur de tuteur
 par son iuge ordinaire, et adiourner ledict tuteur pour repre-
 dre ou repudier. Ce qui est fondé en bonne raison. car le sei-
 gneur feodal ha grand interest a pouruoir de tuteur, parce
 qu'il y ha emolument a cause de sa iurisdiction, tant pour la
 facon de l'inventaire des biens du mineur, que de son seel de
 la tutele. Ce qui cesse, quand on pourroit de curateur en la
 cause: car il n'est tenu faire inventaire. Et ce quant aux ex-
 ceptions declinatoires.

¶ Des exceptions & defenses dilatoires, & des pers-
 emptoires: & quand elles se peuuent cumuler, ou
 se doibuent separeement proposer.

Pource uoyons a present des autres exceptions, lesquelles
 sont de deux manieres ou especes: scauoir est dilatoires, &
 peremptoires. Les dilatoires sont fins de non proceder, ou de
 non receuoir. Les peremptoires sont fins de non ualoir. Les
 dilatoires doibuent estre proposees auant les peremptoires.
 Toutes fois si le defendeur ueult, il les proposera bien toutes
 ensemble, mais protestera qu'il entend les proposer subordinee-
 ment, & que par les unes il n'entend estre preiudicié aux au-
 tres: & requerra luy en estre faict droit par ordre. Neant-
 moins

moins en deux matieres le defendeur est cōtrainct de defendre a toutes fins selon les ordonnances du Roy Charles VII. article lxxxij. scauoir est es causes d'appel, & de complaincte. Et par lesdictes ordonnances dudiect Roy Charles article cxxxiiij. quand le defendeur en autres matieres que d'appel & de complaincte, a defendu par fins de non receuoir, & peremptoires, & le iuge ordonne que les pieces seront mises pardeuers luy pour en ordonner, & puis interloque que les parties feront preuues: lors les fins de non receuoir sont toluees & uuydees, & ne doit lon plus y auoir regard.

¶ L'appoinctement en preuue, s'il vuyde les fins de non receuoir.

Autre chose seroit si les parties prenoient appoinctement entre elles a faire preuues, ou si le iuge l'ordonnoit sans uoir les pieces du consentemēt des parties: car combien que ladicte ordonnance article cxxxiiij. die que quand un proces se peut uuyder par fins de non receuoir, & poinct de droict, le iuge ne doit point appoincter les parties en faict & contraires: toutesfois en ce cas quand sans uoir les pieces il les appoincte de leur consentement en preuues, il n'est pas ueu selon mon aduis uouloir tollir lesdictes fins de non receuoir: car ce seroit chose par trop pernicieuse, que par tel si legier appoinctement lesdictes fins fussent uuydees, par lesquelles bien souuēt lon gaigne sa cause. Mais en l'autre cas qui est quand il uoit les pieces, parce qu'il y a plus meure deliberation, le iuge est presumé uuyder lesdictes fins, & ne se y arrester s'il appoincte en enqueste.

¶ Defenses qu'on propose en matiere de complaincte.

Cōme nous auons parcydeuant traitté la maniere de proposer demande en complaincte, exposons comment lon doit defendre

defendre aussi a la cōplaincte . Le defendeur doncques pour ses defences alleguera possessions cōtraires a celles du demandeur:conclura a maintenue & recreance pendant proces cōme le demandeur,& a despens dommages & interestz.

¶ Cause pour empescher le sequestre:& du remede de la pragmatique sanctiō au tiltre De pacificis possessoribus.

Et ne peut le defendeur defendre ne empescher le sequestre, sinon par un moyē:qui est,qu'il se die auoir possédé par trois ans continuellement & paisiblement : & ce non seulement en matiere prophane, mais aussi en beneficiale : en laquelle aussi le defendeur triēal paisible possesseur peut obtenir lettres royaux en forme de la pragmatique sanction au tiltre De pacificis possessoribus. par lesquelles narration faicte du faict & du proces,il sera mādē au iuge de la matiere de faire inhibition & defenſe a partie aduersē & a tous autres de non inquieter l'impetrant neque in possessorio,neque in petitorio.Lesquelles lettres royaux le defendeur presentera a l'appel, ou audience de la cause , & en requerra l'enterinement. Et peut se ayder un resignataire pour ce regard de la possession de son resignant,mesmement s'il est encores uiuant.

¶ En quelles matieres n'eschoit que sequestre verbal,& la forme du sequestre.

Il y a toutesfois aucunes causes & matieres ou lon n'adiuge que sequestre uerbal:comme quand la complaincte est formee pour quelque droit de seruitudē, & mesmement negatoire:ou que pour faire le sequestre il faudroit faire demolition de la chose contētieuse.Et si lon forme complaincte pour la cessation ou discontinuation du payement d'une rente fonciere ou hypothecaire,lon ne doit sequestrer que la rente,& non les choses pour raison desquelles elle est due.Toutesfois

le iuge peut bien ordonner que le defendeur mettera entre les mains des commissaires commis pour le sequestre de la rente l'arrieraige pour lequel la complaincte est formee, & les autres depuis escheux, & que a default les choses subiectes a ladicte rente seront regies par lesdictz commissaires. Toutesfois ce ne se faiet gueres. Semblablement combien que la chose contentieuse soit incorporele, toutesfois si l'exploict d'icelle peut receuoir aucune estimation a deniers, icelluy exploict doit estre estime par le iuge, appelees les parties, & gens a ce cognoissans, & les deniers de l'estimation estre sequestrez. Et quand deux contendent de quelque piece de terre en iugement possessoire, & qu'elle a esté ensemencee & labouree par un mesteier & colon, le mesteier pourra empescher le sequestre pour sa part qu'il a accoustumé prendre en la terre pour la facon d'icelle, selon la commune usance du pays. Mais si l'une des parties a labouré & ensemencé, elle ne pourra empescher le sequestre du total, ne de la partie qui eust appartenu au mesteier s'il l'eust faiet ou labouré. Et si le iuge d'un siege dont les appellations ne ressortissent neument en la Cour, ordonne le sequestre, & en y ayt appel, & que l'appellant ayt lettres royaux pour mettre son appel au neant: le sequestre doit estre executé pendant proces de l'enterinement desdictes lettres, sans preiudice du parsus de la contestation faiete sur icelles. Et ne peut lon empescher le sequestre, combien que lon ayt tiltre de la chose contentieuse: car le tiltre sans possession ne pourroit empescher la maintenance ne recreance.

¶ Quand le sequestre peut estre empesché par tiltres.

Et y a aucuns qui sont d'opinion, que si ores par une donation il y a clause par laquelle le donataire soit faiet possesseur

ou saisi de la chose donnee, que neantmoins sequestre doit estre fait: parce que par le moyen des contredictz & saluations le sequestre pourroit estre beaucoup differé. Neantmoins ie scay que par sentence d'un iuge royal dont les appellations ressortissoient sans moyen en la Cour de Parlement a Paris, fut dict qu'en certaine matiere de complaincte formee pour raison d'une succession uniuersale, n'y auroit aucun sequestre ne inuentaire des meubles & acquestz du defunct: parce que la uesue d'icelluy en auoit don auecques clause possessoire de constitution de possession & de retention d'usufruit: & luy fut la recreance adiugee, dont l'heritier se seroit porté appellant, mais par la Cour il auroit esté dict qu'il auoit esté bien iugé, & mal appelé. Ce qui auroit esté practiqué encores en cas plus douteux. scauoir est, que en faueur de mariage un oncle donne aux enfans masles a procreer du mariage de sa niepce & de son futur conioinct, une terre & seigneurie, de laquelle il reseruoit a soy l'usufruit, le notaire stipulant & acceptant pour lesdictz enfans, & ce auant l'ordonnance derniere. le donateur meurt, suruiuans a luy des enfans dudit mariage. Lesquelz forment complaincte pour raison de ladicte terre donnee, alencontre des heritiers dudit donateur: & est la cause deuolue par appel au Parlemēt de Bordeaux, dont elle fut euoquee au grand Conseil: par lequel ladicte matiere fut uuydee au profit desdictz enfans, tant a la recreance, que a la maintenue. Mais cessant ladicte clause de retention d'usufruit, ou constitution de possession, scauoir est que celluy qui transporte se constitue possesseur de la chose transportee pour & au nom de celluy auquel il la transporte: la possession ne seroit point transportee par la clause que les notaires ont accoustumé mettre par les contractz, qui est que la partie cede & transporte tout le droit, nom, raison & action,

action, propriété, & possession, & met en possession reale & actuelle. Car ladicte clause ne faist, ains seulement elle donne puissance a l'acquireur, de apprehender la possession de sa propre autorité. Et se peut l'acquireur ayder de la possession de son autheur, & former complaincte contre son autheur, s'il l'empesche, attendu qu'il est tenu garentir a son autheur la possession de la chose par luy transportee. Et a plus forte raison il peut former complaincte contre le colon ou fermier de son autheur, s'il ne ueult uuyder les lieux transportez apres sommation de ce deuement faicte. Mais s'il ha speciale hypothèque pour l'entretienement de la ferme, ou location de la chose baillee a ferme: en ce cas il ne doibt pas defendre a la complaincte, ains la doibt consentir, sans preiudice de sa ferme: & dire que par le moyen d'icelle, & de ladicte speciale hypothèque, il ha droit de retention desdictes choses, iusques ad ce qu'il soit satisfait de son interest. Autre chose seroit, s'il n'auoit que generale hypothèque, car il n'auoit droit de retention.

¶ La forme de executer vne sentence de sequestre.

La maniere de proceder a l'execution du sequestre, est que celluy qui ha interest a l'execution, face bailler assignatiō par un sergent a sa partie aduersē a comparoir pardeuant icelluy sergent a certain iour heure & lieu pour se uenir accorder de commissaires pour regir & gouverner soubz la main du Roy la chose contentieuse. Et si l'adiournē ne compare, le sergent baillera default contre luy au present avec tel profit que de raison: & neantmoins ueu icelluy default cōmettera deux hommes gēs de bien & solubles pour ladicte chose regir, & en rendre bon compte & reliqua si & quand & a qui il appartient. Mais si la partie aduersē compare, & ne se ueult accorder de commissaires, le sergent en cōmettera deux non

suspectz a l'une ne a l'autre des parties. Souuentefois lon
 poursuit pardeuāt le iuge la partie aduersē pour se uenir ac-
 corder de commissaires, ou en default ou delay de ce en uoir
 cōmettre par le iuge. Mais ne doit le iuge commettre au gou-
 uernement de ladicte chose sēs enfans, nepueuz, ou parens:
 comme il est contenu par les ordonnances du Roy Loys xij.
 article lxxxvij. Et fault que la commission soit baillee par le
 sergēt aux commissaires qui auront esté cōmis par luy ou par
 le iuge. Et lors les commissaires seront signifier par un sergēt
 la commission a la partie aduersē, Et luy defendre tous ex-
 ploictz de la chose contentieuse. Mais par l'ordonnance der-
 niere article cy. les parties dedens trois iours apres la sentēce
 de sequestre doibuent conuenir de commissaires: Et lesdictz
 trois iours passez, soit qu'ilz ayēt conuenu ou non, seront te-
 nuz les possesseurs ou detēteurs des choses contentieuses lais-
 ser la detention ou occupation des choses sequestrees, a peine
 de perdition de cause: Et suiuant icelle ordonnance derniere
 article lxxxij. Et iij. seront avec ce lesdictz commissaires sca-
 uoir le iour du bail a ferme de ladicte chose aux parties, Et
 qu'elles ayent a y comparoir pour le uoir faire, ensemble Et
 uoir arrester la mise Et despense qui aura esté faicte pour le
 dict bail: lequel tous commissaires de iustice commis au gou-
 uernement d'aucunes terres sont tenuz faire par auctorité
 de iustice parties appellees au plus offrant Et dernier enche-
 risseur, qui sera tenu de porter les deniers de la ferme iusques
 en la maison des commissaires, Et d'entretenir les choses en
 l'estat qu'elles leur seront baillees, sans y commettre aucune
 fraude ne maluersation, sur peine d'amende a la discretion de
 iustice. Et combien que par ladicte ordonnance il ne soit point
 declairé cōment ledict bail Et arrest de ladicte mise doit estre
 faict par iustice, toutesfois lon a accoustumé de faire faire les
 dictes

dictes choses par le iuge du lieu auquel sont assises les choses saisies. Et par ladicte ordonnance article lxxxiiij. ne pourront lesdictz commissaires sur les deniers de la ferme faire autres fraiz & mises, sinon qu'il leur fust ordonné par iustice parties appellees. Et partant redront tous les deniers de la ferme sans aucune deduction, fors de ce qu'ilz auront ainsi frayé come dessus, & de leurs salaires raisonnables, apres ce qu'ilz auront esté ainsi taxez par iustice. Par l'ordonnance du Roy Loys xij. article lxxxvij. le iuge ne peut commettre ses enfans, nepueux, ou parés, pour regir & gouverner les choses sequestrées. Ce qui conuient avec une loy ancienne de Rome, qui se nommoit Licinia, & Ebutia. par laquelle estoit ordonné, que celluy Consul ou senateur qui auoit requis on senat quelque charge de la chose publique estre baillee, & suiuant le requisitoire d'icelluy eust esté ordonné par le senat la charge estre baillee: ladicte charge n'estoit baillee audit Cōsul, ne a son collogue & estant Consul avec luy, ne a ses parens, ne affins.

¶ Du reſtabliſſement en matiere de cōplaincte.

Quand les commissaires sont establix au gouvernement de la chose contentieuse: la partie qui y ha interest ce requérant, est faict par le iuge commandement a partie aduersé a l'expedition du principal & recreance de la complaincte, que ladicte partie ayt a reſtabliſſer entre les mains desdictz commissaires les fructz qu'elle a prins de la chose contentieuse l'an & iour dernier & precedēt la complaincte formee, & ceulx que depuis elle a leué. Et si la partie ne y obeyſt, le iuge reiterera encores par deux autres foys & a deux diuers termes de la procedure en ladicte cause icelluy commandement: & le tiers cōmandemēt ſera faict a peine de perdition de cause. Et si ladicte partie defaille de y ob'yr & fournir, peut contre elle estre donnee ſentence de perdition de cause en matiere prophane:

m ij comme

comme est contenu par les cccxxviii. & xxxix. articles de la coustume de ce pays de Poictou. Et par lesdictes ordonnances dernieres articles cvi. & vij. le condanné a restabliſſir, est tenu rapporter ou affermer par serment la quantité qu'il aura prins des fruietz: & selon son rapport en faire promptemēt restabliſſement sur peine semblable de perdition de cause. Et est neantmoins permis a la partie aduerſe qui aura obtenu ledict sequestre, informer de la plus grand quantité & ualeur desdictz fruietz oultre ledict rapport par serment, & le condanné au contraire au peril de l'amende ordinaire enuers le Roy, & autant enuers la partie contre celluy qui succumberra. Mais la partie pour defrauder ladiete coustume & ordonnance, rapporte & restablit ſeulement quelque petite portion des fruietz: & lors si partie aduerſe ueult maintenir le restabliſſement faict n'estre ſuffiſant, les parties ſont appoinctees a informer: & pource ſouuent il aduient qu'il y fault faire autant de fraiz qu'au principal: au moyen de quoy lon ne pourſuit point communement ledict restabliſſement si ce n'est question des fruietz d'un gros benefice, ou de grans meubles d'une ſucceſſion. & meſmement apresent que lon peut par les ordonnances dernieres faire declarer en toutes matieres les ſentēces de recreance executoires pardeſſus l'appel, il n'est meſtier ſoy arreſter audict restabliſſement, mais uault mieulx attēdre a pourſuiure la reſtitution des fruietz en l'execution de la ſentence de recreance, pource que tel pourroit faire la diligence dudit restabliſſement, qui parauenture ne obtiendrait pas la recreance.

¶ De la main leuee d'un benefice contentieux.

Et ſ'aucun benefice est ſequeſtré pendant la complaincte intentee pour raiſon du poſſeſſoire d'icelluy, & que l'une des parties

parties plaidans meure pendant proces: le survivant baillera requeste au iuge tendant a ce que la mainmise sur ledict benefice soit leuee & ostee a son profit. sur laquelle le iuge ordonnera qu'elle sera signifiée au procureur du defunct, & adiournement a luy baillé pour y uenir dire ce qu'il appartiendra. & si le procureur au iour assigné declare que a la uerité sa partie est decedee, le iuge ordonnera que la requeste & autres pieces que bon semblera, la partie requérant, serot mises par deuers luy pour en ordonner come de raison: & apres que le requérant aura produit la procedure faicte en ladicte complainte, la sentence de sequestre, & une attestation en forme authentique de la mort de la partie decedee, & la declaration de son procureur, il adiugera au requérant mainleuee dudit benefice, & donnera en mādement au premier sergent de signifier sa sentence aux commissaires commis a regir soubz la main du Roy ledict benefice, & les adiourner a certain & cōpetent iour parduant luy pour rendre compte & reliqua de leur commission. Et doit la mainleuee estre demandee dedens l'an & iour apres le deces du col litigant decedé. Et si on ne la demande dedes trois ans apres le deces, on n'est plus receuable a la demander: d'autant que partie aduerse est pacifique triennal possesseur. & ainsi en a esté dict par arest le xiiij. iour de decembre M.D.XIX.

¶ Comment on peut empescher la main estre leuee.

mais si un tiers se faict pouruoir dudit benefice comme uacant par le deces de celluy des cōtendans qui est decedé: il fault que par lettres royaux il se face subroguer au lieu & droit du defunct dedes l'an & iour apres sa prouisiō dudit benefice: & ce faict empeschera la mainleuee dudit benefice. Et n'est mestier par lesdictes lettres royaux estre releué

m iiij du

du uice de litige, comme il fault en chose prophane en estre releué par lettres royaux de subrogation.

¶ En quelle chambre de la Cour fault presenter lettres Royaux de subrogation.

Et si le proces est pendant en la Cour de Parlement a Paris, & qu'il n'y ayt point esté cōclud cōme au proces par escript: il fault requerrir l'enterinement des lettres royaux en la grād chambre. Et s'il est conclud comme au proces par escript, il faudra en requerrir l'enterinement en la chābre en laquelle le proces aura esté distribué. Par la xxvij. reigle de la Chancellerie de Rome est dict, que si le Pape a cōcedé & oētroyé que un des contendans d'un benefice, soit subrogué on droict & lieu de l'autre du consentement d'icelluy, les impetrations faictes par autres du droict susdict audecens le mois precedent ladiēte cōcesion ou oētroiy de ladiēte subrogation, soient de nul effect: pourueu que l'impetrant dudiēt droict ne soit intrus, & qu'il n'ayt possédé paisiblement par trois ans auant lediēt proces encommencé. Et est ladiēte reigle interpretée par le glosateur en deux manieres: l'une, que si pēdāt proces pour raison d'un benefice, l'une des parties decede, ou autrement lediēt benefice, ou le droict a icelluy auoit uaqué, l'impetration de la subrogation audict benefice ou droict faicte dedens le mois apres le deces, ou autre uacation n'est ualable. L'autre interpretation est, que si deux contendent d'un benefice, & un d'eulx decede, un tiers impetre du Pape apres l'an du deces subrogatiō on lieu & droict du decedé: & apres l'impetration dudiēt tiers dedens un mois, le contentant dudiēt benefice estant suruiuant soit subrogué par bulle du Pape on droict du decedé, ladiēte subrogation uault, & non celle du tiers, iasoit que le tiers soit premier en impetratiō. Mais ladiēte reigle doibt estre entendue de la subrogation qui est faicte par bulle du Pape, non de la subrogation, qui est faicte en in-

gement par uertu du rescript du Pape. car il fault en ce Royaume, que tous rescriptz soient enterinez. Et est necessaire que toutes lettres de ces subrogations soient presentees dedes l'an & iour apres sa prouision dudit benefice, ainsi qu'il est dict par la derniere questio des arestz recueilliz par maistre Iehan le Coc. Aussi ladicte reigle de Chancellerie n'ha passé les mons de pardeca comme ie pense, ainsi qu'on dict de plusieurs autres reigles de ladicte Chancellerie.

¶ Des fins de non receuoir introduictes de droit commun, & receues en ce royaume.

Ce ne sera point chose superflue de reciter icy aucunes fins de non receuoir, lesquelles sont introduictes de droit commun, & dont nous usons encores: & autres, qui ne sont de present en usage: & aucunes qui ont esté inuentees nouuellement aussi. Disons donc premierement de celles que nous obseruons selon le droit commun.

¶ Fins de non receuoir en complaincte pour raison du temps.

Et certes est une fin de non receuoir en matiere possessoire, si icelle n'est intentee dedens l'an & iour apres le trouble, ou spoliacion: ou si apres icelle intentee la poursuite en est delaissee & discotinuee par an & iour auāt contestation en cause.

¶ En quelz cas complaincte peut estre formee pour meubles.

Semblablement lon peut defendre en matiere possessoire, quād elle est meue & formee pour meubles qui ne tiennent & ne sont coherēs aux immeubles: car s'ilz sont cōioinctz aux accessoires des immeubles, ou bien s'il est question de succession ou acquisition uniuersale de meubles, ou bien quand ilz sont prins par droit de iurisdiction en la iustice d'aucun en iusticiant & troublāt aucun a cause de ce en sa iurisdiction: en

ces cas la cōplaincte est bien receuable pour raison de meubles: ainsi qu'il est dict par le cccxxviii. article de la coustume de ce pays de Poictou, & decisi par arest le xxiiij. iour de Iuillet M.D. XXXVII. Et quant aux complaiçtes formees pour rête ou prestatiō annuele, l'an & iour ne court du tēps de la cessation du payemēt, mais du temps de la sommation & denegation du payement si la rente est querable: mais si elle est portable, l'an & iour court des la cessatiō du payemēt faicte au iour accoustumé de recevoir le payement. Car la denegation faict le trouble, quand le debuoir annuel est requerable. Par maniere que si un fermier uend la chose a luy baillee a ferme, & qu'il paye ce pendāt son maistre de la ferme, le maistre n'est point troublé en sa possession, iusques ad ce que le fermier luy denie le payement.

**¶ Action d'iniures annuele: & comment
on y doit proceder.**

D'auātage ladiçte fin de non recevoir, balieu en toutes actions pretoires, lesquelles selon droit commun, ou par noz statutz ou coustumes doibuent estre intentees dedens l'an & iour, comme en matiere d'iniures uerbales, en laquelle le iuge doit appoinçter apres auoir oy les defenses du defendeur, que les parties admeneront leurs tesmoings, lesquelz sommairement seront oyz sur les registres de la demande, & des defenses, & non enuoyer les parties hors de Cour sans despēs, ne amēde: ainsi qu'il fut dict par arest es grans iours tenuz a Poictiers le xvij. iour d'Octobre M.D. XXXI. Et ne doit le iuge aussi appoinçter les parties a escrire par intendit, ne a faire enqueste, cōme lon faict en autres matieres ciuiles. Et a esté defendu ainsi le faire par arest donē le xiiij. iour de Mars l'an M.D. VII. ains quand les iniures sont atroces, il peut biē appoinçter que les parties admeneront leurs tesmoings, qui
seront

seront oyz sommairement sur le registre, ouquel les parties pourront employer leurs faictz.

¶ Condamnation d'amendes annuele.

Pareillement si le iuge a faict cōmandement de faire quelque chose a la peine de l'amende, & que ladiete amēde n'ayt esté declairee, ne taxee, ne leuee dedēs l'an & iour, lō ne peut par apres la demander.

¶ Action sur offre de retraict annuele.

Aussi ceste fin ha lieu en matiere de retraict lignagier, auāt que le demādeur soit receu ou recogneu audiēt retraict. mais s'il est recogneu une fois, l'action par apres dure xxx. ans, comme estant personele.

¶ On n'est point releué de peremption d'actions annueles.

Et ne baille le Prince aucun releuemēt de ce que dedēs l'an & iour l'on n'auroit formé cōplaincte ou autre remede possessoire, ne si l'on n'ha faict l'offre de retraict lignagier dedens l'an & iour, ne aussi meū aucun: action pretoire: car quant aux possessoires il y ha encores le petitoire, auquel lon pourra auoir recours. Et au regard des autres, elles sont d'estroict droit, ou odieuses. Et n'en pourroit on estre releué par lettres royaux encores auant l'ordonnance derniere, de laquelle cy apres sera faict mention. Car quant es complainctes, la peremption n'emporte grand preiudice, d'autāt qu'on peut encores poursuir le petitoire. Et quant es autres matieres, elles sont a restraindre, comme estans odieuses. Toutesfois par les ordonnances dernieres article lxi. y a une limitation, scauoir est sinon qu'il apparust es matieres beneficiales le defendeur n'auoir tiltre apparent pour iustifier sa possession. & quant aux autres actions, si la poursuite en a esté intermise & discontinuee par trois ans auparauant ou apres contestation

en

en cause, l'instance est perie, & n'est lon plus tenu de proceder en icelle. Toutes fois parcydeuant le Prince auoit accoustumé releuer de ladicte peremption d'instance, sinon que auparavant la partie defenderesse eust obtenu lettres royaux tendans a fin de faire declairer ladicte instance perie: car lors lon n'estoit plus releué de ladicte peremption, mais estoit le demandeur condamné es despens de l'instance declairee perie, & de l'instance faicte sur ladicte peremption, sauf audict demandeur de se pouruoir par autres uoyes que de raison: qui estoit qu'il pouuoit de nouueau intenter son action.

¶ De l'ordonnance prohibant releuement de peremption d'instance.

Mais par l'ordonnance derniere article cxx. est dict que dorésenauant ne seront baillées lettres de releuement de peremption d'instance pour quelques causes & matieres que ce soit: & si elles estoient baillées, est defendu de n'y auoir aucun regard: ains les instances dessusdictes seront iugees tout ainsi que si lesdictes lettres n'auoient esté obtenues. En l'interpretation de laquelle ordonnance y font aucuns doute: car au moyen de ce qu'il est dict que les instances seront iugees tout ainsi que si lesdictes lettres n'estoient impetrees, ilz ueulent dire qu'il n'y ha plus de peremption d'instance. Mais ie ne suis de cest aduis: car ie pense que ladicte ordonnance ueult qu'il y ayt peremption, par ce mesinement qu'elle defend de n'en bailler releuement: & si baillé est, de n'y obeyr. ce qui seroit superflu, voire contraire a ladicte ordonnance, s'il n'y auoit peremption. Auourd'huy & ia long temps ha, on ne garde point ceste ordonnance. & contre icelle ont esté baillées plusieurs sentences & arestz: par lesquelz ont esté enterinees lettres royaux de releuement de peremption d'instance es cas cy dessus declairez. Parquoy uen qu'on ne garde point ladicte

Et ordonnance, il seroit bon qu'elle fust rayee, a fin qu'on ne se y arrestast plus. Et est a entendre que le demandeur qui laisse perir l'instance apres la cause contestee, iasoit qu'il en soit releue, & qu'il obtienne a sa demande principale, toutesfois il n'a point restitution des fruietz de tout le temps pendã lequel l'instance est demourree perie. & ainsi en fut dict par arest le huietiesme iour de Feburier M.D.XXXVI.

COn n'est tenu de proceder au petitoire, que la sentence du possessoire ne soit entierement executee.

En oultre il y ha une autre fin de uon receuoir, que s'il y a possessoire intenté, ou qu'en icelluy ayt sentece donnee de recreance, ou plein possessoire, l'on n'est tenu de proceder sur le petitoire iusques a ce qu'il soit decis du possessoire, & que la sentence de recreance ou maintenue ne soit executee tant au principal que fraiz, despens, dommages & interestz: & de present en y a article formel, qui est le xlix. des ordonnances royales dernieres: voire si le petitoire estoit intenté en Cour d'eglise en matiere beneficiale pẽdãt le possessoire intetẽ par deuant le iuge royal. Et se peut lon pouruoir par autre moyẽ: car lon peut auoir lettres royales pour faire desfẽs a la partie poursuiuant en Cour d'eglise de non y pourfuiure: cõme il fut decis par arest donnẽ le vij. d'Aoust M.D.XII.

La maintenue excuse de restituer les fruietz, fors puis la contestation sur le petitoire: & que prouision extraordinaire n'a lieu en complaincte.

Et celluy qui ha sentence de maintenue, n'est tenu rendre les fruietz de la chose contentieuse, quand ores il succumbe en petitoire, sinon depuis la cause contestee en petitoire. Et pendant

pendant la complaincte lon ne peut demander autre prouision que celles qui sont ordinaires: scauoir est le sequestre, & la recreance: comme si lon demandoit prouision de bastir en lieu cõtentieux, en baillant caution de demolir: car ce ne doit estre permis. & ainsi en fut dict par arest le XXVI. Nouembre M.D.XIIII. ne pareillement en reintegrande, car la reintegrande. ce n'est qu'une prouision.

¶ Le defendeur en action petitoire peut tendre a fin de non proceder iusques a ce qu'il soit actuellement possesseur, s'il est empesché par le demandeur.

D'auantage il y a une autre fin de non receuoir, qui est que si le demandeur a intenté une action petitoire, & neantmoins pẽdant proces il empesche le defendeur en la possession de la chose contentieuse: le defendeur, soit auant ou apres la cause cõtestee, pourra dire qu'il n'est tenu de proceder & aller auant iusques a ce que le demandeur l'ayt rẽdu & faict actuellement & realement possesseur de la chose contentieuse. & ainsi en fut dict par arest donnẽ le dernier iour d'Avril l'an M.D.XXXII.

¶ De action negatoire: & des actions resemblans petitoires, lesquelles ne le sont.

Mais il y a une maniere d'action que lon appelle negatoire, laquelle combien qu'elle semble estre petitoire, neantmoins ne l'est: & celui qui l'intente, ne cõstitue le defendeur possesseur. & la forme d'intenter ceste action est a ce qu'il soit dict & declairẽ le defendeur n'auoir droit d'aller & uenir par tel lieu, &c. Et y a plusieurs autres actions lesquelles semblent estre petitoires, lesquelles ne le sont: cõme si lon propose pour auoir payement des arrieries de quelque rente sans cõclure a cõtinueation. & en ce cas si le defendeur defend, lors pour
raison

raison de la denegation qui emporte trouble, le demandeur pourra former complaincte.

¶ Pendant l'opposition faicte a la saisie, l'opposant est possesseur: & de l'ordonnance du Roy Philippes de Valloys.

semblablement ce ha lieu en autres debuoirs annuels, comme droictz desquelz il n'y a que le Roy qui soit possesseur pendant l'opposition baillee a sa saisine. mais ce doibt estre entendu du quand on le denie ou contredit seigneur: autrement non, sinon es cas ou un priué seroit possesseur pendant proces: car il y a ordonnance du Roy Philippes de Valloys faicte l'an mil CCCXLIII. par laquelle est ordonné que si le procureur du Roy faict question d'une chose du domaine du Roy, ou de iurisdiction, ledict procureur ne peut faire saisir la chose contentieuse pendant proces, s'il n'est preallablement ordonné par le iuge. & ce ne doibt estre ordonné sinon es cas que pour un homme priué le iuge ordonneroit ladicte saisie: & si autrement il est faict, il est permis au defendeur exploicter la chose saisie sans pour ce encourir l'amende de saisie brisée.

¶ Si le torcionnairement executé peut tendre a fin de non proceder iusques a ce que les choses mal executees luy soient restituees.

Plus par semblable raison aucuns tiennent que celluy qui a faict faire une trocionniere execution pour raison de quelque debte, qu'il n'est tenu de proceder au principal apres l'appel de ladicte execution uuydee, iusques a ce que celluy qui a faict faire l'execution, ayt entierement restitué a l'executé les choses prinſes par execution: tout ainsi que si lon a intenté une action inepte, & que lon en soit decheu, lon ne peut uenir a l'apte & conuenable action, que preallablement l'on n'ayt payé

payé les despens de l'instance mal intentee. Toutesfois par arrest donné a Paris le xij. de May M.D.XLI. entre Tristand de Boyssi escuyer demandeur d'une part, & Ioyz Bonneuin ausi escuyer defendeur d'autre, iasoit qu'il fust dict qu'il auoit esté mal executé a la requeste dudiect de Boyssi, & biē oppose par lediect Bonneuin, & enuers luy condāné lediect Boyssi es despens de l'instance, dommages & interestz de l'execution reale: neantmoins il fut permis par mesme arrest audiect de Boyssi faire mettre son premier arrest a execution pour le parsus, deduction faicte de quelque somme de deniers dont lediect Bonneuin demandoit compensation.

¶ Pendant le proces de rescision d'un contract, il doibt estre vestu, & les parties iouyssans suyuant icelluy.

Oultre si le demandeur demande l'enterinement de lettres royaux tendans a cassation ou rescision de certain contract, transaction ou sentence, es cas esquelz la sentence peut estre mise au neant par lettres royaux: en chascun desdictz cas le defendeur pourra dire par fin de non proceder, qu'il n'est tenu d'aller auant iusques a ce que le contract, transaction, ou sentence dont lon demande rescision, soit uestu, & le defendeur iouyssant du contenu au contract, par maniere de prouision, offrāt le defendeur bailler cautiō de rendre, si il est dict en fin de cause que faire se doibue. Aucuns toutesfois tiennēt, qu'on ne doibt ce alleguer par fin de non proceder, ains requerrir seulement pendant proces le contract estre entretenu. Et ceste opinion est bien favorable, d'autāt qu'elle n'empesche point la poursuite du principal. Mais si un tiers possedoit la chose dont le defendeur doibt estre declairé iouyssant pēdant le proces de rescisiō, & que icelluy tiers n'eust droit ne cause du demādeur: en ce cas le demandeur en rescision ne seroit tenu

tenu retirer la chose du tiers, & en faire le defendeur iouys-
 sant. Combien qu'en toutes lettres royaux de releuement
 on met ceste clause: Pourueu que celluy qui ueult estre releué,
 soit dispensé de ses foy & serment baillez sur le contract, par
 son prelat ou autre ayant pouuoir a ce : neantmoins il n'est
 point tenu d'appeller partie aduerse pour luy uoir octroyer
 ladicte dispense, ains les Euesques ou leurs officiaux les bail-
 lent indistinctement sans cognoissance de cause. Et n'est l'he-
 ritier tenu auoir dispense du serment de son predecesseur. &
 suffit la produire en sa production, sans en informer en l'en-
 tree de la cause, sinon que partie aduerse le requist, & offrist
 ceder au proces en informant de la dispense: car lors conuie-
 droit en informer. autrement il auroit les despens iusques au
 iour qu'il en seroit informé. Aussi auioird'huy on ne gar-
 de point plusieurs effects des foy & sermens, baillez par le
 droict canõ. Comme si on ha prins quelques deniers a usure,
 & on ayt faict serment de les payer, il fault premierement
 les payer pour raison de l'observation des foy & serment:
 & parapres les repeter selon le droict canon. Toutesfois au-
 iourd'huy nous n'en usons point, ains la Cour & autres iuges
 cassent les contractz quand ilz sont usuraires sans auoir res-
 gard esdictz foy & serment.

¶ Des fins de nõ receuoir introduictes par les ordõ-
 nances royaux. Item du salaire des seruiteurs.

Conuient a present declairer les fins de non receuoir nou-
 uellemēt introduictes, scauoir est par noz ordõnances royaux
 & stile general du royaume. Et premierement lon peut se de-
 fendre par fin de non receuoir alencontre d'un sien seruiteur,
 si dedens un an a compter du iour qu'il sera sorti hors son
 seruice, il ne demãde son loyer, salaire, ou gaiges: & semblables
 ment si ledict seruiteur demande ses salaires ou gaiges de plus
 que

que des trois annees dernieres qu'il aura serui, sinon qu'il y eust conuenance ou obligation par escript, ou sommation ou interpellation suffisant des annees precedentes. Et a ce est forme le Pordonnance du Roy Loys XII. article lxvij. En ce cas n'est requis que la sommation soit faicte iudiciairement: mais suffit qu'elle soit faicte hors iugement present un notaire Et deux tesmoins, ou presens deux tesmoins seulement: attendu les termes de l'ordonnance, qui sont, scauoir est sommation ou interpellation suffisant.

¶ Contre marchans vendans a detail.

Pareillement par lesdictes ordonnances dudict Roy Loys article LXVIII. lon peut user de fin de non receuoir contre tous drappiers, apoticaire, bollengiers, patissiers, serruriers, chaussetiers, tauerniers, cousturiers, cordonniers, selliers, bouchers, Et autres ges de mestier, Et marchans uendans ou distribuans leurs denrees ou marchandises a detail, s'ilz ne demandent leurs denrees, ouurages, Et marchandises par eulx fournies dedes six mois, a compter du iour ouquel ilz auront baillie Et liuree la premiere dree ou ouurage. Et ce halieu aussi quant aux marchandises ou ouurages uendues Et liurees depuis ledict iour dedens lesdictz six mois, sinon qu'il y eust arrest de cöpte, cedula, obligatiö, ou sommation iudiciaire faicte dedens le temps dessusdict. Toutesfois si en consciëce lon scait lesdictes choses estre deues, ie seroye d'aduis que lon ne ufast de ladiete fin de non receuoir: Et ainsi en semblables termes le tiennent les docteurs de droit Canon Et Ciuil.

¶ Des arrierages des rentes constituees a pris d'argent.

Plus lon peut se defendre par fin de non receuoir si lon demande les arrierages d'une rente generale constituee a pris d'argent

d'argent de plus de cinq annees pour le regard des arriera-
ges qui sont oultre les cinq annees dernieres. toutesfois en ce
ne sont comprinses les rêtes foncieres & censives: cōme il est
decis par ordonnances dudict Roy Loys article lxxi. Et ne
doibt estre entendue ladicte ordonnance es arrirages qui se-
roient escheux auparauant ladicte ordonnance des rentes aussi
auparauant constituees, mais bien des arrirages qui seroient
escheux depuis ladicte ordonnance, iasoit qu'elles fussent con-
stituees auparauant. Et peut lon demander garnison de main
de tous les arrirages escheux auparauant l'ordonnance, &
de cinq annees depuis, si le contract de constitution de ladicte
rente est en forme authentique: & pourueu aussi qu'il n'y ayt
coustume locale au contraire, comme au siege de saint Iehan
d'Angely, ou lon ne peut demander garnison de main que de
la derniere annee. Et si la rête est creee & acquise a moindre
raison que de dix pour cent, le contract est declairé usuraire:
& les arrirages payez deduietz sur le sort principal: & en
payant le parsus du sort principal, le debteur est deschargé de
la rête: ou bie elle est moderee, scauoir est par les iuges royaux
& inferieurs, & par la grand chambre de la Cour, a la raison
d'un pour quinze. toutesfois la grand chambre des enquestes
les modere a la raison d'un pour douze.

¶ De la reduction & moderation des rêtes a la rai-
son d'un pour quinze.

Et si la rente est constituee a dix pour cent, ladicte modera-
tion se fait bien a la raison d'un pour quinze, tant des ar-
rirages que du principal de la rête. mais les arrirages payez
ne sont deduietz sur le sort principal, uoyre en ce qu'ilz exce-
deroient ladicte moderation: car iusques a ce que ladicte mo-
deration ayt esté requise, le creditur a peu receuoir les arrie-
rages a la raison d'un pour dix.

¶ Des clauses reprouuees en vendition de rentes
a deniers ou a bled.

Et s'il y a anticipation du payement du premier arriera-
ge deuant la fin de l'an a compter du iour de, la constitution de
rente, le contract en ce regard n'est de ualeur: mais au parsus,
il est bon. Et ainsi en a esté iugé par arrest de la Cour, et dict
qu'il auoit esté mal iugé par un iuge qui auoit entierement
absou le debteur de l'arriera-ge de l'annee anticipee: Et en
emendant le iugement, ladicte Cour auroit ordonné que le
debteur payeroit l'arriera-ge de ladicte annee pro rata tempo-
ris. Et fault entendre l'anticipation susdicte, comme si la ren-
te est constituee en Mars, et est dict que le payement de l'ar-
riera-ge de la premiere annee sera fait a la saint Michel. Aus-
si la cōuenāce ne uault par laquelle est dict que le debteur ne
pourra admortir ladicte rête dedēs cinq ans, ou autre tēps:
ou que s'il l'admortist, il payera l'arriera-ge entier de l'an-
nee: en laquelle il admortira: car il ne le doit que pro rata.
Et de l'anticipatiō fut dict par arrest le XXVII. iour de Iuing
M.D.XXI. Et de l'autre le ij. iour de May M.D.XIII. Mais le
contract est bon par lequel est dict que le debteur pourra
admortir la rente dedens quelque temps. Et a fin que ce pen-
dant arriera-ges ne courent, il baille au creditier telle terre
a leuer: Et en cas que le debteur n'ayt admorty la rente de-
dens le temps prefix, en ce cas des apresent comme deslors
ledict debteur transporte au creditier ladicte terre en assie-
te de ladicte rente, Et en demeure le debteur deschargé.
mais si l'assiete excedoit la ualeur de la rente, l'assiete seroit
cassée Et annulée, le parsus du contract tenant. Toutesfois
la Cour par arrest du premier iour de Feburier M.D.XXX.
donné entre Pierre Pelon d'une part, Et Francois Grignon
escuyer d'autre part, auroit reprouné un pareil contract, Et
confirmé

confermé la sentence du seneschal de Poictou ou son lieutenant a Poictiers. Par laquelle ledict Pelon auroit esté debouté d'une complaincte par luy formee contre ledict Grignon, pour l'auoir empesché es droictz possessions, & saisines de certains heritages a luy par ledict Grignon baillez en assiete d'une rente constituée a un pour quinze, avecques conuenance mise par la constitution d'icelle rente, que si elle n'estoit admortie dedens certain temps, en ce cas des apresent comme deslors, luy transportoit lesdictz heritages. Et par ce que ladicte rente ne fust admortie dedens ledict temps: & que ledict Grignon neantmoins continua encôres a leucr lesdictz heritages: ledict Pelon auroit formé contre luy ladicte complaincte. Et ne peut on fonder ledict arest, sur ce que ledict Pelon n'auoit encores possédé reaulment & de fait lesdictz heritages, & que a ce moyen il ne pouuoit former complaincte. Car il pouuoit user de l'accession de la possession dudit Grignon son aucteur: & ne luy pouuoit ce obijcer ledict Grignon, d'autant qu'il estoit tenu luy en bailler la possession uacue, & la garentir enuers autres. mais est fondé ledict arest sur ce que possession par nostre usance ne peut estre transportee par un contract illicite & reprobuë, & estant contre bonnes meurs.

¶ De la reduction des rentes a bled vendues pour deniers.

semblable moderation a accoustumé estre faicte a la raison d'un pour quinze en rente de bled constituée a pris d'argent, eu regard au pris qu'elle ha esté achaptee. Et se faict ladicte moderation tant des arrierages que du principal, si du commencement la rête est bien acquise. Mais si elle est mal acquise,

n ij lon

lon deduct les arrierages sur le fort principal comme en rente de deniers. Et quant a cognoistre si elle est mal acquise, ou non, il fault entēdre que monsieur maistre Francoys Doyneau a declairé des rentes bien constituees, ou il y auoit un boiceau de froment acquis pour quarante solz tournois, & a mesure de Poictou, ou les huit boiceaux font la charge d'un cheual. La Cour par son arest du xx. iour de Ianuier M.D.XXX. declaira un contract usuraire, ou dixhuit sextiers froment de rente mesure de Paris auoient esté acquis pour cent quarantecinq liures parisis. Et par autre arest precedent donné en l'an M.D.XXIII. le xi. iour d'Apuril elle auoit moderé un nuys de froment mesure de Paris acquis pour soixante liures tournois a six sextiers, qui est la moytié du nuys. Et receut la Cour le debteur a admortir la rente, iasoit qu'il eust plus de quarante ans qu'elle auoit esté constituée : & ha de coustume uoluntiers receuoir ainsi a admortir les rentes en deniers ou bled sans lettres royaux, combiē qu'il y ayt plus de trente ans. Mais les iuges royaux ne le font sans lettres royaux : ne encores avecques lettres, s'il y a plus de trente ans que la rente est constituée : car combien qu'il soit baillé grace de admortir toutes fois & quantes que le debteur uouldra, neantmoins ladicte grace est prescrite par trente ans. Et est aussi a noter que ceste forme de cōtract n'est usuraire, si quelqu'un preste mille liures, & qu'il soit dict que le debteur les rēdra dedēs la fin de l'an, & ou il ne les aura rendu, des apresent comme deslors il constitue au creditier cinquante liures tournois de rente, qu'il promet bailler en assiete en certain lieu. Et ha esté un tel contract approuué par arest.

¶ Dedens quel temps doibuēt les aduocatx & procureurs demander leur salaire.

Il y a oultre une autre fin de non receuoir, baillée par les ordonnances

ordonnances du Roy Charles VII. article xlv. par laquelle les aduocatx & procureurs sont forcloz de demãder leur salaire s'ilz laissent passer deux ans apres auoir faiët les uacatiõs pour lesquelles ilz demandent leurs salaires, sinon que euidẽment ilz facët apparoir qu'ilz n'y procedent par dol ou malice. Toutes fois en ce ne sont comprinses les mises qu'ilz auroient faiët pour les matieres esquelles ilz estoiet aduocatx ou procureurs : dont leurs papiers font foy iusques a la somme de uingt solx tournois pour chascun article.

¶ Du salaire des greffiers.

semblablement par les ordonnances du Roy Loys VII. article xlviii. les greffiers ne peuuent demãder leurs salaires trois ans apres les causes finies. laquelle ordonnance iasoit qu'elle parle en narratif des aduocatx & procureurs, toutes fois ne derogue point a ladicte ordonnãce du Roy Charles VII. parlant du salaire desdictx aduocatx & procureurs, par ce qu'il y a ces motx, sans deroguer aux autres ordonnãces parlans de moindre temps.

¶ Rescission de contractz se doibt demander dedens dix ans.

Aussi lon se peut defendre par fin de non receuoir, si celluy qui est demandeur en lettres royaux de rescission de contract pour raison de force, crainte, dol, ou deception d'oultre moytie de iuste pris, n'est uenu dedens les dix ans apres ledict contract, & que la cause de lesion ou releuement a cessẽ: cõme il est dict par les ordonnances du Roy Loys XII. article quarantesept.

¶ De l'ordonnance des trẽte & cinq ans quant aux mineurs.

Et par les ordonnances dernieres article cxxxiiij. est statuẽ qu'apres l'aage de trente & cinq ans accõpli ne se pourra

n iij pour

pour le regard du priuilege ou faueur de minorité plus deduire ne poursuiure la cassation des contractz faictz par les mineurs, en demandant ou defendant par lettres de relcurement, ou restitution, ou autrement, soit par uoye de nullité, pour alienatiō de biens immeubles faicte sans decret ne auctorité de iustice, lesion, deception, ou circunuection, sinon ainsi qu'en semblables contractz seroit permis aux maieurs d'en faire poursuite par releuemēt ou autre uoye pmise de droit, comme quand par iuste ignorance lon ne scauoit pas le droit a soy estre acquis & appartenir: car pour raison de iuste ignorance le droit subuient aux maieurs. Et pour plus ample declaration de ceste ordonnance, i'ay bien uoulu icy reciter le faict d'un cas aduenu puis peu de tēps enca, c'est que transaction fut faicte entre certaines parties: on narratif de laquelle est dict que entre le pere du mineur, & le pere de l'autre partie transigeans, y auoit eu proces pendāt en matiere d'adueu, pour raison des fruietz d'une metairie: laquelle les peres desdictes parties pretendoient respectiuemēt leur appartenir. & demandoit la partie aduersē dudiēt mineur, que le tuteur dudiēt mineur nōmé oudiēt narratif de ladiēte transaction, eust a se departir de la possession de ladiēte metairie, & l'en laisser iouyr. Et par lediēt tuteur auroit esté dict, que le pere du mineur estoit seigneur & possesseur de ladiēte metairie on temps de son deces. Neantmoins finalement lediēt tuteur en son nom priué par le dispositif de ladiēte transaction se desiste de la possession de ladiēte metairie au profit de l'autre partie transigeant: laquelle tantost apres uend ladiēte metairie a un tiers. Le mineur s'en ua estudier par quelques anneés es uniuerситеz: decede ce pendant lediēt tuteur, qui estoit marié avecques la mere dudiēt mineur. Interuiēnt plusieurs proces entre la mere dudiēt mineur & luy. Pendant lesquels

leſquelz il eſt faiēt maieur. & ſa mere retient touſiours par deuers elle tous les tiltres de la ſucceſſion paternelle d'icelluy mineur ſon filz. uiennēt a ſ'accorder deſdictz proces. Apres lequel accord le filz eſtant lors en l'age de trente huiēt ans, eſt aduertī par ſa mere de ladiēte trāſaction, & du tort que luy auoit faiēt ſon tuteur & beau pere, de ſ'eſtre deſiſtē de la poſſeſſion de ladiēte metairie : de laquelle ſon feu pere eſtoit ſeigneur & poſſeſſeur on temps de ſon deces: comme il eſtoit recogneu par ladiēte tranſactiō. Lediēt filz, narration de ce faiēte, obtient lettres royaux de la Chancellerie a Paris, par leſquelles eſt mandē au ſeneſchal de Poictou ou ſon lieutenant a Fontenay le conte, que ſi de ce luy appert a ſuffire, il contraigne les detenteurs de ladiēte metairie, de l'en laiſſer iouyr, & de luy en rendre les fruiēt depuis tel temps, & en telle ualeur que de raiſon, nonobſtant ladiēte tranſaction : de laquelle partant que meſtier ſeroit, il eſt releuē, & auſſi du temps encouru durant ſa minoritē. L'acquerer & tiers poſſeſſeur de ladiēte metairie eſt adiournē ſur l'ēterinement deſdictes lettres. Il appelle en gariment ſon aucteur & uendeur, avecques lequel ladiēte tranſaction auoit eſtē faiēte: lequel aſſiſte avecques luy on proces. Les deux enſemble defendent eſdictes lettres royaux, alleguāſ que ladiēte metairie eſtoit & appartenoit anciēnemēt aux predeceſſeurs dudiēt aſſiſteur, & que le pere du demandeur ſ'en eſtoit emparē ſans tiltres: & que par le moyen de ladiēte tranſaction il auoit recouuert la poſſeſſion de ladiēte metairie: & que l'acquerer en auoit iouy paiſiblement a tiltre d'achapt & bonne foy par dix ans & plus. Et parce l'auoit preſcript tāt ſelon droiēt, que par la couſtume du pais de Poictou, article premier on tiltre Des preſcriptions. Plus diſoient que lediēt demandeur n'eſtoit receuable, parce que par ladiēte ordonnāce,

publiee en l'an mil cinq cēs trentre neuf article CXXXIII. susdictē, un mineur ne pouuoit estre releuē apres qu'il auoit l'aage de trente cinq ans, de ce qu'il auoit faict durant sa minorité. & que le demandeur on tēps de l'impetration de sesdictes lettres royaux auoit plus de trente cinq ans. A quoy par ledict demandeur auroit esté repliqué, que ueue sa minorité ne pouuoit auoir couru ladicte prescription contre luy: parce que selon droit cōmun la prescription de dix ou uingt ans ne court point contre mineurs. Aussi par ladicte coustume ilz sont expressement exceptez. D'aduantage, d'autant que ledict acquerereur estoit successeur immediat de celluy qui auoit faict ladicte transaction, lequel estoit possesseur de male foy, cōme ayant eu la chose immeuble du mineur sans decret de iustice, icelluy acquerereur selon droit commun ne pouuoit prescrire par moindre tēps que de trente ans. Quant a ladicte ordōnāce il disoit qu'elle estoit faicte depuis ladicte transaction: & par cen'y pouuoit s'estendre, mesmemēt qu'aupar auant on obseruoit en la grand chambre du plaidoyer de la Cour de Parlement a Paris, que cōtre telz cōtraictz nulz des leur commencement, le remede & uoye de nullité duroit trente ans, qui ne commençoient que apres la minorité finie. En oultre, par ladicte ordonnance y a une exception: scauoir est, sinon es cas, esquelz on subuiendroit es maieurs: dont ledict cas qui s'offroit, estoit l'un: parce qu'un maieur peut estre releuē contre prescription de trente ans, quād il a eu iuste ignorance du droit qui luy competoit, selon la commune opinion des docteurs tant de droit ciuil, que de droit canon traictās ceste matiere. Et par lesdictz defendeur & assesseur auroit esté dupliqué, que ledict defendeur ignoroit ladicte metairie auoir appartenu au mineur. & parce pouuoit prescrire par dix ans entre presens, ou xx. entre absens. Aussi que si le tuteur

teur en son nom propre uend la chose du mineur, & l'acque-
reur de bonne foy, & a bon tiltre particulier la possedee par
dix ans, a compter du temps de la minorité finie, l'acquireur
la prescript. Les parties sont appoinctees a faire preuue. le
demandeur uerifie que son pere estoit seigneur & possesseur
de ladiète metairie on temps de son deces. Plus il prouue
qu'il n'auoit que trente & huiet ans on temps de l'impetra-
tion de ses lettres royaux, & qu'il auoit eu lesdictz proces
auecques sa mere, & qu'il n'y auoit long temps qu'ilz estoient
accordez. Les defendeur & assisteur prouuent, ladiète me-
tairie auoir appartenu aux predecesseurs de l'assisteur, &
auoir esté par eulx possedee auant qu'elle fust au pere dudièt
mineur, & que ledièt mineur on temps de l'impetration
de ses lettres royaux auoit xliiij. ans, & que ledièt defendeur
l'auoit possedee par quinze ou seize ans, des & puis son ac-
quisition. Lesdictes parties sont par apres appoinctees a
produire. le demãdeur produièt pour tout tiltre ladiète trãs-
action, & la procedure faicte entre luy & sa mere. les defen-
deur & assisteur produisent les fiefz & adueux par leurs
predecesseurs rendus de ladiète metairie, auant qu'elle ap-
partint au pere dudièt demandeur, & depuis, aux seigneurs
desquelz ladiète metairie estoit tenue, & de quarante ans a-
uant ledièt proces encommencé. Les parties baillent contre-
dictz, & saluatiõs: uoyent les enquestes en publication: &
est la matiere appoinctee en droièt. Est donnee sentence, par
laquelle ledièt demandeur est debouté de ses lettres roy-
aux, & lesdictz defendeur & assisteur enuoyez absoulz
d'icelles, les despens compensez: dont ledièt demandeur au-
roit appellé, & son appel deuement releué en la Cour de
Parlemēt a Paris, ou il faict consultation de sa matiere auec-
ques aucuns notables aduocats, & trouue qu'il deuoit obte-
nir

nir autres lettres royaux, adressans a la Cour: par lesquelles il fust releué du laps du temps escheu depuis sa minorité iusques a l'introductiō du proces, pour cause de la iuste ignorāce qu'il auoit du droict a luy appartenant en ladiēte metairie: parce que par ses premieres lettres royaux il n'estoit releué que du tēps escheu durant sa minorité: & estoie de c'est aduis. Les autres estoient d'opinion, que lediēt appellant & demandeur eust lettres royaux pour estre receu a reprendre lediēt proces d'adueu narré par ladiēte transaction, & sur lequel elle estoit interuenue on lieu de sō feu pere: & qu'il fust releué de la discōtinuation & percemption de l'instance pour les causes cy dessus alleguees, lesquelles il trouuoiet raisonnables. & fut ceste derniere opinion suiuite, & lettres royaux obtenues en ceste derniere forme, & presentees en la Cour, & l'enterincement d'icelles debatue par lesdicts intimés. & les parties surce appointees en droict, et a produire, ioinct au proces principal, pour en faire raison en icelluy iugeant. Par arest fut dict, bien iugé, & mal appelé par lediēt appellant, sans auoir regard a sesdictes dernieres lettres royaux, desquelles il fut debouté: & que ce dont auoit esté appelé, sortiroit son plein & entier effect. Et icelluy appellant condamné es despens de la cause d'appel, & dudiēt incident, & en l'amende. Ce qu'on trouua fort rigoureux, ueues les raisons lesquelles faisoient pour lediēt appellāt. Mais en somme, de cest arest nous pouuons tirer & recueillir, que ladiēte Cour prend ladiēte ordonnance, non pas comme introduisant droict nouveau: car elle ne s'extēderoit es contractz precedēs icelle ordonnance: ains comme declaratiue de l'ancien droict. Et fut donné semblable arest contre un demandeur en lettres royaux, tendant estre receu a demander reddition de compte a l'executeur du testament d'un sien oncle, duquel il estoit heritier

ritier: pource qu'il estoit encore dedens les trente ans, dedens lequel temps ceste action peut estre intentee, deduction faicte du temps encouru durant la minorité dudiect demandeur. A quoy le defendeur disoit, que le demandeur n'estoit receuable, par le moyen de ladiecte ordonnance: parautāt que lediect demandeur auoit plus de trente cinq ans lors qu'il impetra lesdictes lettres. Oultre disoit, que ne deuoit estre faicte aucune deduction dudiect temps de la minorité, pource que le demandeur auoit l'aage de dix & sept ans on temps que son diect oncle deceda: & que quand la prescription commence contre un adulte, scauoir est le masle aiant l'aage de quatorze ans, et la femelle l'aage de douze ans: en ce cas la prescription de treēte ans court, sans espoir de restitution.

¶ N'y a releuement touchant meubles, ne bail a ferme de fruietz.

Plus lon peut user de fin de non receuoir, si le demandeur demande par lettres royaux estre releué de l'alienation de meuble, soit par le moyen de minorité d'ans, ou de deception d'oultre moytie de iuste pris: ne semblablement de bail a ferme faict a moindre ualeur que les fruietz ne ualent.

¶ On ne peut former complaincte pour vn exploict de iustice.

D'auantage un iuge ou officier public, comme un sergent, se peut ayder de fin de non receuoir, si lon forme contre luy complaincte pour quelque exploict par luy faict par auctorité de iustice, sinon qu'il fist preiudice a la iurisdiction d'autrui, ou que par lediect exploict il uolut se attribuer la iurisdiction appartenant a autrui.

Peines

¶ Peines pecuniaires & ciuiles introduictes par le droict n'ont lieu en ce royaume.

Finallement lon peut se defendre par fin de non receuoir, si le demandeur demande quelque peine pecuniaire introduicte de droict ciuil estre declairee encourue & attaincte cõtre luy: car elles n'ont lieu en ce royaume: comme la peine par laquelle celluy qui auoit prins par contract d'emphyteose une chose a prestation annuelle: car iasoit qu'il demoure par trois ans sans payer, toutesfois le bailleur ne se peut emparer des lieux baillez de son auctorité, sinon qu'il y ayt de ce conuenance expresse par le contract du bail: & encores fault il qu'il soit faict de ce declaration par auctorité de iustice: car en ce royaume ce qui estoit de droict cõmun permis faire de son auctorité, se doibt faire par auctorité de iustice: comme de droict un seigneur apres le temps de son bail a ferme, peut de son auctorité mettre hors son fermier: neantmoins en France il ne le peut faire. Semblablement les peines lesquelles sont ordonnees de droict commun contre les femmes qui se remariant, n'ont lieu en ce royaume, sinon que la mere perd la tutelle de ses enfans de son premier liẽt en se remariant, & est retenue en l'amende, ce requérant le procureur fiscal de la seigneurie ou elle demoure, pour s'estre mariee sans auoir faict pouruoir de tuteur aux enfans de son premier mariage. & en plusieurs lieux de ce y a coustume formele.

¶ Des fins de non receuoir baillees de droict commun non admises en ce royaume.

Exposons maintenant par ordre les fins de non receuoir, lesquelles ont esté autresfois obseruees selon droict cõmun, & de present ne sont plus gardees en Cour laye. Et premieremẽt nous n'usons plus de exception de pecune non eue, & non nombree ne receue. Secondement nous ne gardons plus qu'un homme

hōme excōmunié ne doit eſtre receu a intenter action. Tier-
cement nous ne obſeruons plus recōuention ne compenſation.

¶ De reconuention, & en quel cas elle ha
lieu ſelon noſtre ſtile.

Et n'eſt permis de demander compenſation ſinon par lettres
royaux, ne auſſi reconuention, & encores en un cas ſeu
quant a ladiète reconuention, ſcauoir eſt quand la demande
en reconuention ſont les deſenſes du deſendeur en l'autre in-
ſtance, & ſont ſi connexes l'une avecques l'autre, qu'elles ne
peuuent eſtre ſeparees, & l'une emporte la deciſion de l'autre:
comme ſi le demandeur demande payement de quelque fer-
me, le deſendeur deſend qu'il n'ha peu iouyr des choſes bail-
lees a ferme, par le faiēt & coulpe du demandeur: & oultre
ſe conſtitue demandeur pour repeter les deniers qu'il a baillé
d'aduance pour ladiète ferme, ou pour auoir ſes dommages
& intereſtz de l'empeschement a luy donné par le faiēt &
coulpe du demandeur en la iouyſſance deſdictes choſes: car en
deſendant il ne pourroit pas auoir, iasoit qu'il obtint, ne les
deniers par luy aduancez, ne ſeſdictz intereſtz.

¶ Cas ou ne ſont neceſſaires lettres royaux pour
faire compenſation, & par quel moyen on em-
peſche la garniſon de main.

Mais il n'eſt point meſtier d'auoir lettres royaux de cōpen-
ſation quād lon ueult maintenir que la partie aduerſe a pro-
mis faire ladiète compenſation. Auſſi ne peut lon empeschier
par quelque exceptiō que lō allegue, que la garniſon de main
de la ſomme deue par instrument authentique, ne ſoit faiēte,
ſinon que lon face apparoir de ladiète exception par eſcri-
pture authentique: & a ce moyen un fermier ne peut empes-
cher la garniſon de main de la ſomme contenue par instrument
authentique

authentique de sa ferme pour quelque empeschement qu'il allegue luy auoir esté faict en la iouissance des choses a luy affermees par le faict du demandeur, sinon qu'il face apparoir par escripture authentique dudit empeschement. Et si ledict empeschement auoit esté faict par un tiers, luy fault qu'il monstre aussi par escripture authentique comment il ha denoncé l'empeschement au demandeur en temps deu & conuenable : par maniere que comme un débiteur eust esté receu a opposition alencôtre de certaine execution faicte sur ses biens meubles a default de payement d'une somme de deniers duee par lettres obligatoires, & pour ses causes d'opposition eust allegué payement, & dict qu'il s'en rapportoit au serment du créateur : a quoy par le procureur dudit créateur eust esté dict que le créateur estoit demourant loing du lieu ou estoit le proces agité : & requis delay pour luy faire a scauoir : & que neantmoins ce pendant par maniere de prouision, & par forme de garnison de main, les meubles prins par execution fussent uenduz iusques a la concurrence de la somme : qui auroit esté contredict par ledict opposant, attendu qu'il s'estoit rapporté au serment du créateur, & a ce moyen n'estoit plus en demeure : le iuge sur ce auroit ordonné que lesdicts meubles seroient uenduz, & les deniers deliurez au créateur par forme de garnison de main, en baillant par ledict créateur bonne & suffisante caution de redre en fin de cause. dont l'opposant auroit appelé : & la cause playdoïee en la Cour de Parlement, auoit esté dict bien iugé. & est ledict arrest en date du premier iour d'April l'an M.D.XXV. Mais si le créateur demouroit au lieu ou le proces est pendant, ou illec pres, ie siroye d'aduis que lon deuroit differer l'execution iusques a ce que le créateur eust accepté & faict, ou referé ledict serment. Et ne peut estre ladicte garnison de main empeschée,

pour

pour alleguer par le debteur, qu'il estoit mineur on temps de l'obligation, ou que l'obligation par autre moyen est nulle, cōme si elle auoit esté faicte par la femme mariee sans l'authorité de son mari: sinon qu'il apparust par icelles obligations, ou autres instrumens authentiques. Car il n'y a obligation si authentique qu'on ne doibue receuoir contre icelle l'exception, de laquelle appert promptement par autre authentique instrument, ainsi qu'auons cy dessus declairé.

¶ Iouissance prouisionale par vertu d'un contract authentique.

et generalement prouision doit estre faicte & adiugée de la iouissance du cōtenu en tous instrumens authentiques, quand ilz sont liquides, en baillant caution pendant proces sur le principal.

¶ Cas en faict aduenu.

Et pour ceste cause comme la Cour eust faict defense aux procureurs de non exercer plus office de notaire, & neantmoins un procureur eust obtenu du Roy l'office de notaire Royal, & par uertu de ses lettres eust requis au iuge du lieu estre receu a faire le serment, & estre institué audict office, les notaires du lieu l'auroient empesché par le moyen de ladicte ordonnance de la Cour: toutesfois le iuge l'auroit receu audict serment: dont les notaires auroient appellé: & par arest des grands iours tenus a Angiers le xvi. iour de septembre M.D.XXXIX. auroit esté dict bien iugé. & monseigneur maistre Francoys de Monthelon, lors President esdicts grands iours, & second President en la Cour de Parlement a Paris, apres auoir prononcé l'arest, dist que les notaires ne debuoient empescher que le procureur ne fust receu & mis en possession dudict office de notaire: mais apres qu'il eut esté receu, ilz debuoient requerrir qu'il eust a opter estre notaire, ou procureur:

procureur: Et par ce moyen l'eussent cōtrainct de laisser l'un ou l'autre office. En quoy estoit fort a louer la grand humanité de mondict seigneur de Monthelon, Et son grand Zele qu'il auoit d'enseigner les assistans: car il auoit de coustume auant ou apres l'arest prononcé, quand il estoit de consequence, de declairer la raison Et motif de l'arest. Semblablement pour poursuiure nostre propos si le iuge du consentement des parties a ordonné commissaires pour uoir Et uisiter quelques lieux, ou faire autre chose, les parties doibuent estre au proces uerbal ou rapport des commissaires: Et ne le peuuent impugner sinon par uoye de l'inscription de faulx, comme un autre instrument publique Et autbentique. Et ainsi en fut dict par arest esdictz grands iours d'Angiers le xvij. iour de septembre.

¶ Usucapion tollue.

En oultre selon nostre stile de France usucapion n'a point de lieu: c'est a dire que lon ne prescript point les meubles pour les auoir possédé par trois ans continuelz a bonne foy: mais est requis en prescription des meubles tel laps de temps, que a prescrire les immeubles.

¶ De contestation en cause.

Sensuyt la maniere des appoinctemens de contestation en cause: Et en ce le iuge ha a uoir si les parties s'accordent de leurs faictz, par maniere qu'il n'est plus question que du poinct de droict: car en ce cas si les parties n'ont instrumens a produire, le iuge appoincte que le proces de cōtestation, Et autres pieces que bon semblera aux parties, auecques un aduertissement de chascun costé, seront mises pardeuers luy dedens certain temps pour en ordonner comme de raison Et en droict. Et s'il uoit que les parties peuuent auoir instrumens a produire, il les doibt appoincter a escrire Et produire a fin qu'elles

qu'elles ayent communication de leur production, & y bail-
lent contredict & saluatiōs: & ne doibt audiēt cas appoin-
cter la matiere en droict: ou sil la y appoinctoit, fauldroit
que parapres il interloquast que les parties auroient commu-
nication de leurs productions, & y bailleroient contredict &
& saluations. Mais si le iuge uoit que les parties sont contrai-
res en leurs faictz, il les doibt appoincter a escrire par in-
tendit & a informer: & si la matiere est de consequence, se-
ra bon ordonner que les parties communiqueront leurs inten-
ditz pour y respondre, auparauant que les appoincter a in-
former. Aucū iuges ont accoustumē appoincter a escrire par
demande, defense, reплика, & duplique: & par les ordonnā-
ces du Roy Charles VII. article cxxxiij. est cōmandē que les
iuges n'appoinctent les parties contraires, & a faire enque-
stes, quand la matiere se peut uuyder par fin de non recevoir,
& par poinct de droict, comme cy dessus a esté touché. Aussi
par les ordonnances dernieres article xliij. xliij. xliij. & xlv.
est defendu aux parties, leurs aduocat & procureurs, de
n'alleguer aucune raison de droict par leurs intendit, escri-
ptures, additions, & responsifz fourniz es matieres reiglees
en preuues & enquestes, mais seulemēt leurs faictz positifz
& probatifz, sur lesquels ilz entendent informer & faire
enquestes: & que lesdictz faictz soient succinctement po-
sez & articulez sans redicte: & que les parties ne respon-
dront que par une seule addition ou deux au plus en quelque
matiere que ce soit: & si les aduocat & procureurs y con-
treuiēnent, seront pour la premiere fois punis d'une amēde de
dix liures parisis enuers le Roy, & pour la seconde fois de la
suspension de leur estat pour un an, & pour la troisieme pri-
uez a tout iamais de leurdict estat & office de postulation
sans deport. Toutesfois lon n'observe pas ladicte ordonnance

a la rigueur quant a l'allegation des raisons de droict : car souuent les procureurs font les contestations de cause sans les iuges & aduocat^x, & prennent appoinctement a informer bien souuent ou la matiere gist en poinct de droict: parquoy lors est mestier alleguer des raisons de droict . Et se doit entendre ladiete ordonnance, quand il y auroit raisons de droict superflues, ou que le proces seroit pendant es sieges royaux & Cours de Parlement ou y a gens scauans. Mais quand il est pardeuant les iuges subalternes, dont aucuns ne sont scauans en poinct de droict, il n'est point mal d'alleguer lors la raison de droict decisive du proces, mesmement quand elle n'est pas commune, & que on l'allegue briuelement. En oultre par lesdictes ordonnances dernieres article xl. est prohibé de non poser & articuler calumnieusement aucun faux fait, soit en plaidant, ou par escriptures, ou par autres pieces de proces, sur peine de dix liures parisis es Cours souueraines, & cent sol^x parisis es iurisdicions inferieures : esquelles amendes seront les parties condammées enuers le Roy, & en la moytie moins enuers les parties pour leurs interest^x pour chascun faux fait calumnieusement posé.

¶ Des exceptions qui de droict empeschent contestation en cause.

En cest endroict est a noter que selon le droict commun il y a aucunes exceptions qui empeschent la contestation de la cause: comme l'exception de transaction & de prescription. qui se doit entendre qu'elles empeschent contestation sur le principal: mais non pas sur icelle exception: car il fault sur icelle contester cause, voire & appoincter les parties en enquestes si elle gist en fait, comme gist ladiete fin de prescription. Et quant est de ladiete fin de la transaction, nous auons dict cy dessus qu'elle n'empesche la poursuite de la cause, voire si elle auoit esté

esté faicte depuis le proces intenté: & est celluy qui l'allegue, contrainct passer oultre, s'il ne la monstre par instrument authentique. Bien a lon accoustumé ordonner quand la transaction n'est par escript, que celluy qui l'allegue, en informera par tesmoings, si bon luy semble, mais neant moins qu'il ira auant au principal sans preiudice de ladicte transaction.

¶ De la fin de litispence.

Il y a une exception & fin de non proceder, laquelle selon nostre stile mesme empesche bien la contestation sur le principal, scauoir est de litispence, quand lon allegue proces estre pendant pour raison de mesme chose pardeuant autre iuge: car ladicte exception se peut monstrier promptement par escript.

¶ Litispence doit estre proposee auant autres fins en toutes matieres.

Et doit estre ladicte exception proposee auant toutes fins tant de non receuoir, que peremptoires: & d'icelle estre faict droit preallablement, uoie en matieres de complaincte, en laquelle lon doit defendre a toutes fins selon l'ordonnance: car ladicte ordonnance ne doit estre entendue de la fin de litispence.

¶ Quand litispence ne se verifie par actes, & seroit mestier y faire oyr tesmoings, quel apoinctement y eschoit.

Mais si les parties ne s'accordent que soit mesme chose pour raison de laquelle y a proces pendant, & qu'il n'en puisse promptement apparoir au iuge par les proces mis auant pour informer de ladicte litispence: le iuge peut en ce cas ordonner que sans preiudice de ladicte litispence, & sans y auoir pour lors regard, le defendeur defendra a toutes fins: & pourra le defendeur lors alleguer pour fin de non receuoir ladicte

litispence: car autrement il faudroit faire enqueste auant que la cause fut contestee, pour monstrier que ce seroit une mesme chose. qui seroit chose fort absurde: & constituerait les parties en grans fraix & mises, parce qu'il conuiendroit faire deux enquestes, l'une auant cause contestee, & l'autre apres.

¶ Cas aduenü de faict, touchant tel appoinctement sur litispence.

A ceste cause comme une partie eust formé complaincte pour raison d'une succession uniuersale, & eust esté defendu par les defendeurs: le defendeur mesme par apres forme autre complaincte pour raison de quelque chose particuliere dont il disoit estre seigneur & possesseur a bons & iustes moyens, sans les declarer: & par lesdicts defendeurs eust esté dict que ladicte chose particuliere estoit de ladicte succession pour raison de laquelle ladicte autre complaincte auoit esté formee, & par ce moyen eussent tēdu a fin de non proceder en ladicte derniere cōplaincte iusques a ce qu'il fust decisi de la premiere: a quoy par le demandeur eust esté dict que ladicte chose particuliere n'estoit de ladicte succession, ains auoit esté donnee au predecesseur du demandeur par le defunct, & que par auant la succession escheue le demandeur en estoit possesseur: par lesdicts defendeurs auroit esté dict que ledict defunct estoit mort uestu & saisi de ladicte chose particuliere notwithstanding ladicte donation, laquelle n'auoit sorty effect, & que en la lettre de donation n'auoit aucun lieu ou elle auoit esté faicte. surquoy les parties appoinctees en droit, seroit ensuy uie sentēce, par laquelle il auroit esté dict que sans auoir egard a ladicte litispence, les defendeurs defenderont a toutes fins suiuant l'ordonnance: & iceulx enuers le demandeur cōdamner es despens de la contestation: dont ilz appellent. Et ia soit qu'ilz

qu'ilz euſſent conſulté avecques des plus fameux aduocatx des grans iours d'Angiers, & euſſent trouué auoir bõne matiere d'appel, & baillé griefx hors le proces, par leſquelz ilz euſſent remonſtré ladiçte ordonnance ne debuoir eſtre entendue de ladiçte fin de litispendence, & auſſi que le demãdeur n'auoit requis qu'ilz allaſſent auãt, ains ſeulement nyé la litispendence: il auroit eſté diçt par areſt deſdiçtx grans iours tenuz en l'an M.D.XXXIX. qu'il auoit eſté mal appellé, & bien iugé.

¶ D'euocation de cauſe pour raiſon de litispendence.

D'aduãtage lon peut obuier autremẽt une litispedẽce, ſi le proces ouquel on ueult fonder la litispendẽce, eſt intenté pardeuãt le ſuperieur: car le ſuperieur peut euoquer la cauſe pẽdant pardeuant l'inferieur, & luy faire faire deſenſes par uertu de lettres royaux de non entreprẽdre cognoiſſance de la matiere, & aux parties de non elles pourſuiure pardeuãt le iuge inferieur: cõme il a eſté cy deſſus touché. Et peut auſſi le iuge ſuperieur ſans lettres royaux debouter une partie de la litispendence par elle alleguee d'une matiere intentee pardeuant ſon inferieur, de laquelle la cognoiſſance appartient au ſuperieur. Et meſmement quand la partie aduerſe a introduiçt le premier proces pardeuant l'inferieur, pour empêcher que ſa partie aduerſe ne peuſt ſe pouruoir pardeuant le ſuperieur, a fin qu'elle n'eũſt ſi brieue expedition. Comme ſi une partie craignant que ſa partie aduerſe intentañt ou formaſt contre elle complainçte pardeuãt le iuge preſidial, pour raiſon d'une ſucceſſion a elles obuenuẽ, intentoit quelque demande pardeuant le iuge non royal ſubalterne & inferieur du preſidial pour raiſon de ladiçte ſucceſſiõ: & le defendeur ſe laiſſoit defaillir pardeuant le iuge inferieur: & apres for-

deboutez, & condamnez en l'amende ordinaire telle que de fol appel enuers nous, & en la moytie moins enuers la partie. Toutesfois la Cour de Parlement ne les iuges inferieurs ne tiennent entierement ceste rigueur : ains aucuns qui auroient appellé de ce qu'apres le premier delay pour informer, passe sans faire aucune diligence, ne en informer, auroiēt en second delay, auroient esté contrainctz acquiescer en ladicte Cour depuis lesdictes ordonnances dernieres. Et en matiere beneficiale apres que les parties auront contesté, leur doit estre baillé un seul brief delay pour escrire & produire, qui ne pourra estre prorogué pour quelque cause que ce soit. Car le sequestre & la recreance en matiere beneficiale se uuydent regulierement par tiltres, parautant que le tiltre y uiēt plus a considerer que la possession. A ce moyen on ne perd point un benefice pour n'auoir prins possessiō d'icelluy: pourueu qu'on n'ayt laisse passer trois ans. car lors on pourroit practiquer le remede ou prouision de pacificis possessoribus: ou bien si on n'auoit prins possession d'un benefice resigné dedens le temps de la reigle de la Chancellerie Romaine estant en nombre xxxiiij. laquelle est receue en France: comme il a esté dict par arrest de la Cour de Parlemēt a Paris le xiiij. iour d'Aoust M. D. IIII. ainsi que dirons cy apres plus amplement.

¶ La recreance & maintenue en complaincte doibuent estre poursuyues par vn mesme moyen.

Aussi par lesdictes ordonnances article lix. est defendu aux iuges de ne faire deux instances separees sur la recreance & maintenue des matieres possessoires: mais doibuent estre conduictes par un seul proces & moyen. comme semblablement lon ha accoustumé faire du sequestre quād la partie maintiēt

• iiij estre

estre trienal possesseur: car lon appoincte les parties a escrire & informer quant aux trois chefx de ladicte complaincte, scauoir est sequestre, recreance, & maintenue. Mais on ordonne qu'au rapport des enquestes sera fait raison du sequestre.

¶ Sequestre se disioinct des autres chefx de la complaincte.

Toutesfois en complaincte intentee pour raison d'un benefice uacāt par mort, le sequestre ha de coustume d'estre separe de la recreance & maintenue: car apres que la cōplaincte a esté proposee, & que les parties ont eu un delay selon la distance des lieux pour mettre auant & se communiquer leurs tiltres suiuant l'ordonnance derniere article xlvj. & qu'elles ont contesté sur le sequestre, elles sont appoinctees quant a icelluy a escrire & produire pardeuers le iuge, & en droit.

¶ Le sequestre & confection d'inuentaie se ioignent en complaincte de succession.

Semblablement en complaincte formee pour raison de succession uniuersale, lon tient ceste forme de proceder quant au sequestre & confection d'inuentaie des meubles, & tiltres de la succession.

¶ Inuētaires aux despens de la succession, & que prouision ne se doibt ioinde au principal.

Lequel inuentaie doibt estre fait aux despens des biens de la succession. Et pareille forme garde lon quant a la prouisiō que lō ha accoustumé bailler & adiuger de la quarte partie de la portion contendue en une succession directe pendāt le proces de cōplaincte formee pour raison d'icelle, tellement que si le iuge ioignoit lesdictes instances sommaires au proces principal, lon auroit bone matiere d'en appeller. & ainsi en fut dict par arest le vii. de february M.D.XXIX.

¶ Responses

¶ Responſes par credit vel non, abolies.

Parcydeuant quand les parties eſtoient appoinctees en enqueſte, ſelon les ordonnances royaux anciennes elles eſtoient tenues de affermer par ſerment les faietz contenuz en leurs eſcriptures, & y reſpondre par credit uel non, auparauant que faire leur enqueſte, ſi par l'une d'elles il eſtoit requis. Mais par les ordonnances dernieres article xxxvi. xxxvij. xxxviij. & xxxix. il eſt dict qu'il n'y aura plus de reſpoñe par credit.

¶ Des reſponſes de verite.

Et neantmoins eſt permis aux parties ſe faire interroguer l'une ou l'autre pendant proces & ſans retardatiõ d'icelluy par le iuge de la cauſe, ou autre plus prochain des demourances des parties, qui a ce ſera commis, ſur faietz & articles pertinens & concernans la cauſe & matiere dont eſt queſtion entre elles : & ſeront tenues affermer par ſerment les faietz contenuz en leurs eſcriptures, & additions: enſemble par les reſponſes qu'elles ferõt auſdictz interrogatoires, confeſſer ceulx qui ſeront de leur ſcience & cognoiſſance, ſans les pouuoir denyer ou paſſer par nõſcauance: & ce ſur peine de dix liures pariſis d'amende pour chaſcun faietz denyé calumnieuſement es Cours ſouueraines, & cent ſolz pariſis es iuriſdictions inferieures. eſquelles amendes ſerõt leſdictes parties cõdamnees enuers le Roy, & en la moytié moins enuers les parties pour leurs intereſtz. Toutes fois n'eſt tenue la partie affermer ne reſpondre en ſa perſonne, mais ſuffit qu'elle le face par procuratiõ ſpeciale, ſcauoir eſt quãt a ladiete affirmation, qu'elle afferme par ſerment en ſon ame que les faietz contenuz par ſes eſcriptures, contiennent uerité. & quant aux reſponſes, fault que particulierement elles reſpondent a chaſcun article de faietz. & a ceſte fin fault que
celluy

celluy qui ueult faire interroguer sa partie aduerse, face extraire de ses escriptures les articles qui seröt de faict, & qu'il les baille au iuge, ou son commis en ceste partie, & que la procuration soit en forme authentique.

¶ Quand la partie peut estre contraincte respondre en sa personne.

Mais quād il y a cause, & que la partie demeure au lieu ou est le proces pendant, ou illec pres, le iuge peut ordonner que la partie respondra en sa personne aux interrogatiōs: & ne luy fera grief.

¶ Quelles personnes peuuent estre interroguees.

Et si le mary agit ou est poursuyui a cause de sa femme, la partie aduerse peut requerrir que la femme soit oye sur ses faictz qui seront de la science & cognoissance d'icelle. Semblablement le filz de famille, ou mineur ayant attainct l'age de puberté, peuuent estre contrainctz de respondre de ce qui est de leur cognoissance es causes lesquelles leur pere ou curateur poursuyt a cause d'eulx. Pareillement le garend & assistent. Mais celluy duquel on ha prins le gariment, & qui s'en est allé hors proces, ne peut estre contrainct respondre, par ce que sa response ne nuyroit a son garend. Et peuuet tels les responses estre requises, & la partie estre interroguee, iusques a ce que les parties ayent prins appoinctement a oyr droit, & encores apres iusques a la sentēce: uoires'il y auoit appel de la diffinitiuē: car lors le proces est encore pendant, d'autant que l'appel non seulement suspend la sentēce & esfect d'icelle, ains l'extainct. Mais ce doit estre entendu des faictz articlez & posez auant que les parties ayent conclud & renoncē en cause, & non pas de nouueaux faictz: car la partie aduerse pourroit requerrir estre receue a y respōdre aux despens de celluy qui baille les nouueaux faictz. & pourroit

pourroit on alleguer les nouueaux faictz estre impertinens & non receuables. Aussi doit estre entendu quand on le requiert pardeuant le iuge d'appel. car il est notoire qu'on ne le peut requerer pardeuant le iuge a quo, apres l'appel interiecté de la diffinitive.

¶ Quelles enquestes le iuge est tenu commettre a l'enquesteur, & quelles il peut retenir.

Il fault maintenant poursuyuant nostre propos, que nous voyons de la maniere de commettre les commissaires. Et est a entēdre que par edict du Roy Francoys, faict au moys de Februrier l'an M.D.XIIII. qu'en chascun siege royal ressortissant nuement en la Cour de Parlemēt a Paris, auroit un enquesteur, & en aucuns deux: & que le iuge soit tenu leur cōmettre la facon des enquestes es matieres prophanes qui ne excederoient la somme de soixante liures tournois de rente annueles, & en matiere beneficiale qui n'excederoient six uingt liures tournois de reuenue annuel: & encores es matieres qui excederoient lesdictes sommes, le iuge ne pourroit que retenir la cōmission a luy, & est tenu prendre l'enquesteur pour adioinct. Toutesfois pourroit es matieres qui sont au dessoubz desdictes sommes, bailler adioinct a l'enquesteur.

¶ Quelles personnes peuuent estre prinſes pour adioinctz en commission d'enqueste.

Et ne peut le iuge prēdre pour adioinct son filz, gēdre, frere, & filz de son frere, ou son domestic & clerc, posé ores que les parties s'en accordassent, suiuant les ordōnances du Roy Loys XI. article xxxviij.

¶ Des commissaires ad partes.

Doibt neantmoins le iuge, si les parties litigantes s'accordent d'aucuns cōmissaires ad partes, c'est a dire au pays ou les tesmoings

tesmoings sont demourans, commettre ceulx qu'elles accorderont: comme il est dict par les ordonnances du Roy Philippes le Bel. Et si la cause est de legiere importance, combien que l'enquesteur & l'une des parties ne l'accorde, toutesfois le iuge peut ce requerant l'autre partie bailler commissaires ad partes.

¶ Du salaire des iuges vacans a faire les enquestes.

Et si le iuge est lieutenant general d'une prouince, & il aille en cōmission hors son bailliage & ressort, il ne doit auoir que soixante solz tournois par iour: & dedens son ressort, dehors toutesfois du lieu ou il se tient, ne prendra que cinquante solz tournois. Et au lieu ou il demoure & tient son siege, il n'aura que uingt solz tournois par iour. Et en tous lesdictz cas il ne pourra prendre rien pour ses despēs. Et si le iuge est lieutenant particulier ou assesseur, & il besogne hors son ressort, il aura pour iour cinquante solz: & en son ressort hors sa maison, quarante solz: & en sa maison & lieu de son siege, quinze solz tournois. Et ne peuuent prēdre leurs despēs oultre ledict salaire, iasoit que les parties liberalement les leur uolussent bailler, sur peine ausdictz lieutenans de suspension de leurs offices, & priuation de leurs gages pour un an pour la premiere fois, & pour la secōde d'amēde arbitraire. & sont a ce formeles les ordōnāces du Roy Loys. XII. es articles liij. & liiij. Et quāt aux salaires des enquesteurs, il en y a eu plusieurs arestz de la Cour.

¶ Les parties doibuent conuenir de commissaires auant que le iuge les commette, sinon que ce soit luy, l'enquesteur, ou le greffier.

Et si le iuge par une sentence interlocutoire appointe les parties a faire preuues de leurs faictz, & ne ueult retenir la
commission

commissiõ a luy, ou la bailler a l'enquesteur & au greffier, il doit ordonner que les parties se viendront accorder de commissaires pour faire lesdictes preuues: ou s'il les cõmet, il doit mettre sauf a les recuser dedes certain temps qu'il declarera.

¶ De recusatiõ des commissaires, & qu'ilz doivent faire s'ilz sont recusez.

Et peuuent lesdictz commissaires autres que le iuge, l'enquesteur, & le greffier, estre recusez pour legeres causes. Et fault les recuser pardeuant le iuge: & si lon ne les a recusé dedens le temps ordonné, & qu'apres on les recuse, ilz doivent superseder, reuoyer les parties pardeuant le iuge qui les ha commis a certain iour, ou bien leur sauuer a se pourvoir pardeuant ledict iuge, sans leur bailler assignation. & ce est le meilleur sans les renuoyer, attendu mesmement ladicte ordonnance derniere faicte sur les recusations de iuges, par laquelle apres la recusation du iuge il n'y peut plus toucher, & fault se pourvoir par celluy qui tient le siege en son absence: & lors la partie aduersè du recusant prendra commissiõ ou prouisiõ du iuge pour faire adiourner le recusant a certain iour pour luy uoir pourvoir d'autres commissaires au lieu des recusez, & pour se uoir condamner es despès, fraiz, & mises de l'entreprinse ou assignation de l'enqueste qu'il auoit faict auparauãt ladicte recusation avecques le recusé, & de ce qui s'en seroit ensuyuy, & y sera le recusant condamné. Toutesfois si le recusant se accorderoit promptement d'autre commissaire, & qu'il n'y eust retardement notable de l'enqueste, la partie aduersè n'auroit matiere de demander lesdictz fraiz & mises dudit retardement. Et n'y a difference, soit la cause de recusation de nouueau uenue a la notice dudit recusant, ou non: car ueu qu'en quelque maniere que ce soit, l'enqueste de partie aduersè est retardee par le faict du recusant,

cusant, il en doibt estre condanné esdictz despens fraiz & mises. Semblablement si par autre moyen la facon de l'enqueste est retardee par partie aduersse, elle est condamnée es despens fraiz & mises du retardement par la uoye que dessus.

¶ Des lettres executoriales des commissions de la Cour de Parlement, & des requestes, pour faire enquestes.

Conuient scauoir que es commissions de la Cour de Parlement ou des requestes l'on n'a point accoustumé de declairer le nom de l'adjoinct: & enuoye lon les articles cloz & scellez sur lesquelz il fault faire l'enqueste. Et lors la partie qui ha a faire l'enqueste, va pardeuers le commissaire entreprendre iour pour uaqner a la facon d'icelle, & prend de luy executoire contenant le iour heure & lieu esquelz il fera adiourner sa partie aduersse pour se uenir accorder d'adjoinct: & ce fait, uoir par eulx faire ouuerture desdictz articles: & produire receuoir & faire iurer les tesmoins que lon ented faire examiner. Et oultre contient mandement pour adiourner esdictz iour heure & lieu toutes & chascunes les personnes dont le sergēt sera requis pour uenir illec porter bon & loyal tesmoignage de uerité en la matiere: & le tout avec intimation au cas appartenant. Et bien souuent il n'est mestier prédre ledict executoire: car les commissiōs de la Cour portēt mandement adressant au premier sergent pour bailler ledict adiournement es choses susdictes. & en ce cas suffit entreprendre le iour avecques le commissaire: mais lon est plus assseuré quand lon ha executoire signé de luy.

Au iour assigné pour lesdictes choses la partie qui ueult faire l'enqueste, compare au lieu & heure determinee pardeuant le commissaire: fait appeller a l'audience sa partie aduersse par un sergent. Si elle ne compare, est par la comparant requis

requis default avec le profit que de raison: & que uen icel-
 luy, nonobstant l'absence de partie, il soit procede au faict de
 la commission, & a prendre adioinct en premier lieu. Et fait
 le commissaire appeller pardeuant luy quelque homme de biẽ
 qu'il cognoist, ou pense n'estre suspect a l'un ne l'autre des
 contendans: & le plus souuent on prend a ce gens de practi-
 que: combien qu'en default d'eulx lon en puisse bien prendre
 autres.

¶ Cõment on doit prendre adioinct, & du sermẽt
 des tesmoings, & de la forme de les examiner.

Le commissaire suyuant l'ordonnance du Roy Loys XII.
 article xviii. & xix. doit faire faire serment a son clerc, & a
 celluy qu'il ueult prendre pour adioinct, de non reueler le se-
 cret de l'enqueste, & si ledict adioinct est point au conseil des
 parties: & ce faict, le prendre pour adioinct: & present son
 adioinct doit ouurir lesdicts articles, & il & sondict ad-
 ioinct recevoir & faire iurer les tesmoings qui luy serõt pro-
 duiet, de dire ueritẽ sur ce qui serõt par eulx enquis: & que
 pour or, argent, faueur, ou hayne ilz ne diront que la ueritẽ,
 & ne la recelleront. Et feront faire ledict serment aux tes-
 moings lays la main dextre leuee en hault, & aux gẽs d'egli-
 se in uerbo sacerdotis, la main mise sur la poictrine desdicts
 tesmoings: & n'est point necessaire qu'ilz touchent les sain-
 ẽtes euãgiles nostre seigneur Iesus Christ. Et se retireront par-
 apres lesdicts cõmissaires en une maison non suspecte a l'une
 ne a l'autre des parties, & illec redigeront par escript les de-
 positiõs desdicts tesmoings: & chascũ d'iceulx sera separee-
 mẽt des autres oy & enquis par lesdicts cõmissaires & ad-
 ioincts sur les articles qui seront cõtex par nõbre par les at-
 tiquettes, que celluy qui faict faire l'enqueste, baillera a chas-
 cũ tesmoing auant que le mener pardeuant les cõmissaire &
 adioinct,

adioint, sur lesquelz articles il aura premierement bien enquis & instruit chascun tesmoing.

¶ En absence de la partie adiournee pour voir produire tesmoings, on peut a autres heures & iours recevoir tesmoings, que a ceulx ausquelz a esté baillee la premiere assignatiō pour les voir iurer, si ladiēte partie n'y ha comparu.

Et si tous les tesmoings ne comparēt a l'heure assignee, s'ilz viennent lediēt iour, ucu que partie aduersē n'ha comparu a la premiere assignatiō, ilz peuuēt estre produictz & receuz, uoire es autres iours, pourueu qu'il n'y ayt point de discontinuation d'enqueste, scauoir est que par chascun iour lon ayt produict un ou deux tesmoings. Combien qu'aucuns disent que la premiere assignation passeē, lon n'en doit point recevoir sans nouuelle assignation: en quoy n'y ha raison selon mon aduis: car il s'ensuyueroit que le contumax par sa contumace pourroit rendre le droit de sa partie aduersē deteur: car s'il eust comparu, la partie luy eust fait bailler assignation a autre heure certaine, a laquelle il eust pensé fournir de ses tesmoings: ce qu'elle ne peut faire par le moyen de son absence.

¶ Assignation a certain iour & lieu, & generalement aux autres iours lieux & heures qu'on vaquera au fait de l'enqueste, si elle est valable.

Je ne uueil pourtant dire que lon puisse donner assignation generale a la partie aduersē pour uoir produire tesmoings a certaine heure iour & lieu & autres, que sans discontinuation les commissaires procederont au fait de l'enqueste: mais i'entēds que si partie aduersē cōpare, lon luy pourra faire bailler l'assignation a autre iour heure & lieux certains. Laquelle faculté ne doit estre ostee a sa partie aduersē pour son absence

sence.

¶ La partie doit estre adiournee pour voir iurer tesmoins.

Et par les ordonnances du Roy Charles VII. article xcyij. & du Roy Loys XII. article xxxvi. il fault appeller la partie aduerse a la production & reception des tesmoins : & ne suffit d'adiourner le procureur en cause, avecques lequel la cause seroit contestee : combien qu'en plusieurs lieux, comme a la Rochelle, il y ayt coustume escripte par laquelle il suffit d'adiourner le procureur.

¶ Reception de tesmoins en iugement a l'audience de la cause.

Toutesfois nous usons bien en ce pays de Poictou en tous les sieges royaux, qu'a l'appel ou audience de la cause en iugement & en presence du procureur de partie aduerse lon peut produire & faire recevoir & iurer tesmoins sans que ladicte partie y ayt esté adiournee : & ce est toleré pour raison de l'auctorité iudiciaire.

¶ Que doit faire la partie adiournee pour voir produire tesmoins.

Mais si la partie adiournee pour voir produire tesmoins, y ueult comparoir, requerra voir la cōmission, & les articles ou escriptures sur lesquelles la partie ueult faire sa preuve, & delay pour voir lesdictes pieces: lequel luy doit estre baillé, mais fort brief, a fin que l'enqueste ne soit retardec : & luy doit estre decerné & baillé copie desdictes pieces, ensemble du proces uerbal des commissaires, si elle le requiert.

¶ Desquelles pieces on ha cōmunication en proces.

Et si lon luy denie edition & communication desdictes pieces, en peut appeller : mais neantmoins l'enqueste ne sera declarée nulle: car lon doit faire communication de tous actes

p iudiciaires

iudiciaires & escriptures en cause civile, fors des saluations: ou quand le iuge ordonne que les pieces seront mises pardeuant luy avecques un aduertissement, & en droict: car lors lon n'ha point communication de l'advertissement, ne des autres pieces. mais le iuge parapres s'il uoit la matiere subiecte a ce que communication en soit faicte, il l'ordonne par interlocutoire. Aussi n'ha lon point communication des motifs de droict, qui sont baillez apres le proces mis en droict: car ilz sont seulement pour l'instruction du iuge.

¶ Protestation de bailler obiection.

Après ladicte communication la partie dit ce que bon a elle semble pour empescher la production & reception desdictz tesmoings. Et si elle n'ha rien que dire, elle proteste de bailler obiection contre les tesmoings produictz de partie aduersé: lesquels neantmoins les commissaires receuent, & sont iurer en la maniere deuantdicté. Et iasoit qu'aucuns tiennent que ceste protestation de bailler obiection, est de tel effect, que s'il y a aucun des tesmoings contre lesquels on ha protesté de obiection, qui depose pour celluy qui ha faict la protestation, il ne s'en peut ayder: toutesfois nous ne gardons point cela, & y ha bonne raison: car le tesmoing qui ha esté obiectionné par l'une partie, s'il depose pour elle mesme, il luy sert: a plus forte raison la seule protestation ne doit nuire.

¶ Les parties s'accordent de lieu pour y interroger les tesmoings.

Les commissaires apres auoir receu le serment des tesmoings, interroguent les parties en quel lieu elles uulent estre besongné au faict de l'enqueste: & si elles ne se peuuent accorder, eliront les commissaires une maison nō suspecte aux deux parties.

¶ De la contraincte contre les tesmoings refusans de déposer ou testifier.

Et si tous les tesmoings adiournez ne uiennt a l'heure assignee, la partie requerra cōtre culx default: qui luy sera oſtroié par les commissaires, & ordonné qu'il leur sera fait cōmandement a la peine de certaine somme de deniers de uenir deposer a certain iour: auquel s'ilz ne uiennt, il sera ordonné qu'ilz seront adiournez pour uoir declarer ladicte peine conminee estre par culx encourue: & qu'ilz seront contrainctz par saisie de leurs biens, & emprisonnement de leurs personnes. & en ce cas lon ha accoustumé saisir les immeubles, & au regime d'iceulx cōmettre commissaires: & non les meubles.

¶ Prestres non executables en leurs personnes,
ne en leurs meubles.

Mais s'ilz sont prestres, lon ne saisira pas leurs meubles, ne leurs personnes: car ilz ne sont executables par les iuges layz ou leurs sergens de leur ordonnance ou mandement en leurs personnes, ne en leurs biens, selon l'ordonnance faicte par Philippes le Bel Roy de France au moys de Mars 1302. Toutefois aucuns disent que s'ilz sont presens, ilz peuuent estre contrainctz de déposer par arrest ou saisie de leurs cheuaux. Bien ha lon accoustumé de proceder par saisie de leurs immeubles & temporel, & au regime & gouuernement commettre commissaires, comme quant aux layz. Et ne peuuent les gens d'eglise differer de déposer en cause ciuile soubz couleur qu'ilz n'ont congé ou licence de leur prelat ou euesque, ains ce nonobstant les commissaires les peuuent contraindre. Mais en matiere criminele ilz ne doiuent estre contrainctz, uoie avec licence de leur prelat, sinon en default d'autres tesmoings, & ou il est question de grand crime ou cas. Et est la femme par nostre usance contraincte de déposer contre son mary. & ainsi fut dict par arrest le ix. iour de Ianuier M.D.XXXII. Et semblablement le mary est contrainct de déposer contre sa femme.

¶ Cōment les commissaires doibuent passer oultre non obstans aucuns empeschemens a eulx baillez.

Les commissaires commis par la Cour de Parlement doibuent passer oultre au faict de Penqueste nonobstant opposition ou appellation quelconque, & sans preiudice d'icelles, suyuant l'ordonnance du Roy Charles VII. article xcviij. & ne se doibuēt arrester pour quelques obiectz que lon allegue contre les tesmoings,uoire que lon en fist apparoir promptement par escript : combien que selon droit escript ce empescheroit la reception & audition du tesmoing. mais nous auōs l'ordonnance du Roy Loys XII. article xxxix. par laquelle il est dict que le iuge doit uoir tout le proces auant qu'adiuger preuue des obiectz, parce que parauēture le proces se pourra iuger par ailleurs que par les depositions des tesmoings obiectez. Et pour ceste cause fut dict par arest de la Cour donné le xiiij de Mars M. D. XXXII. qu'il auoit esté mal iugé par un iuge lequel auoit ordonné que lon feroit preuue de quelque obiect fort concluāt, auant que le tesmoing fust par luy receu & oy: & fut dict qu'il iroit en personne.

semblablement combien que lon allegue aucuns faictz des intenditz ou escriptures estre impertinēs, & que lon requiere iceulx estre rayez, & que lon empesche que sur iceulx les tesmoings soient oyz: neantmoins les commissaires passeront oultre, & oyront les tesmoings sur lesdictz faictz, sans preiudice des droitz des parties, & sans les approuuer pour ce receuables & pertinens.

¶ Quand on doit determiner & vuyder l'altercation qui aduient en vne assignation d'enqueste, auant que proceder a la facon d'icelle.

Mais s'il suruient quelque altercation en l'expedition de l'assignation

L'assignation d'enqueste: si le iuge est cōmissaire, il fault qu'il
 la decide sur le champ auāt que passer oultre, si c'est une cho-
 se qui soit preiudiciable a la facon de l'enqueste. ou qu'il l'em-
 pesche. Et si il en est appellé, nonobstant l'appel Et sans pre-
 iudice d'icelluy passera oultre a la facō de ladicte enqueste:
 comme au cas qui s'ensuit: scauoir est, les defendeur Et as-
 sisteur auoient esté oyx par credit uel non, suiuant les ordō-
 nances anciennes. L'assisteur au iour de l'assignation de l'en-
 queste du demandeur, craignant que le defendeur eust faict
 quelque cōfession ou responce preiudiciable audict assisteur,
 il requiert que le defendeur soit de rechef oy en sa presence,
 Et que iusques a ce l'enqueste soit supersēdee. le defendeur le
 consent, comme aussi faict le demandeur, pourueu que son
 enqueste n'en soit retardee. L'assisteur dit que lon ne doit pro-
 ceder a faire l'enqueste insques a ce qu'il soit decīs de ce. Le
 iuge met la matiere en droit: Et neantmoins ordonne qu'il
 procedera au faict de l'enqueste: dont l'assisteur appelle, Et
 dit pour tous griefs q̄ le iuge debuait decider dudit differēt
 auant que passer oultre a la facon de ladicte enqueste. L'in-
 timé dit qu'il est greué, Et non l'appellant: car si l'aduient
 qu'il perde sa cause d'appel, les depositions des tesmoings
 oyx apres ledict appel interiecté, seront annullees. Et fut dict
 es grās iours de Poictiers tenuz en l'an M.D.XXXI. le xxvi.
 iour d'Octobre qu'il auoit esté mal iugé Et procedé, non pas
 (cōme ie pense) parce seulement, que le iuge debuait decider
 dudit different auant qu'ordonner qu'il procederoit a la fa-
 con de ladicte enqueste: mais parce qu'il n'auoit pas ordon-
 né ne appoincté ce dōt les parties s'accordoient, scauoir est que
 le defendeur seroit oy par credit present l'assisteur: ains sur
 ce les auoit mis en droit, Et auoit uuydé sur le champ
 ce dont les parties ne s'accordoient point. Et ia soit que les

responſes par credit ſoyent apreſent abolies, neantmoins ce peut eſtre adapté es reſponſes qui aujourd'huy ſont faiçtes de uerité, ou a tout autre different qui interuient en l'aſſignatiõ d'enqueſte: & ce eſt la fin a laquelle i'ay propoſé ceſt exẽple. Auſſi ie ſçay bien qu'il n'y auoit propos a l'aſſiſteur de requerr que le defendeur fuſt oy en ſa preſence par credit: car ſa reſpoſe ne pouuoit preiudicier a l'aſſiſteur: & oultre pouuoit laſſiſteur prendre communication de ce que auoit ia dict le defendeur par ſadiçte reſponſe. Mais ce ne deſtruit & ne change la fin a laquelle i'ay admené ceſt exemple.

¶ Les commiſſaires autres que les iuges ne peuuent declairer les cauſes de recuſation non receuables.

Toutesfois ſi le iuge n'eſt commiſſaire, ains ſont autres par luy deputez a faire l'enqueſte: ilz rẽuoyeront les parties ſur le different pardeuant le iuge, & neantmoins procederõ au faiçt de l'enqueſte: ſi non qu'il ſoit tel, qu'il fuſt preiudiciable a la façõ de l'enqueſte: comme ſi lon diſoit que le temps de leur cõmiſſion fut expiré, & partie aduerſe maintiñſt le cõtraire, & offriſt informer de prorogation du delay: car en ce cas faudroit qu'ilz renuoyaſſent les parties pardeuant le iuge, ſi non que la partie les requiſt de paſſer oultre a ſes perilz & fortunes: car lors ilz pourroient paſſer oultre: & ſeroit auoir en la cauſe d'appel qui d'eulx ſeroit interiecté, ſ'il y auoit prorogation du delay, ou non: car ſ'il en y auoit, auroit eſté bien procedé.

Mais ſi le iuge ou commiſſaires ſont recuſez, il fault qu'ilz ſuſpeſcedent & different de paſſer oultre ſelon l'ordonnance du Roy Loys XII. artic. lxxxv. a quoy ſ'accorde bien l'ordonnance nouuelle. ſi non que ſi c'eſt le iuge, & que les cauſes de recuſation ne ſoient pas receuables, il les peut bien telles declairer. Mais quant aux commiſſaires, ne les peuuent telles declairer

declairer, par ce qu'il ne leur est commis que le nud faict & exercice de la reception & audition desdictz tesmoins, & que les causes de recusation se doibuent proposer deuant le iuge ordinaire duquel est emancee la cōmission. Et a ceste cause le iuge ou commissaires feroient un grand bien aux parties, si amiablement ilz les faisoient lors accorder d'autres cōmissaires au lieu des recusez.

¶ Peine contre ceulx qui friuolement empeschent la facon d'une enqueste.

Et ba la Cour accoustumée de chastier les tergiuersateurs qui sans cause different & empeschent les facons d'enqueste: scauoir est que s'ilz ueulēt estre receuz a faire enqueste, que leur partie aduersē & son conseil y assistera a leurs despēs, si bon a elle semble y assister. Et d'auātage par les ordōnances de ladiēte Cour publiees le iij. de Ianuier l'an M. D. XXXV. est dict que si aucun est appellant de ce que les commissaires par la Cour de Parlement commis a faire les enquestes, l'ont debouté de quelques causes de recusation contre eulx proposees: & que les commissaires ayent passé oultre non-obstant l'appellation interieēte: iasoit que les attentatz par dessus icelles soient subieētz a cassation & reuocation pour l'auctorité & reucrence interieēte comme de iuge recusé, suyuant l'ordonnance: neantmoins la partie qui friuolement aura appellé de ce qu'il aura esté debouté de ses causes de recusation, n'aura & ne rapportera aucune condamnation de despens pour raison de la cassation & reuocation desdictz attentatz, ou de l'appellation interieēte d'iceulx non iustificiee par autre moyen que dudict attentat: mais sera ledict friuolement appellant condamné es despens de la principale cause d'appel: & oultre pour le proces retardé, & empeschement de la facon de l'enqueste, condamné enuers

la partie intimee en telle somme de deniers, que la Cour uerra estre a faire selō la qualite des parties, grādeur des matieres, & lōgueur du temps. Et s'il y a acquiescement, ou desistement de l'appel, oultre l'amende ordinaire pour les delays & subterfuges, en une amende arbitraire enuers le Roy a la discrection de la Cour,

¶ Des proces verbaux des enquestes.

Nous auons declairé ce qu'il fault faire auant que uenir a l'audition des tesmoings: il est requis apresent exposer comment il fault enquerir le tesmoing, & sa deposition rediger par escript. Premierement il fault mettre le proces uerbal des commissaires cōtenant la comparition des parties, la production & reception des tesmoings, & tous les differens interuenux entre les parties sur icelle. Et si la partie adiournee ne compare, fault declairer par qui l'adiournement a esté fait, & les recordx, & le iour de l'adiournement. Et en y a aucuns qui inferent les relations des sergens entierement & au long par ledict proces uerbal: en quoy n'y ha propos: car ausi bien croit lon aux commissaires attestans auoir ueu la relation de la date qu'ilz declairent, comme si elle estoit au long contenue. combien que la Cour ne s'arreste a l'attestation & declaration que font les commissaires d'auoir ueu lesdictes relations. Et fault uoir les originaux quād lō empesche la receptiō d'enqueste en ladicte Cour. Toutes fois es Cours inferieures les iuges s'arrestēt ausdictes attestatiōs desdictx proces verbaux. Aucuns mettent a part de l'enqueste les proces verbaux, & y attachent les relations des adiournemens. ce qui est bien bon: car il fault que les parties en ayēt cōmunication auant que uoir l'enqueste en publicatiō, si elles le requierēt: mais n'ot cōmunication de l'enqueste auāt la publicatiō. Aucuns mettēt les proces verbaux avecques les enquestes:

& si

Et si entre lesdictz proces uerbaux, & depositions des tesmoings mettent les intendit & ou escriptures des parties: qui uient a grands fraiz pour elles: car on prend autant de la grosse desdictz intendit & comme de la grosse des proces uerbaux & enquestes: uoire si met lon en parchemin la grosse desdictz intendit &, ne fut il question que d'une debte ou action personnelle, ou d'un simple & petit excès, & dont on n'ha interest en la conseruation des pieces du proces.

¶ Forme d'enquerir & oyr vn tesmoing.

Quant a la deposition du tesmoing lon met son nom, sa demeure, son mestier ou uacation, son aage, & s'il cognoist les parties: & apres lon met par ordre tout son dire. Et y a aucuns qui sur chascun article de l'atticquette oyent le tesmoing, & mettent son dire sur icelluy article, comme, sur le premier article dit, &c. sur le ij. dit &c. Les autres des le commencement apres auoir mis la demeure, le mestier & l'aage, & comment il a esté produict en presence ou absence de la partie, mettent ces mots, oyr & examinez par nous commissaires susdictz sur les, i. ij. &c. en declairant & nōmant le nombre des articles contenuz par l'atticquette. Et ceste forme me semble meilleure pour obuier a repetition, scauoir est. Et sur ledict article a dict comme sur l'article tel precedent. Mais il fault que les commissaires ayent le soing de accoller & conioindre ensemble tous les articles de l'atticquette faisant mention d'un faict, & sur chascun faict oyr separemēt le tesmoing, sās entrelasser son dire sur un faict, avecques ce qu'il aura dict sur un autre, afin que les iuges puissent plus claiement cognoistre la preuue qui est sur chascun faict: comme il est dict par les ordonnances du Roy Loys XII. article xiiij. Aussi fault que les commissaires fassent rendre raison aux tesmoings de leur dire, ainsi qu'il est dict par les ordonnances

nances du Roy Loys XII. article xvi. D'auantage est prohibé aux cōmissaires de examiner plus de dix tesmoings sur chascun faict. Et n'est comptee une tourbe que pour un tesmoing es cas esquelz lon faict preuue par tourbe.

¶ Des tourbes de tesmoings.

Et si les commissaires en examinent plus de dix, ceulx qui seront oultre ledict nombre, seront reiectez: & les cōmissaires amendables a l'arbitre du iuge: comme il est decisi audiect xiiij. article desdictes ordonnances audiect Roy Loys. Et pour ceste cause pour le moins il fault deux tourbes, uen que chascune ne uault qu'un tesmoing. Et doit estre la tourbe de dix tesmoings pour le moins: & ha lon accoustumé en mettre xij. ou xiiij. a fin que s'il y en auoit aucuns qui fussent suffisamment obiectez, que ledict nombre de dix demourast entier.

¶ De examiner tesmoings par forme de tourbe.

La forme de les examiner est, que les commissaires presentent a dix tesmoings ou plus tous ensemble les articles sur lesquelz ilz entendent les examiner par tourbe, & les lit, & leur fait faire serment de porter bon & loyal tesmoignage de ce qu'ilz croient, scauent, & ont ueu obseruer & garder du contenu esdictz articles. Et apres ledict serment faict, les tesmoings produictz se retirent en certain lieu ou chābre a part & separeement des commissaires, & delibrent encores ensemble de ce qu'ilz scauent sur lesdictz articles: & ce faict, se transportent pardeuers lesdictz commissaires: & pardeuant eulx un desdictz tesmoings, que lon appelle le rapporteur de la tourbe, pour luy & tous les autres presens apart & separeement des parties dit & rapporte la deliberation & resolution de tous lesdictz tesmoings: lesquelz il fault estre concordans en un mesme dire. Et parapres chascun desdictz tesmoings dict des cas particuliers qu'il scait. Et fault que

que l'age, la demeurence & estat de chascun tesmoing soiēt escript & cōme en autre enqueste. Et si les tesmoings sont praticiens & aduocat, comme ilz sont le plus communemēt: en telz cas il fault mettre combien il y a qu'ilz suiuent la pratique & estat d'aduocat.

¶ Quand on peut vser d'enqueste par tourbes.

Lon doit seulement user de ces tourbes quand il est question d'une coustume ou usance ancienne gardee de tout tēps, & encores apresent, laquelle toutes fois n'ha point esté mise au liure des coustumes des pays reformees. Et lors il fault auoir lettres royaux pour estre receu a l'articuler & prouuer. Ou bien s'il est question d'une coustume ancienne qui a eu cours parcydeuant, & au temps dont est question. Ou bien s'il est mestier d'auoir l'interpretation d'une coustume ambigue ou obscure estant audict liure coustumier reformé, comment par usance ancienne lon ha accoustumé l'entēdre & user. Et en ces deux cas ne fault auoir lettres royaux. mais est prohibé par les ordōnces du Roy Charles vij. arti. cxliij. & du Roy Loys XII. article l. de ne faire preuue par tourbe des articles qui sont redigez par escript es liures coustumiers des pays: & n'est point mestier prouuer les coustumes y redigees. & pour ceste cause est dict par lesdictes ordonnances que les coustumes de chascun pays serōt redigees par escript, pour obuier ausdictes preuues par tourbes.

¶ Les coustumes du pays de Poictou redigees par escript & reformees dernièrement font foy.

Et cōbien qu'on ayt fait parcydeuāt difficulté quāt aux coustumes de ce pays de Poictou, si le liure coustumier ou icelles coustumes ont esté redigees par escript, & publicatiō encō mencee a faire le Ieudy xvi. d'Octobre l'an M. D. XIII. estoit authentique, & y fallust adiouster foy sans en faire preuue par tourbe,

tourbe, au moyen de ce que lon disoit que les cōmissaires cōmis en ceste partie de par le Roy n'auoient rapporté leurs proces uerbaux deuement expediez a la Cour: toutes fois lesdictes coustumes ont esté depuis approuuees par plusieurs arestz de la Cour de Parlement a Paris qui sont ensuyuis selon icelles coustumes. Et si les parties sont en different de l'interpretatiō d'une coustume escripte, & de la maniere d'en user: & que les parties soient appoinctees a en faire preuues: elles ne peuuent pas en faire preuue par tourbe, s'il n'est permis expressement par le iuge. Au moyen dequoy apres que en certaine matiere la Cour eust appoincté les parties en enquestes sur la maniere de user d'une coustume escripte du pays de Poictou: & l'une des parties sans permission expresse de ladicte Cour eust faict sa preuue par tourbe: la partie aduerse a la reception de ladicte enqueste, la debat de nullité, pour celle cause seule. La Cour declaire l'enqueste nulle. Depuis ladicte partie obtient lettres royaux, par lesquelles est mandé a la Cour de la recevoir a faire preuue par tourbe, & sont enterinees par ladicte Cour.

¶ De examen a futur.

Il fault garder pareille forme de proceder a la confection de examen a futur, qu'il fault faire es autres enquestes de matieres ciuiles.

¶ Quand on peut obtenir examen a futur.

Et la matiere d'user desdictz examē a futur, est que quād l'une des parties, soit auparauant le proces intenté, ou apres, auparauāt toutes fois cōtestation en cause, craint & doute que ses tesmoins meurent parce qu'ilz sont uieux ou uale-tudinaires, ou se doibuent en brief absēter de lōgue absence. en ce cas ladicte partie, si le proces n'est intenté, doit auoir lettres royaux adressant au iuge royal, ou bien a celluy par-deuant

deuant lequel il ueult intenter ou ſcait le proces deuoir eſtre intenté, ou pardeuant autre plus commode pour oyr les teſmoings : & auparſus y procedera quant a faire bailler aſſiſgnation a ſa partie pour uoir produire teſmoings, & a la production & audition d'iceulx comme deſſus.

¶ De la garde & deliurance dudit examen.

Et tiendra le iuge ou le commiſſaire qui aura faiât lediât examen, icelluy clos & ſecret iuſques a ce qu'il ſoit meſtier le produire : & lors le deliureront encores clos & ſeellé, fors le proces uerbal, comme lon faiât en autres enqueſtes. Et ſi le proces eſt intenté, le iuge pardeuant lequel il eſt pēdant, baille la permission aux parties ce requerans de faire lediât examen ſans que a celle fin elles ayent lettres royaux.

¶ Cas eſquelz n'eſt permis faire examen a futur.

Toutesfois il y a certaines matieres eſquelles le iuge ne doit octroyer ladiâte permission: ſcavoir eſt quād il eſt queſtion de la recreance en matiere beneficiale : car ladiâte recreance ſe doit uuyder par tiltres : & parce ne doibuent eſtre oyꝝ teſmoings. Et a ce eſt formele l'ordonnāce du Roy Charles VII. article lxxxiiij. Semblablement ne doit eſtre baillee ladiâte permission au deſendeur en matiere criminele contre lequel on a commencé a proceder extraordinairement, iuſques a ce que la uoye extraordinaire ſoit paracheuee: car ce ſeroit indirectemēt le recevoir a proces ordinaire. & ainſi en fut dict par areſt le xiiij. iour de Decembre M.D.XIX.

¶ Dedens quel temps apres lediât examen on doit ſe pouruoir pour le principal, a la fin duquel on a faiât lediât examen.

Et quand celluy qui ueult intenter aâtion, a faiât faire le dict examen, il doit intenter ſon aâtion dedens l'an apres lediât

ledict examen faict: autrement il ne se peut plus ayder dudit examen. mais quand lon a obtenu & faict l'examen pour preuue de quelques faictz seruans a exception & definse, lon n'est point tenu de s'en ayder dedens l'an.

¶ Examen a futur doit estre faict nonobstant que partie aduerse obiice les tesmoings n'estre de la qualite requise.

Et combien que la partie aduerse a la production des tesmoings dudit examen, die qu'ilz ne sont uicieux, ne ualeutudinaires, ne absuturs de longue absence, & par ce empesche la reception d'iceux: neantmoins le iuge ou commissaire les doit recevoir sans preiudice a ladicte partie de pouoir impugner & debatre en temps & lieu ladicte qualite d'icellez tesmoings, & a l'autre partie de la soutenir.

¶ De recoler les tesmoings oyz par examen a futur.

Et si lesdictz tesmoings dudit examen sont encores uiuans, & au pays ou temps de l'enqueste qui sera faicte apres contestation en cause, il les fault faire recoler ou reoyr apres contestation en cause, comme les autres tesmoings: autrement lon ne adiousteroit foy audit examen: sinon qu'ilz eussent esté oyz par uertu de commission emance de la Cour de Parlement: car en ce cas n'est mestier les faire recoler, comme il est dict par les arrestz mis a la fin du stile de Parlement en Latin, arrest xx.

¶ Prouision pour s'ayder d'un examen a futur, si les tesmoings sont mortz auant que d'estre recolez.

Mais se lesdictz tesmoings ont esté oyz par uertu d'autres commissaires, & qu'ilz soient mortz ou absens au temps de ladicte enqueste, il fault auoir lettres royaux, par lesquelles
sera

ſera mandé au iuge de la cauſe de receuoir la partie a produire ledict examen, & auoir regard aux depoſitions des teſmoings decedez puis icelluy, & auant l'appointement prins a faire enqueſte, comme ſi leſdictz teſmoings auoient eſté recolez en ladiſte enqueſte, en receuant auſſi partie aduerſe a bailler contre leſdictz teſmoings telz obieſtz que de raiſon. Et ſi partie aduerſe en debatant leſdictes lettres maintenoit leſdictz teſmoings eſtre encores uiuans demeurans au pays, il ſeroit bon informer ſommairement de leur mort ou abſence. Et ſi pour autre cauſe que la ſuſdicte le iuge interloque que les teſmoings oyꝝ en enqueſte, ſeront par luy recolez, & en y ayt aucuns qui ſoient decedez auparauant le recolement: lon ne doit adiouſter foy a leurs depoſitions. & ainſi en fut dict par areſt le xxi. iour de Mars M. D. X. Et pour ceſte cauſe le iuge ſera bien, ſi par ladiſte interlocutoire il nomme particulièrement les teſmoings qu'il fault recoler, quand il n'eſt meſtier les recoler tous.

¶ Quand peuuet les teſmoings produictz dedés le delay, eſtre oyꝝ apres icelluy eſcheu.

Or pour reuenir dōt nous ſommes ſortis, & pourſuiure l'ordre encommencé, ſi les teſmoings ſont receuz & faiſtz iurer de dire uerité dedens le delay pour ce oſtroié, ilz peuuet eſtre oyꝝ apres le delay, ſinon qu'il y ayt appointement a rapporter les preuues & enqueſtes dedens ledict delay: car audict cas il fault qu'ilz ſoient oyꝝ dedens le delay.

¶ De nōmer les teſmoings auāt que les produire.

Et ne ſuffiroit qu'ilz fuſſent ſeulement produictz. Et ont les Cours de Parlemēt & des requestes accouſtumé de bailler en ceſte maniere les delays pour faire enqueſtes. il en y a aucuns, quād le delay eſt ſeulement dōné pour faire enqueſte, qui a fin qu'apres le delay ilz puiſſent faire oyꝝ leurs teſmoings,
ilz

ilz les nomment, & se contentent d'enqueste dedens ledict delay alle auant des depositions des tesmoings nommez, lesquels ilz pourront faire examiner tousiours sans retardement du proces, iusques a ce qu'il faille qu'ilz produisent leur enqueste pour estre ueue en publication. Mais cela est dangereux : car si la partie aduersé scait les tesmoings, elle les pourra suborner, ou faire absenter. Et parce plusieurs iuges ne uulēt receuoir ladicte nomination de tesmoings. Et quād le delay est baillé pour faire & rapporter les enquestes, si elles sont faiçtes dedens le delay, elles peuuent estre enuoyees apres ledict delay, si la partie a heu empeschement, par lequel elle n'ayt peu les enuoyer. & sera creue la partie par serment d'icelluy empeschement. & ainsi estre obserué on Parlement de Bordeaux, atteste monsieur maistre Nicole Bobier en son uiuant tiers President dudit Parlement, en ses decisions d'icelluy Parlement, en la question ccxciiij. ou il dict aussi, que ladicte Cour permet ordinairement, que les parties facent leurs preuues principales dedens le delay baillé pour fournir d'obietz & reproches contre les tesmoings: ce que nous gardons semblablement.

¶ Le delay pour faire enqueste obtenu par vne partie, est commun a l'autre.

Et si l'une des parties ha delay pour faire enqueste, iasoit qu'elle paye pour icelluy despēs, neantmoins la partie aduersé pourra faire son enqueste pendant ledict delay sans en rien payer a l'autre. Et si lon laisse courir la moytie du delay sans rien faire, lors on est en negligence: & celluy qui allegue empeschement pour lequel il n'ha peu faire son enqueste, n'en est pas creu par son serment, ains fault que sommairement il en face apparoir.

¶ Moyens

¶ Moyens de nullité se baillent avecques les
obiectz.

Et combien que la deposition d'un tesmoing produict apres le delay, soit nulle, toutes fois il uault encore mieulx protester de l'impugner de nullité: & lors le iuge ordonne que par les obiectz la partie pourra employer ses moyens de nullité: comme aussi lon ha accoustumé faire quand par autres moyes de nullité lon impugne l'enqueste, scauoir est parce que la partie n'y a esté deuement appelée: & pour autres causes.

¶ De declairer les noms des tesmoings produictz & non oyz auant que prendre appoinctement a bailler obiectz.

Si aucuns tesmoings produictz n'ont esté oyz, il fault que la partie qui les a produict, en declairant qu'elle est contente d'enqueste, qu'elle declaire qu'elle n'ha faict oyr tel tesmoing produict. Et doibt estre faicte celle declaration en tout cas auant que lon prengne appoinctement a bailler obiectz, a fin que partie aduerse ne die que ia il a faict faire ses obiectz contre ledict tesmoing, & en demande payement. Toutes fois aucuns tiennent qu'il n'est mestier faire ladicte declaration, parce qu'ilz disent qu'il fault prendre des commissaires les noms des tesmoings examinez seulement, parce que lon n'est tenu faire oyr tous les tesmoings que lon produit. Mais il me sembleroit meilleur faire ladicte declaration: car ia soit que lon ne soit tenu faire examiner tous les tesmoings produictz, neantmoins il ne sensuit que la partie aduerse n'ayt bonne matiere de penser qu'ilz ont esté examinez, ueu qu'ilz ont esté produictz, mesmement quand elle a esté presente a la production.

¶ De l'appoinctement a bailler obiectz ou res-
proches de tesmoings.

Après que les parties ont declairé estre contentes d'enquestes, le iuge ordonne qu'elles bailleront obiectz & reproches de tesmoings. Et aucunesfois lon ordonne que les parties produiront dedens certain iour, & que ce pendant elles bailleront obiectz. Et parfois pendant le delay a bailler contredictz & saluations, lon ordonne semblablement que les parties pourront bailler obiectz. En quoy il fault prendre garde que lon ne laisse couler la faculté & pouuoir de bailler obiectz durant le delay de uoir l'enqueste en publication : car aucuns apres ledict delay octroyé pour uoir l'enqueste, & qu'ilz ont sceu secrettement le contenu d'icelle, baillent obiectz : & parce il est bon deuant que prendre le delay de uoir l'enqueste, faire forclore les parties de bailler obiectz : car iusques a ce lon n'en est point forclos, encores qu'il y ayt eu delay pour ce faire, sinon que le delay escheu lon ayt donné forclusion. Et en la Cour de Parlement, apres la reception de l'enqueste faicte en la Cour, lon ha huietaine pour bailler obiectz, parce qu'il n'y a publicatiō d'enqueste, par l'ordonnance du Roy Charles VII. article xv. & apres la publication d'enqueste lon n'est plus receu a bailler obiectz, par l'ordonnance du Roy Loys XII. article xxix, combien que selon droit commun on y estoit receu apres publication. mais est l'ordonnance meilleure que le droit : car le droit donnoit occasion de charger d'obiectz le tesmoing qui deposoit mieulx pour la partie qui l'auoit produit, a fin d'en faire adiuger preuue, & retarder ce pendant le iugement du proces. Et en prenant delay pour bailler obiectz, par un moyen lon prend delay de bailler soustenement : combien que bien souuent il n'en est mestier : car si lon prouue l'obiect, le soustenement ne sert de rien, & ne se peut prouuer,

car

car c'est une negatiue: sinon que lon deist pour obiect, le tesmoing auoir esté condamné & conuaincu de crime, & que pour s'oustenement lon uoulust dire que le tesmoing est apellant de ladiete condamnation.

¶ Cas esquelz on n'est point receu a bailler obiectz.

Il y a aucunes matieres esquelles on ne recoit les parties a bailler obiectz, comme en matieres sommaires, scauoir est en recreance, qui est poursuyuie separemēt des autres chefz de la cōplaincte. mais ce n'auroit lieu apresent, parce qu'il fault par les ordonnances dernieres que la recreance & maintenue soient poursuyuies par mesme moyen. Toutesfois d'autant que lon ne recoit obiectz en recreance, si le iuge uoit apres que lesdictz deux chefz auront esté poursuyuiz par mesme moyen, & seront en droict, qu'il faille adiuger preuue des obiectz auant que diffinir la maintenue: il pourra adiuger la recreance, & ordonner quant a la maintenue, que la partie fera preuue de ses obiectz, s'il uoit que la partie contre les tesmoings de laquelle ont esté baillez lesdictz obiectz, ayt plus apparent droict. Aussi ce doit estre entendu des matieres sommaires, qui n'engendrent & n'emportent un iugement irreparable en diffinitive, comme en matiere de garnison de main: car lon n'y recoit reproches de tesmoings, encores que le defendeur soit receu a monstrier de son faict par tesmoings a ladiete garnison. Autre chose seroit de matiere de exhibition: car iasoit qu'elle soit sommaire, toutesfois il n'est pas reparable. Et pour ceste cause on y est receu a bailler obiectz.

¶ Le iuge d'appel peut adiuger preuue des obiectz baillez pardeuant le iuge a quo.

Et iasoit que l'enqueste ayt esté ueue en publication, si les
q ij obiectz

obiectz baillez auant icelles sont concluans, & que le iuge de la premiere instâce n'en ayt adiugé preuue, toutes fois le iuge de la cause d'appel en pourra adiuuger preuue: & ainsi en usons, combien que le droit commun & escript soit a ce contraire. Aussi auons usance par laquelle lon ne peut intenter actiō d'iniures pour quelque fait iniurieux allegué par obiectz ou reproches de tesmoings: combien que selon droit escript lon en puisse mouuoir ladicte action: mais celluy qui la pose, en est excusé s'il monstre que par commune fame le tesmoing soit chargé du cas mis sus.

¶ **Peine contre les proposans obiectz calumnieux.**

Mais par les ordonnances dernieres article xli. est dict que pour chascun fait de reproche non prouué, celluy qui les a posés es Cours de Parlement, doit estre condamné moytie enuers le Roy, & moytie enuers la partie, en uingt liures parisis, & autre plus grand amende, selon que la Cour arbitrera eu regard a la grandeur de la calumnie du proposant: & en la moytie moins es Cours & iurisdicctions inferieures.

¶ **Quelz obiectz nous receuons en ce royaume.**

semblablemēt nous n'auōs accoustumé auoir regard a l'obiect de domesticité, ne pour icelluy mettre un tesmoing hors d'enqueste, sinō que lō maintiēne que le tesmoing est a pain & pot ou du pain & uin de la partie, ou qu'il est nourri aux despens d'icelle; ne pareillemēt a l'obiect par lequel lō maintient le tesmoing auoir esté accusé de quelque crime, sinon que lon maintienne qu'il en a esté attainct ou conuaincu, ou qu'il en a composé a argent, ou autre chose qui le uaille. Et si un tesmoing depose de quelque chose qui uienne a son profit, s'il declaire qu'il ne s'en entend aider, on adioustera foy a son dire, fors quand le tesmoing a esté excédé ou oultragé: car
ia soit

ia soit qu'il die n'en demander reparation, neantmoins lon ne aura entier regard a son dire, pour raison de l'inimitié & mau uaise affection qu'il peut auoir pour raison desdicts exces. Et ia soit que mondict sieur maistre Nicole Bolier en ses decisions du Parlement de Bordeaux en la question cccxxi. tienne qu'il ne suffit pas de dire que un tesmoing a esté con damné pour raison de certain crime, si on ne declare le tēps de ladiete condamnation: & die ainsi en auoir esté dict deux fois par arest dudit Parlement: neantmoins ce doibt estre entendu, qu'il suffit de declarer, que auant le serment & la deposition baillez par le tesmoing, ladiete condamnation a esté contre luy baillee. & ainsi en usons: Et pource est bon de mettre a la fin des reproches des tesmoings, par un article separé, que les tesmoings estoient des conditions contenues par lesdictes reproches ou temps qu'ilz ont esté produictz & iurez, & ont deposé en la matiere. Mais combien qu'on n'ayt point reproché un tesmoing, si toutesfois il appert par registre faict en la cause de quelque reproche ualable, com me qu'il ayt esté sollicité ou partie en la cause, le iuge le doibt reiecter, tout ainsi que si ladiete reproche eust esté alle guee: car il est tenu de supplier ce, dont luy appert par les re gistres & actes de la cause. Et n'est ain tesmoing repro chable pour ne auoir point esté adiourné pour deposer, pourueu qu'il ayt esté produict par la partie.

Est a noter que par les obiectz il ne fault poser aucuns faictz concernans le faict principal, ains seulement ce que lon ha a dire pour reproches contre les tesmoings. Et si aus cūn autre faict y est passé, partie aduerse pourra demander qu'il soit raie, & les dispens de ce: & luy sera totalement faict & adiugé son requisitoire.

De

¶ De l'appoinctement a produire.

Ces choses parfaites, l'ordre iudiciaire est pareil quāt aux matieres esquelles les parties ont esté appoinctees a escrire, informer, & produire, ou escrire & produire seulement: fors quant a la publication d'enqueste, dont nous parlerons cy apres: car en ces deux especes de matieres le iuge ordonne que les parties produiront leurs pieces, bailleront cōtredictz & saluations.

¶ Des inuentaies des pieces.

Et fault qu'il y ayt inuētaire en chascune production, par lequel sera declairee succinctement la fin a laquelle chascune des pieces est produicte: ainsi qu'il est commandé par l'ordonnance du Roy Charles VII. artic. exiiij. par laquelle est aussi prohibé de non mettre par l'inuētaire raisons de droict: & par l'article precedent est defendu de ne produire lettres, tilz tres ou munimens qui de rien ne seruent a la decision du proces: & que lon ne produise autre chose que ce qui sera escript & designé par l'inuētaire. Et s'ilz ueulent produire ou employer autres lettres, qu'ilz les puissent faire extraire: & que temps suffisant pour ce faire, leur soit donné de tout a la peine de cent solz parisis d'amende. Et d'icelle production, ensemble dudict inuētaire sera faicte cōmunication a partie aduerse: comme il est dict par l'ordonnance de derniere article lxxvij. a soit que auparavant lon n'eust communication que de la production, & non de l'inuētaire. Et pour ce ne doit le greffier receuoir aucune production sans inuētaire, ne le iuge iuger. toutes fois aucuns iuges inferieurs ne se y arrestēt point. Mais en la Cour de Parlemēt la partie pourra requerr que la production de sa partie soit reiectee: si il ne fait son inuētaire dedens le temps qui luy sera prefix par la Cour
sur

sur une requeste a icelle Cour presentee.

¶ De produire lettres sine die & consule, ou sans date.

En matiere benefeciale pour obuier aux faulsetez qui se commettent en la date des bulles, les parties souloient requerrir estre receues a produire leurs tiltres sine die & consule, c'est a dire sans date. & ce estoit bien raisonnable. Neantmoins apresent ueue l'ordonnance derniere par laquelle artic. xlvj. est dict qu'en matiere benefeciale les parties auront des le commencement de la cause communication de leurs tiltres; il y a grand difficulte si lon pourroit user maintenant dudit stile: parce que ce ne seroit bien communiqué, si lon ne communiquoit la date des tiltres: car en icelle gist le plus souuent le gaing de la cause. Mais quand la partie qui requiert edition de la date, diroit qu'elle ne peut deliberer s'elle doit ceder ou contendre, sans uoir ladicte date: elle deuroit auoir ladicte edition, en edant aussi par elle preallablement la date de son tiltre: a fin qu'elle use de mesme droit enuers soy, qu'elle ueult user enuers autrui. Et garderoit on le semblable en plusieurs creditiers opposans es. crees des biens immeubles de leur debteur: lesquels contendroient de la priorite ou posteriorite de leurs hypotheques. Toutesfois ledict stile estoit bien raisonnable: car celluy qui requeroit estre receu a faire ceste production, faisoit serment que doleusement il ne requeroit estre receu a ainsi produire, & promettoit eder son tiltre avecques la date toutes fois & quantes que par le iuge seroit ordonné.

¶ Des vidimus ou copies.

Et iasoit que selon droit lon puisse faire faire un uidimus ou copie d'un autre uidimus ou copie deuement collationee a
q iij l'original,

l'original, toutes fois selō nostre stile ce n'ha point de lieu, ains fault tousiours prendre les copies ou uidimus des urays & primitifz originaulx. Mais neantmoins ie penseroye que si la partie affermoit par serment iudiciairement auoir perdu l'original, ou ne l'auoir peu recouurer, en ce cas lon pourroit faire uidimus d'un autre uidimus, ou copie auparauāt collationee deuement a l'original: & y adiousteroit lon foy. Et si lon ha mis quelque piece en auant au commencement de la cause, neantmoins ne fault laisser encores a la produire en la production solennelle de la cause qui est en cest endroict.

¶ Comment on se peut ayder de pieces faictes entre autres parties.

Et si lō ueult produire quelques pieces faictes entre autres parties, il fault auoir lettres royaux, par lesquelles sera mandé au iuge receuoir l'impetrant a produire lesdictes pieces, pour y auoir tel regard que de raison: en receuant aussi partie aduersé a y bailler telz contredictz que bon luy semblera.

¶ Si on peut retirer les pieces yne fois produictes.

Et iasoit que lon ayt produict quelques pieces, neantmoins on les peut retirer en declairant que lon ne s'en ueult ayder. mais s'il y a contredictz baillez, ou consultation faicte sur les contredictz que lon debuoir bailler, il fault refondre les fraiz: & peut aussi partie aduersé contraindre celluy qui a retiré ladicte piece, de la mettre encores auant, a fin de luy en estre baillé un double declairé ualoir original, a ses despens: car ladicte piece a esté faicte commune a sa partie aduersé en icelle piece produisant.

¶ De requerir estre receu a verifïer les escriptures priuees produictes: ou en requerir recognoissance, ou niance.

Et si lon produict quelques escriptures priuees, il fault en les produisant, que que soit, auant que la partie aduersé puisse auoir commencé a besongner a ses cōtrediēt, requérir qu'elle ayt a recognoistre ou nier lesdictes escriptures: ou en cas de refus ou delay luy estre permis uerifier lesdictes escriptures & singz estre de ceulx par lesquelz lon maintient icelles auoir esté faictes. Et lors le iuge en refus ou delay de recognoistre ou nier, ou en cas de niance, ordonnera qu'il sera fait raison en iugeant le proces de la uerification desdictes escriptures: car il pourra estre que le proces se iuydera par ailleurs que par lesdictes escriptures, ou bien le iuge permettra que le requérant ladiete uerification puisse icelle faire pendant proces sans retardement d'icelluy a telle fin que de raison, & la partie aduersé au contraire, si bon luy semble. Et si la piece n'est signee de la partie contendant on proces, ains d'un autre a sa requeste, soit notaire, ou personne priuée, il fault requérir incidēment on proces, que la partie declare se elle l'a pas fait signer a sa requeste ladiete piece du dict sing. Et en cas de ny, ou refus de le recognoistre, on doit faire adiourner celluy qui l'a signé: & si il recognoist l'auoir signé a la requeste de ladiete partie, ladiete recognoissance fait foy cōtre ladiete partie en monstrant par autres tesmoings que ladiete piece ha esté ainsi signee a la requeste de ladiete partie.

¶ De comparaison de lettres.

Pour la uerification desquelles escriptures priuees nous ne usons point ordinairement de comparaison de lettres: mais faisons oyz tesmoings, qui disent bien cōgnoistre lesdictes escriptures & singz, parce qu'ilz ont ueu celluy de l'escripture ou sing duquel est question, escrire ou signer, & qu'il escript ou signe ainsi. Toutes fois il pourroit bien aduenir tel cas qu'a uecques lesdictes depōsitions de tesmoings, nous pourrions
bien

bien user de comparaiſon de lettres : ſcauoir eſt ſ'il eſtoit meſtier de uerifier l'eſcripture priuee d'un qui ſeroit notaire, laquelle toutesfois il n'auroit faiſt comme notaire : car lon la pourroit produire des contractz qu'il auroit ſigné, pour uerifier que ſon ſing eſt ſemblable a celluy duquel eſt queſtiō. Et ainſi ſeroit lō du ſing d'un ſergent, d'un iuge, ou d'une autre perſonne publique.

¶ Des lettres de compulſoire.

Et quand nous uoulons faire faire quelques extraictz ou uidimus, il fault faire mettre par le regiſtre & compulſoire aux parties: Et aux uidimus & copies qui ſeront deuement faiſtes, & collationnees aux originaux partie preſente ou appellee, ſera foy adiouſtee cōme auſdictz originaux. Et faiſt lon commettre commiſſaires communement les iuges ou grefſiers des lieux ou ſont les pieces: & parſois quand ſont pieces legieres, lon commet au premier ſergent royal. Et ſi le proces eſt pendant en la Cour de Parlement, lon prend lettres royales de compulſoire adreſſans aux iuges ou enqueſteurs du pays.

¶ Comment on doit faire extraictz

Et la forme de proceder a faire les extraictz eſt qu'il fault faire adiourner la partie aduerſe pardeuant celluy que lon ueult faire beſongner eſdictz extraictz a certain lieu iour & heure pour uoir faire leſdictz extraictz & copies: & faire faire commandement a ceulx qui ont les pieces, de les porter auſdictz lieu iour & heure pardeuers ledict cōmiſſaire pour en eſtre faiſtz extraictz ou copies. Mais fault que celluy que ueult faire faire leſdictz extraictz, premierement que faire bailler l'adiournement a ſa partie aduerſe, n'entreprendre iour avecques le commiſſaire, ſoit aſſeuré que ceulx qui ont les pieces les porterōt au iour: car il ſeroit autrement condanné

enuer

euuers sa partie aduerse es despens fraiz & mises de ladiete temeraire & frustratoire assignation : & faudroit oultre payer le commissaire de sa uacation. Et si les parties & ceulx qui ont les pieces, comparent, fault requerir qu'ilz ayent a les mettre auant. Et lors pourra la partie adiournee en demãder cõmunication, & terme d'en uenir : qui luy sera octroyé le plus brief que lon pourra, selõ toutesfois la qualité de la matiere. Et si la partie dit quelque chose pour empescher qu'extraictz ne soient faictz, comme que les pieces ne sont en forme authentique: le commissaire baillera acte aux parties de leur dire: & neantmoins declairera qu'il fera lesdictz extraictz, sauf a la partie aduerse de les cõtre dire, & a l'autre de les sõstenir. Et lors le commissaire procedera a faire lesdictz extraictz. Et si c'est un liure ou papier consu, mettera le commissaire par son proces uerbal, dequoy il est couuert, combien il y ha de cayers, & comment commence la premiere fueille, & combien il y ha de lignes. & le semblable fera de la derniere fueille. Et mettera aussi de quelles fueilles pagees & lignes il ha faict l'extraict, & si l'escripture est saine & entiere, & si le liure est signé, ou non. Et pourra la partie aduerse assister a icelluy extraict uoir faire : & sera tenu le commissaire bailler aux parties ce requerans son proces uerbal & lesdictz extraictz en grosse, en la maniere qu'il les aura faict.

¶ De produire dedens le delay
sur ce prefix.

Faict & entendre qu'il fault produire ses pieces dedens le temps qui sera prefix: car la production faicte apres le temps, n'est ualable, non plus que des tesmoins: & peut requerir la partie aduerse que la production faicte apres le delay passés soit reiectee.

¶ Des

¶ Des contredictz & saluations.

Pour uenir aux contredictz & saluations, est a noter que par icelles pieces lon ne doit mettre aucuns faictz conseruans en premiere fin le principal, ne y mettre aucuns faictz nouueaux: fors si lesdictz faictz procedoient & naissoient des pieces produictes, & serussent pour icelles contredire & impugner. Autrement la partie aduersé pourra requerir que lesdictz faictz prohibez soient reiectez & rayez, & celluy qui les allegue, condamné es despens dudit reiect ou radiation. Il y ha toutes fois aucunes matieres ou lon n'est receu a bailler contredictz & saluations: car quant a l'instance de sequestre, l'en ne doit estre admis a en bailler en matiere de complaincte; si le sequestre est separé des autres chefz de ladicte complaincte.

Par les ordonnances dernieres sont baillez nouueaux moyens de cōtre dire contractz: car par le cxxxi. xxxij. & xxxiij. articles, toutes dispositions d'entre uifz ou testamentaires faictes puis lesdictes ordonances: par les donateurs ou testateurs au profit de leurs tuteurs, curateurs, gardiens, baillifz, & autres leurs administrateurs, sont declarees nulles & de nul effect & ualeur, Aussi toutes donatiōs faictes puis les ordonnances susdictes entre les subiectz du Roy, doibuent estre insinuees & enregistrees es Cours royales, & iurisdiccions ordinaires des parties, & des choses donnees: autrement seront repūtees nulles & ne commenceront a auoir leur effect que du iour de ladicte insinuatiō: & ce quant aux donations faictes en la presence des donataires, & par eulx acceptees. Et quant a celles qui seroient faictes en absence desdictz donataires, les notaires stipulans & acceptans pour eulx, elles commenceront leur effect du temps qu'elles auront esté acceptees par lesdictz donataires en la presence des
donateurs

donateurs & des notaires, & inſinuees comme deſſus. Autremēt elles ſeront reputees nulles, encores que par les lettres & inſtrumens d'icelles y euſt clause de retētion de uſufroiēt, ou conſtitution de precaire: dont ne ſ'enſuyuera aucun effect, ſinon depuis que leſdictes acceptations & inſinuations auront eſtē faićtes comme deſſus.

D'aduantage par leſdictes ordonnances article clxxx. & clxxxi. eſt deſendū a tous notaires de quelque iuriſdiction qu'ilz ſoient, de receuoir aucuns contractz d'heritages, ſoit de uendition, eſchange, donation, ou autres, ſans eſtre declairez par les contrahens en quel fief ou cenſiue ſont les choſes cedees & transportees, & de quelle charge enuers les ſeigneurs feodaux ou cenſuels: & ce ſur peine de priuation de leurs offices quant aux notaires, & de la nullité des contractz quant aux contrahens: leſquelles peines ſont declairees deſapreſent comme deſlors en cas ſuſdictz. Et eſt deſendu a tous contrahens en matiere d'heritage, de ne faire ſcienter aucune faulte ſur le rapport ou declaration deſdictes tenances feodales ou cenſuelles qui ſeront appoſees en leurs contractz, ſur peine de priuation de tout l'emolument deſdictz contractz quant aux coupables: c'eſt aſcauoir contre le uendeur, de la priuation du pris: & contre l'achepteur, de la choſe transportee: le tout applicable au Roy quant aux choſes tenues de luy, & aux autres ſeigneurs de ce qu'il en ſeroit tenu d'eulx. Et par le contraire y a pluſieurs moyēs de contredictz, qui auoient lieu ſelon le droit commun, qui auourd'huy ne ſont receus: car en la France couſtumiere nous ne gardons les ſolennitez requiſes de droit ciuil en ung teſtamēt, ains ſeulement la diſpoſition du droit canō. & ſuffit qu'un teſtamēt ſoit ſigné d'un notaire en preſence de deux teſmoins. voire ſuffit qu'il ſoit eſcript & ſigné de la main du teſtateur. Et iſoit que ſelo droit

droict commun il fault qu'en un instrumēt public le lieu ou il est passé soit descript, toutesfois les notaires du seal royal de Paris n'ont accoustumé mettre lieu en leurs instrumens, & font neantmoins foy. Et croy que la raison soit, par ce qu'ilz ne peuuent passer hors le destroict de leur iurisdiction dont ilz sont notaires: & qu'a ce moyen est a presumer qu'ilz soient passez audedens ladicte iurisdiction, si ores il n'en est rien escript.

Est a noter que lon n'ha accoustumé d'adiouster foy aux attestations des notaires faictes a la requeste d'une partie au preiudice d'autre partie, sinon qu'elle soit faicte du consentement des deux parties. Vray est que telles attestations font bien foy contre la partie a la requeste de laquelle elles sont faictes. semblablement il fault scauoir, que quand l'une partie declare qu'elle ne produit que ses actes de Cour, qui sont les registres des expéditions faictes en la matiere, ses escriptures, & enquestes: le iuge ne doit point ordonner que partie aduersē baillera contredictz. car par les ordonnances dernieres article xxxvi. est defendu de non bail-
 ler aucuns contredictz contre les direz & depositions des tesmoings. toutesfois auparauant l'ordonnance susdicte en Poictou on n'en bailloit point: mais en chastelet, a la Rochelle, & en plusieurs autres lieux on en bailloit: & aussi selon droit escript il estoit permis ce faire. Neantmoins ou la partie fait telle declaration de ne uuloir autre chose produire, & que la partie aduersē requiert estre receu a bailler contredictz, le iuge ne fait point mal s'il appoincte les parties ou a uoir l'enqueste en publication, ou en droit, selon la qualite de la matiere, sauf a faire raison en iugeant le proces des contredictz s'ilz y escheent: ou si la partie se-

ra receue a bailler contredict, ou non: car par ce moyen la partie n'ha aucun interest, sinon en ce qu'elle pourroit dire, qu'elle seroit chargée des espices de la uisitation du proces. mais l'interest cesse, partant qu'il n'y ha rien qui gise en contredict. Et ne fault omettre a bailler contredict & saluations auant que uoir l'enqueste en publication: car apres lon ne y est plus ordinairement receu: par ce que par lesdicts contredict ou saluations lon pourroit alleguer quelques faictz nouueaux. Toutesfois il me semble que ce ne pourroit l'empescher s'il n'y auoit forclusion expresse, & que encores en respondant despens de la forclusion & du retardement du proces, lon y pourroit estre receu: par ce que si lon allegue un faict nouueau, le iuge n'y aura regard, s'il est mis par les contredict, la partie aduersé en pourra demander reiect ou radiation. & par ce moyen ce ne peut nuire a la partie aduersé. Et si c'est tel faict qui naisse de la production, tout ainsi que la partie seroit bien receuable a l'alleguer & prouuer en la cause d'appel, pourquoy ne sera elle receu a le poser & prouuer en l'instance premiere: mesmement quand il n'est encores conclu ne renoncé en cause, ne prins appointement a oyr droit?

¶ De la publication d'enqueste.

sensuit uoir la publication d'enqueste, qui n'est autre chose sinon que le iuge ordonne que les parties uerront les enquestes en publication, scauoir est le defendeur le premier, & le demandeur par apres. Et fault prendre aduis auant que le iuge donne ledict appointement, si lon ueult debatre l'enqueste
de

de nullité: car il fault alleguer les moyens de nullité auāt le dict appointement: & empeschcr qu'il ne soit ordonné que l'enqueste soit ueue en publication: car par ledict appointement les moyens de nullité sont uuydez, sinon que le iuge ordonne que les parties uerrōt les enquestes sans preiudice des moyēs de nullité, dont sera faiēt raison en iugeant le proces.

semblablement en la Cour de Parlemēt a Paris, par ce qu'il n'y ha point de publication d'enqueste, lon doit alleguer les dictz moyens de nullité quād la partie demāde que son enqueste soit recue: car ladiēte reception est au lieu de publication. Pareillement doit lon faire es requestes du Palais a Paris: car il n'y ha point de publication, non plus qu'en ladiēte Cour de Parlement. Mais en toutes autres Cours de ce royaume y ha publication d'enqueste par les ordonnances dernieres article lxxxvi. Toutesfois la Cour de Parlement de Toulouse ne uolut du commencement recevoir ledict article, ne trois ou quatre autres, iusques a ce qu'elle en sceust le uoloir du Roy, ainsi qu'il appert par une modification que ladiēte Cour feit mettre a la fin desdictes ordonnances, sans laquelle elle ne uolut oncques permettre les ordōnances estre uēdues en la uille de Toulouse, ne au ressort du Parlemēt. Desquelz trois ou quatre autres articles nous parlerons es lieux propres. Lon auoit accoustumé anciennement & n'a gueres, receuoir une partie a soy inscrire en faulx cōtre la deposition de quelque tesmoing, apres qu'elle auoit ueu l'enqueste en publication: mais par arēt & ordonnance faiēte es grands iours tenuz a Poictiers le xix. iour d'Octobre l'an M.D.XXXI. en certaine matiere d'entre les Chanoines & chapitre de nostre dame la grand de ladiēte uille de Poictiers demandeurs & cōplaignans d'une part, & les Curé & paroiciens de ladiēte eglise defendeurs d'autre part, fut defendu au Seneschal de Poictou

ou ses lieutenans de non recevoir plus telles inscriptions en faulx:combié qu'il estoit question en ladicte matiere, que celui qui uouloit faire ladicte inscription, maintenoit qu'il n'estoit au lieu ou les tesmoings maintenoient les troubles auoir esté faictz desquelz estoit question, ains estoit absent a dix ou douze lieues, tellement qu'il n'eust esté possible qu'il eust esté en ce lieu dont les tesmoings deposoient. Toutesfois selon droit escript telz faictz estoient receuz, & encore sont receuz en matiere criminele, & en doit lon adiuger preuue cōme cy desoubz sera dict. Mais la cause de l'ordonnāce susdicte est pour obuier a subornation: pour laquelle raison aussi selon droit commun lon ne peut faire oyr tesmoings apres publication d'enqueste sur mesmes faictz, ou directement contraires a ceulx sur lesquelz seroient oyz les tesmoings de l'enqueste ueue en publication. Or si lon receuoit telles inscriptions de faulx, lon uendroit consequemment a oyr tesmoings sur faictz directement contraires aux faictz prouuez: parquoy ce seroit faire indirectement ce qu'on ne pourroit directement faire.

¶ Raison pourquoy preuue d'alibi est receue en criminalité apres cōfrontatiōs de tesmoings, & non en ciuilité.

Et la raison de diuersité pourquoy nous receuons ladicte preuue d'alibi en criminalité apres la confrontation de tesmoings, qui equipolle a publication d'enqueste, est que le defendeur l'ha allegué auparauant la cōfrontation du tesmoing a luy faicte, scauoir est par son audition. Et parce qu'en matiere ciuile lon adiuge preuue de tous les faictz aux parties, est a imputer a celle partie qui n'aura faict preuue du faict de son alibi par un moyen avecques ses autres faictz. Et en matiere criminele le defendeur n'est receu a faire preuue de ses faictz iustificatifz, sinō apres confrōtation de tesmoings.

A ceste cause ladicte confrontation ne doit empescher la preuve dudit fait de alibi, c'est a dire que lon estoit en autre part. Mais il y ha un remede qui fut baillé par ladicte ordonnance desdicts grands iours, c'est si lon ueult maintenir la deposition faulx, & le tesmoing auoir esté suborné & corrompu: car lon doit en ce cas receuoir l'inscription de faulx apres la publication d'enqueste: & le iuge icelle faicte en personne ou par procuration speciale au greffe, ou en iugement, ordonnera que la partie mettera ses moyens de faulx par deuers luy, pour en faire droit: ou les ioindra au principal, pour en faire raison preallablement en iugeant le proces: qui est beaucoup le meilleur: car par aduenture le proces se pourra iuger par ailleurs, & ne sera retardé le iugement d'icelluy par le moyen de ladicte inscription, que lon appelle en la Cour, maintenir de faulx.

¶ Moyens de faulx ne se communiquent a partie aduersé: mais aux gens du Roy.

Et ne se doibuent les moyens de faulx communiquer a partie aduersé contre laquelle est faicte l'inscription, ains seulement aux gens du Roy avec les informations sur iceulx faictes: car si le iuge uoit que le faulx soit decisif du principal, & que le principal ne se puisse iuger sans que le faulx soit preallablement uuydé, il ordonne que informations seront faictes sur lesdicts moyens de faulx, & icelles seront communiquées aux gens du Roy, qui y mettront leur requisitoire de decret d'adiournement personnel, ou de prise de corps, si le coupable peut estre apprehendé: sinon, qu'il soit adiourné a comparoir en personne. Et ordonnera le iuge l'un ou l'autre, selon que il uerra estre a faire. Et d'illec en auant sera proces dé comme en matrice criminelle, & sursoyé le principal iusques a ce qu'il soit decis du faulx.

¶ Publication

¶ Publication d'enqueste en quelles Cours
& matieres ha lieu.

Et combien que par l'ordonnance il soit dict qu'en toutes Cours il y aura publicatiõ d'enqueste fors esdictes Cours exceptees : neantmoins il ne s'ensuit qu'en toutes matieres il y ayt publication d'enqueste : car elle ne doit auoir lieu selon droit commun en incident, uoire ne en cause principale sommaire. Et si elle est omise, la sentence pourtant n'est nulle, inique, ou torcioniere. car ou bien elle ha esté demandee, & n'ha esté octroyee. en ce cas s'il n'y ha appel, lon est ueu acquiescer a l'appoinctement par lequel elle ha esté deniee, & passe ledict appoinctement en force de chose iugce. Vray est que s'il y ha appel de la denegation, si la qualite de la matiere ne l'empesche, il sera bien soustenable: & par le moyen d'icelluy, la sentence, & tout ce qui depuis aura esté fait, sera mis au neant, & reuoqué comme attentat. Et si ladicte publication n'ha point esté demandee ne faite, la sentence pour ce ne laisse estre ualable: car l'ordonnance doit estre entendue si ladicte publication est demandee. Et si ladicte publication ha esté octroyee, & que la partie ne l'ayt ueu en publication, luy est a imputer, & ne se peut plaindre si la sentence depuis ha esté donnee sans qu'il ayt ueu l'enqueste. Toutefois il seroit meilleur de la faire forclorre de la uoir en publication. Ce que lon ha accoustumé communement de faire: car lon ordonne que le defendeur uerra les enquestes en publication dedens tel temps, & le demandeur dedens tel autre temps ensuyuant, & en droit, sans autre forclusion, ne iniunction.

¶ De non recoler ou reoyr tesmoins apres
publication d'enqueste.

Après ladicte publication d'enqueste, la partie ne peut plus
r ij requirir

requerir que ses tesmoins soient recolez ou reoys, sinon que ses tesmoins eussent esté produictz en absence de partie aduersé, & icelle non adiournee : ou bien que les commissaires n'eussent faict rendre es tesmoins raison de leur dire, ou eussent omis a oyr les tesmoins sur quelques articles a eulx baillez par attiquette: car en ces cas ou semblables s'il est sauf a partie aduersé de luy faire raison des moyens de nullité en iugeant le proces, la partie contre laquelle est obiicee la nullité, peut obtenir lettres royaux adressans au iuge, par lesquelles luy sera mandé recoler ou reoyr lesdictz tesmoins, uoire & a recevoir & oyr tesmoins sur les articles sur lesquels il n'en auroit examiné d'autres. & ainsi en fut dict par arrest le vi. iour de Septēbre M.D.XVI. Et parce le iuge ou cōmissaire doit mettre par l'audition du tesmoing, cōment il l'a oy sur tous les articles cottez par l'attiquette. Et combié que le tesmoing die ne scauoir rien du faict cōtenu en un article, ne aumoins est bon de mettre qu'il ha esté enquis sur cest article, & dict n'en scauoir rien: car lors le commissaire sera entieremēt deschargé. Et en ce cas ou la partie ueult estre receue a faire preuue sur autres articles, la partie aduersé doit estre aussi receue a faire preuue au contraire aux despens de l'autre, cōme en la cause d'appel: ainsi que cy apres sera dict. Toutesfois si aucuns des tesmoins sont mortz puis leurs depositions, & qu'il soit ordonné qu'ilz seront recolez, lon n'aura regard a leur depositiō, cōme ha esté par nous dict cy deuāt: mais le iuge de son office sans ce que les parties le requierent, pourra biē ordonner que les tesmoins serōt par luy reoyz sur aucuns poinctz & articles du proces. Et iasōit que selō droit escript publicatiō des enquestes ne doit estre faicte a celluy qui s'est asisté au proces puis les enquestes faictes, parce que lesdictes enquestes n'ont esté faictes cōtre luy ne par luy: toutesfois ie pense

penſe que ſ'il declairoit uouloir prendre droit par leſdictes enqueſtes cōme ſi faiçtes eſtoient avecques luy, & qu'il ſe uouluſt contenter des meſmes obieçtz qui auroient eſté baillez par celluy avecques lequel il aſſiſte, qu'il deburoit auoir publication des enqueſtes ſoubz meſme delay que celluy avecques lequel il ſe ſeroit aſſiſté: car en ce faiſant la partie aduerſe n'y auroit intereſt.

¶ De prendre appointement en droit apres les enqueſtes ueues en publication.

Les enqueſtes ueues en publication, lon prend appointement en droit: cōbien que ſouuēt en prenant appointement a les uoir, les parties quāt & quant ſont appointees en droit: comme cy deſſus ha eſté dict. Et en prenant ledict appointement, ſi la partie le requiert, le iuge luy ſauue ou permet bailler motifz de droit, deſquelz n'ha la partie aduerſe communication nō plus que des ſaluatiōs. Et pour ceſte cauſe aucuns quād ilz ont quelque bon point de droit ou remonſtrāce, ilz le reſeruēt en leurs ſaluations. Mais il fault ſe garder d'attendre a faire quelque offre ou conſentement en ſaluatiōs ou autres pieces dōt partie aduerſe n'ha cōmunicatiō: car ledict offre ou cōſentement ne preiudicie a la partie aduerſe ſi nō depuis le tēps qu'elle en ha eu cōmunicatiō: & iuſques a ce eſt pour non faiçt ou aduenu. Et pource il fault faire un offre ou cōſentement en preſence de partie aduerſe, ou luy faire ſignifier & bailler copie des eſcriptures eſquelles ha eſté faiçt ledict offre ou conſentement. Cōuient entendre que mōdict ſieur maiſtre Nicole Bohier en ſa queſt. 344. des deciſions de Bourdeaux dict que par areſt du Parlemēt dudiçt lieu auroit eſté dict, qu'il ne ſuffiſoit d'alleguer par ſes eſcriptures, que ſa partie aduerſe en matiere benefciale n'eſtoit deucement diſpenſee. mais il fault ce entendre des eſcriptures & motifz de droit

ou aduertiffemēt, qui ne se cōmuniqūēt point a partie: & nō des escriptures qui se cōmuniquent. car on ha accoustumē ce obiicer & alleguer par les principales escriptures, ou par les contredictz qu'on baille contre les pieces de partie aduersē. Ce que i'ay biē uoulu icy declairer, a fin qu'on ne imputast erreur a un tel notable personnage: ou qu'aucun en le prenant trop crument, & sans faire ladiēte distinction, tumbassent ou pissent tumber autres en inconuenient.

¶ De la clause, sans autre iniunction ou forclusion, qui se met ordinairement en l'appoinctement de en droict.

Et par icelluy appoinctement de en droict, on met ordinairement ceste clause, sans autre iniunction: laquelle emporte que le iuge pcut iuger deslors par ce qu'il trouuera pardeuers la Cour, uō pas toutesfois des le iour mesme ou ledemain, mais selō la grādeur de la matiere apres quelque interualle de tēps par maniere qu'il puisse auoir eu loysir de meurement y auoir ueu & delibéré. Toutesfois par urbanité cōbien que ladiēte clause y soit, encores si la partie n'ha dressē son sac, le iuge ordōne que iniunction luy sera faicte de le dresser dedens trois iours, ou autre temps a sa discretion: autremēt qu'il sera par luy iugē par ce qui se trouuera pardeuers la Cour. Et si ladiēte clause, sans forclusion ne iniunction, n'est mise par ledict appoinctement, & que le iuge sans faire iniunction, iuge par le sac d'une partie, l'autre se pourra porter appellāt de la sentence. & ainsi en fut dict par arest es grāds iours de Poictiers le xxiiij. iour d'octobre l'an M.D.XXXI. en certaine appellation interiectee d'une sentence portant adiudicatiō de sequestre, laquelle fut baillēe apres qu'il auoit eslé ordonnē que quant au sequestre en matiere de cōplaincte les parties escriroient par cedulaes & aduertiffemēs, & mettroient toutes les
pieces

pieces que bõ leur sembleroit, pardeuers le iuge pour en ordõner comme de raison, & en droict: & n'y auoit esté mise ceste clause, sans forclusion, ne iniunctiõ: ne depuis n'auoit esté faite aucune iniunctiõ, ne forclusion. Toutes fois si les parties auoient esté appoinctees a produire, & que lon eust baillé cõtrediçt & saluations, & mis la matiere en droict sans ladicte clause de forclusion ou iniunctiõ, & que apres le iuge baillast sentence sans preallablement faire aucune iniunctiõ ne forclusiõ, & que la partie cõtrelaquelle seroit sentëcié, en appellast pour ce seul grief, qu'il n'y auroit eu forclusiõ ne iniunctiõ, ie trouueroye l'appel fort delicat: car ueu qu'il y ha eu appoinctemēt a produire, & que lon ha baillé cõtrediçt & saluatiõs, il est a presumer qu'il ha esté produict: & puis que lõ prêt appoictemēt en droict, parapres il y ha cõtumace & negligēce notable, si lon ne met son sac tout dressé au grefse. Et si le iuge faict ladicte iniunctiõ en absence d'une des parties, ce qu'il peut faire, il doit ordonner qu'elle sera signifiee a la partie: & ne courra le temps, sinõ depuis la significatiõ.

¶ Delation de serment en supplement de semipleine preuue.

Et si la matiere est disposee que le serment soit deferé ou baillé par l'une des parties pour supplement de semipleine preuue, icelle partie en prenant appoinctement en droict, peut requerrir que ledict serment luy soit deferé: combien que sans qu'elle le requiere, le iuge ha accoustumé & le doit faire de son office: mais ledict requisitoire sert seulement d'aduertissement. Et la maniere de deferer ledict sermēt en nostre pratique est que le iuge interloque que la partie sera oye par serment sur certains poinçt & articles du proces auparauāt que proceder en iugement diffinitif d'icelluy. Et pource que par ladicte forme n'est declairé certainement si le iuge entend

deferer a la partie ledict serment pour supplement de preuue, ou que pour autre cause il ueuille oyr la partie: il ne fault que la partie aduerse appelle de ladiete interlocutoire, ains doit attendre la diffinitive. Et si le iuge selon le serment & affirmatiõ de celle qui l'ha faict, baille sentece diffinitive au profit d'elle, la partie aduerse pourra lors appeller de ladiete sentece diffinitive, s'il n'y auoit telle preuue que lon luy deust deferer le serment, ou paraduecture qu'il eust deu estre deferé a la partie aduerse: a laquelle il ne nuira point a la poursuite de l'appel de ladiete diffinitive, ce qu'elle n'ha point appellé de ladiete interlocutoire: comme a esté dict par arrest. N'est a omettre en ce passage, qu'auõs esté aduertis par aucuns notables aduocatx de la Cour de Parlement a Paris, que ce que noz docteurs du droit disent, que quand le demandeur ha sempleine preuue, scauoir est un tesmoing entier deposant de la uerité du faict, luy doit le serment estre deferé par le iuge pour supplement de sa sempleine preuue, n'est point gardé en ladiete Cour, pour raison de la grand facilité que les hommes du iourd'huy ont de iurer & faire sermēt: & qu'ilz n'õt telle reuerence ne religiõ a un sermēt ou iuremēt iudiciaire, que on temps passé ilz auoient. Qui est abolir grans difficultez de droit, que font les docteurs quand une preuue est sempleine. Et cõbien aussi que lesdictz docteurs disent, qu'en matiere criminele le iuge doit deferer ledict sermēt en supplement de preuue pleniere: toutesfois monsieur maistre Nicole Bohier en ses questiõs lxxxv. & lxxxvi. des decisions du Parlement de Bourdeaux dict que ledict Parlemēt observe cela en matiere d'iniures, de delict, ou lon cõclud a amede & reparation pecuniaire, & non ou lon demande a amende honorable: & beaucoup moins ou lon tend a punition corporelle. Mais il me semble que ledict serment ne doit auoir lieu

en matiere d'iniure ou de delict quelque qu'elle soit, par ce que la sentence y donnee selon droit emporte infamie, voire si l'iniure estoit faicte a uile persone. & l'infamie est de droit equiparee a mort.

¶ De la communication d'audition de serment entre les parties.

Et tout ainsi que les parties ont communication & publication de leurs enquestes, aussi doibuent elles auoir communication de l'audition de celle qui aura esté oye par serment. Et pource que plussouuent on defere le serment audict defendeur que au demandeur selon droit & raison, aussi faict lon communement communication de ladicte audition a celui qui ha faict le serment, & ha esté oy, premierement qu'a sa partie aduersé. semblablement pource que ledict serment est une espee de preuue, il fault appeller la partie aduersé a certain iour lieu & heure par le iuge ou commissaire pour uoir faire ledict serment: & icelluy faict, sera oye la partie a laquelle il ha esté deferé apart & separeement de sa partie aduersé: laquelle ne doit aucunement estre presente a l'audition, nō plus que a l'auditiō d'un tesmoing. Et si l'une partie defere le serment a l'autre sur aucun poinct de la demāde, ou des defenses, partie aduersé n'est tenu de l'accepter, sinō qu'il soit creu sur le tout. Et si d'aduenture il estoit omis de ce ordonner: neantmoins si le faict est cōnexé ou depēdant de celluy sur lequel ha esté deferé le serment: nous obseruōs que celluy qui faict le serment, est creu dudit faict, cōme du faict sur lequel est deferé le serment: comme si le demandeur se raporte au serment du defendeur, si par l'arrest ou closture de cōpte de certaine negotiation il n'est pas demouré redeuable au demādeur de la somme dont est question: & le defendeur dit par son serment, que a la verité il demoura redeuable de ladicte

ladiète somme, mais que lors il la paya audièt demandeur: il sera creu du payement de ladiète somme: combien que aucüs docteurs du droièt ciuil ont tenu le contraire. Et n'est lon tenu accepter le serment s'il est deferé ailleurs que sur les saintes euangiles, ou en l'eglise present le precieux corps de nostre seigneur Iesu Christ, ou deuant le lieu ou il repose, & non sur aucunes reliques des saintz: ainsi qu'il a esté dièt par plusieurs arestz. Quand les parties ont conclu en cause, & prins appoinctement a oyr droièt, & conclu en cause sur leurs productions, ou sur ce qui est en leurs sacz, le iuge ne doibt differer ne delayer de proferer ou donner sa sentence, soit soubz ombre de ce que l'une des parties demanderoit delay d'absence, ou attente de conseil, ou autre delay: ne aussi pour quelque appellatiō qui soit faicte de luy pour empescher le iugement du proces: ne aussi pour l'absence & default d'une des parties: ne pour lettres royaux de estat: ainsi qu'il est dièt par les ordonnances du Roy Charles VII. article lxxviij.

¶ Des lettres royaux de estat.

Et sont lesdictes lettres d'estat, que le Roy, ou son lieutenant en quelque armee, donne a quelcun estant a l'armee, par lesquelles il est mandé faire tenir toutes les causes de celluy tāt en demandāt que defendant en surseance iusques a un moys ou quinze iours apres son retour: desquelles lettres est parlé es ordonnāces du Roy Philippes le bel faictes sur le faict des aydes, article viij.

¶ Que le iuge ne doibt differer a donner sentence pour mestiuës ou vendenges.

Aussi le iuge ne doibt differer a donner sentence pour les uacations ou feries de mestiuës ou uendenges, mais si la partie obtient lettres royaux par lesquelles luy soit mandé auāt que

que proceder au iugement, faire quelque chose concernant le proces, & en surseoir le iugement iusques a ce qu'il ayt faict ce qui est mandé: lors le iuge doit surseoir & differer ledict iugement, & oyr les parties sur l'enterinement desdictes lettres, & ioindre ledict incident avecques le principal, pour icelluy estre iugé avecques ledict principal conioinctement, ou diuisement, comme il uerra estre a faire par raison. Et si le iuge trouue que ladiete partie ayt obtenu lesdictes lettres royaux par malice, & pour delayer frustratoirement ledict proces, il la condamnera en amende oultre le principal, & es interestz & despens pour icelluy proces retardé: comme il est dict par ladiete ordonnance dudit Roy Charles VII. artic. lxxvij. susdict.

¶ De ceulx qui apres l'appoinctement en droit, produisent faictz nouueaux.

D'aduantage par les ordonances artic. cij. est ordonné que les impetrans des lettres royaux pour estre receuz a articuler faictz nouueaux, s'il est trouué qu'ilz ne seruēt a la decision du proces, sont condamnez enuers le Roy en l'amende ordinaire d'un fol appel es Cours de Parlemēt, & en uingt liures parisis es Cours inferieures, & moytie moins aux parties, & plus grosse si mestier est. Pareillement les iuges receuent une partie apres l'appoinctement en droit a produire de nouveau sans lettres royaux le plus communement. toutesfois le plus seur est d'auoir lettres: car le iuge ne la receuera point sans icelles, s'il ne ueult. mais il doit aussi ordonner en la receuant, que partie aduersē baillera contredictz alencontre desdictes pieces de nouveau produictes, aux despens de celle qui les produit. et qu'elle payera oultre certaine sōme pour les despēs du proces retardé. Et si la partie aduersē uoulant auancer le iugemēt de la cause, declare ne uouloir bailler contredictz

contredictz, mais demande estre resarcié des fraiz d'une consultation qu'elle dict auoir faict pour scauoir si elle debuoit bailler contredictz, ou non, lesdictz fraiz luy doibuent estre adiugez. Et iasoit que quand on baille contredictz aux despens de partie aduerse, communement elle n'ha les despēs & fraiz de ladicte consultation: toutes fois me semble qu'elle les deburoit auoir, si elle afferme l'auoir faict: parce qu'il est bien requis parfois faire ladicte consultation. Et neātmoins pourra ce pendant la partie aduerse produire aussi de nouveau. & ne baillera toutesfois l'autre contredictz contre ladicte production nouuelle aux despens du second produisant: parce que les delays de produire sont communs, comme de faire preuue, ainsi qu'auons cy dessus dict. En oultre apres ledict appoinctement a oyr droict, la partie peut recuser le iuge, pourueu qu'elle die les causes de recusation estre de nouveau uenues a sa notice depuis la derniere expeditiō. Et doibt mettre ses causes de recusatiō en son sac, & icelles biē cotter par son inuentaie: ainsi qu'il a esté par nous cy dessus dict. Mais si le proces est ia ueu & uisité, ou cōmencé a uoir & uisiter, lō ne peut plus recuser. Et si le iuge seul dit auoir ia cōmencé a uoir & uisiter ledict proces, & qu'il n'en apparaisse d'ailleurs que par son rapport, il n'en doibt pas estre creu: car il peut estre animé contre le recusant, ou contre luy auoir cōceue haine au moyen de la recusation, uoires'il monstroie le dictū de la sentence par luy faict, s'il n'apparaissoit autremēt qu'il l'eust faict auant la recusation, mesmement que oultre ladicte haine il pourroit ce dire & alleguer pour auoir ses espices, & consequemment a son profit.

¶ Le greffier doibt porter les sacz pardeuers le iuge dedens huietaine.

Conuient par apres que le greffier porte les sacz pardeuers le

le iuge: ce qu'il doit faire dedens huitaine apres le proces mis en droit par les iuges royaux, pour le plus tard, a peine d'amende arbitraire: & est tenu faire registre du iour qu'il les aura presenté au iuge: ainsi qu'il est dict par les ordonnances du Roy Loys XII. article lviij. Mais communement le greffier ne fait point autre registre, sinon que le iuge merche & sousigne a un papier du greffe le iour mois & an qu'il ha eu du greffier les fact. Et fault que le iuge ayt en premiere cure uoir si le proces est bien en droit, & si chascune des parties a fourny de ce qu'elle debuoit faire, ou non. & ou elle n'en auoit fourny, si elle en a esté forclosé deuement. Et si l'une des parties n'ha satisfait a ce qu'elle debuoit, le iuge doit interloquer que ladicte partie y satisfera dedens certain temps, pour ce fait, ou le delay passé, estre par luy procedé au iugement du proces comme de raison. Mais le iuge doit pouruoir qu'il ne baille aucunes interlocutoires, sinon qu'elles soient bien necessaires: car autrement il encourra suspicion de grand cupidité & auarice, & qu'il le fait pour auoir espices de ses uisitations du proces.

¶ Le iuge par sa sentence doit trancher toutes occasions de nouveau proces.

Et signamment doit obuier que par sa sentence il ne mette les parties en plus grand proces que auparauant: & fault qu'il tranche toutes occasions aux parties de plus n'auoir proces: ce que plusieurs ne font pas, car en uuydant un proces, il en engendrent trois ou quatre. Aussi est necessaire, que si le iuge ueult suiure l'offre faite par une des parties, qu'il la pregne entiere, & ne la decoupe point: scauoir est qu'il n'en pregne une partie, & laisse l'autre. Et parce que souuent aduient que les lieux dont est question, sont si incertains, & si peu de claires par les escriptures des parties & depositions des temoings:

moings : qu'il est neccessaire interloquer, que le iuge se transporter sur les lieux, & sera faicte d'icculx figure: & les tefmoings s'ilz sont uiuans, serōt recolez, ou autres en leur lieu, s'ilz sont mortz, oyz sur les lieux: & que plusieurs iuges & commissaires ont cydeuant erré a faire lesdictes figures, tellement que par arest a esté dict, qu'elles seroient refaictes: i'ay voulu cy declairer la maniere comment il les fault faire. Les iuges communeemēt ont accoustumé retenir a eulx celle commission: a fin d'estre mieulx instruietz pour le iugemēt du proces. Et a ce moyen baille le iuge son exequutoire contenant iour heure & lieu assignez es parties pour se trouuer sur ou pres desdictz lieux contentieux. & comparens les parties, ou en absence de celluy contre lequel on faict la figure, luy deuement appellé o intimation: le iuge faict faire serment a un peinctre homme de bien, qu'il eslira, de bien & loyaument faire & peindre ladicte figure. & luy mōstrera lesdictz lieux. & la figure faicte, il demandera es parties, si elles s'accordent ladicte figure estre bien faicte. & s'ilz s'en accordent, le iuge interroguera les parties, qu'ilz ayent a declairer ce qu'ilz pretendent des lieux contentieux, & les limites respectiuelement pretenduz: & les causes & indices, lesquelz chascū d'eulx pretend pour soy. & les faict rediger par escript par son adioinct, qui ha accoustumé d'estre le greffier de son siege. & faict signer es parties leurs direz, s'ilz scauent signer. & apres recole ou oyt les tefmoings des deux parties, serment preallablement par elles faict: & les interrogue de ce, qu'il uoit estre neccessaire pour esclarcir les droitz des parties: & ce a part & separement des parties. & a la fin il met ce que luy semble des droitz desdictes parties. & en iugeant le proces, il met auant la figure avecques son proces uerbal de la confection d'icelle.

¶ Des sentences interlocutoires en matieres
de reproches.

Il aduient souuent qu'il est necessairement requis que le iuge interloque, signamment quand les tesmoings sans lesquels lon ne pourroit iuger le proces, sont suffisamment obiectez & reprochez par reproches concludans. Mais par l'ordonnance du Roy Loys XII. article xxxix. est defendu d'appointer les parties a informer sur les faictz des reproches, sans uoir lesdictes reproches avecques le proces principal: & de ne receuoir les parties en preuue desdictz faictz, sinon qu'ilz soient concludans, & que sans iceulx lon ne pourroit decider le proces. Et ha de coustume la Cour de Parlemēt a Paris puis quelque temps enca, de coter ou designer par son arest interlocutoire par lequel elle adiuage preuue des reproches, les articles desdictes reproches desquelles elle entend que preuue soit faicte, comme sur le iij. v. vi. articles, &c. Ce qui est tres-equitablement faict, a fin que les parties ne uagent, & ne soient incertaines quelles preuues elles doibuent faire, & qu'elles ne soient uexces de peine & fraiz de preuue superflue. Et pource les iuges royaux du ressort d'icelle Cour suyuent de present ceste maniere d'interlocutoire, & cotent les articles des reproches. Et combien qu'il ne soit point commandé aux iuges de le faire ainsi, toutesfois ie pense que si le iuge ne cotoit les articles desdictes reproches, la partie a qui seroit confusement adiugee ladicte preuue, en pourroit appeller, non pas tant pource que lon l'auroit greué, partant que lon est uen la charger de toute la preuue de ses obiectz, en quoy encores y auroit grand apparence: mais pource que la Cour qui iuge d'equité, en la cause d'appel fera ce que debuoit faire le premier iuge.

¶ Des

¶ Des reproches des tesmoings produictz pour la verificatiõ des reproches de partie aduerse.

Et est a entendre que la partie peut bailler reproches contre les tesmoings que sa partie aduerse produit pour la uerification de ses reproches : & qu'il doibt estre adiugee preuue desdictes secondes reproches, comme des autres premieres. Mais oultre lesdictes reproches secondes lon n'est plus receu a en bailler contre les tesmoings qui auroient depose sur lesdictes secondes reproches. Toutesfois s'il y auoit quelques reproches contre les derniers tesmoings reprobatoires, & que d'icelles reproches lon en fit apparoir par instrument authentique, il seroit bon les alleguer, & quant & quant produire ledict instrument, a fin d'y auoir par le iuge tel egard que de raison: car lors la presumption de malicieusement uouloir retarder le proces, seroit tollue: & si les reproches estoient concluans, le iuge y deburoit auoir regard.

¶ Le iuge doibt vuyder les incidens le plustost que faire se pourra, & les gros proces dedens trois mois, ou six mois pour le plus tard.

Le iuge apres que les sacz ont esté portez pardeuers luy, est tenu par l'ordonnance du Roy Loys XII. article lviij. uuyder les incidens le plus diligemment que faire se pourra: & les gros proces dedens trois mois, a tout le moins dedens six mois pour le plus tard, sur peine d'amende arbitraire. Et si desdës ledict temps il ne iuge, la partie qui aura interest, pourra le sommer de uuyder le proces, ou bien en iugement present le greffier, ou hors iugement en presence de notaire & tesmoings. Et si le iuge neantmoins ne le uuyde apres que ainsi la partie l'aura sommé par trois diuerses fois & a diuers iours auecques quelque interualle entreiceulx, & qu'elle aura prins acte de ladicte sommation, & de la sommation que
apres

apres leſdictz iours paſſez elle fera au greſſier de luy declarer ſi le proces eſt uuyd , & de la reſponſe du greſſier, elle ſe pourra porter appellant du iuge comme de deny de iuſtice. & ainſi en fut dict par areſt le xviij iour de Ianuier l'an M.D. XXXII.

¶ Es quelz cas les iuges appellent au c ſeil des aduocat  de leur ſiege: & que les vieil  aduocat  & expert  ſont a preferer aux nouueaux venuz & non expert .

Et doit le iuge appeller au conſeil des aduocat  de ſon ſiege, a tout le moins en certaines cauſes eſquelles nommeement les ordonnances royaux le adſtraignent d'en appeller, comme es matieres eſquelles les ſentences excedent uingt & cinq liures tournois ſont executoirs nonobſtant oppoſitions ou appellati s quelconques, dont nous traicterons cy apres. Et par les ordonn ces du Roy Loys XII. publiees en l'an M.D. XII. leſdict  aduocat  qui ainſi ſeront appelle  aux iugemens des proces, doibuent eſtre reſidens continuellement au ſiege, & y auoir pr ctiqu  par trois ans continu   & au deſſou . Mais pluſieurs iuges font le contraire, & y appellent ſeulement leurs enfans & gendres, i ſoit qu'il  n'ayent point encores pr ctiqu , & ne ſacent que uenir des eſcholes. Non pas que ie uueille dire que les iuges ne les y puiſſent bien appeller pour les inſtruire au fai t de pr ctique: mais pourtant ne peuuent & ne doibuent laiſſer de appeller d'autres aduocat  ay s pr ctiqu  par le temps ſuſdict: car encore que leſdict  enfans ou gendres ſoient ſcauans en droit & pr ctique, toutesfois il  n'auront pas leurs opini s lib es, & ſer t contrain   incliner a l'opinion du iuge: & par ce moyen autant uauldroit il qu'il n'y eut que le iuge. D'auantage il eſt raiſonnable que les aduocat  qui par leurs preſences & aſſiſtences

sistences decorēt les sieges, & qui par les ordonnances es causes esquelles n'y a partie que le Roy, sont tenuz de conseiller le iuge gratis, & sans salaire, qu'aussi le iuge les recognoisse d'ailleurs.

¶ Quand pourra le iuge demander pour la uisitation des proces par le greffier, aucune chose aux parties.

Et par les ordonnances du Roy Loys XII. publiees en l'an mil cccc.xcix article c. le iuge ne doit demander aucune chose aux parties pour la uisitation des proces par le greffier, sinō apres les dictons prononcez, fors pour les gros proces, & de longue uisitation, comme proces de fruietz, de criees, de discussion d'hypotheques, & autres proces esquelz seroit besoing assembler gens de conseil, & commissaires, & les payer comptant: auquel cas les parties mettront pardeuers le greffier ce qui sera raisonnablemēt ordonné par le iuge pour payer & contenter les Conseillers & commissaires.

¶ La forme de bailler sentences.

Or declairons apresent la forme de bailler sentences. Premieremēt doit le iuge selon l'ordonnāce du Roy Charles VII. article xvij. & du Roy Loys XII. article xcviij. faire son brief dicton par escript, & le signer de sa main, & mettre les consultants avec lesquelz il aura faict les consultations, & la taxation de leur uisitation & consultation. Et l'enuoyera au greffier avec les sacz: lequel brief il sera tenu garder & enregistrer: autrement le greffier ne le doit prononcer ne enregistrer, par l'ordonnance du Roy Loys XII. article. CI. Et par apres le greffier ou son commis le doit prononcer aux parties si elles sont presentes: sinon, a leurs procureurs.

¶ Les sentences se donnent contre les parties, non contre les procureurs.

Et est tousiours la sentence donnee contre les parties, & non contre les procureurs. Toutesfois es Cours royales & autres inferieures, si la sentence est prononcee aux procureurs, lon met les parties comparens par leurs procureurs: & si la sentence n'est prononcee aux procureurs, lon met les parties seulement. Et par la on cognoist s'il a esté appellé illico de la sentence, ou non: car si la sentēce est prononcee aux procureurs, ou aux parties, & n'en appellēt, ilz n'ont appelé illico. Mais pour scauoir si la sentence est donnee par contumace, ou non, il fault regarder si l'appoinctement en droict, est donné avecques les deux parties. Et aussi la sentence donnee contre un tuteur, n'est mise a execution sur ses biens, mais sur ceulx du mineur: combien que la Cour de Parlement aucunesfois condamne biē un pere plaidant comme administrateur de son filz, es despens en son nom priué, quand la calumnie est euidente. Mais en ladiēte Cour de Parlement lon ne met que les parties, & ne met lon point les procureurs. Neantmoins ne en la Cour de Parlement, ne es Cours inferieures les parties ne sont presentes quand les iuges ou la Cour donnent leurs sentences ou arestz: car ilz les peuuent faire les dimēches, & en leurs maisons, mais ilz ne les doibuent enuoyer au greffe, queque soit, faire prononcer les dimēches, ne autres festes celebres. Et si le greffier ne peut trouuer les parties, lon peut faire signifier le dicton au procureur par un sergēt du siege. De ce peut resulter un doubte, si ce que nous auons de droict commū, que si le procureur a faict des fraiz en une cause, & sa partie gaigne sa cause, & ayt adiudication de quelque somme de deniers: & par apres le procureur demāde le dictz fraiz a sa partie, & en obtiēt condānation cōtre elle: & se trouue en l'execution, que ledict cōdānné n'est soluble: le demandeur se peut adresser contre l'autre partie

qui auoit succubé, & demãder qu'elle luy satsiface desdictz fraiz sur ce qu'elle doit a la partie, pour laquelle les fraiz ont esté faictz. Et me semble, que ce doit estre gardé encore de present, combien que la sentēce ne se donne contre les procureurs, ains contre les parties seulement. Et fault entendre necessaiřemēt, que la partie premieremēt condamnēe n'auoit payé la somme de deniers portee par la condamnation: car si elle auoit esté payee, n'y auroit raison de la demander encore au condanné, ou partie d'icelle somme: d'autant qu'il auoit payé a celluy auquel il estoit condanné, & consequemment en seroit dechargé.

¶ Deux manieres de leuer sentence: & que la taxe des espices doit estre mise au dos de la sentēce.

Et y a deux manieres de leuer sentences: l'une par dicton seulement, l'autre quand on la leue en forme. Doibt tousiours le greffier mettre au dos des sentences ce qui a esté taxé par le iuge pour ses uisitation & consultation, que nous appellōs espices, & ce qui luy a esté payé pour l'expedition du dictō, ou de la sentēce en forme. Et ne peuuent le iuge & le greffier prendre autre chose. Et doibuent les iuges prendre lesdictes espices par les mains du greffier: ainsi qu'il est es ordonnances du Roy Loys XII. article lvij. Toutesfois en la Cour de Parlement a Paris lon ne met point au dos des arrestz les espices, dont il aduient beaucoup de dommage aux parties: car au moyen qu'elles sont de loing, aucuns procureurs circonueñuz par leurs clerks ou solliciturs, leur escriuēt qu'il y a beaucoup plus d'espices qu'il n'en y a. En quoy est chargé aussi l'honneur de messieurs de la Cour sans cause. pource seroit bon que l'ordonnance y fust gardee.

¶ Cōment le greffier doit faire sentence leuee en forme, & y mettre le dicton du iuge.

Doibt

Doibt le greffier semblablement par les ordonnances du Roy Charles VII. article xvij. & du Roy Loys XII. publiques en l'ā M. CCCC. XCIX. article CI. faire la sentence en forme sur les pieces des parties; & inserer au vray sans superfluité de langage le playdoié, ou cōtenu des escriptures des parties le plus sommairement qu'il est possible. Et aussi par apres y mettre de mot a mot le dicton du iuge tel qu'il l'aura signé & enuoyé au greffier, sur peine d'en estre puny cōme de crime de faulx. Et ne sera une partie receue a maintenir le dicton estre autre qu'il n'est cōtenu par ladiete sentence, quād elle est en la forme susdictes; sinon qu'elle le ueuille arguer de faulx. Et ia soit qu'il semble que par ladiete ordonnance du Roy Charles VII. il soit dict que le iuge doibt signer la sentēce en forme, & que parcydeuāt lon ayt use, que lō ne adioussoit foy aux sentēces en forme sinon qu'elles fussent signees des iuges: neātmoins apresent lon ne s'y arreste point; car ce engendreroit quelque uachette es parties; parce qu'aucuns iuges prennent argent pour ledict sing: aussi qu'il suffit que le dicton soit signé, auquel lon peut auoir recours en cas de doute. Toutes fois quād on enuoye une sentence en forme d'un proces par escript, on ha encore de coustume de la faire signer. & ne suffit en ce cas ou il y a proces par escript, d'enuoyer le dicton par extraict du greffier en la Cour a Paris en la cause d'appel: mais fault enuoyer la sentence en forme. autrement l'appellant ne seroit tenu conclure cōme en proces par escript, cōme sera traicté cy apres. Pource fault prendre regard a ce que le greffier n'enuoye les sacx cloz & euangelisez en la Cour auant que la sentence en forme soit minutee: car iay ueu des parties estre cōtrainctes faire rapporter les sacx de Paris au lieu ou la sentence auoit esté donnee, pour la faire mettre en forme. Toutes fois les greffiers sont tenuz bailler copie des di

Et on signe de leur sing aux parties la requerrans, par ladicte ordonnance du Roy Charles. Et quant aux sentences mises en forme, le greffier par ladicte ordonnance du Roy Loys XII. en doit auoir uingt solz pour peau de parchemin de grandeur suffisant, & loyaument escripte, pour le plus, ou moins, selo la coustume des lieux, a laquelle n'est derogué par ladicte ordonnance en tant que les greffiers en deburoient moins auoir. En quoy sont a reprendre plusieurs iuges qui permettent a leurs clerks ou greffiers faire des sentences en forme, qui ont de marge presque demy pied.

¶ Des salaires que lon prend pour autres escriptures que sentences.

Puis qu'il uiet a propos, il sera bon de declarer quel salaire on prend pour autres escriptures. Et par ladicte ordonnance arti. Ci. est dict que comme desdictes sentences, aussi des autres lettres d'importance, qui requerront minute, on pourra prendre a la raison de uingt solz tournois pour peau de parchemin. Mais ce n'est pas obserué en la Cour de Parlement en declaration de despens; car on prend uingt solz tournois pour chascun roolle, & contient la peau quatre rolles. Et quant aux escriptures faictes en papier, si sont aduertissemens, ou interditz, ou autres escriptures en grosse faictes par les aduocats, come declarations de despens faictes pardeuant les iuges royaux, & autres inferieurs, on prend deux solz six deniers tournois pour chascun feuillet de papier, qui sont cinq solz tournois pour feuille. Mais quant aux autres escriptures faictes pour grosse, il y a uingt deniers tournois. Et quand elles sont faictes pour double ou copie, il n'y a que cinq deniers tournois. Et par les ordonnances du Roy Philippes le Bel arti. xxi. lon ne pouuoit prendre que de trois lignes un denier, & de quatre a six deux deniers, & d'illec en auant si plus y

en auoit, un denier de trois lignes. Et debuoit estre la ligne d'un espa de long, & contenir soixāte & dix lettres: ce qui est tresmal gardé apresent: car bien souuēt en une ligne lon ne met pas six lettres, & la remplist on de grās traictz: qui est chose fort exorbitāt de raison, & uray larcin soubz couleur de iustice, & de tāt plus detestable, que lon ne peūt faire qu'on n'ayt affaire de ces escriptures: ausi qu'il y a tant d'autres fraiz a faire en proces, que a peine les plus riches y peuuent suffire: par maniere que le dire de Ciceron en son second liure des offices ne fut oncques plus ueritable, que aujourd'huy, Auoir les proces en hayne tāt qu'il fault, uoire plus qu'il ne fault, & n'est licite, c'est chose non seulement liberale, mais ausi fructueuse & utile. Mais pour reuenir a nostre principale matiere, le iuge en toutes sentences doibt cōdāner celluy qui perd sa cause, enuers celluy qui la gaigne, es despēs, & ne les doibt reseruer en diffinitiuē, quād ores la sentēce est donnee sur quelque incidēt: cōme il est dict par l'ordonnance du Roy Charles VIII. arti. l. Toutesfois cila doibt estre entendu quād celluy q perd sa cause, n'auoit pas iuste cause de plaider: autrement il sensuyeroit grād iniquité, & trop grād destruction de droit commun. Ausi que ladiēte ordōnance ne defēd que reseruer les despens des incidens en diffinitiuē: ce qu'elle fait pour obuier a ce que lon ne face temerairement incidens en une matiere. Et par les ordōnāces dernieres arti. lxxxviij. est dict que en toutes sentences donnees en matiere reale, possessoire, personnele, ciuile, ou criminele, celluy qui perd sa cause, oultre ce qu'il est condanné es despens d'icelle, doibt quant & quant estre condanné es dommages & interestz procedans de l'instance, & de la calumnie ou temerité de celluy qui succumbera en icelles, qui seront par la mesme sentence taxez & moderez a certaine somme

des deniers selon la qualité de parties, & grandeur des matieres: pourueu toutesfois que lesdictz dommages & interestz ayent esté requis & demandez par la partie qui aura obtenu, & desquelz les parties pourront faire remonstration sommaire par le proces. Et en toutes condamnations de dommages & interestz procedans de la qualité & nature de l'instance, les iuges doibuent arbitrer une certaine somme, selon qu'il leur pourra uraysemblablement apparoir par le proces, selon la qualité & grandeur de la cause & des parties, sans ce qu'elles soient plus receues a les bailler par declaration, ne a faire preuue sur iceux: comme il est dict par l'article lxxxix. desdictes ordonnances. Et semble que ledict dernier article est superflu, & qu'il ne contient que autant que le precedent. mais il contient d'aduantage en deux choses. L'une, que le dernier article parle des dommages & interestz procedans de la nature & qualité de l'instance: car il conuient entendre qu' auparauant ladicte ordonnance derniere y auoit aucunes matieres esquelles lon condamnoit celluy qui succumboit, es despens dommages & interestz, desquelles nous parleros cy apres. Et a fin que lon ne fust doubte si l'article precedet debuoit estre entendu desdictz dommages & interestz procedans de la nature & qualité des instances, ledict article suyuant a esté adiousté. L'autre chose qu'il contiēt plus que le premier, c'est qu'il contient que lon ne sera receu a les bailler par declaration, ne en faire preuue. Or les matieres esquelles lon'auoit auparauant lesdictes dernieres ordonnances accoustumé donner condamnation de despens dommages & interestz, estoient matieres de complainctes, esquelles par les ordonnances dudiect Roy Charles VIII. article xlix. il falloit condamner celluy qui succumboit, oultre lesdictz despens dommages & interestz en une amēde arbitraire enuers le Roy.

Et disoient aucuns qu'il ne falloit pas condamner es dommages & interest & generally & simplement, mais les conuenoit limiter, & auoir esté procedé pour raison du trouble: & que au moyen de ce qu'un iuge auoit cōdamné es dommages & interest & simplement, qu'il auoit esté dict par arrest de Parlement de Paris, qu'il auoit esté mal iugé. Toutes fois il me semble qu'il fust de condamner es dommages & interest & simplement: car l'ordonnance dudit Roy Charles est a ce forme, & ne restrainct point ou limite de trouble.

¶ Mal executans sont condamnés es despens dommages & interestz.

semblablement quand il y auoit eu execution reale, & qu'il estoit dict qu'il auoit esté mal executé, celluy qui auoit fait faire l'execution, estoit condamné es despens dommages & interestz de l'execution reale. Et falloit nonneement mettre de l'execution reale: & encores ce est obserué. Aussi en causes criminelles le demandeur ou defendeur qui succum'boit, estoit condamné es despens dommages & interestz selon l'opinion d'aucuns. Toutes fois lon ne condamnoit le plus souuent que le demandeur es despens dommages & interestz, quand il succum'boit: & adionstoit on de la detention personnelle du defendeur. mais quand le defendeur succum'boit, il n'estoit cōdamné que es despens de la cause outre la reparation pecuniaire que lon adingeoit a la partie, & l'amende au Roy: car par la reparation estoient compris les dommages & interestz de l'instance: comme nous dirons cy apres plus amplement.

¶ Commēt se doibuent taxer les despens de ceulx qui apres l'emprisonnement de leurs personnes sont enuoyez absous.

Mais ne faut cy omettre un doute, qui est, si uene ladicte
nouuelle

nouuelle ordonnāce par laquelle le iuge doit arbitrer les interstz a certaine somme, s'il doit arbitrer les interstz procedans a cause de la detentiō de la personne du defendeur en matiere criminele enuoyé absou. Et iasoit qu'il sēble qu'il les debuioit arbitrer sans en faire preuue, neātmoins la Cour ne plusieurs scauans iuges ne les arbitrent point: ains ordonnēt que la partie les baillera par declaration, & en fera preuue: car lesdictz interstz ne sont proprement de la calumnie ou de la qualite ou nature de l'instance, ains de la detētion persōnelle de l'accusē, ioinēt que difficilement on les pourroit biē arbitrer sans preuue de tesmoings. & me semble que ce est le meilleur, & plus seur. Mais i'entendz d'autres dōmages & interstz que de la despense de l'accusē, & de ceulx qu'il pouuoit & debuioit auoir raisonnablement a son seruice du temps qu'il a esté detenu prisonnier ou par la uille, ou en prison close: car ladiēte despense doit estre taxee avecques les despens: car il appert par l'escroue du gcollier, ou par le registre du greffier du temps qu'il a esté detenu: & est certain que ce pendant il n'ha pas uestu de uent: & luy peut lon taxer sa despense selon sa qualite: & ainsi le faiēt lon en la Cour de Parlement a Paris: combien qu'il y ayt aucuns iuges inferieurs, qui font difficultē de ce faire.

¶ Causes esquelles lon ne adiuge point despens.

Il y a certaines causes & matieres esquelles on n'a point accoustumē de adiuger despēs a l'une ne a l'autre des parties: scauoir est en matiere de assureté, quand les deux parties cōparent, & l'une demāde assureté a l'autre: car l'assureté est baillie sans despens. Semblablement si on fait conuenir quelcun en interruption, qui est a ce que la possession d'aucuns immeubles faiēte par le defendeur auparavant, soit interrompue:

pte : & celle que ledict defendeur fera a l'aduenir, ne puiſſe nuire ne preiudicier au demandeur. Et a lon accouſtumé d'uſer de ceſte interruption, quand quelque heritage eſt ſubieét a quelque rente conſtituee a pris d'argent: car par noſtre couſtume de poictou arti. premier du tiltre des preſcript. quand on poſſede un immeuble par dix ans entre preſens. & uingt ans entre abſens, a tiltre particulier habile a transporter ſeigneurie, & a bonne foy, il ſe peut defendre des rentes que lon pourroit pretendre parſus. Mais ce n'ha lieu quant aux debvoirs ſeigneuriaux & ſcodaux: & ſont entēdus les rentes foncières eſtre debvoirs ſeigneuriaux. Et ſont auſſi exceptez les mineurs, gens d'eglīſe, & autres gens priuilegiees: ainſi qu'il eſt contenu par ledict article premier. En oultre quand lon fait adiourner partie pour uoir en iugement faire quelque ſomation contre elle. dont aucuns prennent occaſſion, quand ilz ont faiēt conuenir leurs parties en iugemēt pour reſpondre en general a leurs dem.andes, & ne ſcauent que demander, ilz intentent aucunes deſdictes matieres, a fin de ne payer deſpens de l'aſſignation. voire apres qu'aucuns ont propoſé temeraire action, au iour que le defendeur doit y defendre, pour ſauuer les deſpens, ilz declairent qu'ilz conuertiffent leurs concluſions & demandes en ſomation. mais en ce cas il me ſemble qu'ilz doibuent les deſpens a tout le moins du iour aſſigné au defendeur pour reſpondre: & la conſultation qu'il auroit faiēt pour y defendre: comme auſſi ſeroient deuz ſi l'adiournemet eſtoit libellé, & que au iour le demandeur conuertift ſa demande en ſomatiō. Mais ſi l'adiournement n'eſtoit libellé, & apres la demande propoſee, & delay baillé au defendeur a autre iour enſuiuant pour en uenir, le demandeur, en meſme iugemēt declaireroit qu'il conuertift ſa demande en ſomation, lors ſelon mon
opinion

opinion ne deburoit aucuns despens, tout ainsi que s'il eust faict premierement conuenir en sommation: car le defendeur n'en est plus interessé.

¶ Taxation de despens par qui se faict.

Ne fault passer soubz silence, que les iuges par leurs sentēces reseruent communement a eulx la taxation des despens, esquelz ilz condamnent par leurs sentēces. Mais quād ilz declairent leurs sentēces executoires par dessus l'appel interiecté d'icelles, ilz ordonnent que les despens seront taxez par autres que par eulx: car en ce cas les ordōnances royaux uelent qu'ilz soient taxez par autres que par celluy qui ha donné la sentēce.

¶ Comment on doit proceder a execution de sentēces.

Voyons maintenant apres auoir exposé la forme de dōner sentēces, comment on doit proceder a l'execution d'icelles. Et y a deux manieres de ce faire: l'une, qui gist en cognoissance de cause. L'autre, qui n'y gist point, ains seulement en simple ministere & exploit du sergent. Nous traiterons de la premiere auant que uenir a l'autre, par ce que la premiere ressemble plus a la premiere instance, que la seconde: car en la premiere il y ha pareille procedure qu'en la principale instance, & n'y ha difference sinon que les delays pour la procedure ne sont baillez si longs qu'ilz sont en la principale instance. Aussi quand il y a eu sentēce en matiere d'execution, & que le tout est liquide, on la met a execution par un sergent, comme la sentēce donnée en la principale & premiere instance. Et parce qu'il y ha le plus souvent condamnation de despens, & aucunes fois oultre iceulx y ha adiuudication de domages & interestz, nous parlerōs premierement des despens, puis des domages & interestz, & apres ce de

la liquidation de fruietz, & des autres choses non liquidees par les sentences.

¶ Comment & en quel lieu les despens doibuent estre taxez.

Quant est des despens, il fault faire adiourner la partie cōdamnee en iceulx, a certain & competent iour pour les voir taxer, & avec intimation au cas appartenant: qui est qu'il compare ou non, sera procedé nonobstant son absence a la taxation d'iceulx. Et si la partie adiournee ne compare au iour, le iuge baille default au comparant, & avec tout le profit: & uen icelluy, ordonne que tous les despens serōt taxez. Et fault que le default soit donné au parquet & auditoire, & non en la maison du iuge: & aussi les despens estre taxez en l'auditoire: comme il fut dict par arrest aux grās iours tenuz a Angiers le xi. iour de septembre l'an M.D.XXXIX. Et iasoit qu'aucūns disent qu'il suffit que le dict default soit donné en iugement, & que par apres uue la contumace lon peut faire taxer les despens en la maison du iuge, par ce que le contumax n'y ha plus d'interest, aussi que les Conseillers de la Cour les taxent bien en leurs maisons: routesfois ie seroye d'aduis que les iuges inferieurs & royaux ne peuuent taxer en leur maison: & que lon auroit matiere d'appel: car il est toleré a messeigneurs de la Cour de taxer en leur maison, parce qu'ilz sont deux commis ordinairement a taxer: aussi pour leur treseminente auctorité leur sont loysibles plusieurs choses qui ne sont aux inferieurs. D'aduantage communemēt apres qu'ilz ont faict la taxation, ilz la font communiquer au procureur de partie aduersē, pour y dire ce que bon luy semblera: & quand il en prend cōmunication. c'est autant que s'il estoit present: & le met lon aussi present par l'arrest du calcul des despens, dont on prend l'executoire de despens. Oultre il fault

fault que les despens soient taxez particulièrement sur les pieces, & non en bloc: autrement la partie aduerse ha bonne matiere d'appel. Et pour ceste cause, quand les parties s'accordent de quelque somme de deniers pour les despens, & que suyuant ce, le iuge les taxe a ladicte somme, il ne fault oublier mettre que ce est du consentement des parties.

¶ Voyages taxables es despens, quatre ou cinq.

Lon ha accoustumé es Cours royales taxer communement quatre ou cinq uoyages. l'un, quand c'est pour le demandeur, pour porter ses pieces, & proposer sa matiere: & quand c'est pour le defendeur, pour defendre & contester en cause. l'autre uoyage est pour aller faire l'enqueste. le tiers pour produire les tiltres. le quart pour voir l'enqueste en publication. le cinquiesme pour faire taxer les despens. Mais aucuns de mesme seigneurs de la Cour en baillent d'auantage a leur discretion. Toutesfois ie trouueroye bien equitable, que lon ne baillast que lesdicts cinq uoyages: queque soit, que lon en refrenast le nombre: car plusieurs parties ayans large conscience, uoyans qu'il suffit de affermer par serment les uoyages, en affermeroient autant que lon leur en uouldroit taxer. Est requis que les uoyages & consultations soient affermees par le serment de la partie, ou de procureur ayant mandement special ace: & doit mettre le iuge sur ces articles, habito iuramento de celluy qui affermie.

¶ Quel doit estre le salaire du iuge qui taxe les despens.

Aucuns iuges royaux auoient accoustumé taxer pour leur salaire de la taxation, un solz tournois pour liure de la somme de deniers que se montent les despens: mais ce a esté prohibé par arest de la Cour, & dict que pour le regard du tēps & labeur mis a la taxatiō les iuges seulement taxerōt leurdict salaire:

laire : afin que le iuge pour capter occaſion de ſon proſict, ne taxe les deſpens trop exceſſiuement.

En taxation de uoyages lon ne deduit point ce que lon euſt peu deſpendre en ſa maiſon , combien que de droit commun il doibue eſtre deduit. Mais l'ordonnance ayant a ce regard, ne baille que dix ſolz tournois pour homme & pour cheual.

¶ Ne fault point reiterer taxation de deſpens
vne fois arreſtee.

Et iaſoit auſſi que es queſtions de maiſtre Iehan le cocq, queſtione xxxvi. ſoit dict, que ſ'il a eſté omis quelque choſe a taxer par la taxation des deſpēs, que apres icelle faiete & arreſtee lon pourra demander taxe de ce qui aura eſté omis: on n'en uſe point de preſent : & ne ſeroye pas d'opinion que on le peut faire: car apres qu'elle eſt arreſtee, elle paſſe en force de choſe iugee, comme une autre ſentence: & eſt a imputer a celluy qui ha faiet ladiete omiſſion, attēdu qu'il eſt demandeur. autrement n'y auroit iamais de fin a proces.

¶ Comment ſe doibuent liquider dommages & intereſtz.

Venons apreſent a la liquidation des dommages & intereſtz. Et premierement il fault les bailer par declaration par le demandeur, & puis le defendeur baille diminutions a lencontre de ladiete declaration. puis le demandeur ſa repli que ou reſponſe, & le defendeur ſa duplique ou contre-reſponſe. Ce faiet, le tout eſt mis pardeuers le iuge pour en ordonner. lequel ſ'il voit la matiere diſpoſee, appoincte les parties en preuues: & ſi elle ſe peut uuyder ſans preuue, il la uuyde. Et ſouuētes fois les parties uoyans la matiere eſtre ſubieete a faire preuue, pour obuier aux fraiz de l'interlocutoire, prennent appoinctement a faire preuue. Et regulierement
telles

telles matieres ne sont uuydees sans preuue de tesmoings. Et n'en est le demandeur creu par serment, comme des uoyages & consultations. Vray est qu'apres le proces de dōmages & interestz mis en droit, le iuge ex officio ordonnera que le demandeur sera oy sur certains poinctz & articles du proces, & l'oyra sur l'estimation de ses interestz en bloc & en general, scauoir est a quelle somme il estime tous ses interestz. Mais le iuge par l'appoinctemēt, par lequel il ordonne que le demandeur sera oy sur l'estimatiō d'icelz interestz par serment, doit taxer & declarer la somme de deniers, au dessous laquelle le demandeur iurera & estimera sesdictz interestz. Et s'il l'oyt par serment sans faire ladicte taxatiō & limitation, la partie aduersē aura matiere d'appeller de la sentēce qui sera dōnee apres le sermēt. Et pour celle cause seule fut dict par la Cour de Parlement a Paris, qu'il auoit esté mal iugé par le Preuost de Paris conseruateur des priuileges royaux de l'uniuersité d'icel lieu : que que soit fut mise sa sentence au neant : & en icelle emendant, la Cour ordōna que le serment seroit deferé au demandeur audeffoubz certaine somme de deniers. & estoit question d'une reintegratiō intētée par informations de meubles estimēz a la somme de dix mille liures entre certaines personnes de la Rochelle. Et n'est le defendeur appellé a uoir faire ledict serment, & n'en ha communication.

¶ De taxation de despens d'homme & cheual en voyages, chommage de gaing par emprisonnement, & de perdition de credit par execution reale de biens.

En taxation de dommages & interestz on taxe le salaire de l'homme & du cheual qui ha esté enuoyé pour faire les uoyages taxēz en la declaration de despēs : & pource quand

on fait article dudit salaire en la declaration de despens, le taxateur met sur ledict article, reseruetur in dānis & interesse: car en la taxation de despens on ne taxe que la despense de l'homme & du cheual: & despend lon encores d'aduantage que lesdictz dix solz baillez par l'ordonnance. Aussi quant aux interestz procedans d'emprisonnement ou detention de la personne, y uient ce qu'elle eust peu gagner certainement de son mestier ou uacation, si elle n'eust esté detenue, non pas tout ce qu'elle eust peu gagner de gaing incertain: comme si un marchand disoit qu'il eust faict un uoyage en Flandre, & eust mené des marchandises ou il eust peu gagner grand somme de deniers: car cest interest est trop esloigné & extrinseque. aussi il eust peu aduenir qu'il eust perdu. Mais y uiedroit bien ce qu'il eust peu gagner & ha accoustumé gagner communement de son train de marchandise: cōme pour le regard d'un procureur ou aduocat, il uiet ce qu'il ha accoustumé gagner en sa maison: & ce est arbitraire, tellement qu'on n'en pourroit bailler autre reigle. Mais es dommages & interestz d'execution reale de biens, n'y uient l'interest du bon fame ou credit perdu: parce que c'est trop esloigné, & que on ne peut ce cognoistre perceptiblement & certainemēt: car il peut y auoir autres causes pour lesquelles ledict credit ha esté perdu.

¶ De la liquidation des fruietz: & cōment l'estimation d'iceulx se peut scauoir & prouuer.

Reste a traicter de la liquidation des fruietz. Par les ordonnances dernieres articles xcviij. xcix. c. ci. cij. ciij. ciij. & cv. est dict que celluy qui est condamné a rendre les fruietz, est tenu de les bailler par declaration, & icelle affermer par serment contenir uerité: & oultre des la premiere assignation

signation apporter les comptes de recepte, papiers & baulx a ferme de la chose adiugée : & apres l'affirmation susdictée, sera tenu de rendre les fruietz dedens un moys. Et neantmoins pourra le defendeur faire preuue de la plus grād quantité & ualeur des fruietz : & la partie condamnée au contraire dedens un seul delay peremptoire, qui sera arbitré par le iuge ou executeur de sentence ou arrest. Et ou il se trouuera par lesdictes preuues le defendeur auoir mal & calumnieusement affirmé, & lesdictz fruietz se monter plus qu'il n'auoit affirmé, sera condamné en grosse amende enuers le Roy, & grosse reparation enuers la partie : & semblablement le demandeur qui se trouuera aussi auoir calumnieusement insisté & maintenu les fruietz plus monter qu'ilz n'auoient esté affermez par ledict defendeur. Et a ceste fin en tous sieges royaux & ordinaires generaulx & particuliers se fera rapport par chascune sepmaine de la ualeur & estimation commune de toutes especes de gros fruietz, comme bledz, uins, foins, & autres semblables, par les marchans faisans negotiation desdictes especes de fruietz : qui seront contrainctz a ce faire sans en prendre aucun salaire, par mulctes & amendes, sur priuation de negotiation, emprisonnement de leurs personnes, & autrement a l'arbitration de iustice. Et seront tenez lesdictz marchans d'enuoyer par chascun iour de marché deux ou trois d'entre eulx qui a ce seront par eulx deputez, & sans estre autrement appelez ou adiournez, au greffe de noz dictes iurisdiccions, pour rapporter & enregistrer le pris par le greffier ou son commis : qui sera incontinent tenu faire ledict registre. sans aucunement faire seiourner n'attendre lesdictz deputez, & sans rien en prendre. Et par ledict extraict du registre desdictz greffes, & non autrement, se prouuera doreseuuant la ualeur

Et estimation desdictz fruietz, tant en execution d'arestz
 et sentences, que autres matieres ou il gist appreciation. Et
 si en execution de iugement ou arest est requise cognoissance
 de cause, pour meliorations, reparations, ou autres droictz
 qu'il conuiendroit liquider: le condanné sera tenu uerifier
 et liquider lesdictes reparations, meliorations, ou autres
 droictz, pour lesquels il pretend retention des lieux et cho-
 ses adiugees, dedens certain brief delay seul et peremptoire,
 qui sera arbitré par le iuge selon la qualité de la matiere, et
 distance des lieux. Autrement a faulte de ce faire dedens le
 temps, et icelluy escheu, sans autre declaration ou forclusion
 seront contrainctz les condamnéz eulx desister et departir
 de la iouissance des choses adiugees, en baillant cautio par la
 partie qui aura obtenu, de payer apres liquidation ce qui se-
 roit demandé par le condanné: laquelle liquidation il sera te-
 nu faire dedens un autre brief delay qui luy sera presigé par
 le iuge: et neantmoins sera condanné enuers le Roy en a-
 mende, et en reparation enuers la partie pour la retardation
 de ladicte execution selon les qualitez que dessus: ainsi qu'il
 est mis par l'article xcviij. desdictes ordonnances. Oultre par
 lesdictes ordonnances article xciiij. est dict, qu'en toutes ma-
 tieres reeles, petitoires, et personnelles intentees pour herita-
 ges, et choses immeubles, s'il y a restitution de fruietz, ilz
 seront adiugez non seulement depuis contestation en cause,
 mais aussi puis le temps que le condanné a esté en demeure
 et mauuaise foy auparauant ladicte contestation, selon tou-
 tesfois l'estimation commune, qui se prédera sur l'extraict des
 registres desdictz greffes des iurisdicions royales et ordi-
 naires: comme dict est. Et ce quant aux executions de senten-
 ces qui gisent en cognoissance de cause.

¶ Toutes sentences doibuent estre executees
par le sergent dedens l'an.

Parlons doncques de l'autre maniere d'exécuter sentēces:
laquelle gist en simple office de sergent. Est a entēdre, que toutes
sentences doibuent estre mises a execution dedens l'an
par le sergent: autrement celluy contre lequel on execute, ha
matiere de se y opposer: & si le sergent ne le recoit a oppo-
sition, ou qu'il passe oultre nonobstant ladiēte opposition, &
sans preiudice d'icelle, il en peut appeller. Ou s'il en appelle
de plain, lon pourra faire conuertir son appel en opposition:
comme sera dict cy apres au second liure. mais le remede pour
a ce obuier, est de prendre prouision ou mandement du iuge,
que appellons attache, par lequel le iuge qui ha donnē la sen-
tence, donnera en mandement de la mettre a execution non-
obstant qu'elle soit surannee, avec ceste clause toutesfois de
bailler iour & adiournement en cas d'opposition, pour dire
les causes d'icelle. Et combien qu'on ayt acoustumē mettre
par lesdicts mandemens que lon n'ha peu faire exécuter la
sentence obstans certains empeschemens & affaires, toutes-
fois s'ilz sont nierz, n'est mestier en faire preuue aucune. Et
combien que la condēnation soit baillee du consentement des
parties, ce nonobstant il fault attache pour l'exécuter apres
l'an, & recevoir la partie a opposition: comme il fut dict par
arest es grands iours d'Angiers le quart iour d'Octobre l'an
M. D. XXXIX. car il conuient entendre, que en France non
seulement tous mandemens ou sentences de iuges sont annaux,
scauoir est ilz doibuent estre mis a execution dedens l'an &
iour de l'impetration d'iceulx: mais aussi tous rescript & du
Prince, ou lettres royaux, ainsi que cy dessus au commence-
ment de ce liure nous auons dict des mandemens de debitis
oētroyez tant par le Prince, que par les iuges. Mais quant
esdictes

esdictes lettres royaux non executees dedens l'an & iour, on peut auoir une attache ſoubz le contreſeel de la Chancel-
lerie pour les faire mettre a execution, comme on fait des
attaches qu'on obtient des iuges: & lors leſdictes lettres ont
pareil effect, que ſi dedens l'an & iour elles euſſent eſté mi-
ſes a execution. Et ainſi deuons entendre le droit, qui dit
que les reſcriptz du Prince ne ſont annaux, ains ont force
perpetuelle, ſcauoir eſt ſelon la nature de l'action qu'on in-
tente par iceulx. Et parce que combien qu'une ſentence don-
nee du conſentement du debteur, ne peut apres l'an & iour
eſtre miſe a execution nonobſtant l'oppoſition du debteur,
ains fault deſerer a l'oppoſition, comme il fut dict par ledict
areſt d'Angiers: la couſtume n'eſt pas bonne ne ſeu-
re de paſſer les condempnations des debteurs au greſſe d'une Cour: ains
eſt beaucoup meilleur, les paſſer pardeuant deux notaires
royaux: car on ne peut executer la ſentence ou condemna-
tion donnee par le iuge nonobſtant l'oppoſitiō apres l'an &
iour, ne auſſi au dedens l'an & iour, ſi le condamné en ap-
pelle, ſinon qu'elle ſoit de celles qu'on execute par les ordon-
nances royaux nonobſtans oppoſitions ou appellations. mais
une condamnation receue par leſdictz notaires ſe peut tous
iours iuſques a trente ans executer nonobſtans oppoſitions
ou appellatiōs quelconques, & ſans preiudice d'icelles, quāt
a la garniſon de main de quelque ſomme qu'elle ſoit, ainſi que
cy deſſus au commencement de ce liure nous auons plus am-
plement deduit. D'auantage communement telles condam-
nations expediees au greſſe ne ſont donnees par le iuge: &
eſt certain que le greffier n'a puiſſance de condamner, ains
ſeulement ſert d'un teſmoing avecques le iuge, qui en uault un
autre: au moyen dequoy les appoinctemens pardeuant eulx
expediez ſont foy, comme deuant deux notaires. Mais n'eſt
t iij meſtier

mestier que le iuge signe les appoinctemēs ordinaires en cause, ou autres appoinctemēs qu'il dōne sur le champ: ains seulement les dictōns des matieres qu'il a appoinctē en droit, selon l'ordonnance, ainsi que cy dessus a esté dict. Toutefois on doit entendre, que l'on peut bien apres l'an faire adiourner la partie en execution de sentence pardeuant le iuge sans le mandement susdict: car lors la partie peut alleguer toutes ses exceptions pour l'empeschier.

D'auantage il faut bien regarder ce que contient la sentence: car ou elle contient condemnation du payement de quelque somme de deniers: ou autre quantité, comme bled, uin, & autres choses semblables: ou restitution de chose mobiliere, ou immobiliere: ou condamnation de faire quelque chose. Et si la partie est condānee a payer ou bailler quelque quantité, soit de deniers, ou autre: le sergent a la requeste de celluy qui aura obtenu la sentence, fera commandement au condamné, que incontinent & sans delay il ayt a bailler & payer ladicte quantité: & ce en personne dudit condamné, & presens deux tesmoins, ou par cedula avecques iniunction: comme nous auons dict cy dessus au commencement de ce liure.

¶ Comment on doit proceder a execution & vendition des biens du condamné qui refuse ou delaye a payer: & de salaire du sergent executeur.

Et si le condamné est refusant ou delayant payer: selon la coustume de ce pays de Poictou le sergent doit premierement saisir les meubles dont plus facilement on pourra recouurer deniers: mais par les ordonnances derrieres articles lxxiiij.

Et lxxv. il n'est apreset necessaire faire aucune perquisition de biens meubles pour la ualidité de l'exploict de criees, ou autre saisie, ou mainmise de personne, ou de biens. Et iasoit que ladiete coustume soit reale & de fait, & par ce moyen le Prince par son ordonnance ne soit ueu la uouloir abroger, neantmoins ie pense qu'elle soit tollue par ladiete ordonnance: car elle ne contient sinon ce qui est de droict commun. Et ainsi que le Prince est ueu par son ordonnance tollir le droict commun: aussi est il ueu tollir la coustume disposant ce que le droict commun. Et par la diete coustume article ccclxyiij. & quatre articles ensuyuans doibt le sergent assigner iour au condamné au prochain iour de marché ou de foire du lieu dont il est de chastellainie, s'il y a marché: sinon, au marché le plus proche du lieu ou est faicte ladiete executiō, pour illec a la plus forte assēblee du marché, & au lieu ou lō a accoustumé faire les proclamatiōs de iustice, uoir faire la premiere crie des meubles saiziz, & la seconde, & adiudication desdictz meubles a huyctaine ensuyuant audict lieu. Et doibt faire porter les meubles audictz iour & lieu, & faire scauoir publiquement par cry public, scauoir est par la Crie & huche dudit lieu, qui est office public, en plain marché, que lesdictz meubles de tel sont saiziz pour telle somme, & a uendre au plus offrant & dernier encherisseur: & s'il y a aucun qui les mette a pris, le sergent le doibt faire scauoir publiquemēt, & par ledict cry. Et doibt receuoir les encheres, si elles y uient celluy iour, & es autres iours ensuyuans iusques a la diete huietaine, & iusques a trois heures apres midy. & par ledict cry doibt faire scauoir, que s'il y a aucun qui plus en ueuille bailler, qu'il uienne auant dedens lesdictz huit iours, & il y sera receu. Et ce pēdāt doibt faire scauoir

au debteur ledict prix, & luy declairer qu'il paye: autrement qu'il deliurera lesdictz meubles au dernier encherissent. & audiect iour de huitaine reiterera & fera mesme crie, & receuera les encheres iusques a trois heures apres midy, & non plus. Et si le debteur y uient tout celluy iour, & ueuille payer, il y sera receu, & lesdictz meubles ne cherrôt en executiō. & si lesdictz meubles sont uēdū plus grand pris que ne monte la debte, le demeurant sera rendu au debteur. Toutesfois sur icelluy demeurāt se payera le sergent au despēs du debteur de son salaire de l'execution. & s'il n'y auoit demeurant, le debteur payera le sergent a ses despens. Mais par les ordonnances royaux faictes touchant le petit seel de Mōtpellier, le creditur le doit payer, & apres le repeter du debteur. Aussi nous usōns que le creditur fait taxer les fraiz de l'execution, & puis se fait deliurer par iustice le parsus pour lesdictz fraiz, partie aduersē toutesfois presēte ou appellee. Et par les ordonāces dernieres article clxxxiiij. & clxxxiiij. un sergēt a cheual doit auoir pour chascun iour seize solz parisis. Et par les ordonnances du Roy Loys XII. article clv. les sergēs du petit seel de Montpēllier n'auoiēt que douze solz six deniers tournois quand ilz estoient a cheual, & a pied six solz six deniers tournois. Et par lesdictes mesmes ordonnances article cliij. si un sergent faisoit plusieurs executions en un iour, il ne doit estre payē que pour une iournee: & ce obseruelon en tous autres sergens.

¶ Meubles ou arrierages deuz a prestres ou clerics ne sont executables.

Est a noter que ainsi que lon ne peut prendre par executiō les meubles d'un prestre ou clerc: aussi ne peut lon saisir les arrierages qui sont ia escheuz des rentes a eulx deues, ne le prix, ou autres especes des baux a fermes de leurs dōmaines, lesquelz

lesquelz prix ou autres especes s'ot ia deux & escheuz: mais s'ilz ne sont escheuz ou deux, ilz peuuent bien estre saiziz, car ilz sont comme fruietz pendans, & par ce moyen immeubles. & ainsi en fut dict par arest le ix. iour de Decembre. M. D. XIII.

¶ Si par donation de meubles, se doibuent entendre debtes deues en deniers.

Et ia soit qu'aucuns docteurs tiennent qu'en donation de meubles, ne sont cōprinſes les debtes en deniers deues au donant: toutesfois par arest de la Cour donné le xiiij. de May M. D. XL. les obligations, cedules, & creances deues au donant, furēt adingez au donataire qui auoit don des meubles, & choses censees pour meubles. Mais aucuns disent que les dict arest a esté donné pour raison de la coustume du pays de Poictou, article cxcviiij. par laquelle celluy qui ha tous les meubles du premier mourant, doibt & peut demander toutes debtes touchant meubles, & les arrieraiges des rêtes qui seroient deux au temps du premier mourant. Neantmoins ie ne suis de cest aduis: car ladicte coustume parle seulement entre mari & femme, comme il appert euidentement: & au cas dudict arest estoit question d'un don faict par un a son parent. Et par autre arest de ladicte Cour a esté dict le semblable en une donation de meubles faicte a un estrangier. Fault entendre le mot debtes, des debtes deues & procedans de choses mobiliaries: comme de deniers prestez, de uëdition de grains, uin, & huyle, & de choses semblables. Pareillemēt sont reputees debtes mobiliaries & personnelles les arrieraiges escheuz de rentes foncieres & cens par les coustumes de Poictou en Particle cclxxxviij. & de la Rochelle article lxxv. combien que les rentes foncieres, & cens soient estimez immeubles. Et quant es rentes constituees a prix d'argent, el-
les

les sont censees mobiliaries, si elles ne sont perpetuelles, tellement que quand elles sont admorties, les deniers en viennent a ceulx qui doibuent auoir les meubles : cōbien que ce ayt bien lieu en uendition d'immeubles faicte avecques faculté de les pouuoir rachapter : comme porte la coustume de Poictou en l'article xxxvij. Mais y a grand difficulté, si celluy qui ha les meubles, est tenu de payer les rentes constituees a prix d'argent : comme la femme les rentes constituees par son mari a deniers. Car i'ay ueu bailler plusieurs sentences, par lesquelles les femmes estoient deschargees & absoutes desdictes rentes entierement, combien que par la coustume elles soient tenues d'une moitie des debtes crees constāt leur mariage. Toutefois i'ay oy dire que par arrest donné entre feu Francoys seigneur de la Trimouille Cheualier de l'Ordre & une douairiere de sa maison, la douairiere auoit esté condamnée a payer la moitie de telles rêtes. Ce que ie treuve bien raisonnable : quād les deniers de la creation des rentes sont tournez au profit commun des conioinctz. Aussi il est bien raisonnable que l'action ou debte soit reputée meuble, quand elle est due ou compete pour chose mobiliare.

¶ Le creancier qui premier fait mettre en execution le meuble du debteur, est a preferer aux autres creanciers.

Celluy qui premier a faict prendre par execution aucun meuble de son debteur, doit estre preferé a tous autres creanciers du debteur, iasōit que les autres ayent premiers hypothèques de tous biens sur le debteur : car meuble estāt en tierce main, n'ha point de suyte par hypothèque selon la generale coustume de France : & est ueu le creancier auoir le meuble entre ses mains, quand il l'ha faict saisir. Autre chose est des immeubles : comme nous dirons cy apres. Toutesfois
si un

si un tiers est opposant a ce qu'un meuble ne soit prins par execution pour les causes qu'il entend dire en tēps & lieu, il fault le recevoir a opposition, fust ce en execution d'arest. Et lors si le creancier ueult, il peut faire faire declaration au debteur, que ueu l'opposition, il n'entend point faire proceder au paracheuement de l'execution dudit meuble, & qu'il se depart & desiste de la saisie & prinse dudit meuble pour le regard du principal, mais non quant es despens, lesquels il entend poursuiure. Mais ce doit estre entendu quand le meuble lors de l'executiō estoit en la possession du debteur: car en ce monstrant, le creancier euite les despens, iusques a ce que ledict tiers opposant offre faire serment la chose executee luy appartenir: & puis ladicte offre, le creancier sera condamné entierement es despens, car il n'est tenu faire preuve par tesmoings ou tiltres a ses despens de ce que ladicte chose luy appartient. Et si un tiers se oppose disāt seulement que il est possesseur de la chose, le sergēt le doit recevoir. Mais s'il est prouué en la deduction, que le condamné lors de l'executiō estoit possesseur, l'opposant sera debouté de son oppositiō: car il se debuoit pourvoir par adueu quant aux meubles, ou par complaincte quant aux immeubles. Mais un tiers en execution de sentence n'est receuable a prendre le gariment formel du condamné, & le mettre hors proces: car il est obligé personnellement par la sentence. Mais peut bien assister, & empescher que l'execution ne se face contre le condamné. Toutesfois si le demandeur le requiert: sa sentence sera executee contre le condamné, en baillant par le demandeur caution de le rendre indemne enuers le tiers. Et si les meubles appartiennent a plusieurs personnes par indiuis, le creancier neantmoins peut faire saisir la part du debteur, mais non rendre & adiuger au plus offrant: & s'il y a oppositiō
des

des autres parsonniers, le creancier pendant icelle peut requerrir le iuge qu'il luy ayt a permettre faire uendre & adiuger ladiete part dudict debteur, si mieulx lesdictz parsonniers n'euulent faire partage dedens certain temps, que le iuge arbitrera. Et s'ilz ne ueulent la diuiser, lors selon ladiete permission le creancier fera uendre & adiuger ladiete part: & s'il n'y a aucun qui la ueuille encherir, le creancier la peut encherir iusques a la concurrence de ce qui luy est deu: & luy sera adiuee: come si la femme est condamnée constant son mariage, lon peut saisir la propriété de son dot qu'elle pourroit auoir le mariage solu, ou de son domaine. & ainsi en a esté dict ceste année par arest a Paris. Et si le sergent executeur a declairé seulement au cōdamné, qu'il saisissoit ses meubles, sans faire saisie reale de tous, ains seulement de partie qu'il trouue: ou bien il n'en saisist point réellement, parce qu'il n'en trouue: par apres ala requeste d'autre creditur sont prins les meubles non saisis réellement: le creditur qui a faict la premiere saisie, combien qu'elle soit uerbale seulement, ou reale d'aucuns meubles, se peut opposer a ladiete derniere saisie reale, ou a la uente desdictz meubles prins par la derniere execution. Et a plus forte raison, si les meubles uerbalement saisis seulement en la maison du debteur, ont esté baillez en depost & garde de iustice a quelqu'un des uoifins, qui s'en soit chargé, sans desplacer lesdictz meubles: & que pour cause que les parties sont entré en accord, ou autrement, lesdictz meubles n'ayent esté uenduz: & un autre creditur les faict saisir: le creditur qui premier les a faict saisir, doibt estre preferé, si non qu'il l'eust faict en fraude, & on le peust monstrier.

¶ Comment se doibt porter le sergent a la vendition du meuble prins par execution.

Quand

Quand le sergent uend le meuble prins par execution, il doit le uétre argent comptant: & si le dernier encherisseur delaye de payer, le sergent le pourra contraindre par emprisonnement de sa personne, & semblablement le depositaire de iustice, auquel il aura baillé les meubles saiziz en garde iusques a la derniere crie. Neantmoins est tousiours plus ciuil & urbain, que le sergent poursuiue en iustice pour raison de ce lesdictz derniers encherisseurs & depositaires, a fin qu'ilz ne soient executeurs ou iuges en leurs causes: & lors le iuge ordonnera qu'ilz seront contrainctz par emprisonnement de leurs personnes.

¶ Comment on procede a la saisie des immeubles du debteur quād les meubles ne se trouuent, ou ne sont suffisans.

Et si les meubles uenduz ne suffisent, ou si lon n'en peut trouuer, iasoit que la perquisition de meubles ne soit necessaire par les ordonnances dernieres: le creditur, ou celluy qui a obtenu sentence, fait saisir par le sergent les immeubles du cōdamné, & commettre bons & suffisans commissaires pour en leuer les fruietz iusques a la concurrēce de la somme due. Et cōbien que lon n'ayt accoustumé que de faire scauoir par ledict sergent au debteur que lon ha saisi telz immeubles a luy appartenans: & apres les commissaires qui sont commis au regime des lieux, le font scauoir au debteur par un sergent presens recordz, ou present un notaire & deux tesmoings: neantmoins il est plus seur que le creditur face scauoir au condamné par le sergent la saisie & l'establissement des commissaires: & qu'il luy face defense de non empescher les commissaires en l'exercice de leur commission: car on a ueu certains commissaires auoir esté enuoyez absouz de l'instance de reddition de cōpte en laquelle ilz estoient adiournez pardeuant

deuât messeigneurs les Generaux sur le faict de la iustice des aydes a Paris, parce que le creditur n'auoit faict signifier la saisie ne l'establissement des commissaires au condamné. Et ce est fort equitable, a fin que les commissaires soient deschargez des fraiz de ladiete signification. Nous auons dict cy dessus cōment ilz doibuent bailler a ferme & a l'enchere les fruietz de la chose saisie : parquoy n'est mestier le repeter icy. Et apres que commissaires sont cōmis pour leuer les fruietz des choses saisies iusques a plein payement, & qu'ilz ont commencé a leuer, si en brief la somme de deniers ne peut estre solue, ou que plusieurs crediturs soient opposans aux criees des biens saisis, & aucuns tendent a distraction: ce pendant le creditur peut faire saisir les deniers liquides deuz a son debteur: avecques protestation toutesfois, qu'on il sera payé par une uoye, il entēd se departir de l'autre, & que par toutes lesdictes uoyes il ne tend qu'a un seul payement. Car on peut accumuler plusieurs manieres d'execution tēdans a une mesme fin, scauoir est de payement, & peut on tenir son debteur prisonnier, si ad ce il est obligé : & oultre, durant ladiete prison, faire uēdre ses biens, sans ce qu'il soit expressement dict par l'obligation: ia soit que plusieurs le facent mettre par expres. Toutesfois comme un creditur eust baillé requeste a la Cour, tendant ad ce que ueu que a raison du grand nombre des opposans es biens saisis a sa requeste, il ne pourroit estre de long temps payé de son deu, il pleust a la Cour luy permettre faire saisir une debte liquide due aux heritiers de son condamné: & pour oyr les parties sur ladiete requeste, la Cour eust commis un des Conseillers d'icelle : apres auoir oy les parties, & que le condamné eust soustenu les commissaires auoir leué fruietz suffisans pour la somme, ledict commissaire ordonné par la Cour dict, que le creditur fera rendre compte
aux

aux commissaires des fruietz par eulx leuez : & si le reliqua n'est trouué suffisant pour la somme due, le creditur pourra faire saisir les deniers deuz a son debteur. Depuis le creditur faict conuenir aucuns commissaires de certaines annees: qui tiennent compte, & n'est leur reliqua trouué suffisant pour la debte: & en faict conuenir d'autres pour la gestion d'autres annees: neantmoins auant qu'ilz ayent rendu compte, il presente une autre requeste a la Cour, ad ce que ueue ladicte diligence, les heritiers susdictz du debteur soient contrainctz le payer, & qu'il puisse faire proceder contre eulx par execution. Lesdictz heritiers la debatent, & n'en est encore rien decisi. Mais ie pense que le creditur seroit bien fondé, si ce n'estoit ladicte sentence, a laquelle il a ia acquiescé, dont il est adstrainct de faire rendre compte a tous les commissaires. Toutesfois la Cour qui iuge d'equité, pourra enteriner ladicte requeste, sans auoir regard a ladicte sentence: a fin que le creditur ne soit tant molesté de faire rendre compte a tous les commissaires.

¶ Les commissaires establis au regime de chose immobiliere saisie par execution, comment ilz doibuent exercer leur commission.

Et si le condamné ou un tiers s'oppose ou appelle d'eulx, ilz peuuent passer oultre a l'exercice de leur commission nonobstant oppositions ou appellations quelconques, & sans preiudice d'icelles: car ilz sont simples executeurs, & n'ont aucune cognoissance de cause, ains sont personnes priuees, desquelles on ne peut appeller. & ainsi en fut dict par arrest le xxviij. iour de Septembre M.D.XXXI. es grans iours tenuz a Poitiers.

Et

Et si l'opposant ou appellant les prennent a parties, ilz en feront enuoyez absouz avecques despens. Mais les cōmissaires pour le mieulx doibuent faire signifier a la partie a la requeste de laquelle ilz sont commis, lesdictes oppositions ou appellations, & la sommer par un sergent presens recordz, ou en presence de notaire, de declairer si elle entend qu'ilz passent oultre nonobstans lesdictes oppositions ou appellations, & sans preiudice d'icelles: & luy declairer que ou elle ne leur uouldra faire promptement response, qu'ilz cesseront d'exercer leur commissiō. Et feront semblable sommation de leuer & oster les autres empeschemens qui leur seront baillez en l'exercice de leur commissiō, & pareille declaratiō de cesser pour iceulx empeschemens: & en ce faisant ne pourront estre redarguez de negligēce, s'ilz n'ont leuē. Et s'ilz ne font ladiete sommation & declaration, la partie les pourra contraindre a rēdre compte des fruietz qu'ilz ont deu leuer: ou a payer la somme pour laquelle ilz ont esté commis: sinon que les choses saisies ne fussent bien confrontees ne declairees, en maniere qu'ilz n'auroient peu se immiscer a les leuer: car en ce cas n'en seroiēt tenuz. toutes fois il uauldroit mieulx qu'en ce cas ilz se transportassent pardeuers la partie qui les auroit faict commettre, & la sommassent de leur bailler par declaration au certain lesdictes choses: autrement qu'ilz protestent de n'en tenir & rendre compte.

¶ De l'oppositiō que fait le debteur ou vn tiers contre la saisie de ses biens.

Mais si le debteur ou un tiers se ueult opposer, il fault qu'il se oppose au sergent qui fait la saisie, & qu'il appelle du refus de le receuoir a opposition: ou si la saisie est ia faicte, qu'il appelle la partie pardeuant le iuge qui a donné la sentence de l'exécution de laquelle est question, pour proceder sur l'oppositiō

L'opposition qu'il fait a ladicte saisie, & luy uoir faire deli-
 urance de la chose saisie. Mais parce que ce pendant la sai-
 sie tiendroit, & les commissaires leueroient, lon se porte appel-
 lant de la saisie, & des commissaires, & leur fait on signi-
 fier: & apres on ha incontinct lettres royaux pour muer &
 conuertir les appellatiōs en opposition: & pour faire adiour-
 ner la partie qui a faict saisir, pour proceder sur ladicte op-
 position: car si auparauant lesdictes lettres obtenues & exe-
 cutees l'appellant estoit anticipé, il deburoit les despens de la
 cause d'appel. Et si pendant l'exercice de la commissiō le
 debteur offre aux commissaires realement & de faict mettre
 entre leurs mains la somme pour laquelle ilz ont esté com-
 mis, fault qu'ilz la recoiuent, & qu'ilz declairent qu'ilz ne
 se immisceront plus au faict de leur commissiō: & s'ilz ont
 faict les baulx a ferme des choses saisies, le declaireront a la-
 dicte partie, & luy offeront ceder leurs actions contre les
 derniers encherisseurs. Et ne pourront soubz couleur des
 fraiz par eulx faictz a l'exercice de leur commissiō, plus
 proceder oultre, ne tenir les choses saisies: & s'ilz le font, on
 pourra se pouruoir contre eulx par les uoyes susdictes: mais
 faudra qu'incontinent les commissaires se transportent par-
 deuers la partie qui les a faict commettre, & luy offrir rea-
 lemēt & de faict la somme pour laquelle la saisie est faicte,
 deduiēt les fraiz faictz pour la gestion de ladicte cōmis-
 siō, selon qu'ilz leur auront esté taxez en faisant le bail &
 encheire, & autres fraiz raisonnables, suyuant l'ordonnance
 derniere. & si ladicte partie ne leur ueult deduire lesdictz
 fraiz, ilz auront iuste cause de retention apres ladicte offre
 reale.

¶ Les commissaires establiz au regime d'vne chose
 saisie, sōt tenuz a rendre cōpte par chascune annee.

¶ Quand

Quand le creditur uoit que les commissaires ont assez le-
 ué & receu de deniers, si la somme est grande, les peut appeler
 a cōpte pour chascune annee, icelle toutesfois escheue. &
 fault qu'il appelle aussi le condanné ou debteur pour assister
 & estre present, si bon luy semble, a la reddition & closture
 dudit cōpte. Et ce sera par mandemēt du iuge, ou par lettres
 royaux. & si la commission procede de la Cour, & que lon
 uueille adresser la cognoissance de la reddition du compte a
 un iuge royal, il fault l'adresser au iuge royal du lieu ou est
 situee la chose saisie, ou du domicile des commissaires. si les
 commissaires ne comparēt au iour, on donne contre eulx de
 fault: & par la coustume de ce pays de Poictou, par le moyen
 dudit default ilz sont condamnēz a rendre compte & re-
 liqua dedens certain temps: & icelluy passé, leur fait on si-
 gnifier ce default & appointement, & bailler adiournemēt
 a certain iour avec intimation pour rapporter leur compte
 & reliqua. & si a ce iour ilz se defaillent, encore y aura il
 contre eulx default avec tout le profit, sauf quelque iour: &
 icelluy passé, ueux les deux defaultz & exploitz, sera or-
 donné que lesdictz cōmissaires seront contrainctz par sai-
 sie de leurs biens, & emprisonnement de leurs personnes, &
 autres uoyes deues & raisonnables, a rēdre compte & reli-
 qua: & que le demandeur en reddition de compte sera creu
 par serment de la quantité & ualeur des fruitz leuez, ioin-
 te la preuue de la cōmune fame & renommee. & apres l'en-
 queste de la commune renommee faicte & publiee, & le pro-
 ces mis en droit, le iuge uerra l'enqueste & autres pieces: &
 sans y appeller les commissaires, il oyra le demandeur, & luy
 fera faire le serment s'il pense que les fruitz se soient mon-
 té iusques a telle quātité & ualeur qu'il luy dira: & ce faict
 condānera les commissaires a rēdre compte desdictz fruitz
 iusques

iufques a ladiète quantité & ualeur: ainfi qu'en pareil cas eft dict par la coustume de cediect pays de Poictou article ccxxxij. Ou si le seigneur a default de parens s'est emparé des meubles estans en sa iurisdiction appartenans a un defunct, sans faire aucū inuentaie, l'heritier qui apres demandera lesdictz meubles, sera creu par serment de la quantité & ualeur des meubles, ioincte la preuue de la commune renommee. Aussi selon raison on est creu ainfi par serment de la ualeur & quantité des fruietz qui ont esté leuez par un depredateur: & ueue la contumace des commissaires, ilz sont prins comme depredateurs. Toutesfois la Cour de Parlement ha accoustumé de user d'un remede plus brieu contre ces fuyardz delayans rendre compte: car elle ordonne qu'ilz seront contrainctz de rēdre compte sans ce que aucū fraiz faiēt a l'exercice de leur commissiō, leur soient deduiēt: cōme elle ordonna le xiiij.iour de May M.D.XXXV. Mais le xxi.iour de iuliet M. D.XXXVI. sur une requeste presentee a la Cour par celluy qui en celle maniere auoit esté condanné a rendre cōpte sans deduction de fraiz: par le moyen des raisons qu'il alleguoit pōur lesquelles il n'auoit peu plustost rēdre compte, la Cour le receut a rendre compte avec les fraiz susdictz, & moyennant ce qu'il consigneroit dedens huit iours entre les mains des demandeurs en reddition de compte, la somme pour laquelle il auoit esté ordonné commissaire.

¶ Quel doit estre le compte des commissaires en cest affaire.

Le compte doit contenir premierement les receptes, ou les causes pour lesquelles on nes'en charge point: & puis apres les mises, & le tout par le menu, & non en bloc. Et doibuent les commissaires, ce requerant le demandeur, affermer par
u ij serment

sermēt en leurs personnes, ou par procuration speciale, que cas
 lumnicusement ilz n'ont mis aucune chose par leur compte.
 Et doibuent uerifier Et prouuer par tiltres ou tesmoings le
 contenu de leur compte touchant la mise, fors quand il est
 question de menues mises: car de icelles ilz sont creux par ser
 ment selon raison Et disposition de droict commun, pourueu
 qu'il n'y ayt point tant de menues mises, que toutes accumu
 lees ensemble elles facent une grand somme, parce que en ce
 cas il ne suffiroit les uerifier par sermēt: ou bien s'il n'y auoit
 aucune uerisimilitude qu'ilz eussent faict lesdictes mises. Et
 combien qu'ilz ayent prins a prouuer quelque mise par tes
 moings, Et qu'ilz en soiēt forclos, Et n'ayēt toutesfois faict
 aucune preuue, ilz peuuent requerrir estre creux par sermēt,
 si la mise est telle qu'ilz en doibuent estre creux par sermēt,
 scauoir est de la qualité susdicte: mais ce doit estre en refun
 dant despens des delayx frustratoires prins pour faire ladi
 cte preuue: car si une partie chargee de quelque preuue, se lais
 se forclore de la faire, neantmoins elle peut par apres se rap
 porter au sermēt de partie aduersē sur ledict faict, qu'elle es
 toit chargee monstrer, sinon qu'elle eust cōmencē a faire preu
 ue, Et faict oyr tesmoings: car mesme auant la publicatiō de
 l'enquēste, elle ne pourroit en ce cas se rapporter au sermēt de
 partie aduersē: que que soit, ladicte partie aduersē ne seroit
 tenue l'accepter ne faire, si elle ne uouloit, parce qu'elle pour
 roit estre notee de periurer, ou icelluy periure estre descouuert
 par les depositions des tesmoings ia oyx: qui est un cas de
 droict auquel on n'est tenu de prendre ou accepter le sermēt.
 Et ainsi en a esté decisi par arest on Parlement de Bourdeaux,
 comme recite monsieur Bohier tiers President d'icelluy, en
 ses decisions des arestx dudiēt Parlemēt, qu'il ha recueilly Et
 disputé, en la question xcy.

¶ Comment l'auditeur de compte condamne les commissaires a payer le reliqua.

S'il y a quelque omission de recepte audiect compte, le demandeur, ou celluy qui est adiourné pour y assister, peut l'alleguer, & debatre le compte de defectuosité pour ce regard. Et s'il se trouue quelque reliqua par l'arrest & closture du compte, scauoir est que recepte doibue a mise, (car premierement par la closture que fait le iuge qui oyt le compte, il arreste la recepte, & parapres la mise, & puis met la somme que les commissaires doibuent pour plus auoir receu que mis) il les condamne a icelle payer simplement: qui s'entend chascun des commissaires pro rata: & s'ilz ne sont que deux, chascun pour une moytie: & s'ilz sont d'auantage, chascun pour sa contingente portion pour le nombre des personnes: sinon qu'ilz eussent esté commis chascun d'eulx seul, & pour le tout: car en ce cas ilz seroient aussi condamnéz a payer le reliqua chascun d'eulx seul, & pour le tout.

¶ L'heritier d'un commissaire mourant durât la commission, n'est tenu exercer la mesme commission.

Et si un des commissaires meurt durant la commission, ses heritiers ne sont point tenez exercer le faict de la commission au lieu de luy. Et si par uertu d'un arrest de la Cour le sergent de quelque iuge royal a commis commissaires, neantmoins ledict iuge royal ne autre que la Cour ne les peut descharger, iasoit qu'il y ayt cause, sinon du consentement de la partie qui les auroit faict commettre.

¶ A la vente de biens immeubles du condamné
u ij saiziz

faisiez pour debte, par crie, toutes les solennitez y doibuent estre gardees.

Quand on uoit que de brief on ne peut estre payé par la uoye de saisie des fruietz, on procede a la uente des immeubles du condamné. Et en ce le sergent qui fait les crie, des immeubles, doit prendre garde qu'il observe & accomplisse entierement toutes les solennitez requises par la coustume du pais auquel il fait les crie: car autrement toutes les crie, & ce qui s'en fera ensuyui, sera declairé nul. Or par la coustume de ce pais de Poictou il fault que le sergent declaire la saisie des immeubles qu'il ha saisi, au condamné, & qu'il les mettra en crie, & adiugera au plus offrant & dernier encherisseur, pour les deniers qui en iſtront, estre conuertiz au payement du deu: & luy donnera iour pour en uoir faire la premiere crie au prochain iour de marché de la chastellenie en la iurisdiction de laquelle est situee la chose saisie: & s'il n'y ha marché, baillera iour au plus prochain marché du lieu onquel est ladicte chose assise, s'il n'est plus loing de quatre lieues: auquel cas baillera ledict iour au prochain dimenche de la paroice en laquelle est assise ladicte chose saisie, a l'ysſue de la grand messe. Toutesfois ce doit estre entédu pourueu qu'il y ayt interualle cōpetēt entre le iour de la significatiō de ladicte premiere crie, & le iour auquel elle sera faicte, & que le condamné puisse commodement se transporter au iour & lieu assigné. Et n'y a point par nostredicte coustume aucun iour assigné pour la premiere crie: & pource il doit estre arbitré. Mais la seconde crie doit estre faicte a huietaine ensuyuant de la premiere, la tierce a la quinzaine ensuyuant, & la quarte a quarante iours apres aussi ensuyuant, si le iour de marché y eschoit. & si au-

cum deſdictz iours eſchoit a iour de feſte auquel ne ſoit tenu le marché, le ſergent fera la crie eſſignee a ce iour, au iour du prochain marché ſuſdict. Et ſi les cries ſont faiçtes au iour de dimenche, on les pourſuyuera ſans diſcontinuation: & a chaſcune deſdictes cries qui ſeront faiçtes au lieu ou lon ha accouſtumé faire les proclamations de iuſtice, & a la plus forte aſſemblée du marché, le ſergent declaira a haulte uoix, & confrontera particulièrement les choſes ſaiſies, & pour quelle ſomme elles ſont en cries & uente, & le pris auquel elles auront eſté encheries, & par qui, & que ſ'il y a aucun qui ueuille encherir pardeſſus, ou qui ueuille pretendre aucune hypotheque, debte, debuoir, ou autre droit pardeſſus leſdictes choſes, qu'il uienne auant, & l'ayt a declarer: autrement qu'il en ſera forclos. Et a la premiere crie ſignifiera les iours de la ſeconde, tierce, & quarte: & ſemblablement a chaſcune des autres fera ſcauoir les iours des autres cries reſtâs a eſtre faiçtes. Et fera toutes les ſignifications ſuſdictes a ſon de trompe, & par la uoix & organe de Crie & huche du lieu ou il fait les cries. lequel huche eſt un homme ayant office par auctorité publique pour faire les crix & proclamations de iuſtice, & autres publiques. Et ſ'il y ha quelque encheriſſeur a chaſcune crie, ledict ſergent tantost apres & auant la ſubſequent crie le fera ſcauoir au condamné. Et ſ'il y ha quelque oppoſant ou appellant deſdictes cries, le ſergent le receuera a oppoſition ou appellation partant qu'il le peut faire, & neantmoins procedera a l'exécution & paracheuement des cries: & icelles par-faiçtes baillera iour aux oppoſans pardeuant le iuge dont procede la condamnation, pour dire leurs cauſes d'oppoſition, & au condamné pour uoir interpoſer le decret.

¶ Le debteur peut renoncer aux solennitez des criees.

On a faict doubte, si le debteur pouuoit renoncer aux solennitez de ces criees par obligation ou autre acte a part. Quant au debteur, il est uray qu'il y peut renoncer: mais ce ne nuist point aux autres creditours d'icelluy debteur.

¶ Si celluy a qui appartient la chose mise en crie, en ne s'y opposant perd la seigneurie d'icelle.

Aussi parce que par la coustume de ce pais de Poictou ceulx qui ne se opposent aux criees, sont decheuz de droict, rēte, hypothèque, ou deuoir a eulx deu sur la chose saisie, s'est meue difficulté, si celluy auquel appartient la chose crie, ne se oppose, il en perd la seigneurie. Et semble que non, parce que ce mot droict, doit estre entendu selon les motz ensuy-uans, scauoir est de rente ou hypothèque. Plus par ladicte coustume celluy auquel est deue rēte fonciere sur les choses criees, ne la perd, iasōit qu'il ne se soit opposé a icelles pour ladicte rēte. a plus forte raison le droict de seigneurie ne peut y estre perdu. En oultre les iuges de ce pais de Poictou par un stile anciē ont accoustumé forclore ceulx qui ne se sont opposez, de toutes rentes, hypothèques & deuoirs qu'ilz pourroient pretendre es choses criees: laquelle usance est ueue interpreter assez ladicte coustume escripte. Mais selon droict commun l'autre opiniō est plus sōstenable, scauoir est que lon perd le droict de seigneurie qn'on ha, si lon ne se oppose aux criees, fors quand on est actuel & real possesseur des choses criees: car en ce cas il ne suffit pas faire lesdictes criees, ains fault adiourner particulièrement & nommeement le possesseur pour uoir interposer le decret, ou dire causes pour l'empescher, si bon luy semble. Et a ceste cause par les ordonnances nouvelles article lxxvij. est dict que le sergent pendentes
les

les criees establira commissaires au regime & gouvernement des choses criees des le commencement d'icelles criees, non-obstant quelque coustume locale au contraire. Et par lesdictes ordonnances article lxxxi. est dict que on ne sera receu a desmander distraction de quelque chose crieë, si on a esté six ans auparauant sans intenter action pour raison de ladicte chose: lequel temps sera compté deslors que la prescription aura commencé courir. Toutesfois si celluy qui tēd a la distractiō, peut mōstrer y auoir quelque droit de seigneurie, il sera payé & satisfait de sondict droit sur la somme de deniers a laquelle sera la chose adiugee au dernier encherisseur selon son tour, ordre & prerogatiue, soit par temps ou par hypothèque priuilegiee.

¶ Comment il fault proceder es oppositions qui se font contre lesdictes criees.

Pource que souuentefois uient debat & proces entre les opposans, il conuient declairer icy la maniere de proceder en telles matieres: qui est, que si les opposans defaillent au iour a eulx assigné pour dire leurs causes d'opposition, le demandeur en criees comparent obtient contre eulx default avec tout le profit, ou simple, sauf quelque iour: & icelluy passé, s'il n'est rabatu, le iuge en luy adiugeant le profit dudiect default, enuoyera lediect demādeur absou de l'instāce de leursdictes oppositions: & ordonnera que nonobstant icelles oppositions il sera procedé a l'adiudicatiō des choses saisies, & interposition de decret. mais si les opposans comparent, le debteur adiourné en interposition de decret, pourra demander communication du proces uerbal des criees: & luy doit estre faicte: mais les opposans n'en peuuent auoir communication, parce que tous opposans sont demandeurs. Et doibuent les opposans en fournissant de leurs causes d'oppositiō bailler

¶

Et mettre auant tiltres pour faire apparoir du faict conte-
 nu en leurs causes, Et le demandeur en crieas apres respon-
 dera esdictes causes, Et par ses respōses pourra contredire Et
 impugner les tiltres mis auant par lesdictz opposans : Et
 iceulx opposans bailler leurs repliques, Et par icelles met-
 tre les saluations de leurs pieces: Et doiuent faire lesdictes
 deux choses a un iour, scauoir est bailler leurs causes, Et four-
 nir de leurs tiltres. Et semblablement le demandeur doit
 defendre ou respondre, Et y employer Et mettre ses contre-
 dictz contre les pieces des opposans, sans ce que pour ce fai-
 re lesdictes parties puissent chascune d'elle auoir fors que un
 seul delay pour faire les deux choses susdictes: combien qu'en
 plusieurs sieges on y garde semblable procedure qu'es autres
 matieres: car apres les causes d'opposition, Et responses a
 icelles baillies, ilz ont delay pour produire, Et apres baillēt
 contredictz Et saluations, Et ont delay particulier pour fai-
 re chascune desdictes choses. Et si aucuns des opposans al-
 leguent quelque faict dont il faille preallablement adiuuger
 preuue, ou icelluy autrement estre examinē auant que faire
 droict sur son opposition: en ce cas les autres opposans ne
 sont tenuz de proceder oultre a faire ce qu'ilz estoient tenuz
 faire, iusques a ce que ce soit faict que l'autre opposant doit
 faire: parce qu'il fault que par mesme sentence il soit decisi
 de la priorite ou posteriorite de tous les opposans: car au-
 trement on ne pourroit pas cognoistre l'ordre Et le tour au-
 quel chascun des opposans doit estre mis. Mais si celluy au-
 quel on adiuge faire preuue ou quelque autre chose auant
 les autres opposans se laisse defaillir, par le moyen dequoy
 il en soit forclos, ou autrement il y ayt contre luy conclu-
 sion de ce faire: les autres opposans sont tenuz neant-
 moins d'aller auant en la cause; car ledict opposant par
 sa

sa cōtumace sera debouté de son opposition: & par ce moyen sa cōtumace ne doibt point empescher que sentence de priorité ou posteriorité ne soit donnée. Autrement il s'ensuiueroit qu'il seroit en la puissance d'un opposant qui ne uouldroit comparoir, ou faire ce qu'il est tenu faire, empescher que ladicte sentence ne fust baillee. Mais quand il fait son debuoir, il doibt estre attendu par les autres, afin que par un moyen tous les opposans ayent sentence. Tellement qu'en certaine matiere en laquelle l'heritier du débiteur sur lequel auoient esté criés aucuns lieux & adiugez au plus offrant & dernier enchérisseur, se seroit porté appellant de ladicte adiudication comme nulle, par le moyen qu'elle auoit esté baillee contre luy mineur, & un soy portât son curateur, qui ne l'estoit: & auoit releué son appel en la Cour, & y faict intimer le dernier enchérisseur possesseur desdictz lieux: par arest interlocutoire fut dict, que les opposans esdictes criees seroyent appellex, pour uenir defendre esdictes lettres royales de l'appellant, & a l'appel y mentionné s'il y escheoit, scauoir est si faire se debuoir. Et a ceste cause si un des opposans pour proces retardé est condamné es despens, ilz doibuent estre partiz & diuisez entre le demandeur & tous les autres opposans: & aussi le defendeur adiourné pour uoir interposer decret: sinon que celluy qui aura faict demander audience, ou faict autres fraiz pour auoir lesdictz despens, leuera premierement ses fraiz. Mais en diffinitive ledict defendeur regulierement n'est pas condamné es despens de la cause enuers les opposans, ains seulement enuers le demandeur en criees, ou celluy qui est subrogué en son lieu. Toutesfois si ledict defendeur debitoit le deu de quelque opposant, il seroit raisonnable de le condamner

enuers

euers lediēt opposant qui gaigneroit sa cause , es despens pour le regard d'icelluy opposant. Et pource, attendu que souuent le defendeur ne debat point les oppositiōs, ains en laisse faire aux autres opposans, le defendeur n'est point euers eulx condanné es despens : mais s'il y a quelcun des opposans tendant a fin de distraction , & il maintienne la chose dont il demande distraction, luy appartenir, & en estre possesseur, & le demandeur en crie es le contredise , & insiste au cōtraire: lediēt opposant ne sera point tenu d'informer de son tiltre , mais il pourra former complaincte contre le demandeur en crie es.

¶ Le iuge donnera sentence en ces oppositions selon l'ordre de priorité & posteriorité que mōstrent lesdictz opposans.

Mais si lediēt tiers opposant n'est possesseur , & qu'il ayt esté par six ans auant que intenter son action sur laquelle il fonde sa distraction , a commencer depuis le temps que prescription aura peu couvrir, ne sera retardee l'adiudication par decret . Neantmoins en uerifiant leurs droitz, seront payez de leursdictz droitz sur le pris de l'encheure selon leur ordre de priorité ou posteriorité : ainsi qu'il est decisi par lesdictes ordonnances dernieres article. lxxxij . Et apres que le proces entre lesdictes parties aura esté mis en droit, le iuge baillera la sentēce de priorité ou posteriorité: scauoir est que les choses crie es seront uendues au plus offrant & dernier encheurisseur , a la charge de payer tant a tel, en quoy lediēt defendeur luy est tenu par contract en date de tel iour , signé tel notaire. & ainsi des autres.

¶ De ceulx qui s'opposent en vertu des cedulaes qu'ilz ont.

Et est a noter icy , que s'il y a des opposans qui ayent des cedulaes

cedules, si elles sont recogneues, ilz seront mis en leur tour & ordre, eu regard au temps de ladicte recognoissance faicte par la confession iudiciaire au debteur, ou par preuue de tesmoing selon droit commun. Mais apresent par l'ordonnance derniere article. xciiij. si le debteur nie sa cedula en iugement, & le creancier la prouue, l'hypothèque courra & aura lieu des le iour de la denegatiō, ou contestation. Et ce doit estre entendu non seulement quant au preiudice du debteur qui aura nié, mais aussi au preiudice des autres creanciers: car un debteur pour gratifier a aucuns de ses creditiers avec lesquels il auroit intelligence, denieroit sa cedula a fin de les faire preferer a l'autre. Et si la cedula n'est point recogneue, on debouterá l'opposant de son oppositiō, parce que telle cedula n'a hypothèque. Mais le iuge luy reseruera par sadicte sentence, de se pouruoir pour raison de la somme contenue par ladicte cedula, par les voyes que de raison. Mais si le creditier ayant cedula requeroit estre receu a la faire recognoistre, & produisist sur le champ tesmoins a ceste fin, il y deuroit estre receu: & icelle recogneue, doit ledict creditier estre mis le dernier: combien que sa cedula soit premiere en date que les obligatiōs des autres creditiers: car une escripture priuee ne faict foy au preiudice d'un tiers, quant a la date d'icelle. Car ce seroit en sa puissance de faire preferer telz creditiers qu'il uouldroit. Et tout ainsi que si le debteur de uiue uoix disoit quelque creditier estre premier, il n'en seroit creu au preiudice de ceulx qui ont obligation precedente: aussi sa cedula ne faict foy de sa date: cōme cy dessus ha esté dict. Sēblablement si le creditier auoit preuue prōpte & parée par tesmoins deposans de l'hypothèque de quelque debte, & il requist estre receu a faire ladicte preuue, il y deburoit estre admis: car l'hypothèque est constituée & creee par le seul consentement du debteur,

debteur, & la lettre obligatoire ne sert que pour prouuer le consentement de ladicte constitution d'hypotheques. Et en iugemens pour prouuer quelque faict, regulierement les tesmoings ont pareille force que les instrumens. Pareillement un instrument passé par notaires de Cour d'eglise, comme n'emportât point hypothèque, ne peut seruir pour estre mis en l'ordre de sa date: ains sera mis le creditur qui l'a, le dernier, & comme s'il n'auoit que simple cedula: ainsi que tiēt mondict sieur Bobier en ses decisions du Parlement de Bourdeaux en la question ccxcv. Et iasoit qu'il n'y ayt aucuns opposans, toutesfois si luy sont deues plusieurs sommes par diuers cōtraictz il sera dict par la sentence que les choses crieées seront uēdues a la charge de luy payer telle somme a luy deue par tel cōtraict, plus telle somme a luy deue par tel cōtraict. Il y ha aucuns iuges qui par ceste sentence de priorité ou posteriorité forcloent & deboutent les opposans & tous autres de charges, hypotheques, seruitudes, droictz & debuoirs quelconques qu'ilz pourront prétēdre par dessus les choses crieées, exceptez les droictz & debuoir sonciers & feodaux: & ordonnent que d'abūdant sera faicte une autre & quinte crieée dedens tel temps: & que pendant icelluy, le demandeur en crieées, & autres, si bon leur semble, pourront mettre a pris ou encherir les choses crieées. Et ceste forme de sentence procede selon mon iugement d'une ordonnance ancienne de la Cour de Parlement a Paris faicte le xviij. iour du mois de Februrier l'an mil quatre centz quatre uingtz douze, par laquelle estoit ordōné que nul ne seroit receu a s'opposer apres sentence de priorité ou posteriorité donnée ou consernee par ladicte Cour. ce qui est bien raisonnable: autrement a peine y auroit fin en telles matieres. Toutesfois nous usons en aucunes Cours royales que par la sentence de priorité ou posteriorité

steriorité lon ne forcloist point les opposans ne autres d'autres debtes, ains seulement par le decret, par lequel on adiuge la chose au dernier encherisseur avec les charges declairees par ladicte sentence de priorité: & recoit on tous a s'opposer iusques a ce que le decret soit interposé, & en respondant despes du proces retardé, & moyennant ce que les opposans & autres parties, scauoir est le demandeur & defendeur pourrôt respondre aux causes d'opposition du nouueau opposant a ses despens, s'il uient apres ladicte sentence de priorité. Et ce est moult equitable. Et pendant le proces desdictes crieas, les choses saisies seront regies par commissaires, comme dict est.

¶ Comment se doit obtenir mainleuee.

Et si le defendeur en ueult auoir mainleuee, il fault qu'il consigne la somme due tant audict demandeur, qu'aux opposans: & s'il consigne seulement la somme due au demandeur, neantmoins les opposans pourrôt tousiours poursuiure leurs oppositions, & empescher ladicte mainleuee. Et pour ce faire fault que l'un des opposans obtienne lettres royaux: par lesquelles sera mandé au iuge pardeuant lequel est le proces de crieas pendant, le y subroguer, & le recevoir a faire la poursuite de la matiere des crieas, tout ainsi qu'eust peu faire ledict demandeur en crieas, & selon les derniers arremens & procedures. toutesfois les demandeur & opposans ou l'un d'eulx ne peuuent empescher la mainleuee au defendeur, quand il ha consigné les sommes a eulx deues, & pour lesquelles ilz se sont opposez soubz couleur, & par le moye de ce qu'il n'auoit consigné les fraiz & mises des crieas, & de la procedure qui s'en est ensuiuite: car lesdicts fraiz ne sont encores liquides, & pource ne compete retétion pour raison d'iceulx, non plus que compensation. Iasoit que autrement il soit escript au stile de Parlemēt composé en francois.

mais

mais en icelluy meſme ſtile il eſt dict que par areſt il auroit eſté ordonné que pour raiſon d'iceulx deſpens des criees le demandeur ſe pouruoieroit par action ſimple, & ne peut les auoir par fin de proceder, ſcauoir eſt qu'il n'eſtoit tenu ſurſeoir la pourſuyte de la matiere de criees, & interpoſition de decret, iuſques a ce qu'il fuſt payé deſdictz fraiz. mais par la ſentence de priorité il eſt dict que le demandeur en criees ſera premier payé des fraiz faictz pour les criees, & de ce qui ſ'en eſt enſuiuy: ce qui eſt bien de raiſon: car les oppoſans par le moyen deſdictes criees & proces qui ſ'en eſt enſuiuy, ont conſerué leurs debtes & droitz.

¶ Le pourſuiuant des criees doit incontinent apres icelles faictes les faire certifier: & la maniere de la certification.

Et pource qu'il y ha diuerſité de couſtumes quant a faire criees & ſubſtations, & qu'il fault garder la couſtume du pays auquel elles ſont faictes, & que la Cour de Parlement bien ſouuent interloquoit que les criees ſeroient certifiees par le iuge & practiciens du lieu ou elles eſtoient faictes, qu'elles eſtoient bien & deuement faictes ſelon la couſtume dudit lieu: pour obuier a telles interlocutoires, par les ordonnances dernieres article lxxix. eſt dict que le pourſuiuant des criees auant qu'il ſ'en puiſſe ayder, ne faire aucune pourſuite d'icelles, & ſur peine de nullité deſdictes criees, eſt tenu incontinent apres icelles faictes les faire certifier bien & deuement ſelon les anciēnes ordonnances, & faire attacher la lettre de certification a l'exploict des criees, ſoubz le ſeel du iuge qui l'aura faict. Et la maniere de faire ladicte certification, eſt que ce requerāt l'aduocat ou procureur du pourſuiuant les criees, le iuge a iour ordinaire de Cour ou plaidz fait lire par ſon greffier ou par autre a haulte uoix le proces uerbal deſdictes criees

criees en presence des aduocatx & procureurs du siege: a chascū desquelx apres il demande si lesdictes criees sont bien & solennellemēt faictes selon la coustume du pays: & apres suiuant leur aduis les declare biē ou mal faictes, & en fait faire registre par son greffier. Et en auoit esté faicte presque pareille ordonnance par la Cour de Parlemēt des le xiiij. iour de Ianuier M.D.XXIII. par laquelle la Cour auoit ordonné oultre, que les iuges aduocatx & procureurs seroient tenuz faire telles certificatiōs sans en rien prēdre des parties.

¶ Comment le dernier encherisseur est mis en possession des choses adiugees par criees.

Le iuge apres auoir ueu les pieces, donne sentence: par laquelle il adiuge au plus offrant & dernier encherisseur les choses criees pour la somme de deniers qu'il aura enchery: laquelle il declare, & le condamne a la mettre au greffe, pour par son greffier estre distribuee au demandeur en criees & opposans selon la sentence de prioritē & posterioritē par luy auparauant donnee: de laquelle il declare la date. & ordonne que les fraix & mises des criees, & de ce qui s'en est ensuiuy, seront les premiers prins sur ladicte somme, & payez au demandeur & poursuiuant lesdictes criees, desquelx il se reserue la taxe, & interpose le decret & auctoritē de sa Cour sur ladicte adiudication: & donne en mandement au premier sergent de sa Cour, ou autre sur ce requis, de mettre le dernier encherisseur en possession reale & actuele des choses adiugees, & de faire inhibition & defenses au defendeur & tous autres de non y troubler ne empescher ledict dernier encherisseur. Et par lesdictes ordonnances dernieres article lxxxv. est dict que es arestx ou sentēces de adiudication de decret ne seront doresenauant inserex les exploictx

x de

des criees, ne autres pieces qui parcydeuant auoient accon-
sumé y estre inferees: mais sera seulement fait un recit som-
maire des pieces necessaires, comme il se doibt faire es arrestz
et sentences donnees es autres matieres. Et ne doibt le greff-
fier deliurer ledict decret qu'au dernier encherisseur sans per-
mission du iuge: ne mesmes au dernier encherisseur, que pre-
allablement il n'ait consigné au greffe la somme de deniers a
laquelle il ha encheri, ou bien informé le greffier de quittance
des creditiers, qui soit en forme authentique, de laquelle il
laissera copie audict greffier.

¶ Que l'enchere dure iusques a tant que le de-
cret soit seellé.

Et iusques a ce que le decret soit seellé, il est permis a un
chascun d'encherir: mais apres les criees parfaites il fault
faire l'enchere au greffe: et le greffier suyuant ladiete ordon-
nance ancienne de la Cour, mettera un brief d'icelle enchere
signé de luy contre la porte de l'auditoire du siege; et pren-
dra garde que ledict brief y demeure affiché par huit iours
entiers. Et si il y ha aucune enchere qui ayt esté faite entre
les mains du sergent qui ha fait lesdictes criees, il doibt met-
tre et afficher semblable brief de la derniere enchere contre
ladiete porte de l'auditoire. Et en ladiete Cour de Parlement
ledict brief doibt estre mis contre le premier huys de la grand
chambre du playdoyer, et y doibt demourer par quinze iours
entiers. Et doibt estre declairé par un des huysiers en iuge-
ment la Cour tenant en ladiete grand chambre ledict pris de
la derniere enchere auparauant que faire mettre ledict brief
contre ledict huys: et lesdictz quinze iours passez, ledict
pris doibt estre encores declairé en la maniere susdicte. Et si
apres la premiere declaration dudit pris suruiennent les ua-
cations des uendenges, icelles nonobstans a ladiete quinzai-

ne ſera faiſte ladiſte ſeconde declaration dudict pris en la chambre ordonnee pour le temps des uacations . Et comme deſſus eſt dict , aucuns iuges reſeruent au decret a forclore les oppoſans & tous autres de toutes autres charges, hypotheques, ſeruitudes, droictz & debuoirs quelconques qu'ilz pourroient pretendre pardeſſus les choſes criees. Et ſ'il y ha aucunes rêtes conſtituees a pris d'argent, que nous nommons rentes uolans & generales , pour raiſon deſquelles ayt eſté formee oppoſition, il eſt dict par le decret que leſdictz oppoſans ſeront payez de leur ſort principal, & loyaux couſtz & arrierages. Ce que les autres iuges font par la ſentence de priorité & poſteriorité. Et me ſembleroit mieulx conuenable le mettre par ladiſte ſentence, que par l'adiudication ou decret. Et combiē que par l'ordonnance du Roy Francois faiſte ſur la reformation de certain ſtile du Chastelet de Paris touchant les criees & ſubhaſtations au mois de Nouembre l'an mil cinq cens uingt & ſept , & publiee & enregiſtree en la Cour le uingt & quatrieſme de Mars mil cinq cens trente-neuf, ce eſt limité, pourueu que celluy auquel eſt deue la rête, le demande & requiere : toutesfois les iuges & la Cour de Parlement plus ſouuent le font ſans ce qu'il ſoit requis par les parties. Et par la couſtume de ce pays de Poictou les debnoirs ſeigneuriaux, ſcauoir eſt fonciers & feodaux, ſont exceptez , iasſoit qu'il n'en ſoit nommeement rien dict par la ſentence . Et ſi pour raiſon des arrierages d'iceulx debuoirs fonciers ou feodaux il y ha eu oppoſition, ou non, neantmoins le dernier encheriſſeur ſera contrainct de les payer , ſi celluy auquel ilz ſont deuz le requiert : & ſemblablement les arrierages d'autres rentes non admortiſſables : ainſi qu'il eſt dict par ladiſte ordonnance . Et par leſdictes autres rentes que foncieres dont parle ladiſte ordonnance , l'entendz

les rentes constituées a pris d'argent auparavant trente ans, car elles ne sont plus regulierement admortissables apres le dict temps passé.

¶ Comment les rentes se peuuent admortir.

Toutesfois par edict & ordonnance du Roy Francois faite en septembre M.D.XXXIX. & publiee en la Cour en mesme an le v. iour de Feurier, est permis admortir les rentes deues sur les maisons situees es uilles, citez & fauxbourgs du royaume, en rendant le pris pour lequel elles auront esté acquises, & payant les arrierages a la raison d'un pour quinze iusques au temps de l'admortissement, s'il appert du pris qu'elles ont esté acquises. Mais s'il n'en appert, elles seront admorties en redant pour chascun denier de ladicte rente quinze deniers, soient lesdictes rentes deues a gens layz, ou gens d'eglise. Quelles solennitez y doibuent estre gardees, il est amplement declaré par ladicte ordonnance: laquelle ie ne uueil icy transplâter, ne la modification de la Cour faite sur icelle, parce qu'elles sont imprimees. Et iasoit qu'aucuns doutent que les rentes foncieres deues sur les maisons & places desdictes uilles, citez & fauxbourgz, y soient comprises: neantmoins les termes de ladicte ordonnance sonnent assez qu'elles n'y sont incluses, pource qu'il est dict qu'elles seront admorties pour mesme pris qu'elles ont esté constituées. Mais le doute est plus grand s'il n'appert de la creation ou constitution, & qu'il y ayt plus de trete ans qu'elles ont esté creees & payees, si elles sont presumees estre foncieres, ou generales & constituées a pris d'argent, & par ce moyen subiectes a l'ordonnance. Et me semble qu'elles doibuent estre presumees generales & constituées a pris d'argent: car c'est la moindre & moins onereuse espece de rente, & dont par le moyen de ladicte ordonnance on pourra descharger & liberer lesdictes

ctes maiſons & places. Et quād par la ſentēce de priorité ou poſteriorité y ha eu forcluſion des autres hypotheques & debuoirs, ſauf ceulx par leſquelz y ha eu oppoſition faicte & receue: on adiuge ſeulement par la ſentēce du decret leſdictes choſes criees franches, liberaes & deſchargees de toutes debtes hypotheques & autres debuoirs & droitz, fors ceulx qui ſont contenuz & declairez par ladiſte ſentēce de priorité: & ſaufz auſſi les debuoirs ſeigneuriaux & ſeodaux: comme dict eſt. Et apres ce ſont excluſes toutes perſonnes de debtes debuoirs & droitz qu'ilz y pouuoient pretendre, dont ilz n'auroient formé oppoſition, ſoyent gens d'eglīſe, mineurs, ou autres perſonnes priuilegiees quelconques: ainſi qu'il appert par l'article penultime de la Couſtume de Poictou, qui eſt generale en ce royaume. Mais ſi un mineur de xxv. ans, ou autre perſonne priuilegiee eſtoit enormement deceue par ladiſte uendition, & beaucoup plus d'oultre moytié de iuſte pris, ou qu'il y euſt eſté faict dol ou fraude euidēt: ſi la ſentence de decret eſt donnee par les iuges inferieurs, il en fault appeller: & par le benefice de l'appel la Cour de Parlemēt ha de couſtume de mettre au neant l'appel, & ce dont ha eſté appellé, & ordonner que l'appellant ſera receu a retirer a luy & rauoir la choſe alienee, en payant le ſort principal, & loyaux couſtz, & en reſondant les deſpēs de la cauſe d'appel. Et ſi le decret eſt donné par un iuge duquel on n'appelle ſans moyen a la Cour, ſera pour le miculx que l'appellant dudiſt decret obtienne lettres royales addreſſans au iuge de l'appel, par leſquelles luy ſera mandé, que ſ'il luy appert de ladiſte enorme leſion, & de beaucoup oultre moytié de iuſte pris, ou de dol ou fraude euidēt interuenue en l'adiudicatiō, ou de la nullité d'icelluy, en ce cas il procede au iugemēt de la cauſe d'appel cōme de raiſon, ſans auoir eſgard

ne soy arrestez audiect decret. Et le semblable doit estre gardé quant aux decretz interposez par les iuges sur l'alienation des biens immeubles des mineurs, esquelz n'ont esté gardees les solēnitez du droict ciuil: scauoir est qu'ilz n'ont esté faictz avecques cognoissance de cause. iasoit que aucuns disent qu'il suffit auoir lettres royaux pour casser & rescinder & annuller lediect decret, & cōtraindre les detēteurs des choses alienees a en laisser iouyr le mineur, & luy en rēdre les fruietz. Toutesfois ladiecte uoye d'appel ioinctes lesdictes lettres royaux est la plus seure. Mais si l'adiudicatiō par decret est faicte par la Cour, il fault obtenir lettres royaux en forme de requeste ciuile adressans a la Cour, par lesquelles sera mādē, s'il luy appert comme dessus, casser rescinder & retracter ladiecte adiudication: & nonobstant icelle, receuoir le suppliant a retirer a luy & rauoir les choses adiugees en resumdant le sort principal, & loyaux coustz telz que de raison. & luy seront lesdictes lettres enterinees: mais il payera les despens de l'instance desdictes lettres, si partie aduersē ne les debat par maniere qu'on ne uuyde la matiere sur le champ: car si partie aduersē les debatoit en telle maniere, que pour allegation de quelques faictz la Cour appoinctast la matiere au conseil, il n'y auroit raison que ladiecte partie aduersē ne fust condamnēe es despens depuis le iour que la matiere aueroit esté ainsi appoinctee au conseil. & ainsi en fut dict par arest es grands iours tenuz en l'an M. D. XXXI. a Poictiers au moys d'Octobre. & par icelluy arest le defendeur eut les despens de l'instance des lettres royaux, parce que la matiere fut uuydee sur le champ: & si fut dict que le demādeur & poursuyuant l'enterinement desdictes lettres renderoit le sort principal, & loyaux coustz de ladiecte adiudication dedens certain temps, qui luy fut prefix par la Cour: autrement

trement que a default de ce, l'adiudication sortiroit son plein & entier effect. Et le semblable auoir esté decisi par plusieurs arestz de Bourdeaux escript, mondict sieur Bohier en ses decisions du Parlement dudit lieu en la question cxli. & aussi pour l'Eglise, & pour un marchand d'Angleterre absent & demourât en Angleterre, duquel les immeubles assis on ressort du Parlement de Bourdeaux auroient esté uëduz par crieies & decret. Toutesfois par ledict arest desdictz grands iours le secretaire qui expedia les lettres royaux susdictes, l'aduocat qui les minuta, & le procureur qui les mit au seau, furent chascun d'eulx condamnez en une amende: que lon trouua fort estrange, ueu qu'elles furent enterinees.

¶ Les solennitez de crieies procedans tant par decret ou adiudication, que par lettres obligatoires passees soubz seel royal, sont pareilles.

Est a noter qu'on garde pareilles solennitez tant es crieies qu'en procedures & sentences & adiudication, quand les crieies sont faictes par nertu de lettres obligatoires passees soubz seel royal ou autre seel authentique. Et iasoit que par les arestz composez ou redigez par escript par maistre Ichâ le Coc en la question cxlvi. soit dict, que comme les seigneurs on fief desquelz les choses saisies & crieies par uertu de lettres obligatoires passees soubz seel royal, estoient assises, eussent demandé le renuoy de l'instance de adiudication & interposition de decret desdictes choses crieies estre faict a leur iurisdiction, ledict reuoy ou obeyssance leur fut rendu. Et cōbien que ce soit chose raisonnable, & conforme au droit cōmun: & que tout ainsi que le seigneur ha le renuoy de son homme, aussi qu'il ayt le renuoy touchant la chose de son

x iiii fief

fief: neantmoins ie n'en ay point ueu encores user. Et communement le iuge qui ha baillé le mandement de debitis par uer-
tu duquel on ha faict la saisie & les criees, cognoist des oppo-
sitions qui sur ce interuiennēt, & faict l'adiudication, & in-
terpose le decret. Vray est que par nostre coustume de Poictou
(comme dict est cy dessus, & qui ha lieu en plusieurs pays de
ce royaume) les criees doibuent estre faictes au lieu ou sont
les choses saisies situees. Et quand les biens criez sont en plu-
sieurs prouinces & ressortz, les criees se doibuent faire selon
la coustume de chascun ressort ou lesdictz biens sont assis.
Mais quand par uertu de sentence donnee auecques cognois-
sance de cause, ou pour les despens procedez d'icelle, seroit
faicte la saisie & les criees: ie seroye d'aduis que le iuge qui
auroit donné la sentence, debueroit cognoistre des oppositiōs
faictes es criees, & adiuger & interposer le decret: car ce de-
pend de l'exécution de la sentence, laquelle luy appartient.
Bien la peut il commettre au iuge du lieu ou sont les choses
criees situees: mais a ce n'est adstrainēt, s'il ne ueult: & telz
executeurs & commissaires ainsi commis ont cognoissance de
cause, & peuuent estre refusez: & souuent la Cour de Parle-
ment & des requestes baille telles commissiōs.

¶ Executeurs de sentence irrecusables.

Mais il y ha aucuns executeurs de sentence, qui n'ont co-
gnoissance de cause: & telz ne peuuent estre refusez. comme
si le iuge commet son greffier pour faire quelque apprecia-
tion de grain, ou d'autre espeece, ou pour receuoir caution de
certaine somme de deniers: ou quand il commet un sergent
pour faire commandement, ou faire extraictz en autres
choses: car le sergent ne peut estre refusé. Et combien qu'en
nos Institutions latines nous ayons traicté ceste matiere au
lieu

lieu ou nous parlons des commissaires commis par les sergēs au gouuernement des choses saisies, toutesfois il m'a semblé plus propre & a propos la reseruer a cest endroiēt.

¶ Comment lon doibt adiourner les heritiers de celluy avec qui le proces de crie es est pendant, quand il est decedé, pour reprēdre ou repudier le dict proces: & des defaultz qui s'y commettent.

souuentesfois aduient que pendans ces matieres & proces de crie es, comme estās les plus longs qu'ayons en pratique, aucunes des parties playdans decedent & meurent, & conuient faire adiourner les heritiers en reprints ou repudiation de proces: a ceste cause, & pource que n'auōs point traité encores de ces matieres, il en conuient icy traiter. Si dōcques l'une des parties decede, & que le proces n'ayt encores esté mis en droiēt: il fault que celluy qui ha interest en l'aduancement de ladiēte matiere, cōme en toutes autres matieres, face adiourner les heritiers du defunēt pour uenir reprendre le proces en procedant au lieu du defunēt, ou icelluy proces repudier. Et si les adiournez ne comparent a la premiere assignation, le iuge ordōne qu'ilz seront adiournez sur default, & avec intimation. & s'ilz defaillēt encores au iour assigné, il donne cōtre eulx default avec tout le profiēt, sauf quelque iour: car comme dict est cy dessus, par la nouvelle ordonnance, n'est pas requis que obtenir deux defaultz. Et le iour du sauf passé & escheu, le iuge les declaire contumax: & en adiugeant le profiēt desdictz defaultz, tient le dict proces pour repudié, & les condamne es despens tant d'icelluy proces, que de l'instance de la reprints, telz que de raison, & es amendes des defaultz enuers la Cour: car il fault

fault entendre que pour chascun default il y a amende contre le defaillāt es Cours royales, & autres inferieures: mais non es Cours de Parlemēt. Et en aucuns lieux es Cours royales, comme en ce pays de Poictou, l'amende est de sept solz fix deniers es Cours de la Seneschaucee de Poictou: mais on la modere communement a cinq solz. Et en aucuns pays y a amende tousiours contre celluy qui perd sa cause, comme en ceste seneschaucee de Poictou, ou il y a amēde tant en la cause principale, qu'en la cause d'appel: & aussi grosse contre l'intimé comme contre l'appellant, scauoir est de lx. solz tournois, qu'on modere toutesfois a xl. solz tournois. Et a la Rochelle y a amende seulement en matieres de complaincte, & de commandement faict par uertu de lettres obligatoires cōtre celluy qui perd sa cause, indistinctemēt. Et en matiere d'appel contre l'appellant seulement, & non contre l'intimé, cōme en la Cour de Parlement. Et ce s'il y a contestation en cause quant aux matieres & instances principales & premieres, en ce pays de Poictou seulement: mais à la Rochelle n'est point quant a ce requise aucune contestation de cause. Et quant es matieres d'appel n'y fault pareillemēt en ce pays de Poictou aucune contestation en cause, ne conclusion, comme en proces par escript, qui equipolle a contestation. Et si les parties s'accordent apres la contestation, & qu'il ne soit point dict par accord qui doit payer l'amende, les deux parties sont condammées a la payer par commun, sauf a repeter cōtre celluy qui la doit payer par la nature de l'accord.

Mais quand les heritiers adiournez comparent, ilz peuuent a la premiere assignation demander delay de quarāte iours pour deliberer: & leur sera octroié, sinō que partie aduersē ueuille maintenir qu'ilz se sont porté heritiers: car en ce cas n'ont delay que de huitaine. & ainsi en fut dict par
arest

arest le tiers iour de Mars M.D.XXIX. Et apres ledict delay passé fault qu'ilz reprennent ou repudient. toutes fois auant que reprendre, peuuent demãder estre informez des derniers arremens & procedures de la matiere. & apres qu'ilz auront ueu lesdictes procedures, pourront auoir encores un delay ordinaire de huitaine ou quinzaine pour uoir si les arremens & procedures baillees sont les dernieres, & s'ilz doibuent proceder suyuant icelles. Et pour oster l'occasion de ce delay, fault qu'en leur faisant bailler l'adiournement pour uenir reprendre ou repudier, on leur face bailler l'adiournement pour uenir reprendre & proceder suiuant lesdictz registres, ou repudier: & leur bailler copie desdictz registres. Et s'ilz reprennent, ilz procederont suiuant lesdictz registres iusques a sentence en la maniere susdicte. Et s'ilz repudient, sera contre eulx baillee telle sentence, qu'elle eust esté baillee contre le defunct s'il fut succumbé, & eust perdu se cause. Et semblable forme de reprẽdre ou repudier proces on tient en toutes autres matieres, & aussi quant aux ueufues es payesquelz par la communauté de leur mariage elles sont tenues des debtes de leurs mariz pour la portion que par la coustume du pays elles sont tenues.

**¶ De reprendre ou repudier le proces
d'un beneficié decedé.**

pareillement si un beneficié plaide touchant les droictz estans des appartenances de son benefice, & il decede, s'il est religieux, suffit adiourner le successeur en benefice pour reprẽdre ou repudier le proces. Mais s'il est prestre seculier, il fault faire adiourner ses heritiers pour le reprendre ou repudier pour le regard des fruietz de la chose dont est question, & des despẽs du proces iusques au tẽps du deces dudit beneficié: car il y a coustume en ce pays de Poictou, qui est generale

Par tout ce royaume, que les parens des prestres seculiers & Euesques leur succedent quant aux meubles & acquies: & pource les fruietz ia leuez comme estans ameubliz, & les despens comme estans personnelz, appartiennent a leurs heritiers. Car quant es charges reales, elles suiuent le benefice: & le successeur est tenu du proces intêrê par son precesseur, ou contre ledict precesseur, touchant lesdictes charges reales, pour le regard de la continuation d'icelles charges, & des despens de son temps, uoire fussent les reparations escheues du temps de son precesseur, ainsi qu'a esté dict par arrest du Parlement de Tolose, comme atteste mondict sieur Bohier en ses decisions du Parlement de Bourdeaux en la question cciiij. Mais si le beneficié estoit religieux, l'Abbé qui ha prins les meubles de son religieux, est tenu des despens iugez contre son religieux, touchant les proces des choses dependās du benefice que ledict religieux tenoit dudit Abbé. Semblablement les administrateurs des colleges & cōmunautex sont tenuz de reprendre les proces de leurs precesseurs en ladicte administration, si lesdictz proces concernoient les droictz & choses desdictz colleges & communautex: mais non, si lesdictz proces concernoient le tiltre de leur administration, laquelle ilz auroient contendu contre un tiers. Tout ainsi qu'un successeur en benefice, n'est tenu des despens du proces que auoit son precesseur pour raison du tiltre du benefice.

¶ Les decimes imposees sur les benefices, quelle charge c'est, ou reale, ou personele.

Mais on ha fait doubte, si les decimes lesquelles sont imposees par le Roy par maniere de octroy & subside caritatif sur les benefices, si c'est charge reale, ou personele: scauoir est si on peut saisir le benefice pour raison des decimes deues du temps du precesseur en benefice. Et comme a la requeste de
l'Euesque

L'Euesque de Maillezay commissaire en ceste partie de par le Roy, eust esté faict saisir le temporel d'un pricuré pour la decime due du temps du precesseur prieur commendataire du dict prieuré, & le successeur aussi cōmēdataire dudit prieuré se fust opposé & porté appellant de ladicte saisie, & fut la cause plaidee au grand conseil, ou se doibuent traicter telles causes: l'aduocat de l'Euesque uoyant qu'il perdoit sa cause, parce que ledict successeur estoit frere de son precesseur, uà maintenir que ledict successeur s'estoit porté heritier de son frere, & en auoit prins les meubles: au moyen dequoy ledict conseil ordōna que ledict Euesque feroit preuue dudit faict: & fut donē ledict arest le xiiij. iour d'Aoust M. D. XXXVII. & parce que ledict Euesque depuis ne fait preuue dudit faict, ledict prieur eust arest diffinitif a son profit. Mais quand le proces est mis en droict, ou en la cause d'appel les parties ont cōclu comme en proces par escript, tout ainsi que parcydeuant en la Cour de Parlement a Paris on ne laissoit point pour ce a iuger le proces sans auparavant faire reprēdre ou repudier le proces par les heritiers del'une ou l'autre partie qui estoit par apres ledict proces mis en droict, decedee: aussi par les ordonnances dernieres article xc. est dict que tous iuges pourront proceder a bailler sentēce sans faire adiourner les heritiers en reprise de proces, si auant le deces le proces auoit esté mis en droict: & uauldra la sentence donnee contre celluy qui estoit decedé on temps d'icelle.

CDifference entre vn heritier, & vn successeur en benefice: & des resignans & resignataires, quand mort entreuient.

Et ce ha lieu tant en matiere beneficiale quant au successeur en benefice, qu'en matiere prophane contre l'heritier: combien qu'en

qu'en autres cas y ayt difference entre un heritier, & un successeur en benefice, parce que l'heritier ha cause & droit du defunct, mais non le benefice de son precesseur en benefice: ains du Collateur par lequel il ha esté pourueu: iasoit qu'il fust resignataire. Mais neantmoins le temps de la possession du resignant sert au resignataire, & se conioinct par accession avec le temps de la possession du resignataire, soit pour empescher le sequestre, recreance, maintenue, ou le benefice de la Pragmatique sanction & Concordatz au tiltre De pacificis possessoribus: tellement que combien que par la xxxiiij. reigle de la Chancellerie Apostolique, le resignataire quand la resignation est expediee en Cour de Rome, il doibt faire publier & fulminer ses bulles sur le lieu du benefice dedens six mois, & prendre possession du benefice: & si la resignation a esté admise es parties ou pays ou est le benefice, dedens un mois doibt ladicte fulmination & execution des bulles estre faicte: autrement si le resignant meurt en possession du benefice, il est censé uaqner par mort, & non par resignation: toutesfois aucuns entendent ladicte reigle n'auoir lieu sinon qu'apres le deces du resignant le resignataire eust esté en demeure par six mois, ou par un mois de faire executer ses bulles ou prouision: & que tant que uit le resignant, le resignataire n'est point adstrainct dudit temps. Et fault entendre que ladicte reigle de Chancellerie est receue en ce royaume avecques celle de uerisimili notitia, & autres, mais non pas toutes. Mais si le resignataire ou successeur se ueult faire subroguer au lieu du defunct ou resignant, faire le peut apres le proces en droit, ou la conclusion faicte comme en procès par escript. Et s'il est receu a faire production nouvelle dedens quelque temps, & il ne la face, il l'en fault faire forclore, comme s'il auoit tousiours esté partie en la cause. Et parce que

un resignataire d'un benefice auoit esté ainsi subrogué en la Cour en un proces touchant le tiltre du benefice, & receu a faire production nouvelle dedens certain temps, & ne l'auoit fait, & y auoit ia cinq ou six ans passez apres ledict delay: il fut donné arest contre luy. mais au moyen de ce qu'il se opposa en l'exécution dudiect arest, & remonstra qu'il n'y auoit eu forclusion de produire, iasoit que l'executeur dudiect arest l'eust debouté de son opposition, il en appella, & gagna sa cau se par arest. Et fut le premier arest cassé, combien que l'intimé remonstrast que ledict tēps de cinq ou six ans escheuz apres ledict delay de produire, deuoit equipoller a forclusion.

¶ **Forme de proceder par execution sur les debtes deues au debteur ou condamné.**

Reste a declarer la forme de proceder par execution sur les debtes deues au debteur, ou condamné. Et combien que selon droit commun on ne peut commencer par ceste uoye l'exécution d'un iugé, ains estoit seulement loysible d'en user apres auoir prins par execution les biens meubles & immeubles du debteur, & iceulx auoir uendu: toutesfois auiours d'huy on peut par nostre usance commencer l'exécution par ceste uoye, mesmement que par l'ordonnance derniere cy dessus alleguee on n'est point tenu faire perquisition de meubles auant que faire saisir les immeubles. Or pour uenir a la pratique de ceste espece d'exécution, il fault premierement faire commandement au condamné de payer: & s'il est refusant ou delayant, fault que le sergent luy declare qu'il satisfait telle somme de deniers, ou quantité de bled, ou d'autre espece a luy deue par tel, iusques a la concurrence de la somme contenue par la condamnation, si plus la dette se monte.

Et incontinent apres que ledict sergent ou autre se transporte pardeuers celluy qui doit la debte, & luy declare comment par uertu de telle condamnation a default de payement de tant, il ha prins & saisi en la main du Roy a la requeste de tel la somme de tant, laquelle il doit au condanné, & que de faict il la saisist encores & l'arreste entre ses mains, & luy fait inhibitiō & defense de non en uuyder ses mains, ne la bailler au condanné, a la peine d'en respōdre comme de deniers de iustice, & luy baille assignation pardeuant le iuge qui ha donné la condamnation, pour en uenir faire deliurāce a celluy qui a faict faire la saisie: & par apres adiourne aussi a mesme iour le condanné pour uoir faire deliurance de ladiete somme saisie a l'autre. Et si le debteur se default, il sera contumacé ainsi que dessus a esté dict au commencement de ce liure. Mais si le condanné se default, on baillera cōtre luy default avec tout le profit: & ueu icelluy on le declarera cōtūmax, & qu'il ne fait plus a receuoir a empescher que deliurance de la somme saisie ne soit faicte au demandeur & poursuyuant l'exécution: & en ce faisant condamne le debteur a deliurer ladiete somme, & le cōtūmax es despens du default, & de ce qui s'en est ensuiuy, & sans despens quant au debteur, s'il ha consentu des la premiere assignation faire deliurance de la somme a qui il sera ordōné par iustice, comme il doit faire. Et si tous comparent, il sera procedé comme en autres matieres ciuiles: sinon que les delayx serōt plus briefx qu'en matiere ordinaire, parce qu'il est question d'exécution de sentence. Et iasoit que le poursuyuant l'exécution ne sache au certain la somme deue, neantmoins s'il scayt qu'elle soit deue, la pourra faire saisir en la maniere susdicte, & fera bailler adiournement au debteur pour uenir declarer la debte qu'il doit au condanné, & la declaration faicte

faicte, la deliurer au demandeur. Et si quelcun estoit condamné en certains despēs enuers l'autre condamné, iasoit qu'ilz ne fussent taxez, neantmoins le demandeur en execution les pourroit bien faire arrester & saisir iusques a la concurrence de sa debte, & attendre a en poursuiure deliurance iusques a ce qu'ilz fussent taxez. & si son condamné ne les uoloit faire taxer, le demandeur pourroit le contraindre de luy ceder son droit de dictz despēs pour iceulx faire taxer, & le parsus qui resteroit apres la somme a luy deue payee, & les fraiz par luy faictz pour la taxation, estre rendu au condamné. Mais il uauldroit mieulx auparauant que le poursuiure pour ladicte cession, qu'on luy fist presire terme par le iuge dedens lequel il feroit taxer lesdictz despēs: & s'il ne les faisoit taxer dedens ledict terme, lors le poursuiure pour faire ladicte cession: car on peut mesme faire saisir les gages ou pēsions d'un officier ou iuge a default de payement de la somme par luy deue, & les fruietz du temporel d'un benefice: mais non du spirituel, comme dixmes prediales, ou mixtes, & les oblations qu'on fait en l'eglise du benefice.

¶ De vendre l'office du debteur condamné qui n'est soluable en autres biens.

Voire si les gages d'un office qui se peut uēdre, comme d'un office d'huissier en la Cour, ne peuuent suffire au payement; le demandeur & poursuiuant l'execution peut poursuiure le condamné pardeuant iuge competent qu'il ayt a resigner ledict office au profit du dernier encherisseur, & luy bailler procuration pour ce faire, pour icelluy estre uēdu au plus offrant & dernier encherisseur, pour des deniers qui en ystrōt; en estre satisfait audict demandeur: & sera le condamné contrainct a ce faire & souffrir. Et combien que ce ne puisse aduenir souuēt, neātmoins parce qu'il est aduenu, & ainsi en

a esté dict par arest du Parlement de Rouen, ie l'ay bien uoulu icy inserer pour seruir en cas semblable. Et si un office uenal, scauoir est qui ne soit de iudicature, est saisi pour quelque debte, le debteur ne peut resigner ledict office au preiudice de son creditier, mesmement si celluy au profit duquel on a resigné estoit plainement certioré d'icelle saisie, qui seroit, si ladicte saisie luy auoit esté signifiée par un sergent presens records. Voire comme tel cas fut aduenue, celluy qui ainsi auroit esté pourueu de l'office, auroit esté debouté de l'opposition par luy faicte a ladicte saisie, & ordonné que ladicte saisie tiendroit. D'auantage, comme aucun eust promis par instrument authentique resigner en faueur d'un autre un tel office uenal, & eust baillé procuration a resigner entre les mains de mon seigneur le Chancelier, dont un tiers aduerti trouue moyen de practiquer celluy qui auoit baillé ladicte procuratiō pour resigner, & de s'en faire bailler une autre, & par uertu d'icelle se faict pourueoir dudit office, auant que celluy qui auoit la premiere procuration l'eust faict admettre: fut dict par arest, que le pourueu dudit office par uertu de la seconde procuration, seroit tenu & contrainct par emprisonnement de sa personne resigner ledict office a celluy qui auoit la premiere procuration. Mais si celluy qui ha promesse de resignation & expedition de la prouision d'un office a quelque peine pecuniaire dedens certain temps, & obligation speciale de l'office ad ce faire: & neantmoins est frustré de ladicte promesse, & l'office baillé & expédié a un tiers ignorant ladicte promesse: y a grand doute, si de plain pour ladicte peine commise, il peut faire saisir ledict office: ueu qu'on temps de la saisie il n'est plus en la possession du debteur. Et sembleroit qu'il ne le peust faire, non plus que saisir une maison spécialement hypotheeue pour une debte, apres

pres que la maison n'est plus en la possession du debteur. Car combien que speciale hypothèque empesche l'alienation de la chose hypothecuee, autre chose est de la generale hypothèque : laquelle selon nostre usance n'empesche l'alienation. Toutesfois l'empeschement d'alienation ne faict pas que de plain bond on se puisse adresser au tiers possesseur sans discussion preallable du debteur : ains seulement, qu'on puisse demander par action reuocatoire la cassation & resolution de l'alienation: ou bien apres discussion du debteur, s'adresser par action hypothecaire contre le possesseur de la chose spécialement hypothecuee.

¶ Tous condamnez de debtes, peuuent estre contrainctz a faire cession des droictz & actions qui leur competent, a ceulx enuers lesquels ilz sont condamnez.

Et en general tous condamnez peuuent estre contrainctz faire cession de leurs droictz & actions contre leurs debteurs, a ceulx esquelz ilz sont condamnez. Apres telles saisies & arrest le condamné ne peut pas agir ne proceder par execution contre ses debteurs.

¶ Quand les saisies & arrestz ne sont faictz par auctorité de iustice, comment procedera le creditur.

Mais si les saisies & arrestz ne sont faictz par auctorité de iustice, le creditur peut nonobstant l'empeschement d'un tiers faire proceder par execution pour raison de sa debte sur son
y y condamné,

condamné, sinon que le tiers se opposast a l'exécution qu'on feroit sur le condamné, & que ledict tiers pretendist la somme dont il y a condamnation, luy appartenir: car en ce cas fault recevoir le tiers a opposition, combié ores que lesdictes saisies ou empeschemens ayent esté faictz sans auctorité de iustice: cōme si un tiers declare au debteur d'un autre qu'il se oppose a ce qu'il n'ayt a payer a celluy a qui il doit, & face seulement signifier l'opposition par un sergent: auquel cas l'entens la saisie n'estre faicte de la somme due solennellemēt, ne par auctorité de iustice: neantmoins le meilleur est de ne proceder par execution pour raison de ladicte debte: mais il fault que celluy auquel est due ladicte debte, face adiourner le debteur pour luy payer ladicte debte: & en cas de debat en uenir garnir sa main par uertu du iugé, ou lettres obligatoires, offrant bailler caution d'icelle somme rendre s'il est dict en fin de cause que faire se doibue. Et aussi a mesme iour faire adiourner l'opposant pour faire uoir lesdictz payement & garnison de main, & les consentir ou dissentir, si bon luy semble: & apres la demande proposée, si l'opposant ne informe promptement & par escript authentique de causes ualables pour l'empescher, le iuge les appoinctera a escrire & produire au principal: & par maniere de prouision condamnera le debteur a garnir la main du demandeur en baillant ladicte caution. Et bien souuent le iuge sur ladicte garnison appoincte la matiere en droit: ou il n'y ha grand propos: car il fault la uuyder sommairement sur le champ, sinon ou elle excéderoit uingt cinq liures tournois: car pour faire la sentence executoire nonobstant l'appel, il uauldroit mieulx en faire proces par escript, & appeller six Conseillers, suyuant l'ordonnance derniere dont nous parlerons cy apres plus amplement.

¶ Autre

¶ Autre remede pour se faire payer.

il y ha un autre remede pour empescher telles saisies & arrestz, & cōtraindre ce pēdant son debteur a payer: scauoir est qu'il fault se porter appellant de l'arrest ou saisie: car par ce moyen elle sera suspendue, & pourra lon executer pēdant l'appel. Mais ce remede est dangereux pour deux moyens: l'un, que l'appel n'est receuable, s'il n'est conuertý en opposition: & y a dangier que entre les deux la partie anticipe en l'appel: car en ce cas il faudroit payer les despēs de la cause d'appel. L'autre moyen est, que aussi bien attente l'appellant, que l'intimé: & pour ce l'appellant attenteroit en faisant executer par dessus la saisie de laquelle il seroit appellāt. Parquoy le premier remede est meilleur, iasōit qu'il soit plus lōg: & d'icelluy peut on user quand ores les saisies des deniers sont faictes par auctorité de iustice, comme quand il n'y ha que simple opposition.

¶ De la maniere d'executer les sentences par lesquelles lon est condamné a bailler bled, vin, huyle, &c.

Nous auons exposé iusques icy des executiōs des sentēces par lesquelles on est cōdāné bailler deniers: il fault a present parler de la maniere d'executer les sentēces par lesquelles on est cōdāné a bailler bled, uin, huyle, & autres semblables especes: car c'est le second membre de nostre diuisiō cy dessus declairee. Pour executer dōcques telles sentēces, il fault par uertu d'icelles faire faire cōmandement par un sergent au cōdāné de bailler a celluy qui ha obtenu a son profit, l'espece de bled ou autre mētionnee par la sentence. & s'il est refusant ou delayant, suiuant l'ordonnance derniere dont cy dessus auōs parlé au cōmencemēt de ce liure, on peut faire saisir les meubles & immeubles du condamné, & en garnir la main de iu-

y iij sice

stice iusques a la cōcurrēce de ce que uraysiblement peut
 ualoir ladiēte espee, auāt que proceder a l'appréciation d'is
 celle: & apres ladiēte saisie, & auāt que uēdre les choses sai
 sies, il conuiēt que le condāné soit adiourné pardeuāt le iuge
 qui ha donné la sentence, pour uoir apprecier ledict grain ou
 espee, & avec intimation au cas appartenāt. Et parce que
 ou il est besoing faire telle appréciation, cōmunement le iuge
 cōmet par sa sentēce cōmissaire le greffier de sa cour pour fai
 re ladiēte liquidation & appréciation: en ce cas il fault ad
 iourner pardeuāt ledict cōmissaire. Et si ledict cōdāné default
 au iour assigné, le iuge ou cōmissaire donne cōtre luy default
 auēc tout le profit, ueux les exploict: & ordonne que nō
 obstant icelluy il procedera a ladiēte liquidation. Et ce faict,
 le demādeur en execution de ladiēte sentence produira tes
 moings pardeuāt le iuge ou cōmissaire: lesquelz receux, &
 faictz iurer de dire uerité, serōt examinez de la somme de de
 niers que a ualu ladiēte espee en trois temps & saisons de
 l'année en laquelle elle deuoit estre payee, esquelles saisons
 on ha accoustumé uēdre telle espee plus cōmunemēt. Et peu
 uēt tous les tesmoings estre examinez ensemble a une fois:
 & s'ilz deposent de plusieurs & diuers pris, le cōmissaire ap
 preciera ladiēte espee au moyen pris des trois dont ilz au
 rōt deposé. Mais apresent n'est mestier de faire oyr tesmoings
 sur ladiēte appréciation, si on est condāné de rendre telles es
 peces du tēps qui est ensuiuy puis lesdictes ordonnances der
 nieres: car comme nous auons dict cy dessus, ou nous auons
 parlé en general de la liquidation des fruiēt, on doit faire
 ladiēte appréciation par extraict du registre du greffier de
 la Cour royale du lieu ou ladiēte espee estoit deue, par lequel
 extraict est cōtenu le rapport de la ualeur de ladiēte espee
 en l'ānce dont est question: & ne peut on faire oyr sur ce tes
 moings, parce que ce est introduict pour releuer les parties de

fraix: sinon que le greffier qui est tenu d'en faire registre, n'e
 eust fait registre: car on pourroit faire oyr tesmoings: qui est
 l'une des causes pour lesquelles i'ay mis icy la maniere de fai
 re ladicte appreciation dont auāt ladicte ordōnāce auīōs ac
 coustumé user: aussi parce qu'il aduiēt souuent qu'on est con
 dāné bailler telles especes lesquelles estoīēt deues auāt l'ordō
 nance susdicte: & auecques ce pour monstrier la grād utili
 té laquelle nous uient desdictes ordonnāces dernieres. sēbla
 ble forme gardera lō, si le condāné cōparoīt au iour a luy as
 signé a uoir faire ladicte appreciation: & pourront le demā
 deur & le cōdamné assister & estre presens a la deposition
 des tesmoings qui seront oyx sur ladicte appreciation. Est be
 soing scauoir, que si le defendeur est tenu de sōn fait bailler
 ladicte espee, cōme par obligatiō par luy faicte: en ce cas on
 le peut cōdāner a bailler ladicte espee a l'estimatiō qu'elle a
 plus ualu. Mais si le defendeur n'est tenu de contract faict a
 uecques luy, ains du faict d'autrui, comme s'il tiēt quelques
 lieux subiectx a certains grains de rente, laquelle n'ha esté
 creee auecques luy: en ce cas on le condāne a payer lesdictx
 grains a l'estimation qu'ilx ont ualu communement en l'an
 nee de laquelle ilx sont deuz. Et ce doit estre entendu du
 pris qu'ilx ont esté uendux par la plus grand partie de ladi
 cte annee. Et ainsi en fut dict par arest le xvi. iour de Feb
 urier l'an M.D.XXX. Et combien que au cas dudiēt arest le
 condāné fust obligē de sōn fait payer quelques grains de
 rente qu'il auoit uendu & constitué sur ses biens, & pour
 ce eust esté cōdāné par le iuge a quo, payer lesdictx grains
 a l'estimation que plus ilx auoient ualu: neantmoins la
 Cour ayant regard a la grand cherté desdictx grains en l'an
 nee, & au pays ou ilx estoient deuz, amēde la sentence pour
 ce regard: & ordonne que lesdictx grains seront payez a

Premier liure des

l'estimation commune. Plus conuient noter, qu'au Chastelet a Paris quand on y condamne a payer les arrierages d'une rente fonciere & a continuer, on ordonne par mesme sentence que les lieux sur lesquels elle est due, seront criez subhastez & uenduz au plus offrant & dernier encherisseur. ce qui est fort raisonnable: & pour ce me semble que les autres iuges le pourroient ainsi faire. Neantmoins i'entenderoye, que auant que faire crier & uendre les lieux, il faudroit faire cōmandement de payer les arrierages. Et iusloict qu'on puisse subhaster les lieux: toutes fois n'est ostee a celluy qui a obtenu ladicte sentence, la puissance & faculté de faire saisir les meubles de son condamné pour les arrierages escheuz au temps de la sentence: attendu mesmement que par nostre coustume arrierages de rente, voire fonciere, sont debtes personnelles. Et apres la liquidation ou appreciation faicte, on procede au parsus de l'exécution comme si on estoit condamné a bailler deniers par la premiere sentence. Conuient entendre, que quand est question de l'auualuation, ou estimation du reuenu annuel d'une piece, on prend les baulx a ferme de la piece: ou s'il n'y a baulx a ferme, le reuenu annuel des dix annees dernieres: & en faict on une somme, laquelle on partist & diuisé en dix parties, & estime lon le reuenu annuel autant que se monte l'une des dix parties.

¶ Des condamnez qui empeschent l'exécution, ou se cachent.

Il conuient cy traicter du remede contre les condānez qui pour empeschier l'exécution des condamnations en deniers, latitent leurs meubles: & tiennent les portes de leurs maisons closes. Et iusloict qu'aucuns tiennent que le sergent executeur apres le cōmandement faict de payer, & de ouuir les
portes,

portes, & inquisition faicte auecques les uoifins du cōdamné, s'il n'est pas en sa maison, ou tient ses portes fermées, le sergent peut faire ouuerture des portes, & leuer les serrures des coffres en presence de deux recordz gens de biē, sans permission du iuge, en faisant par luy loyal inuentaire des meubles qu'il trouuera: & telles ouuertes de portes & coffres ont esté declairees bonnes & ualables par arest de la Cour: toutesfois nous usons que le poursuyuant l'execution, remonstre au iuge commēt le condanné tient ses portes fermées, & qu'on ne peut faire executiō sur ses meubles, ou qu'il les latite. & en fera apparoir sommairement par ladiēte inquisition & rapport du sergent, & requerra permission de proceder par ouuerture de portes & coffres: sur quoy le iuge ordonnera que ledict condanné sera adiourné pour y dire ce que bon luy semblera, & auec intimation: & compare ou nō au iour sera donnee ladiēte permission.

**Comment lon procede contre ceulx qui
n'ont point de quoy payer.**

Mais si ledict condanné est si poure qu'il n'ayt aucuns biēs meubles, où les latite si occultement, qu'on ne les peut trouuer: en ce cas le iuge, ce requerant le poursuiuant l'execution, ueu le rapport de ladiēte inquisition sur ce faicte par le sergent, ordonnera que commandement sera faict au condanné d'exhiber ou mettre en euidēce au sergent ses meubles, ou qu'il declairera ses immeubles au greffe dedēs quelque tēps qu'il arbitrera: & a default de ce, ledict tēps passé permettra de se pouruoir contre le condanné par censures ecclesiastiques. toutesfois j'ay ueu plusieurs permissions telles estre donnees par la Cour en uoyant seulement ladiēte inquisition & rapport du sergent, sans y appeller la partie. Et s'il ne tiēt cōpte desdictes censures, & ne satisface au iuge, le poursuyuant de

de l'exécution remonstrera le tout au iuge, & l'en informera par le monitoire du iuge ecclesiastique du condamné, & execution d'icelluy. & requerra que le condamné soit contrainct satisfaire par emprisonnement & detention de sa personne. sur quoy sera ordonné que ledict condamné sera adiourné, & avec intimation: & compare ou non, ueu ladiete inquisition & rapport, sera ordonné qu'il sera contrainct a payer par emprisonnement & detention de sa personne: & sera constitué prisonnier, dõt il ne sortira iusques a ce qu'il ayt payé, ou faiet cession de biens. Mais si sans obseruer ladiete forme on procedoit par lesdictes césures, parcydeuãt on souloit user de deux remedes: l'un, que le cõdamné censuré se portoit appellant de l'oëtroi & publication de telles censures comme d'abus en la Cour de Parlemēt formellement. l'autre, que sans appeller il requeroit pardeuant iuge competent cassation de ladiete censure: & que ladiete cassation fust publiee au lieu ou ladiete censure auoit esté publiee. Et par l'un ou l'autre desdictz remedes le censuré obtenoit cassation de ladiete censure en ladiete publication d'icelle cassation, & condemnation de despēs dõmages & interestz contre celluy qui l'auoit impetré & faiet publier. Mais par arest des grans iours tenuz a Tours l'an M.D. XXXIII. fut defendue aux iuges royaux la cognoissance des abus des censures & querimonies; ou excommunications. Toutesfois l'appellant de la sentence d'un iuge royal qui auoit entrepris cognoissance de l'abus d'une querimonie, auroit esté par ledict arest cõdamné enuers l'intimé es despens de la procedure uolũtaire par luy faiete parduant ledict iuge royal.

¶ **F**orme pour contraindre vn homme d'eglise condamné par vn iuge ecclesiastique, ou vn homme lay par vn iuge d'eglise de payer quelque somme

me de deniers.

semblable forme conuient tenir pour contraindre un hōs
me d'eglise cōdamné par un iuge ecclesiastique a payer quel-
que somme de deniers, ou bien si un homme lay est cōdamné
par un iuge d'eglise en matiere dōt la cognoissance luy appar-
tient, alencontre des layx: combien que souuent les iuges d'es-
glise facent le contraire, & decernent monitoire aucunes fois
par la sentēce mesme, aucunes fois par autre acte apart pour
les admonnester de payer dedens certain temps, autrement le
iour passé ilx sont excōmuniēx. D'auātage si on ueult met-
tre a execution la sentēce d'un iuge ecclesiastique sur les biēs
d'un prestre: il fault demander permission & commissiō de
ce faire au iuge lay en la iurisdicțiō duquel sont lesdictx biēs:
lequel commettra au premier sergent de sa Cour pour mettre
ladicte sentēce ou cōdamnation du iuge d'eglise a executiō.
Aussi un iuge lay ne peut ordonner qu'un prestre par luy
condāné soit contrainct satisfaire au iugé, ains sauuera a la
partie aduersē a se pourvoir pour raison de ce pardeuant son
iuge: iasōit que le prestre ayt declairē au commandement a
luy faict de payer, qu'il n'ha aucuns biēs. & ainsi en fut dict
par arrest le xiiij. de May. M.D.XXX. Toutes fois il me semble
le prestre auoir bien peu d'interest en ce.

¶ Que pour vn default vn homme lay ne peut estre
excommuniē par vn iuge ecclesiastique.

Pareillement n'est loysible a un iuge d'eglise d'excommu-
nier un homme lay pour le premier default, uoire qu'il soit
citē pour une matiere dōt la cognoissance en appartient a icel-
luy iuge: & en fault deux pour le moins apresent, autāt que
a donner sentēce diffinitive: car l'execution est plus grie-
ue que la sentēce diffinitive. Et si autrement les iuges
d'eglise le font, il est permis d'en appeller comme d'abus:

☞

Et en aura lon semblable reparation que dessus. Et souuent aduient que quand la Cour uoit un official trop prōt a decerner Et octroyer telles censures, ce requerant monsicur le procureur general du Roy, elle ordonne qu'ilz uiendront en personne pour estre oyx, Et eulx oyx sont condamnē en amende pecuniaire enuers le Roy.

Cas ou est permis recours aux censures ecclesiastiques.

Toutesfois il est permis en aucuns cas auoir recours aux censures ecclesiastiques, scauoir est pour auoir reuelation de quelques faictz dont ceulx qui en scauent n'en ueulent depōser. Et s'il y ha proces pendant, fault demander permission au iuge de faire querimonie ou monition pour auoir reuelation desdictz faictz, la partie aduersē exceptee, Et non cōprinse, Et son conseil sans fraude: laquelle permission le iuge donne ordinairement partie aduersē appelee. Et ces motz les parties Et leur conseil sans fraude, non comprins, s'entēdent qu'on n'ayt communiqué en conseil de la matiere a aucuns qui en scauroient, a fin que par ce moyen ilz ne fussent tenez reueler: car on les auroit prins au conseil en fraude. Et de ce fut donné arest le dernier iour d'Auril M. D. XXXI. Mais il y ha certain cas auquel les parties Et le conseil sont comprins, scauoir est quand la partie maintient subtraction ou latitation de pieces seruans au proces pendant, pourueu qu'il n'y ayt ia proces intētē pour la subtractiō Et latitatiō desdictes pieces: car en ce cas il fault excepter la partie cōtre laquelle on poursuit ladiētē subtraction. Et quiconque n'est contrainct porter tesmoignage, ne peut aussi estre contrainct bailler reuelation a une querimonie. Mais s'il n'y ha point proces pendant, ne fault point demander permission, ains la fault faire en termes generaux sans declairer ne nōmer au-

cūs, mesmement quand y sont cōtenuz faictz scandaleux & iniurieux, voire quand ores il y auroit permission du iuge de faire la querimonie. Et pour ce est aduenü quelque fois que pour obuier a appellation comme d'abus de l'oëtroÿ & execution de ces querimonies, & qu'il est bien difficile d'en faire sans abus: la partie qui en uouloit faire, presente requeste a la Cour, a laquelle elle attache ses articles qu'elle entendoit mettre par sa querimonie: & requiert que partie aduersè die ce que bon luy semblera pour empescher que lesdictz articles ne soient mis par querimonie: & lors fauldra qu'elle consente ou dissente. & pourra lon faire seurement la querimonie des faictz consentiz, ou desquelz sera baillé speciale permission par la Cour. Lequel expedient ie trouue bien equitable. Toutesfois quād c'est une matiere pure ciuile, & n'y ha faict iniurieux, il me semble qu'il n'y ha danger nommer les parties, a fin que ceulx qui oyront la publication, uiennent plus aysement a reuelation.

¶ Excommunications ne doibuent tendre a restitution de meubles ou immeubles: & que les maledictions des cēsures ecclesiastiques ne doibuent estre trop execrables.

Ne doibuent en oultre les excommunications ou censures tendre a restitution de meubles ne de immeubles, voire ne a exhibitio de meubles. Et comme un legataire eust obtenu une querimonie tendant a'exhibition des meubles a luy leguez, l'heritier se porta appellant de l'oëtroÿ & execution de ladicte querimonie, & par arest donné le xij. de Decembre mil cinq cens trente & deux, fut dict bien appellé. Toutesfois cōtre les gens d'eglise on peut par ladicte querimonie tendre a satisfaction: & pource met on communement ceste clause, *Monemus laicos reuelare, & clericos reuelare & satisfacere:*

car

car si on tendoit contre les layx a satisfaction, il s'ensuiuroit que le iuge d'eglise pourroit cognoistre de l'opposition qui y seroit dōnee par les layx: ce qu'il ne peut faire, comme dessus ha esté dict.

semblablement on ne doit mettre par la querimonie mandement pour citer les layx en cas d'opposition pardeuant le iuge d'eglise qui l'a octroyé, ne generalmente de citer tous opposans: ains on met ceste clause, *Clericos & iusticiabiles nostros citetis coram nobis, laicos uerò coram iudice competenti.*

En oultre on ne doit mettre que les reuelations soient baillees pardeuant le iuge qui l'octroie. Ne fault aussi mettre que excommunication, aggrauation, & reaggrauation seulement, & non autres maledictions, comme clause de malediction de *Datan, Core, & Abiron*: ne du *Pseume, Deus meus laudè, ne Cāpanis pulsatis, & cereis accensis, &c.* Ne doit on aussi adresser l'execution desdictes censures a autres que aux *Euesques & iuges ordinaires ecclesiastiques*. Et ne la peut on adresser aux autres ayans dignitez ecclesiastiques, comme bien qu'il soit permis par les droictz canōs leur adresser rescriptz Apostoliques. mais lesdictz droictz canōs ne sont receuz en France, parce qu'ilz deroguent a la iurisdiction ordinaire ecclesiastique. Et combien que lesdictes censures contiennent clause abusive en ce qu'il est mandé generally citer les opposans pardeuant celluy qui les ha decretees, toutesfois il n'y ha que le procureur du Roy qui s'en puisse porter appellāt de l'octroy comme d'abus, & celluy qui par uertu d'icelles ha esté cité. Mais si lesdictes censures sont scandaleuses & iniurieuses, celluy qu'elles touchent, se peut porter appellāt de l'octroy d'icelles, iasōit qu'elles n'ayent esté executees, ne publiees.

Et si il y ha aucū qui reuele a la querimonie pardeuant l'executeur, & baille sa declaration ou reuelation signee de luy,

ou qu'elle ne soit en forme authentique: s'il est lay, conuient l'adiourner pardeuant son iuge domiciliaire, si elle n'est point faicte en un proces encores pendant: car en ce cas le fault adiouner pardeuant le iuge qui cognoist dudiect proces, pour aduouer ou desaduouer sa reuelation. Et s'il l'aduoue, le iuge en baille acte, & enuoye les parties hors de Cour sans despēs d'une part & d'autre, sinon que l'une eust prins des delayz frustratoires: car elle est condamnée es despens de ces delayz. Et neantmoins faultdra encores faire oyr le reuelant comme tesmoing en l'equeste du proces, quād il reuele cōme tesmoing, & chargeant autrui. mais s'il reuele de ce qui le concerne cōme partie, apres qu'il a aduoué sa reuelation, on peut intēter action contre luy pour le faict reuelé & aduoué, comme aussi on peut faire sans adueu precedēt, quand il a reuelé par instrument en forme authentique, scauoir est quand la reuelation est signee de deux notaires, ou d'un, presens tesmoins a sa requeste: car lors n'est besoing d'adueu. Et si on uoit que le reuelant n'ha pas amplemēt declairé, l'impetrāt de la querimonie pourra requerir pardeuant lediēt iuge competēt, que ladiēte querimonie sorte son effect, & soit publiee oultre les choses reuelees, en ce non comprins les reuelans pour le regard des choses reuelees seulement. toutesfois par la publication qu'on fera par apres de la querimonie, ne faultdra nommer les reuelans: mais l'executeur dira que l'impetrant n'entend que les reuelans y soient comprins, selon ladiēte modification.

Par cy deuant nous auons usé, qu'en toutes querimonies impetrees pour auoir reuelation des faictz concernans un proces pendant, esquelles il fault excepter la partie & son conseil, on ne nommoit iamais la partie par ladiēte querimonie, ains mettoit lon, qu'on proces pendant entre l'impetrant de la querimonie demandeur, & un quidam defendeur

peur: toutesfois par arrest donné le viij.iour de Mars M. D. XLIIII. fut dict qu'en matiere ciuile quand les faictz desquelz on demande reuelation, ne chargēt l'honneur de la partie aduerse, on peut la nommer en la querimonie: parce que le plus souuent sans la nommer, on ne pourroit auoir reuelatiō. mais quand on obtient monition contre le defendeur en matiere criminele, il fault taire le nom du defendeur: & si le defendeur obtenoit monition pour uerifier ses iustificacions & obiectionz, il pourroit bien nommer le demandeur, pourueu que les faictz ne blessassent l'honneur du demandeur.

Reuelateurs par vertu d'excommunication,
s'ilz peuuent demander despens.

Ceux qui ont reuelé, iasoit qu'ilz ayent reuelé seulement de ce qu'ilz scauoient comme tesmoins, ne peuuent demander les fraiz par eulx faictz a leur reuelation, quand ilz sont petitz: mais s'ilz estoient grands, les pourroient demander apres leur reuelation baillee, si elle sert a l'impetrant, comme s'il luy auoit conuenu aller loing de sa maison pour faire la reuelation: & ce quand il reuele comme tesmoing: car il fault bailler au tesmoing qu'on ueult produire, les fraiz & uacations qu'il faict pour aller déposer, uoire selon droit escript auant qu'il se mette a chemin. Toutesfois nous n'en usons pas si estroitement, car on leur baille uoluntiers leur uiatique: & apres le commissaire leur taxe leur salaire & uacation. Et en matiere criminele on ordōne que les tesmoins uiēdrōt a leurs despens, sauf iceulx oyx recolez & confronter a leur faire taxe de leur despense & salaire. & les ay ainsi ueu faire uenir de uingt grands lieues de ce pays de Poictou: qui n'estoit gueres equitable, a tout le moins qu'on ne leur bailloit pour faire leur despense par les chemins. Mais quād quelqu'un reuele

uele comme coulparable, & comme partie: en ce cas il eſt euidēt qu'on ne luy doit payer aucuns fraiz pour ſa reuelation, iuſques en fin de cauſe. Et i'aſoit qu'un ayt reuelé cōme teſmoing par instrument authentique, comme par reuelation ſignée de deux notaires, neant moins il le fault faire encores oyren en enqueſte: car il ne ſeroit point iuré en preſence de partie, ou icelle appellee, comme il eſt requis en teſmoignage. Et quand on ſe oppoſe a quelque querimonie ſans bailler aucune declaratiō, ne maintenir abus, il le fault faire adiourner par deuant ſon iuge, ou domiciliaire, ou celluy par deuant lequel on ueult inter le proces principal dont la querimonie eſt preparatoire, a ce qu'il ayt a dire ſes cauſes d'oppoſition: & ſ'il ne dit cauſes ualables, il ſera condanné es dōmages & intereſt du retardement de l'exécution de ladiēte querimonie, & es deſpens de l'inſtance d'oppoſition. Et ſ'il dit cauſes ualables, comme auoir faiēt l'exploict dont on ſe plainēt, a bonne cauſe & tiltre: lors le demandeur intente ſon action principale. On auoit parcydeuant accouſtumé d'uſer en Cour d'eglīſe, que ſi lon ne ſ'eſtoit oppoſé ou reuelé a une querimonie, & que neant moins on ſcauoit des faiēt y contenuz, on faiſoit oyren par information teſmoings qui diſoient auoir oy parler deſdiēt faiēt a celluy qui ne ſ'eſtoit oppoſé, ne n'auoit reuelé. & ladiēte information rapportee, le iuge eccleſiaſtique qui auoit decreté la querimonie, decretoit citation perſonnele contre celluy qui n'auoit donné reuelation ne oppoſition, uoire fuſt il lay. Mais ce ha eſté corrigé & reformé par areſt de Parlemēt en tant que touche les gens layes: car il en fault laiſſer la punition a Dieu, cōme d'un crime occulte, & de periure. Toutes fois ilz en uſent encores contre les clerics.

¶ Le condanné par ſentence de bailler deniers ou autre choſe, quel temps & reſpit il ha pour payer.

z

A fin

A fin que nous rendons consommée la maniere de proceder a l'exécution des sentēces, par lesquelles on est condamné a bailler deniers, ou autre quantité, comme bled & uin: il est a entendre, que selon droict escript le condamné a bailler deniers ou autre quantité par uertu d'action personnele, auoit quatre moys de delay apres la sentēce pour payer. mais apres par la coustume de ce pays de Poictou, ledict condamné n'ha que huiētaine a compter d'icelluy iour que la sentēce ou condamnation est donnee avecques luy, s'il y est present: ou s'il est absent, qu'elle luy est signifiée. Et quand on est condamné par iuges royaux ressortissans nuement & sans moyen en la Cour: en ce cas on ne peut obtenir du Roy ou de sa Chancellerie respit a un an, ne a trois, ne a cinq ans. & si on en obtient, on en est debouté quant a ce. combien que aucuns uueillent dire que ce n'ha lieu sinon quand on est condamné par arrest de Parlement. Toutesfois nous en usons ainsi. semblablement lesdicts respits n'ont lieu quand il est question de deniers deuz pour louage ou location de maison, & d'autres dommaines, ainsi qu'il fut dict par arrest le xxviij. iour de May M.D.XXXVI. arrierages de rētes foncieres, ou de loyer & salaire: ou quand il est question de debte faicte es foires de Champaigne & de Brie: ou si lon est condamné enuers le Roy ou partie ciuile en quelque somme de deniers pour reparatiō de quelque crime ou delict: ou quand on est obligé pour les deniers du Roy. En oultre quant es deniers deuz de uendition de uin, de chair, de poisson, & d'autres uiures uēduz en foires, ou en marche a terme ou autrement, nul respit ha lieu. ainsi qu'il a esté decisi par plusieurs arrests du Parlement de Bourdeaux, & est rapporté par mondict sieur Bohier en ses decisions dudit Parlement en la question ccxcvi. Cōbien qu'il die plusieurs tenir le contraire, quand on a baillé terme de payer

payer les deniers, & quand on en a prins obligation. Plus il dict auoir esté uuydé par plusieurs arrestz de ladicte Cour qu'en depost respitz ne sont receuz.

¶ Difference entre trois manieres de respit, & quelles sont les personnes miserables.

Il y a difference entre lesdictes trois manieres de respit. Les premiers qui sont d'un an, sont octroyez a toutes personnes tât layz que prestres ou clerics: & ce pour obuier a la uile & ignominieuse distraction & uente de leurs biens. Et en ces respitz on ha accoustumé de mettre une clause de faire iouyr du respit quant aux crediturs puissans d'attendre. Et pource on demande quelles personnes sont censees n'estre puissans d'attendre. Et sont les personnes que nous appellons miserables, scauoir est dõt il fault auoir pitié & misericorde, comme uesues, orphelins, ou pupilles, iasoit qu'ilz soient riches & on pulens en biens. Aucuns disent que ce doit estre laissé a l'arbitration du iuge quelles personnes sont miserables. Neantmoins nous gardons que respitz n'ont lieu cõtre femmes uesues, orphelins, ou pupilles, combien qu'ilz soient riches. Et iasoit que autres crediturs fors lesdictes uesues, pupilles, ou orphelins, se dient n'estre puissans d'attendre, neantmoins ne fault receuoir ledict faict, ne semblablement j'ilz alleguoient le debteur n'auoir souffert la perte de ses biens par feu ou autre cas fortuit, comme on ha accoustumé mettre par lesdictz respitz. Et ne doit on adiuger preuue desdictz faictz, quelque chose qui soit mise au contraire par le protocolle de Chancellerie ou sont mis les formulaïres des respitz: car on met lesdictes clauses plus de stile, qu'elles soyent necessaires, attendu que par lesdictz respitz on ne met

z ij point

point la clause, s'il uous appert desdictes choses partant que
suffire doibue. laquelle on met es lettres royaux qui gisent en
cognoissance de cause. aussi le Roy de sa seule grace sans au-
tre cause peut bailler ledict delay ou respit a un an. Toutes-
fois l'ay ueu un iuge bien scauant auoir quelque fois appoin-
cté les parties a faire preuue, si aucuns creditours estoient
puissans d'attendre ou non, combien qu'ilz ne se disent orphe-
lins, pupilles, ne ueufues: & en y eut appel intericté par le
debteur: qui fut trouué par consultation faicte a Paris bon &
sustainable: mais n'en ha esté decisi par arrest, au moyen de ce
que les parties pendant icelluy s'accorderent. Et n'en auoye
iamais ueu appoincter en preuues sur ledict faict, ains sans a
icelluy auoir regard, enteriner tousiours lesdictz respitz a
un an. Et de c'est aduës est mondict sieur Bohier en sesdictes
decisiōs en la question ccxcvi. ou il dict, qu'il suffist en ces re-
spitz a un an, que l'impeit̃ant afferme par serment, n'auoir
obtenu ledict respit en fraude & par calūnie, ains par neces-
sité. & qu'il ne fault faire aucune preuue, ne declairer & con-
fesser la debte, ne bailler caution. Et si on a eu un respit a un
an, on peut en auoir encores un a cinq ans.

¶ Du respit a trois ans.

Quant au respit a trois ans, il se baille communement aux
clercs ou gens d'eglise particuliers, ou a quelque corps & col-
lege d'eglise: mais est dict par icelluy, que ce pēdāt les fruietz
de tout leur temporel seront regiz & leuez par commissai-
res, qui en distribueront la tierce partie des deniers aux cre-
diteurs, ainsi qu'il est contenu par le formulaire qui en est au-
dict protocole de Chancellerie.

¶ Du respit de cinq ans.

Et n'est mestier que la plus grand partie des creditours con-
sente

ſente l'enterinement deſdictz reſpitz a un ou a trois ans. Mais quant au reſpit a cinq ans il fault que la pluſgrand partie des crediturs, eu regard a la quãtité des ſômes dues, le conſente. Et eſt beſoing que chaſcun creditur en perſonne ou par procuration ſpeciale affirme par ſerment ſa debte luy eſtre iuſtement deue, & n'y auoir faiet aucune fraude. Auſſi le debteur & impetrant du reſpit eſt tenu confeſſer a un chaſcun d'eulx ſa debte, & la cauſe pour laquelle il la doit: & eſt deſlors en enterinant ledict reſpit a cinq ans, condamné a payer leſdictes debtes le temps dudiect reſpit eſcheu. Et ſe baille ledict reſpit a cinq ans pour obuier a la miſerable ceſſion de biens. Et ſe pouuoit ſelõ droict eſcript bailler par le iuge du cõſentement de la pl⁹ grãde partie deſdictz crediturs. Par tous leſdictz reſpitz il eſt mandé faire deſenſe aux crediturs de non attenter & innouer aucune choſe pendant le proces ſur l'enterinement d'iceulx alencontre du debteur, ne de ſes pleiges, ne de leurs biens: & ſi aucune choſe auoit eſté faiete, ou eulx ou leurs biens prins & ſaiſiz, ilz ſoient mis a pleine deliurance, & remis au premier eſtat & deu. Et i'aſoit qu'il y ayt autre difference miſe par ledict protocole de Chãcellerie entre les reſpitz a un an & cinq ans, ſcauoir eſt que les reſpitz a un an ſe peuuent adreſſer a tous iuges du royaume, & les reſpitz a cinq ans aux iuges royaux ſeulement: neantmoins on ha accouſtumé de adreſſer les reſpitz a un an aux iuges royaux ſeulement.

¶ De l'execution des ſentences de reſtitution de biens tant meubles que immeubles.

Venons a preſent a traieter de la maniere de proceder a l'execution des ſentēces de la tierce eſpece, ſcauoir eſt par leſquelles on eſt condamné a rendre & reſtituer quelque choſe mobiliare, ou immeuble, ou biē a laiſſer & ſouffrir iouyr de la

chose immèuble. Et selon l'ordonnance dernière article xcv. fault que le sergent a la requeste de celluy qui ha obtenu arrest, ou sentēce passēe en force de chose iugēe (qui est quād il n'y a appel de la sentēce) si lesdictz iugemens sont liquides, face cōmander au condanné en action petitoire ou possessoire de obeir ausdictz iugemens dedens trois iours, a la peine de soixante liures paris: & de pareille somme ou autre somme que de raison a appliquer a la partie pour reparation de son interest. Et s'il n'y satisfaiēt dedēs ledict tēps, icelluy passē il sera adiourné pour uoir declairer lesdictes peines encourues tant enuers le Roy, qu'enuers partie, & avec intimation au cas appartenāt. Et s'il n'y comparoit, il sera cōtre luy donné default par le iuge qui ha donné la sentēce, ou autre auquel il aura commis l'exécution, avec tout le profit que de raison. Et si c'est telle chose qu'on puisse monstrier estre encores en la possession du condanné, comme s'il est condanné rendre quelque robbe, ou a laisser iouyr d'une maisō: & nōobstāt ledict cōmandement, il les detiēne encores: est pour le mieulx que le sergēt presens deux recordz face inquisition avecques tesmoings sur ce: & le iuge ueu lesdictz default & rapport du sergēt, declairera ledict condanné cōtūmax: & qui ne faiēt plus a recevoir a empescher que lesdictes peines soient contre luy declairees encourues: esquelles en ce faisant il le cōdānera: & ordōnera que a icelles payer il sera cōtrainct par uēte & exploitatiō de ses biēs & emprisonnemēt de sa personne. Et apres ledict cōmandemēt de satisfaire au iugē, si le poursuyuant l'exēcutiō le requiert, & que le cōdāné soit adiourné avec intimatiō pour declairer les causes pour lesquelles il n'ha satisfaiēt au iugē ou sentēce, & il se defaillē, le iuge par uertu du dict default donné avec tout le profit, le declairera cōtūmax: & ordonnera ueu ledict rapport du dict sergēt, qu'il sera cōtrainct

trainet par saisie de ses biens meubles & immeubles de satisfaire a ladicte sentēce: laquelle saisie on fera executer par apposition & establissement de commissaires sur lesdicts biens.

¶ De iecter vn hoste locatif hors la maison qu'il tient de louage.

Et s'il est question d'une maison, & que le condamné a la laisser, ayt meubles a dedens, le iuge pourra ordonner que ses meubles seront mis sur les carreaux, & le demandeur mis en possession d'icelle realemēt & de faict par un sergent. Et s'il resiste & perseuere en sa contumace & desobeissance, le iuge peut ordonner qu'il sera contrainct par emprisonnement de sa personne a satisfaire a ladicte sentēces: ou pour le miculx ordonnera qu'il sera prins au corps, & admené aux prisons de la Cour pour estre oy sur certains poinctz & articles, & respondre aux fins & conclusions des gens du Roy, & de la partie civile: ou selon la qualité des parties & de la matiere decretera seulement adiournement personnel.

¶ Quād est permis de faire execution par main forte, ou militaire: & des despens d'icelle.

Et combien que le droit die qu'on peut oster par main militaire a un condamné la chose qu'il est condamné rendre, toutes fois il se doit entendre par les sergens du iuge, & par le commandement du iuge: car pour la desobeissance d'obeir a ladicte sentence, le sergent ne pourroit pas saisir les biens du desobeissant sans mandement du iuge. Et n'est loysible de faire assemblee de gens pour executer une sentence par force & main armee, sans permission de la Cour de Parlement, ou du Roy: laquelle est octroyee sur les informations faictes par auctorité & mandement de ladicte Cour, ou par lettres royaux touchant les rebellions: & mande & enioinct communement la Cour au Seneschal ou Baillif de la prouince ou il

fault faire l'executiō, que appellé (si mestier est) le ban & arriereban de ladiēte prouince, il face faire ladiēte execution, & y donne confort & ayde. Ie ne uueil pas pourtant entendre qu'un sergent ne puisse bien proceder par ouuerture de portes & coffres en la maniere cy dessus declairee. Voire si la Cour a commis l'execution d'un arest a un Conseiller ou autre iuge, le cōmissaire ne peut decreter adiournement personnel ou prinse de corps a l'encontre des rebelles empeschans ladiēte execution, ains fault qu'il en face son rapport a la Cour pour y estre par elle pourueu. Et ne peut pareillemēt l'executeur commis ayant cognoissance de cause, condamner es despens fraiz & mises de l'executiō reale, mais seulement es despens de l'instance agitee pardeuant luy sur ladiēte executiō: & fault qu'il reserve a se pouruoir des despens de l'executiō pardeuant celluy qui l'ha delegué. & ainsi en ha esté consulté par scauans aduocatx de la Cour de Parlement a Paris. ce que ie trouue bien dur: car ce est uen dependre de l'executiō qui est commise.

¶ Comment il fault proceder contre ceulx qui sont condamnēz a faire partage de biens.

Conuient icy noter un remede nouueau, que la Cour ha trouué cōtre ceulx qui sont cōdānēz a faire partage de biens, & neantmoins ilz sont delayans, ou empeschans: duquel remede elle use, & aucuns iuges inferieurs a son exemple. C'est qu'elle ordonne que les partx & portions dudit delayant seront regies par commissaires, s'il ne satisfait a ce qu'il est tenu faire pour la confection du partage dedens certain iour que ladiēte Cour luy assigne.

¶ Cōdamné en action petitoire ou possessoire, empeschant l'execution, quelle peine il souffre.

semblablemēt par lesdictes ordonnances dernieres article

xcvi. ſi le condāné en action petitoire ou poſſeſſoire, eſt trouuē appellant, oppoſant, ou autrement friuolement & indeuement empēſchant l'execution du iugement, par luy, ou par perſonne ſuſcitee ou interpoſee, il ſera condamnē en l'amēde de ſoixante liures pariſis, & oultre en autre amende extraordinaire enuers le Roy, & en groſſe reparatiō enuers la partie, a la diſcretion des iuges. Et neantmoins ſera la partie empēſchant indeuement ladiſte execution, contraincte a faire executer ledict iugement a ſes propres couſtz & deſpens dedens certain brief delay, qui pour ce faire luy ſera prefix ſur groſſes peines, qui a celuy ſeront cōminees: & en default de ce faire dedens ledict delay, ſera contrainct par emprisonnement de ſa perſonne. Et me ſemble que ceſte ordonnance n'empēſche point qu'on ne puiſſe uſer des cōtrainctes ſuſdictes, quand par cōtumace le condamnē delaye. mais ſi en iugement il delayoit, il faudroit uſer de ceſte ordonnance, & non des remedes ſuſdictz. Auſſi aucuns ont voulu entendre ceſt article & le precedent deſdictes ordonnances, quand on ſeroit condamnē en action perſonnele a bailler deniers ou ſemblable quantitiē, mais en ce n'y a propos, car ladiſte ordonnance parle ſeulement en actiō petitoire & poſſeſſoire: eſquelz cas il eſt plus facile d'executer la ſentence, que bailler deniers: car lon n'ha que a laiſſer ou bailler la choſe qu'on eſt condamnē: mais quāt eſt de deniers, on ne les peut recouurer ſi ayſement: D'auantage ſelon droit commun le condamnē en actiō perſonnele a bailler deniers, auoit quatre mois pour payer: mais en action reale il n'auoit point de delay, ſinō que la choſe qu'il eſtoit condāné bailler ou rendre, ne fuſt au lieu, ne preſente: car lors on luy donnoit quelque delay pour la rendre, en baillant routesfois par le condamnē caution d'en vendre l'eſtimation, ſ'il ne rendoit la choſe. Et pource il fault entendre

entendre ladicte ordonnāce selon ou au plus pres du droit commun.

¶ De accumuler plusieurs remedes d'execution ensemble.

Est plus a noter, que lon peut accumuler plusieurs remedes d'executiō ensemble: cōme si mō debteur a obligé son corps & ses biens, iasōit que a default de payement ie l'aye. faict constituer prisonnier, neātmoins luy estāt prisonnier ie pourray faire uendre ses biens: & ne fault point faire difficulté. que sans discussion preallable de biēs, ie puis faire emprisonner mon debteur, si a ce est obligé. Pour ladicte cause aucuns ont uoulu dire, que si i'ay faict saisir quelque debte deue a mon debteur, que ce nōobstāt ie puis bien encores agir cōtre luy pour ladicte debte. Mais ie l'entenderoye pourueu qu'en ladicte action & demande simple il offrist se departir de ladicte saisie, en luy payant sa debte, & qu'il declairast que par lesdictes deux uoyes il n'entēdoit que tendre a un seul payement de ladicte debte.

¶ Si on peut apres auoir prins quelques biens du condamné par execution, retourner a en prendre d'autres.

Pareillement aucuns tiennent, que si on ha prins des meubles du condamné, iasōit qu'ilz ne fussent, neantmoins uous ne pouez en prendre d'autres iusques a ce que les premiers prins & executez soient uenduz & adingez. Les autres disent qu'il suffit d'auoir faict faire les crieas & encheres, sans faire la uente & adiudication: car par ce moyen on pourra cognoistre s'ilz seront suffisās pour la debte, on non. Mais ie penseroye que si euidentment il apparoiſſoit lesdictz meubles executez n'estre suffisans, on en pourroit prendre autres sans en faire preallablement les crieas ne la uente: & s'il n'apparoiſſoit

n'apparoifſoit ainſi euidentement, ie ſeroye d'aduis qu'on feit les criees des premiers auant qu'en prendre d'autres . Toutes fois on en peut a la premiere fois tant prendre par execution, qu'ilz ſoient ſuffiſans pour le principal , & pour les fraiz de l'execution.

¶ Toutes les peines comminees du iuge contre le condanné, ne ſont pourtant toutes a demander enſemble.

Ne fault en celieu oublier, que ſi le iuge fait comminatio ſur pluſieurs & diuerſes peines pecuniaires ou amendes de faire quelque choſe, & celluy auquel leſdictes peines ſont cõminees, n'en fait rien, on ne peut pas demander toutes leſdictes peines enſemble , ains ſeulement la plus grand deſdictes peines. Et ſ'il obtẽpere & ſatisfait a ce dont luy a eſté ainſi comminé , il euit toutes leſdictes peines , pourueu qu'elles n'ayẽt eſté auparauant declairees encourues.

¶ Des ſentences executables nonobſtant appel.

Pource qu'il y a pluſieurs matieres eſquelles les executiõs des ſentences ne ſont ſuspendues par appel, ains ſont faiçtes nonobſtans oppoſitions ou appellations quelconques, & ſans preiudice d'icelles: auãt que uenir a traicter des appellatiõs, il nous fault toucher quelque choſe deſdictes matieres. Premièrement la ſentence de ſequeſtre donnee en matiere de cõplaincte , & de reſtabliſſement des fruiçtz leuez les an & iour precedens la cõplaincte, & depuis icelle, eſt miſe a execution nonobſtans oppoſitions ou appellations quelconques : ainſi qu'il eſt dict par les ordõnances du Roy Charles VIII. article xlviii. Et par les ordonnãces du Roy Loys XII. articles lxxxiiij. & lxxxiiij. falloit que telle ſentence fuſt donnée parties oyẽs , & non par contumace. Mais par les ordonnances

ordonnances dernieres article xxx. est dict qu'en toutes matieres esquelles les sentences donnees parties oyes sont executoires pardeffus l'appel, suyuant les ordonnances royaux, aussi les sentences y donnees par contumace, & apres que le demandeur ha prouué le contenu en sa demande, sont semblablement executoires. Aussi les sentences de recreance ou de plein possesseur expedies par tiltre, sans foy arrester a la recreance en matieres beneficiales, qui seront donnees parties oyes par iuges royaux en leurs sieges principaux, ou qu'ilz donneront en leurs sieges esquelz il ont accoustumé tenir les assises, & durant icelles: ressortissans sans moyen en la Cour, sont executoires, en baillant caution par la partie qui aura obtenu, de rendre les fruietz sil est dict que faire se doibue: pourueu que ausdictz iugemens les iuges appellent avecques culx six ou quatre pour le moins des Conseillers & practiciens de leurs sieges & auditoires, non suspectz ne fauorables aux parties: & que la sentence ou dictum d'icelle soit signé du iuge & d'eulx: comme il est nommeement decis par les ordonnances du Roy Loys XII. articles xci. & xcij.

¶ Des Seneschaucees ressortissans sans moyen en la Cour de Parlement.

Et pour l'intelligence de ladiete ordonnance conuient entendre qu'il y a en ce royaume aucunes seneschaucees esquelles y a plusieurs sieges royaux ressortissans sans moyen en la Cour de Parlement, & non subiectz l'un a l'autre: sinon que le lieutenant general de la seneschaucee ua tenir deux ou trois fois l'an les grâds assises royaux en chascun desdictz sieges: & donne esdictes assises tous appointemens, sentences, & autres expeditiōs de iustice: & ne peuuet durant icelles assises les lieutenāns particuliers ou assesseurs du siege duquel le general tient les assises, faire aucune expedition de iustice
oultre

oultre le gré & uolunté dudiſt lieutenant general : lequel neantmoins ne peut corriger les appointemens au parauant donnez par les lieutenans particuliers : comme en Poictou y a lieutenant general de Poictiers : lequel ua tenir les aſſiſes a Nyort, & a Fontenay le conte, & es autres ſieges royaux de Poictou . Et iaſoit que a prendre eſtroictement les termes de l'ordonnance, les ſentences de recreance ou plein poſſeſſoire donnees par les lieutenans particuliers en leurs ſieges hors leſdictes aſſiſes ne ſeroient executoires : toutesfois le lieutenant de Fontenay en a declairé pluſieurs executoires par deſſus l'appel, leſquelles il auoit doné hors leſdictes aſſiſes, nonobſtant qu'on alleguaſt ladiſte ordonnance : & de ce y a eu appel interieſté : mais les appointement & declaration par leſquelz il les auroit declairees executoires, auroiēt eſté conſermez par areſt : car la raiſon qui eſtoit par aduenture lors de la diſte ordonnance, ceſſe apresent : car il y ha iuges notables, & affluence de bon conſeil apresent eſdiſt & ſieges royaux particuliers : ce que par aduenture n'eſtoit lors : car il y ha uiciſſitude de laus & excellence en tous pays : & ne peut pas une region touſiours fleurir en excellent & eſperit : quand une y fleurit, l'autre en diminue : comme nous li ſons des Atheniens, Lacedemoniens, & Romains : ainſi que tresbien dit Velleius Paterculus.

¶ Si les ſentences de recreance & de reintegrāde ſont executoires nonobſtans oppoſitions ou appellations quelconques.

Et par les ordonnances dernieres article lxij. il eſt diſt que les ſentences de recreance & de reintegrande en toutes matieres donnees par iuges royaux reſſortiſſans ſans moyen en la Cour, appellez avecques eulx ſix Conſeillers ou aduocat & de leurs ſieges, qui ſigneront le diſtū avecques le iuge, dont
il

il fera mention au bas de la sentence, seront executoires non-obstans oppositions ou appellations quelconques, & sans preiudice d'icelles, en baillant caution. Est besoing cy noter, que si la partie contre laquelle a esté donnee la sentence de recreance, en appelle: celluy qui l'ha obtenu, ne la peut contraindre de proceder & aller auant quāt au plein possessoire ou maintenue iusques a ce qu'il soit decisi dudit appel: car l'appellant peut dire que la matiere estoit subiecte a uuyder ladicte maintenue au plein possessoire a son profit: & que la Cour en uuydāt ledict appel, luy adiugera par ce qui ha esté faict au proces, la maintenue: & ainsi en fut dict par arrest le xvij. de Fevrier M.D.xvii. Pareillement sont bien a pezer les motz de ladicte ordonnance du Roy Loys XII. parlant de la sentence de maintenue expediee par tiltres en matiere beneficiale: car si ladicte sentence estoit donnee par tiltres, & enquestes de tesmoings, elle ne seroit executoire nonobstant l'appel. & ainsi en fut dict par arrest le xvij. iour de Ianuier l'an M.D. xxx. Car en la matiere ou fut donnē ledict arrest, il y auoit eu inscriptiō de faux contre un acte de apprehension de possession du benefice dont estoit question. Combien que si ores l'une des parties contendens du possessoire d'un benefice, ne monstre auoir prins possession d'icelluy, toutesfois si elle ha bon tiltre, & sa partie aduersē n'ayt tiltre ualable, l'autre obtiendra a la recreance: & par mesme sentēce sont les parties appoinctees a informer plus amplemēt quant a la maintenue, ou plein possessoire. Car il n'y a temps prefix pour prendre possession d'un benefice, quand il est confere par l'ordinaire, ou par le Pape comme uacant par mort & par preuention sur l'ordinaire: mais quand le Pape confere par resignation, & que le benefice est deca les montz, il fault prendre possession dedēs six mois: & ainsi en auoir esté dict

par

par arrest du Parlement de Bourdeaux recite monsieur Ba-
 tier en ses decisions en la question xxiiij. ou il dict aussi,
 qu'on ne se peut ayder de possession triennale, si on n'a til-
 tre du collateur ordinaire. car le tiltre qu'on ha d'autre que
 dudict collateur, n'est point dict tiltre coloré, qui est requis
 pour iustifier ladicte triennale possession selon le tiltre De pa-
 cificis possessoribus. D'auantage par les ordonnances du
 Roy Loys XII. article lxxxiiij. si l'une des parties aupara-
 uant la recreance adiugee appelloit de quelque interlocutoi-
 re, neantmoins lesdicts iuges ressortissans sans moyen ne deb-
 uoient differer de proceder en la matiere nonobstans les ap-
 pellationes, & sans preiudice d'icelles, sinon qu'il fust que-
 sition de la competence ou incompetence du iuge. Et depuis
 par les ordonnances du Roy Francoys, premier de ce nom,
 article iij. & y. & en toutes matieres si l'interlocutoire dõt
 a esté appellé, est reparable en diffinitue, le iuge passera oul-
 tre, & procedera auparsus iusques a diffinitue inclusiue-
 ment, nonobstans oppositions ou appellations quelconques,
 & sans preiudice d'icelles: & aussi nonobstans les inhibitions
 & defenses a eulx faictes tant par uertu de relief & en cas
 d'appel, que par lettres royaux ne lite pendente, sans sur ce
 attendre permission ou inuention par lettres de Chancelle-
 rie. Toutesfois si par lesdictes Cours de Parlement parties
 oyes estoit ordonné inhibitions estre faictes aux iuges de ne
 proceder oultre, lesdicts iuges y doibuent obeir.

¶ Quand vn appointement est reparable
 en diffinitue.

Pour entendre bien ladicte ordonnance, conuiēt scauoir que
 nous en cest endroiēt ne prenons un grief ou appointement
 reparable

reparable en diffinitive selon le droit escript: car par le droit escript un appointement est dict reparable en diffinitive, quand il concerne le principal: & iasoit que le iuge par iceluy appointement ayt debouté & forclos la partie de quelque exception & defense concernant le principal, comme de prescription, ou promesse de non demander: neantmoins encore le peut il reparer en la diffinitive. Et par nostre stile & pratique nous entendons & disons le grief & appointement estre reparable en diffinitive, quand il empesche qu'on ne puisse passer oultre, & proceder en la cause, & a donner la diffinitive: comme si le defendeur a requis monstree, & il en soit forclos, & en appelle, ceste forclusion de monstree n'est reparable, parce que au moyen de ce que la monstree n'est faite, le defendeur peut dire n'estre certain de la chose demandee, & pource n'estre tenu de proceder en la cause uen son appel. Semblablement si le iuge forclost la partie de faire enqueste, ou de produire, cest appointement n'est reparable en diffinitive. Et ne pouuons prendre l'appointement reparable en diffinitive selon le droit escript: car en ce royaume un appointement ne se peut reuoker ne reformer que par appel, tellement que si on n'est appellant d'un appointement, il passe en force de chose iugee, & ne peut on plus le retracter par diffinitive. Mais tout ainsi que selon droit civil escript il n'estoit loysible d'appeller d'une interlocutoire auparavant diffinitive, & encores au pays de droit escript on ne baille point es Chancelleries relief & d'appel interiecté d'interlocutoire: ausi au pays coustumier combien qu'on en baille relief d'appel, toutesfois sans preiudice d'icelluy on passe oultre. Et a fin de plus clerement demonstrier quel grief ou appointement nous prenons irreparable, ou reparable, i'ay bien uoulu encores cy en mettre un exemple: qui est, que apres la cause contestee

testee en une matiere de complainte, le demandeur qui auoit discontinué la poursuite par trois ans, les ueult poursuiure, & requiert que le defendeur procede: lequel obijce perëption d'instance par le moyen de ladicte discontinuation, & qu'il n'est receuable sans lettres royaux a poursuiure: toutesfois il est ordonné qu'il procedera, dont il appelle: nonobstāt lequel appel, & sans preiudice d'icelluy, ce requerant le demandeur, il est ordonné qu'il passera oultre: dont de rechef il appelle, & releue ses appellations en la Cour de Parlement: par arest de laquelle est dict mal procedé & appoincté, & bien appellé: & tout ce qui auroit esté faiēt puis le premier appel interiecté, reuocqué comme attentat. Et s'il est appellé d'une sentence interlocutoire donnee par un iuge royal, toutesfois non ressortissant nuement en la Cour de Parlement, & que l'appel soit releué pardeuant le iuge royal ressortissant en la Cour, & par icelluy dict qu'il a esté mal appellé, dont encores l'appellant appelle: ledict iuge royal pourra ordonner que ledict appellant nonobstant son appel, & sans preiudice d'icelluy, procedera pardeuant le premier iuge a quo, pardeuant lequel il ha renuoyé les parties en disant bien iugé. Autre chose seroit, s'il auoit esté appellé d'un iuge non royal. car iasoit que le iuge royal en disant bien iugé, renuoyast les parties pardeuant le iuge a quo: toutesfois s'il y auoit appel dudit iuge royal, il ne pourroit pas ordonner que nonobstant son appel, & sans preiudice d'icelluy, il procederoit pardeuant ledict iuge a quo, parce que par la coustume par le moyen de son appel il est exempt de la iurisdiction du iuge a quo: & luy seroit tollu ledict benefice d'exemption. & pour la confirmation de ce aucuns alleguent l'ordonnance du Roy Loys XII. article xciiij. par laquelle est permis ainsi le faire quant aux interlocutoires interiectees es proces criminelz que font les

iuges royaux, ou autres inferieurs alencontre des uagabons, & autres qui auroient esté fustiguez, efforcillez, banniz, & puniz d'autres grieues peines corporelles, qui auroiēt esté depuis apprehēdez pour autres cas par eulx cōmis de nouuel. Mais parce que ce est ordonné specialement contre telle maniere de gens en leur haine, & pour la uilité de leurs personnes : ie ne penseroye que ce deust estre extendu en matieres ciuiles : ains penseroye plustost les iuges royaux ressortissans en la Cour le pouuoir faire par uertu de l'ordonnance susdite du Roy Francoys premier de ce nom, article iiii. & v. par laquelle il leur est permis de passer oultre nonobstans les appellations interiectees des interlocutoires reparables en definitiue: car quād ilz consermēt l'interlocutoire de l'inferieur, elle est censée la leur, & comme par eulx donnee : car nous agissons de la sentence consermant, & non de la consermee.

¶ De iuges qui apres auoir appoincté les parties a faire preuue de quelque faict, donnent sentence contre lesdictes parties.

Combien que (comme dict est) on ne puisse en pays coustumier reformer & amender un appoinctement ou sentence, que par appel : toutesfois aucuns iuges apres auoir appoincté les parties a faire preuue de quelque faict, & qu'elles l'ont prouué, neantmoins ilz baillent sentence contre elles. en quoy n'y ha propos : car puis qu'ilz ont receu le faict, & adiugé preuue d'icelluy, & qu'elle ha esté bien faicte, il fault qu'ilz iugent selon ledict faict, & la preuue d'icelluy: autrement pour neant ilz en adiugent preuue: & est retraeter & amender leur appoinctement : ce qu'ilz ne peuuent faire: attendu mesmement que la partie en est beaucoup interressee & endommagée. Et ce aduient souuent en interlocutoires, par lesquelles sont les parties appoinctees a faire preuue

ue de leurs obietz: car combien qu'elles en ayent faiēt bonne preuue, toutes fois bien ſouuēt elles perdēt leur cauſe. Mais on pourroit excuſer cela, parce que le iuge ſelon la preuue des obietz, & reproche de teſmoings qu'on fera, pourra mieulx aduiſer auſquelz teſmoings il debucra ſe arreſter, meſmement quand il y ha conſliēt & contrariētē ou repugnan- ce de preuues entre les deux parties. Mais autrement telles interlocutoires & diffinitiuēs de ſi grād uariation ne ſont to- lerables: car elles ne tendent que au gaing des iuges aduo- catz & procureurs. Et par areſt de la Cour donnē le ij. iour de Ianuier M.D.XLII. donē ſur une requēſte preſentee pour faire declairer une ſentence interlocutoire d'adiudication de preuue d'obietz en une matiere criminelle nonobſtant l'ap- pel, fut ladiēt ſentence declairēe executoire, & renuoyees les parties pour proceder iuſques en diffinitiuē nonobſtant lediēt appel, & autres quelconques, & ſans preiudice d'iceulx.

¶ Comment il fault mettre en execution les ſentences des iuges eccleſiaſtiques par aucto- ritē des iuges layz &c.

Il ne conuiēdra mal en ce lieu d'y traictier cōment on doit mettre a execution les ſentences des iuges d'eglīſe par aucto- ritē des iuges layz en ce royaume nonobſtans oppoſitions ou appellations quelconques: iāſoit que ie n'aye entrepris de toucher de l'ordre iudiciaire des Cours eccleſiaſtiques. Or il fault entendre que par la pragmatique ſanctiō & par les Concordatz faiētz entre noſtre ſainēt Pere le Pape, & le Roy, il eſt diēt qu'il n'eſt permis d'appeller deux fois d'une interlocutoire donnee par le iuge d'eglīſe, quand elle n'ha force & efficace de ſentence diffinitiuē: & d'une diffinitiuē

ou autre ayant force de diffinitive, il n'est loysible de appeller trois fois. Si doncques il est question de l'execution de telles sentēces, il fault que celluy qui les ha obtenu, preigne lettres royaux adressans au premier des Conseillers de la Cour de Parlement au ressort de laquelle demeure ledict appellant: & que par icelles soit mandé, que s'il luy appert desdictes sentēces, il les face mettre a execution deue selon leur forme & teneur, suiuant lesdictz pragmatique sanction & cōcordatz. Et si ledict appellant obtient relief d'appel touchant la seconde appellation d'interlocutoire, ou tierce appellation de diffinitive: celluy qui sera cité par uertu dudit relief d'appel, se portera appellant comme d'abus formellemēt en ladicte Cour de Parlement. & en pareil cas fut dict bien appellé comme d'abus, par arrest donē le ix. iour de Ianuier l'an M.D.XXXII. Aucuns ont esté d'aduis, que ad ce propos une sentence de garnison de main, donnee par le iuge d'eglise, estoit interlocutoire & reparable en diffinitive, & qu'on n'en pouuoit appeller deux fois. Mais le contraire a esté decis par arrest de la Cour, & qu'on en pouuoit appeller deux fois comme d'une diffinitive: par ce que l'instāce de garnison de main n'ha rien commun avecques le principal, & se doit poursuivre separement du principal. Aupar sus pour retourner a nostre propos, aucuns ont voulu prendre occasion par ceste ordonnance parlant des appointemens reparables en diffinitive, ou non, de rēdre illusōires les autres ordonnances permettant executer aucunes sentences diffinitives nonobstant oppositions ou appellations quelconques, & sans preiudice d'icelles: car apres que telles diffinitives estoient donnees, ilz declairoient estre appellans de quelque appointement donnē en la matiere, lequel n'estoit reparable en diffinitive, comme de la forclusion d'enqueste, & de tout ce qui s'en estoit ensuiuy:

ſuiuy: & pource empeschoient que ladicte diffinitue ne fuſt declairee executoire: toutesfois les iuges ſans a ce auoir regard, auroyent declaire ladicte diffinitue executoire: car attendu qu'ilz n'auoiēt point appellé en temps opportun, & quand leſdictz appoinctemens interlocutoires ſe donnoient, ilz ne pouuoient plus empescher apres la diffinitue l'executiō d'icelle par tel appel: car il n'eſtoit plus queſtion ſ'il eſtoit reparable, ou non. D'auantage c'eſtoit faire fraude a toutes les autres ordonnances permettant executer les diffinitues nonobſtant l'appel, & induire ladicte ordonnance a un eſfect tout contraire a celluy auquel elle auoit eſté faiçte: car elle auoit eſté faiçte pour paruenir pluſtoſt a la diffinitue, & en celle maniere elle ēpeſchoit l'executiō de la diffinitue.

Quand donques l'appoinctement n'eſt reparable en diffinitue, & que d'icelluy il y a appel, attendu qu'on ne peut paſſer oultre obſtant lediçt appel, il conuient uoir ſ'il y a point quelque remede pour faire paſſer oultre & uenir a la diffinitue. Certes ſelon droit commun il eſt loyſible de reparer le grief par le iuge qui l'ha faiçt. Et pource en Cour d'eglise en ce royaume ilz ont une maniere d'Apoſtres, qu'ilz appellent reſpoſitoires, ſcauoir eſt par leſquelz ilz remettent l'appellant en l'eſtat qu'il eſtoit au temps de l'appoinctement dont il ha appellé. Mais par areſt de la Cour de Parlement il a eſté diçt pluſieurs fois, que le iuge apres l'appel interieçté de ſon appoinctement, ne peut reparer le grief par luy faiçt: & meſmement par areſt donné le xiiij. iour de Mars M. D. XXXII. & par autre areſt donné le xij. iour d'April audiçt an. Toutesfois pluſieurs iuges de grād auctorité ſont chaſcun iour le contraire, & reparent le grief apres l'appel interieçté: pourueu que l'appel ne ſoit releué, & les inhibitions & deſenſes au cas appartenans faiçtes:

Et ne suffiroit reparer le grief seulement quant au principal, ains fault condamner la partie a la requeste de laquelle a esté donné l'appoinctement, enuers l'appellant es despens faictz par Et au moyen dudit appoinctement, Et de ce qui s'en est ensuiuy. Et de ces arrestz susdictz uient que combien que icelluy au profit duquel est donné l'appoinctement dont a esté appelé, declare a l'appellant dedens la huitaine dedens laquelle il peut se desister de son appel, qu'il n'entend soustenir ledict appoinctement, ne s'en ayder, Et qu'il le somme de se desister de son appel, offrant luy payer les despens faictz par Et au moyen dudit appoinctement, Et de ce qui s'en est ensuiuy: neantmoins l'appellant n'est tenu accepter ladicte offre, Et peut releuer son appel: Et aura les despens de ce qu'il aura faict pour releuer Et playder ladicte cause d'appel puis ladicte offre: Et ainsi en a esté dict par plusieurs arrestz. Ce que ietrouue fort rigoureux, parce qu'il appert euidentement de la malice Et pertinacité de celluy qui refuse telle offre: attendu que par icelle il est totalement rendu indenne. Mais il y ha quelque raison de formalité en ce: car selon le stile de ce royaume, en Cour laye on defere a toutes appellations, Et ne passe lon oultre nonobstans icelles, sinon es cas ou il est specialement permis par les ordonances royales. Or puis que le iuge doibt deferer a l'appel, Et qu'il y ha deféré, il ne peut plus entreprendre cognoissance de la cause: parquoy ladicte offre est inutile: Et est le refus d'icelle excusé pour le default de la iurisdiction Et cognoissance qui est tollue au iuge par le moyen dudit appel.

¶ Plusieurs manieres de sentences executoires nonobstans oppositions ou appellations quelconques

En oultre sentences prouisoires donnees en matiere de re-
 petition de dot ou douaire, dation de tutelle, confection d'in-
 uentaire, interdiction de biens aux furieux ou prodigues,
 refection de pontz & passages, & de alimentz ou medi-
 camentz, & aussi quand il sera question de salaire ou loyer
 des seruiteurs de trois annees, & au dessoubz, seront exe-
 cutoires nonobstans oppositions ou appellations quelcōques,
 & sans preiudice d'icelles. & a ce sont formelles les ordon-
 nances du Roy Charles huietieme article cinquante & un,
 & du Roy Loys XII. article LXXX. Mais il fault entendre
 lesdictes ordonnances des alimens futurs, & non passez,
 tout ainsi qu'on ne peut transiger sur les futurs, ains sur les
 passez. ce que toutesfois nous ne gardons pas quand il est
 question d'alimens & medicamens adiugez a une personne
 blesee: car combien que la personne soit guerie, toutesfois on
 execute la sentence desdictz alimens & medicamens, non-
 obstans oppositions ou appellations quelconques: ainsi qu'il
 sera dict cy apres au iij.liure.

¶ Des sentences donnees en matiere de douaire.

Et au regard des sentences dōnees en matiere de douaire, il
 fault entēdre quād le condāné est heritier du mary, on estoit
 tenu par conuenāce au douaire. car si c'estoit un tiers posses-
 seur, qui tiēt quelques immeubles subiectz audict douaire, &
 fust condanné a en laisser ioyr la demanderesse: en ce cas la
 sentence seroit executoire nonobstant l'appel. & ainsi en fut
 dict par arest donné le xxviij.iour de Nouembre M.D.XXX.
 Dont resulte que la Cour n'entend lesdictes ordonnances a-
 uoir lieu en action reale, mais seulement en action person-
 nele: car en autre matiere ou estoit question d'une robe que

une partie estoit condamnée rendre, ladicte Cour declaira la dicté condamnation n'estre executoire par dessus l'appel, par arrest donné le xxviii iour de february M.D.XXIX. Voire lesdictes ordonnances ne doibuent estre extendues es cas semblables a ceulx qui par icelles sont exprimez, iasoit qu'ilz soient aussi fauorables: car combien que par une mesme sentence un quidam eust esté condamné payer certaine somme de deniers au dessoubz uingt & cinq liures enuers une fille pour ses seruices, & oultre quelque somme de deniers non excedant ladicte somme de uingt cinq liures pour la defloratiō d'icelle: toutes fois auroit esté dict par arrest donné le vij. iour de Mars M.D.XXIX. qu'il auoit esté mal iugé, entant que la dicté sentence auroit esté declairée executoire pour le regard de la somme adiugée pour ladicte defloration.

¶ Sentences diffinitives non excedans la somme de xxv. liures tournois, en matieres pures personnelles & ciuiles, sont executoires nonobstant appel, &c.

Pareillemēt les sentences diffinitives non excedans la somme de uingt & cinq liures tournois en matieres pures personnelles & ciuiles, par l'ordonnance du Roy Loys XII. article lxxxvi. peuuent estre mises a execution nonobstant oppositions ou appellations quelconques, & sans preiudice d'icelles, tant en principal que despens, quelque somme que se montent les despens. Et depuis ladicte ordonnance a esté ampliee par les ordonnances du Roy Francoys premier de ce nom, article sixiesme, iusques a la somme de quarante liures parisis, & dix liures parisis de rente ou renenu. Mais en ce cas conuient que la sentence soit donnée par le iuge royal ressortissant

ressortissant sans moyen, appellez avecques luy quatre Conseillers ou aduocatx, & que le dictü de la sentence soit signé d'eulx. Mais quand la sentence n'excede uingt & cinq liures, il suffit qu'elle soit baillee par le iuge royal seul sans Conseil lers ou aduocatx. Et iasoit que par ladicte ordonnance du Roy Loys il soit dict qu'il fault qu'elle soit baillee par lesdictx iuges royaux en leurs sieges ordinaires, ou en leurs autres sieges durans leurs grands assises: neantmoins nous obseruons tousiours que les sentences dōnees par lesdictx iuges royaux es sieges particuliers, cōme Fōtenay, Nyort, & Lusignē, hors les grāds assises, sont executees comme celles qui sont dōnees durans icelles grāds assises. Et de ce en ha esté decisi par plusieurs arestx. Et fault en ces deux cas que les despēs adiugez par lesdictes sentences, soient taxez par autre que par celluy qui ha donné la sentence dont ha esté appellé. Et notamment i'ay mis ces motx, nō excedās la somme de uingt & cinq liures, apres ces motx les sentēces diffinitiuēs: pour oster l'ambigibologie qui estoit par les motx de ladicte ordonnāce en ce qu'elle met ces motx, les sentences donnees en matiere pure personnele & ciuile non excedans ladicte somme: car aucūs referoient ces motx, non excedās ladicte somme, a la matiere, & nō a la sentēce, par maniere qu'ilx disoient que si la demande contenoit soixante liures, & que la sentēce cōtint seulement uingt liures de condānation, & auparsus absolution, elle ne debuoit estre declairee executoire, a fin qu'il ne resulast inequalité entre le demandeur & defendeur: car si le defendeur eust esté enuoyé entierement absou, & que le demandeur en eust appellé, la sentēce n'eust esté declairee executoire.

¶ De sentences executaires en matiere
de rente & reuenu.

Aussi par quelque temps la Cour ha entēdu & interpreté
ceste

ceste ordonnance du Roy Francois en tant que touche les dix liures de rente, des rentes en argent, ou en bled constituees a pris d'argent. Mais puis certain temps enca elle ha donné plusieurs arestz par lesquelz elle ha declairé les sentēces données touchant rentes foncieres non excedans ladiēte somme de dix liures tant en deniers que en grains, executoires nō-obstant l'appel. Et ay oy dire qu'elle en auoit fait ordonnāce ou declaration les chambres assemblees. Toutes fois ladiēte Cour excepte tousiours les rētes ou deuoirs feodaux: car ilz portent beaucoup plus grand consequence, que les foncieres: d'autāt que par fois un denier de cens sera deu sur une maison qui uauldra mille liures, dont au moyen dudiēt denier de cens, les uentes en appartiendront au seigneur dudiēt denier de cens.

Semblablement aucuns iuges extendoient ladiēte ordonnance es sentences donnees touchant choses immeubles non excedans la ualeur de dix liures de reuenu, en maniere que apres la sentence on faisoit liquider la chose immeuble: Et si elle n'excedoit dix liures, le iuge la declairoit executoire. mais ce ha esté reprouuē par plusieurs arestz, tellement que s'il n'est question que d'une boicellee de terre (qui est ce que peut estre ensemencé d'un boiceau de bled) la sentence n'est executoire. ce que ie trouue biē rigoureux. Voire la Cour par plusieurs ses arestz ha interpretē lesdiētes ordonnāces, quand lesdiētes sentences sont donnees en matiere pure personnelle Et ciuile: comme quand lesdiētes sentences desdiētes rentes sont donnees contre l'obligē qui ha constitué lesdiētes rentes, ou contre son heritier: mais non quand elles sont donnees contre un tiers possesseur des lieux subiectz ausdiētes rentes.

Toutes fois depuis certain temps enca la Cour les Chambres

bres aſſembles ha fait ordonnance, par laquelle elle auroit ordonné que les ſentences donnees en toutes matieres non excedans la ſomme de dix liures pariſis de rente fonciere non portant ſief, ne iuriſdiction, ou l'eſtimation de dix liures de reuenu en grains ou autres choſes ſemblables, ſeront executoires nonobſtans oppoſitions ou appellations quelconques, & ſans preiudice d'icelles. Et ainſi en fut dict par areſt donné le quinzième iour de Ianuier l'an mil cinq cens quarante & quatre pour raiſon d'une rente en ſeigle non excedant ladiſte ualeur. Combien que le demandeur n'eust monſtré la diſte rente eſtre fonciere, ains ſeulement auoir eſté payee pour raiſon de certains lieux: & eust eſté maintenu & gardé en poſſeſſion de ladiſte rente, dont le deſendeur auroit appellé: nonobſtant lequel appel & ſans preiudice d'icelluy, le demandeur auroit requis ladiſte ſentence eſtre declairee executoire. qui auroit eſté empesché par le deſendeur. Le ſeneſchal de poictou ou ſon lieutenant a poictiers qui auoit donné ladiſte ſentence, ſauue au demandeur a ſe pouruoir par la Cour. A laquelle le demandeur baille requête a ceſte fin. qui eſt enterinee par ſentence d'un des Conſeillers a ce commis. laquelle ſentence fut confirmee par ledict areſt, & le deſendeur condamné es deſpens de la premiere inſtance, & de la cauſe d'appel.

¶ Sentences donnees pour taxation
d'eſpices, ſont executoires
nonobſtant l'appel.

Au parſus toutes taxationſ d'eſpices (qui ſont le ſalaire des iuges, qu'ilz ſe taxent tant pour la uiſitation, que conſultatio des matieres qu'ilz uuydēt) doiuent eſtre payees nonobſtant

obstant opposition on appellation quelcōque, & sans preiudice d'icelles, quelque somme de deniers qu'elles se montent: ainsi qu'il est dict par les ordonnances du Roy Loys XII. article xliiij.

¶ Sentences de vingt & cinq liures tournois, & de soixante solz & vn denier d'amende, si sont executoires sans appel.

Plus les sentences de uingt & cinq liures tournois d'amēde tāt enuers le Roy, qu'enuers la partie ciuile, sont executoires en baillant caution par la partie ciuile seulement, & non par le receueur du Roy: comme il est dict par lesdictes ordonnances dudit Roy Loys XII. article lxxij. Et iasoit que par le liure desdictes ordonnances il soit dict qu'elle ayt esté leue publiee & enregistree en la Cour de Parlemēt a Paris le xxviij. iour d'April M.D.XII. toutesfois par arest de ladicte Cour donné le xv. iour d'April l'an M.D.XXXI fut dict bien appellé de ce qu'un iuge auoit declairé une telle sentence non excédant uingt & cinq liures d'amende, executoire non obstant l'appel. & combien que le fermier des amendes de la Cour ou auoit esté dōnée la sentence, dict estre mal & follement intimé, par ce que lon debloit intimer le procureur du Roy, d'autant qu'il estoit fermier desdictes amendes pour le Roy: neantmoins fut dict par mesme arest que ledict fermier estoit bien intimé. Et de rechef fut encores pour le regard de ce que telles amēdes ne sont executoires, baillé sēblable arest le vi. iour de May M.D.XXXII. Est a noter qu'aucuns ont uoulu extendre ladicte ordonnance es soixante solz un denier d'amende, que es Cours royales ressortissans nuement en la Cour payent les appellans temeraires, ou les intimez qui perdent leurs causes: ou les intimez payent l'amende. Mais ce ha esté corrigé & reformé par arest de ladicte Cour donné

donné le xxviii. iour de Mars l'an M.D. XXX. auant pasques. La raison du premier arest portant ladiète ordonnance desdictz uingt & cinq liures d'amende n'estre receue, est pource que ladiète amende procede de delict, & consequemment pour cause infamant, laquelle est suspendue selon droit commun par l'appel. La raison du second arest est, pource que ladiète amende de soixante est accessoire: & par ce moyen si la sentence quant au principal n'est executoire, elle ne le doit estre quant a l'amende.

¶ Sentences d'arbitres, executaires
sans appel.

En oultre les sentences des arbitres confermees par les iuges royaux ressortissans nuement en ladiète Cour de Parlemēt, sont executaires nonobstans oppositions ou appellations quelconques, quant a la peine apposee par le compromis & arbitrage d'estre par les parties a l'arbitrage ordonnance & sentence des arbitres: cōme il est decisi par lesdictes ordonnances du Roy Loys XII. article xxxiiiij. Et selon droit commun il n'estoit permis d'appeller de la sentence du iuge ordinaire, auquel on auoit eu recours pour la reformation de la sentence des arbitres: & pouuoit lon recourir au iuge ordinaire pour la reformation de la sentence arbitraire sans appeller de la sentence: mais aujourdhuy selon nostre stile il en fault appeler, & releuer l'appel pardeuant le iuge royal ordinaire, & ressortissant en la Cour nuement, au ressort duquel demeure la partie contre laquelle on ueult poursuiure la correction de la sentence des arbitres, s'il n'y auoit point proces pēdant sur le different sur lequel les parties auoient eleu les arbitres: car s'il y auoit proces pendant, fault releuer l'appel pardeuant le iuge qui auoit ia entrepris cognoissance de la matiere, pourueu qu'il ayt telle iurisdiction qu'il puisse cognoistre de la

la cause d'appel: car tous iuges n'en peuuent pas cognoistre, & mesmement les iuges chastellains, soient royaux, ou d'autres iurisdiccions. Et en ce cas ie seroye d'aduis qu'il seroit le meilleur de releuer l'appel pardeuant le iuge royal ressortissant nuement en ladicte Cour au ressort duquel demeure la partie contre laquelle on ueult demander la reformation de la sentence des arbitres. combien qu'il se pourroit soustenir qu'on pourroit en ce cas releuer pardeuant le iuge royal superieur du iuge qui auoit ia commence a cognoistre de la matiere: car si l'inferieur est iuge competent, son superieur l'est aussi en cas de ressort & d'appel. Et usent les arbitres en ce royaume du mot, louons, par leur sentece: ou les iuges disent, ordonnons.

¶ Appel de l'adiournement du sergent, n'empesche point la contumace.

D'auantage si on appelle de l'adiournement baillé par un sergent, soit en matiere pure personnele & ciuile ou royale, ou en matiere criminele: ce nonobstant l'adiournement tient, & procedera lon a contumacer l'appellant nonobstant son appel, & sans preiudice d'icelluy, suyuant les ordonnances du Roy Charles VII. article xij. xij. & xiiij. & du Roy Charles VIII. article xci.

¶ Appel d'une prinse de corps, n'empesche point qu'elle ne soit executee.

Aussi si on appelle d'un decret de prinse de corps, uoirc comme icelluy decret estant donné par iuge incompetent, neantmoins ledict decret peut estre execute: mais le iuge ne doit passer oultre a la facon du proces criminel: ainsi qu'il est dict par les ordonnances de la Cour de Parlement a Paris faictes sur l'abbreuiation des proces.

¶ Appel

¶ Appel du decret d'un adiournement personnel quand est valable ou non.

Pareillement si on appelle d'un decret d'adiournement personnel comme donné par iuge incompetent: le iuge qui l'a decreté, ne doit passer oultre a la facon du proces, & est l'appel bien receuable, suivant les ordonnances royaux dudit Roy Charles VIII. article xci. par lequel il est dict qu'on ne peut appeller des decretz des adiournemens personnels donnez par les iuges contre leurs subiectz, & audehors leur ressort & iurisdiction: dont s'ensuit que si ceulx contre lesquels est decreté, ne sont du ressort du iuge, on en peut appeller. Et en ce y ha difference entre une cause civile, & criminelle: car en civile on ne peut appeller d'un adiournement comme donné par iuge incompetent, ains fault aller demander son renuoy. Et en une criminelle on peut appeller du decret d'adiournement personnel, ou de prise de corps. La raison de la diuersité est, qu'il est plus facile d'enuoyer demander son renuoy en matiere civile par procureur, que d'y aller en personne. Toutesfois la Cour de Parlemēt a Paris uoyant que telles appellations de iuge incompetent, empeschoient la punition des crimes, elle ne les uult plus puis n'agueres recevoir: ains ueult qu'on aille demander son renuoy pardeuant le iuge qui a decreté l'adiournement personnel, sinon qu'il y ayt incompetence oculaire, & dont il apparaisse par le decret, ou par les informations: scauoir est comme si par un decret donné par le Seneschal de Poictou ou son lieutenant a Poictiers, il estoit mandé d'adiourner a comparoir en personne un tel demourant a Fontenay le conte, qui est un siege royal distinct & separé de celluy de Poictiers. Et comme un tel cas se offrant feu messieurs maistre Iehan Thibaut procureur general en ladicte Cour, se seroit porté appellant d'un pareil decret comme

contenant

contenant grief oculaire: toutesfois par arest de la Cour l'appel de mondict seigneur le procureur general, & celluy de l'accusé fut depuis mis au neant, & les despens dommages & interest reseruez en diffinitive: parce que l'advocat de la partie intimée playda qu'elle estoit poure, & qu'elle ne pourroit payer les despens dommages & interest, & que pour iceulx elle seroit contraincte de laisser la poursuite du supposé homicide dont estoit question, duquel l'accusé depuis auroit esté enuoyé absou par sentence confirmée par arest.

¶ On ne peut appeller de l'octroy de lettres royaux.

Fait a entendre qu'on ne peut appeller de l'octroy de lettres royaux. mais si elles sont contre les ordonnances royaux, ou arest de la Cour, on peut appeller de l'exécution d'icelles: & en la cause d'appel on pourra deduire mesmes moyens que si on estoit appellant de l'octroy. & n'est mestier que l'exécuteur desdictes lettres excède ce qui luy est mandé par icelles pour iustifier l'appel interiecté de l'exécution. Et doit on releuer en la Cour de Parlement les appellations interiectées de l'exécution des lettres royaux faicte par un sergent.

¶ Appel de l'exécution d'une sentence diffinitive a quoy vault.

Et si on appelle de l'exécution d'une sentence diffinitive sans qu'on soit appellant de la sentēce, le sergent executeur saisira & prendra des meubles ou immeubles iusques a la concurrence de la sentēce, nonobstans oppositions ou appellations quelcōques, & sans préiudice d'icelles, & les mettera en main tierce, sans toutesfois proceder a la uente ou alienation: comme il est dict par les ordonnances du Roy Charles VII. article xij.

¶ Toutes

¶ Toutes executions par vertu d'obligations ſoubz ſeal royal & authentique, procedent nonobſtāt appel.

Finale^{ment} toutes executions faiçtes par uertu d'obligations paffees ſoubz ſeal royal ou autre ſeal authentique, au dedens des fins & limites ou il eſt authentique, peuuent eſtre faiçtes nonobſtans oppoſitions ou appellations quelconques, & ſans preiudice d'icelles quant a la garniſon de main, ſuyuant les ordonnances du Roy Charles VIII. article liiij. dont cy deſſus au commencement de ce liure nous auons ample^{ment} parlé.

¶ Sentences de garniſon de main, &c. execu^{toires} ſans appel.

Auſſi les ſentences de garniſon de main, de quelque ſomme que ce ſoit, donnees par iuges royaux reſſortiſſans nuemēt en la Cour, ſeront executees nonobſtans oppoſitions ou appellations quelconques, & ſans preiudice d'icelles, en baillant caution: ainſi qu'il eſt dict par les ordonnances dernieres article lxiij. Et combien que par ledict article il ſoit dict que les ſentences de recreance & reintegrande doibuent eſtre donnees par le iuge appellez ſix, aduocatx ou Conſeilliers, & non quant es ſentences de garniſon de main: toutesſois ſi elles exceedent uingt & cinq liures, il y fault appeller quatre aduocatx avecques le iuge, ſuyuant les ordonnances precedentes parlans des quarante liures pariſis. Et iaſoit que par areſt donné le xxiiij. iour de May M.D.XXX. il fut dict maliugé en ce qu'un iuge auoit condamné a garnir la main de la ſomme dont queſtion eſtoit, ſimplement, ſans dire, ou de quitance de ladiçte ſomme: toutesſois en ce pays de Poiçtou, on n'ha accouſtumé que de condamner a garnir la main de la ſomme: & me ſembleroit que l'appel fondé en ce ſeulement, ſeroit

bien delicat : car le debteur n'est point forclos en l'execution de la garnison de s'ayder de ses quitances.

¶ Sentences donnees par contumace, executoirs sans appel.

Et cōbien que par cy deuant il falloit que les sentences susdictes eussent esté donnees parties oyes, a ce qu'elles eussent peu estre executoirs nōobstant l'appel, & sans preiudice d'icelluy: neantmoins par les ordōnances dernieres article xxx. il est dict que les sentēces donnees par contumace, seront executoirs nonobstant l'appel en toutes matieres esquelles elles seroient executoirs si donnees estoient parties oyes.

¶ Comment lesdictes sentences doibuent estre donnees, & mises en execution.

Conuient entendre qu'il fault que toutes lesdictes sentences soient donnees par iuges royaux ressortissans nuement en la Cour de Parlemēt: & que de plain uol on ne les doibt pas faire mettre a execution reale nonobstant l'appel interiecté d'icelles: mais qu'il fault faire adiourner la partie condamnée pour uoir declairer lesdictes sentēces executoirs: & ce faict, pour uoir bailler caution par la partie qui les ha obtenu. Toutesfois aucuns iuges par leurs sentences donnent en mandement icelles executer nonobstant oppositions ou appellations quelconques, & sans preiudice d'icelles, quand ilz uoyent qu'elles y sont subiectes. ce qui est bien faict, pour obuier a circcuit & fraiz. Et seroit mestier qu'il y eust ordonnance qui a ce faire astraingist les iuges: comme ilz ont de coustume faire es sentences de alimens & medicamens. Et quand lesdictes sentences sont telles, que suiuant les ordonnances susdictes elles doibuent estre executoirs, les iuges les doibuent telles declairer sans attendre lettres royaux, & ne doibuent differer pour adiournement & inhibition a eulx faictz par uertu des reliefsz

reliefz en cas d'appel. mais si la Cour auoit faict inhibition speciale en cas parties oyees de non attenter ne innouer: en ce cas y faudroit obeir, ainsi qu'il est dict par les ordonnances du Roy Francoys articles iij. & v.

Et est a noter que esdictes matieres esquelles les sentences diffinitives sont executoires, si toutes fois il y ha appel d'incōpetēce ou recusation de iuge, on ne peut passer oultre a poursuiure le principal desdictes matieres: ainsi qu'il est dict par les ordonnances du Roy Loys XII. article lxxxij. & lxxxiiij. Toutes fois quant a recusation il y ha esté autremēt pourueu par les ordonnances de ce Roy, comme il ha esté cy dessus a plain deduiet. Aussi toutes les sentences es matieres susdictes sont seulement executoires quant au principal d'icelles, & non quant aux despens adiugez par lesdictes sentences, fors quant es sentences de uingt liures paris, & quarante liures paris, ou dix liures paris de rente ou reuenue: lesquelles par lesdictes ordonnances sont expressement executoires tant en principal que despens. Et pource par arrest de la Cour donné le ix. iour de Februrier l'an M.D.XXXII. fut dict que une sentence de sequestre en matiere de complaincte n'estoit executoire quant aux despens adiugez par icelle. Et fault que le iuge uuyde sur le champ l'altercation d'entre les parties sur ce, si sa sentence doibt estre declairee executoire, ou non: & n'en doibt faire proces par escript, ne pour ce prendre espices: ainsi qu'il fut dict par arrest donné le viij. de Februrier l'an M.D.XXIX.

¶ De pleiges es sentences executoires.

Fault aussi que les pleiges que baillera celluy qui uult faire declairer lesdictes sentences executoires, soient soluables, & certifiez pardeuant le iuge ou son commis par autres personnes aussi soluables que iceulx pleiges sont soluables. Et on se

B ij constitue

constitue certificateur en affermant iudiciairement sur ce enquis, que le pleige présenté est suffisant pour la somme. Et se peut on adresser cōtre ses pleiges & certificateurs auāt que contre le principal debteur pour la somme ou chose pour laquelle ilz se sont constituez pleiges, s'il est dict qu'elle doibue estre rendue. Toutes fois comme par arest quelqu'un eust esté condāné payer les arrierages de certaine rente, & par mesme arest un autre eust esté condamné a l'en rendre indēne: le premier condamné paye les arrierages, & en prēd quitance par notaires: & par uertu dudit arest & de ladicte quitance il fait faire commandement a son condamné de luy payer les arrierages contenuz par lesdictz arest & quitance. son condamné s'oppose au commandement. & pource que le sergēt ueult passer oultre nonobstāt l'opposition, il en appelle, & dit qu'il falloit que fust faicte cōtre luy liquidation desdictz arrierages par autre instance separee, auant que proceder contre luy par execution. L'autre defendoit disant qu'ilz estoient tous liquides par lesdictz arest & quitance. L'appellant disoit que quelque chose qui fust contenue par ladicte quitance, l'autre n'en auoit tant payé; & que luy en auoit esté remise partie, & qu'il ne le nieroit point s'il en estoit interrogué, & que ladicte remission luy debuoit seruir. fut dict par arest donné le x. iour de Iuillet M. D. XV. qu'il auoit esté bien appelé: & commet la Cour deux d'icelle pour oyr les parties a la Barre sur la liquidation desdictz arrierages & execution du premier arest. Et le motif de la Cour fut, par ce que celluy auquel est promise indemnité, ne peut agir, si en quelque maniere il peut se rendre indemne: aussi que la quitance faicte auecques le creditur, ne luy pouuoit nuyre, cōme non faicte auecques luy. Autre chose eust esté d'un pleige iudiciaire, & que le tout eust esté liquide. Mais quand il ne seroit liquide, ie conseilleroye

seilleroye encores d'appeller le pleige en mesme instance, & conclure contre luy en execution de l'arest ou sentence comme contre le principal. Et si le proces & cause d'appel prend l'og traict, & que les pleiges ne soient solubles que pour les fructz qu'ilz ont ia receu: partie appellât peut requerir que le recredientaire qui ha eu la recreance dont ha esté appellé, ayt a renouueller les cautions, & bailler autres pleiges: ainsi qu'il fut dict par arest le xij iour d'April l'an M.D.XVIII.

¶ De la caution que baille le recredientaire d'un benefice.

Et iasoit que par arest donné le x. iour de Februrier M.D.XX. fust dict qu'un recredientaire d'un benefice ne bailleroit caution de rendre les fructz, pource qu'il n'auoit point esté ordonné ne adiugé sequestre du benefice pendant proces: neantmoins ie seroye d'aduis, si semblable cas occurreit, que le recredientaire fust cōtrainct bailler caution s'il y auoit appel de la recreance, attendu que l'ordonnance est a ce forinelle, & ne distingue s'il y ha eu sequestre, ou non. Vray est que si le sequestre auoit esté requis par le demandeur, & le defendeur l'eust empesché, alleguant possession triennale paisible, & eust esté enuoyé dudit sequestre, & puis apres eust obtenu recreance, dont le demandeur eust appellé: en ce cas ie seroye d'opinion que le recredientaire ne seroit tenu de bailler caution: pource qu'en ayant esté enuoyé absou du sequestre, il est aucunement approuué possesseur du benefice.

¶ De la desertion d'appel.

Mais en toutes matieres quand on ha appellé de quelque sentence ou appoinctement interlocutoire, & qu'on n'ha releué dedès le temps de la coustume du pays ou des ordonnances royaux, qui est de trois moys, l'appel est desert: & peut

celluy qui ha obtenu ladicte sentence, faire adiourner ledict appellant pardeuant le iuge pour uenir proceder sur l'execution de ladicte sentence, nonobstant ledict appel comme estant desert, & pardeuant le iuge superieur pardeuant lequel se debuoit releuer ledict appel, pour monstrier & enseigner de la diligence qu'il ha faict dudict appel releuer, icelluy dire & declairer desert si mestier est: & en oultre proceder sur icelluy comme de raison, ainsi qu'il est dict par les ordonnances du Roy Charles VII. article xy. Et n'est mestier a ceste fin obtenir lettres royaux, sinon quād il fault adiourner en la Cour de Parlement: car on ne peut adiourner communement en la Cour sans lettres royaux. Et en toutes autres appellations il fault deferer a icelles, suiuant nostre stile de France, & ne passer oultre nonobstant l'appel: ainsi que ha esté dict souuent cy dessus.

¶ Epilogue de ce premier liure.

Et pour ce icy finit la tissure & forme de proceder en premiere instance: par maniere qu'il n'est difficil cognoistre cōmēt lon doibt appeller a droit sa partie aduersē, & en quelle sorte on la doibt contumacer, si elle n'y compare: & par apres quel ordre de procedure il fault tenir quand les deux parties sont presentes: & comment il fault donner sentences, & icelles executer: & lesquelles peuuent estre mises a execution nonobstant oppositions ou appellations quelconques, & sans preiudice d'icelles.

¶ Fin de ce premier liure.

PARAPHRASE
 DV SECOND LIVRE DES-
 diètes Institutions par lediēt auteur.



NOUS auons traicté on premier liure de ce qui touche la premiere instance des iugemens: il conuient en ce second liure declairer ce qui cōcerne la secōde instance: laquelle gist en appellations. Nous commēcerons doncques par la definition d'appellation.

¶ Definition de appellation.

Appellation est la plaincte qu'on faiēt de quelque tort, qui a esté faiēt par un iuge, sergent, ou autre publique personne, soubz forme ou ombre de iustice, ou uoye iudiciaire.

¶ On ne peut appeller d'une priuee personne.

Car fault entendre, que ne receuons l'appellation qui est interiectee d'un tort ou grief faiēt par une priuee personne. Et pour ce mieulx demōstrer, ie reciteray un cas aduenu, faisant ad ce propos. Vn Abbé faiēt defense a un iuge d'une sienne terre, ou seigneurie, depēdant de son abbaye, ainsi qu'il tenoit la Cour & iurisdicțiō de ladiēte terre, de nō la tenir: & par force l'oste du siege. dont le iuge appelle comme d'abus formellement en la Cour de Parlement. Il releue: faiēt adiourner, & intimer l'Abbé: & plaide sēs causes d'appel. L'Abbé diēt qu'il n'est receuable comme appellant, parce qu'il est appellant de l'Abbé estant priuee personne: & defend oultre

par fins peremptoires. Neantmoins l'appellant gaigne sa cause en la Cour de Parlement a Paris donné le ij. iour de iuillet l'an M.D.XV. Car il ne pouuoit faire ladicte desense comme une priuee personne, & la faisoit comme seigneur de la iurisdiction qu'exercoit ledict iuge pour ledict Abbé. Vn autre cas semblable: Le seigneur auoit baillé la capitainie de son chasteil a quelqu'un: il le destitue dudit estat: & par les lettres de destitution, il met, qu'il le priue dudit office, pource qu'il y ha mal uersé. Le capitaine s'en porte appellant a la Cour de Parlement a Paris. Il y faict adiourner & intimer le seigneur: qui apres que l'appellāt a plaidé ses causes d'appel, dict que l'appellant n'est receuable comme appellāt, parce qu'il est appellant a priuata persona: & qu'il le pouuoit reuoker a sa uolunté. L'appellant dict que s'il le uouloit reuoker, & qu'il peust le faire, il ne debuoit le faire pour auoir mal uersé: car cela emportoit infamie: quoy que soit, ce chargeoit son nom, & bon fame: & qu'il le debuoit reuoker purement & simplement, sans expression de ladicte cause. Il est dict par arrest, mal procedé, & bien appellé.

CComment on se doibt pouruoir contre vn sergēt mal traictant celluy qu'il prend prisonnier.

Toutesfois si le sergent en executant quelque mandement de iustice frappe ou blesse la partie contre laquelle il exploite, elle ne s'en doibt pas pourueoir par appel, ains en faire faire information, & la rapporter pardeuant le iuge dont procede le mandement. Et ainsi en fut dict par arrest des Conseillers Generaux sur le faict de la iustice des aydes du Roy nostre sire a Paris le xxviij. iour d'Octobre M. D. XXVIII.

CQuand vn sergent peut excéder celluy qu'il constitue prisonnier.

Mais

Mais il eſt permis au ſergent, ſ'il y ha reſiſtence, de uſer de force: & n'eſera tenu: par maniere qu'il luy eſt loyſible d'excéder & frapper celluy qu'il a coſtitué priſonnier, ſ'il ſe ueult defendre, ou le bleſſer, en le menant : ou bien ſi en prenant le priſonnier, il met la main a l'eſpee pour empeſcher de le prendre. Neantmoins ſi le ſergēt craint rebellion, ſera le meilleur de demander permiſſion d'uſer de force & de main armee: mais il n'y ha que la Cour de Parlement ou du grand coſeil qui le permette ordinairement : uoire elle ne baille point telle permiſſion qu'il n'y ayt information de la rebellion precedēte, ou de ce que le delinquant eſt couſtumier uſer de force, & de contemner les mandemens de iuſtice.

¶ Dedens quel temps il fault appeller.

Et pour reuenir a noſtre propos, il fault interiecter toutes appellations on pays couſtumier, incontinent que le grief & tort eſt faiēt, que nous appellons en Latin Illico.

¶ On eſt releué de n'auoir appellé Illico.

Mais le Roy releue ordinairement par les lettres de relief obtenues de la Châcellerie de ce qu'on n'ha appellé illico. & fault par les lettres ſuſdictes declairer le tēps qui eſt enſuiuy depuis le grief faiēt iuſques au iour de l'appel formé. Car ſi l'intimé (qui eſt la partie aduerſe de l'appellant) a faiēt quelque choſe pour l'execution de l'appoinctement ou ſentence entre les deux, ſcauoir entre le iour que ha eſté prononcee la ſentence, & le iour que l'appel a eſté formé: icelluy intimé peut pardeuant le iuge pardeuant lequel eſt pendant lediēt appel, requerir condamnation des fraix de ce qu'il ha faiēt en ceſt intervalle de temps: combien que l'appellant ſoit releué de l'illico. car le Roy ne remet point l'intereſt priué de la partie, ains releue ſeulement, a fin de le faire recevoir comme appellant. Car ſ'il n'eſtoit releué de l'illico, il ne ſeroit reccu
comme

comme appellant. Et en ay ueu perdre une cause d'appel en la Cour de Parlement, a default d'estre releué de l'illico. Et en fut l'aduocat de l'appellant condamné en une amende pour sa negligence de ne l'auoir aduerti.

¶ On ne doit faire difficulté de releuer de l'illico dedens six mois.

On ha faict quelque difficulté depuis les ordonnances royaux publiees sur l'abbreuiation des proces en l'an M. D. XXXIX. de bailler en la Chancellerie de Paris lettres royaux de relieuement de l'illico, si lon n'auoit appellé dedes huit ou quinze iours, combien que par lesdictes ordonnances n'en fust rien touché. Et encores aujourdhuy en la Chancellerie de Bourdeaux on n'expedie gueres lettres de relieuement d'illico de plus de douze ou quinze iours. Toutesfois a presēt en la Chancellerie de Paris on baille lettres de relieuement dudit illico, comme on faisoit auparauant lesdictes ordonnances, nonobstant qu'il y ayt trois, uoire six mois, que la sentence soit donnée: pourueu que lon ne narre point par les lettres, auoir faict acte, par lequel on ayt approuué la sentence.

¶ On n'est tenu de demander Apostres.

On pays de droit escript, il falloit auparauant lesdictes ordonnances dernieres, que l'appellāt demādaſt Apostres, c'est a dire lettres dimissoires: par lesquelles le iuge duquel on estoit appellant, declairoit s'il deferoit a l'appellation ou non. Et bailloit delay de releuer l'appel pardeuant son superieur, selon la distance des lieux. mais par lesdictes ordonnances article cxvij. il est dict que lon ne sera tenu de demāder apostres ondict pays de droit escript. Et sont releuez de ceste peine. mais on baille l'amende aux temeraires appellans comme on
pays

pays coustumier : combien que auparauant ilz n'en payassent. Et ce ha lieu en Cour laye: car en Cour d'Eglise tant en la France coustumiere, que en pays de droict escript, on use encores d'apostres. Parce que les ordonnances royaux ne se extendent es Cours ecclesiastiques, s'il n'est dict expressement, comme est dict quant es appellations comme d'abus, ainsi qu'il sera dict cy apres. Toutesfois ce n'est que reduction au droict canon: ainsi que dirons.

¶ Pardeuant qui doibt estre l'appel formé.

L'appel peut estre formé pardeuant le iuge ou greffier quād l'appointement dont on appelle est donné: ou pardeuant le sergent qui le signifie, ou met a execution: ou par apres pardeuant deux notaires de Cour laye: ou pardeuant un, & deux tesmoins: ou par les lettres royaux mesme de relief d'appel.

¶ N'est mestier declairer les griefz en le formant.

Et en formant l'appel n'est mestier declairer les griefz. & supposé que la sentence contienne plusieurs chefz, toutesfois suffit de former l'appel en general en ce que la sentence fait contre celluy qui en appelle. car on pourroit declairer estre appellant de quelque chef, on quel on n'auroit matiere d'appeller. mais fault attendre a le declairer par les lettres de relief, ou en cōcluāt on proces par escript. Et pource nous ne gardons en Cour laye la forme d'appeller baillee par le droict canon. Laquelle toutesfois on garde encore en ce royaume en Cour d'Eglise. Car si on appelle d'un appointement donné par un iuge d'Eglise qui soit interlocutoire, il fault bailler sa cedula appellatoire dedens dix iours apres ledict appel formé, & par icelle deduire ses griefz, & requerrir le iuge instamment de bailler apostres reuerentiaux, ou autres telz que de raison.

¶ Trois

¶ Trois manieres d'Apostres en Cour
d'Eglise.

Et faict a noter qu'il y a trois manieres d'Apostres: Reuerentiaux, Refutatoires, & Repositoires. Les reuerentiaux sont, quãd le iuge desce a l'appellation, & declare qu'il sursoyt pour reuerence dudit appel. Les refutatoires sont, quãd il declare qu'il passera oultre, nonobstant ledict appel, & autres, & sans preiudice d'icculx. Les repositoires sont, quãd le iuge uoyãt la cedula appellatoire auoir greuë la partie, il repare le grief, & remet l'appellant en l'estat qu'il estoit auãt l'appoinctement donné, duquel il ha appelle.

¶ Fatales du droict commun n'ont plus de
lieu en ce royaume.

Parcillement nous ne gardons point les solennitez des fatales introduictes de droict cõmun: car iasõit que l'appellãt differe de poursuiure son appel par deux ans, il ne dechoit point de son appel, & l'appel n'est desert. Toutes fois il me s'ẽbleroit qu'il auroit perẽption d'instãce aussi biẽ en la cause d'appel pardeuant les iuges inferieurs des Cours de Parlement, tout ainsi que en la premiere instance, auant qu'il fust conclud comme en proces par escript, ou qu'il y eust contestation en appellation uerbale. Car le droict ciuil ueult qu'il y ayt peremption d'instance aussi bien en cause d'appel par fatales de deux ans, cõme par trois ans en premiere instance. Mais ie n'ay point ueu user de peremption d'instance en cause d'appel pardeuãt les iuges inferieurs. Au regard des Cours de Parlement il n'y pourroit auoir peremption: parce que ou sont appellatiõs uerbales, ou proces par escript. Quãt es appellations uerbales, apres la presentatiõ des parties faicte au greffe des presentations, il ne reste que a faire mettre la cause au roolle. Ce qui ne gist entieremẽt en la puissãce de la partie:

tie: comme il eſt notoire. car bien ſouuent une poure partie ſera bien un an ou deux a pourſuiure a faire mettre un. cauſe au roolle & en auoir expedition.

¶ D'une chambre en Parlemēt, pour decider par chaſcun iour les appellations verbales.

A quoy le Roy & meſſeigneurs de la Cour debueroient pourueoir, & auoir chambre, en laquelle continuellement on playdoyſt appellations uerbales, & non pas ſeulement deux ou trois fois la ſemaine, comme on faiēt. Et quand ce ſont proces par eſcript, apres qu'il eſt conclud en iceulx comme en proces par eſcript: & les griefs & reſponſes a iceulx fournis, avecques la production nouuelle, les contredicts, & ſaluations, ſi le cas y eſchoit, ou au lieu deſdictes choſes qu'on ayt prins forcluſions d'icelles faire: ne peut plus eſtre imputee negligence a la partie. Car c'eſt au rapporteur d'en faire ſon rapport a la Cour.

¶ Continuation des cauſes d'un Parlement a l'autre prochain.

Anciennement les procureurs de la Cour eſtoient tenuz faire preſentation pour les parties y playdans en chaſcū commencement de Parlement, qui ſe faiēt a la ſainct Martin. Car on prenoit diſcontinuation des cauſes pour raiſon du Parlement qui ceſſe a la feſte noſtre dame en Aouſt, quant a y faire preſentation, iuſques au lendemain de la ſainct Martin. Mais par ordonnance du Roy Francoys premier de ce nom, il a eſté ordonné que les cauſes pendans es Cours de Parlement, ſeroient reſeruees & continuees d'un Parlement en autre: ſans ce que les procureurs ſoient tenuz de faire autre preſentation que la premiere. Toutes fois aucuns procureurs prennēt encōre des parties de mie preſentation de chaſcune cauſe par chaſcun an: ce qui n'eſt raiſonnable: ueu que
la

la peine cesse, & ne reuiendrait en ce faisant ladicte ordonnance au soulagement des parties, contre l'intention du Roy.

Apres qu'ouons declairé comment il fault former les appellations, il conuient monstrer comment elles se doibuent releuer, car il fault tousiours relouer deuant le prochain iuge superieur.

¶ Des degrez de la iurisdiction ou iustice de France.

Et pour ce miculx entendre, il fault scauoir que en France sont plusieurs degrez de iurisdiction. Le premier degre est des iuges chastellains des chastellainies, & des seneschaux des autres seigneuries qui n'ot droit de chastellainie. Et ces iuges chastellains & seneschaux cognoissent des causes en premiere instance. Et ne cognoissent des causes d'appel. Le second degre est des seneschaux & secondz iuges des chastellainies non royales. car en une chastellainie sont deux iuges: le premier, qui cognoist en premiere instace des causes: qu'on appelle iuge chastellain. & ne cognoist en ce pays de Poictou des causes criminelles, & ne baille tuteles, ne curateles, ne iust, ne mesures: car il ha seulement l'exercice de la basse, & fonciere iurisdiction. Toutesfois on gouuernemēt de la Rochelle, les iuges chastellains cognoissent des causes crimineles, baillēt tuteles & curateles. Et les plaidz qui sont deuant ces iuges chastellains, se nommēt les preuostez ou petites assises. Et sont aussi les chastellains royaux, qui cognoissent de causes criminelles, mais ne cognoissent de causes d'appel. Les autres iuges des chastellainies sont les seneschaux. Et cognoissent de causes d'appel, de crimes, & de tous cas. Et leurs plaidz sont nommez les grāds assises. Le tiers degre est des Baillifz & seneschaux des prouinces, ou leurs lieutenāts: desquelz on appelle nuement & sans moyen en la Cour de Parlement. Et cognoissent

cognoiſſent des appellatiōs interiectees de tous les ſeneſchaux des ſeigneuries & chaſtellainies de leur reſſort & iuriſdiction, & des appellatiōs interiectees des chaſtellains royaux de leurs ſieges. Car en chaſcun ſiege royal ſont iuges chaſtellain & ſeneſchal. Et auons ordonnances royaux de la diſtinctiō de la iuriſdiction des iuges preſidiaux & preuoſtaux, faiſtes par le Roy Francoys premier de ce nom, du dixneuſieſme iour de Iuing M.D.XXXVI. Leſquelles cy ne ueuil repeter, parce qu'elles ſont imprimees, & un chaſcun les peut auoir. Les iuges preſidiaux ſont les ſeneſchaux, ou Baillifz royaux, leurs lieutenāſ generaux, particuliers, & conſeillers. Les preuoſtaux ſont les iuges chaſtellains, parce qu'en aucuns lieux on appelle les chaſtellains preuoſtz.

¶ Des degrez de releuer appellations.

Et pour plus euidente doctrine ie ueuil exemplifier les degrez, par leſquelz il fault releuer une appellation. Premiere-
ment du Chaſtellain de la ſeigneurie de Maroil, il fault releuer pardeuant le ſeneſchal de ladiſte ſeigneurie & Chaſtellainie de Maroil. Et ſemblablement fault releuer pardeuant ledict Chaſtellain de Maroil toutes les appellatiōs interiectees de tous les ſeneſchaux des ſeigneuries tenues & mouuans de ladiſte Chaſtellainie. Dudiſt ſeneſchal de Maroil fault releuer pardeuant le ſeneſchal de Touars, pource que ladiſte Chaſtellainie de Maroil eſt tenue de ladiſte uicōtē de Touars. Et dudiſt ſeneſchal de Touars on releue pardeuant le ſeneſchal de Poictou, ou ſon lieutenant a Poictiers: parce que ladiſte uicōtē eſt tenue du Roy a cauſe de ſon chaſtel & chaſtellainie de Poictiers. Et dudiſt ſeneſchal de Poictou, ou ſon lieutenant, on releue en la Cour de Parlement a Paris.

¶ Quon

¶ Qu'on appelle en France de la quatriesme sentence.

Dont sensuit que on peut appeller quatre fois en une cause, combien que de droit commun il ne fut loysible que appeller pardeuant deux iuges, & de la sentence du tiers iuge on ne peust appeller. ce qu'on garde encore en Cour d'eglise, comme tout le parsus du droit canon, fors ce qui est contre la liberte du Royaume.

¶ Qu'il seroit vtile, supprimer les degrez des iurisdiccions du Royaume.

Pource le Roy & monseigneur le Chancelier debueroient pouruoir a supprimer & oster si grand nombre de degrez de iurisdiccions. Et quand il y auroit deux degrez de iurisdiccions, subalternes & inferieures, il suffiroit. scauoir est, un iuge en chascune chastellainie: duquel on appelleroit droitement, & sans moyen, pardeuant le iuge presidial: duquel les appellations ressortissent nuement en la Cour de Parlement. Et supprimer tous les iuges & iurisdiccions des autres seigneurs non estans seigneurs chastellains. Car la chose publique en est grandement interessee, & les pures subiects grandement uexez: parce que s'il y ha quelque creditier, qui ayt une action a intenter contre le subiect d'un seigneur ayant basse iurisdiction, le debteur & le seigneur ou son procureur suscite par le debteur, en demanderont le renuoy & obeissance. Lequel renuoy leur fault faire a la prochaine assise, laquelle ne tient que en un an ou deux ans une fois: & n'ya procureurs, ne conseil, ne logis au lieu ou elle tient. Et si le Roy scauoit les grands inconueniens qui en adueniennēt tous les iours, ie ne say doubte, qu'il y pouruerroit en brief pour le bon zele
de

de iustice & soulagement qu'il ha enuers ses subiectz. Et ne fault auoir regard a la diminution des emolumens des iurisdiccions des seigneurs inferieurs par dessoubz le Roy. car l'exercice leur en couste presque autant que l'emolument. Et aussi ne fault preferer un bien priué au publique.

¶ De n'appeller omis le moyen.

Or ueux lesdictz degrez de iurisdiccions, est a noter, que si l'appellant omet le moyen, & releue pardeuant le superieur du moyen: pourtant l'appel n'est desert. Mais le seigneur de la iurisdiction moyenne, ou son procureur ensemble l'intimé peuvent demander le renuoy de ladicte cause d'appel. & leur doit estre fait, & l'appellant condamné es despens de l'assignation baillée pardeuant ledict iuge superieur, & de ce qui s'en est ensuiuy. Car de droict commun mesme on ne pouuoit faire prorogation de iurisdiction en cause d'appel. Et moins par nostre usance, q'ueult que les iurisdictionz soyent patrimoniales.

¶ En quelz cas la Cour de Parlement cognoist du principal avecques l'article d'appel.

Par maniere que la Cour de Parlement cognoissant de la cause d'appel d'un appoinctement interlocutoire, ne cognoist point du principal, sinon en causes pitoyables, comme entre le pere & le filz, le mari & la femme, mesmement si le procureur general du Roy se y rend partie, & le requiert: ou bien quand un debteur est appellant du deny de quelque renuoy que le iuge luy ha fait, & que la Cour uoyt qu'il ha interiecté l'appel pour delayer: & que l'intimé ha baillé requeste a la Cour ad ce que l'appellant en playdant la cause d'appel, uienne respondre a la garnison de main, de la dette demandée, & dont il appert par instrument en forme authentique: lors la Cour en uuydant l'article del'appel, ha accoustumé de faire droict de ladicte garnison de main, & icelle adiuger, si la

debte est claire & liquide : mais si elle n'est liquide , elle ren-
uoye les parties pardeuant le iuge ordinaire.

¶ En quelz cas on doibt releuer nuement & sans
moyen es Cours de Parlement.

Nous auõs plusieurs cas esquelz on doibt releuer droitement
& sans moyen en la Cour de Parlemēt: c'est ascauoir, quād on
appelle de l'executiō de quelques lettres royaux: car on n'ap-
pelle point de l'oētroi. Aussi quand on appelle des iuges dele-
guez & commis par lettres royaux , soit qu'ilz soient com-
mis particulièrement en une cause , ou generalmente en cer-
taines causes, ou pour le regard de certaines personnes. com-
me les Conseruateurs des priuileges royaux des uniuerſitez
de ce royaume: lesquelz cognoissent des causes des escholiers:
& mesieurs des requestes du Palais a Paris, qui cognoissent
des causes possessoires & personnelles de ceulx qui ont leurs
causes commises pardeuant eulx. Combien que en eulx y ayt
autre raison: scauoir est , qu'ilz sont du corps de la Cour de
Parlement. Voire & si on appelle des executeurs des sen-
tēces de ces iuges deleguez, les appellatiōs ne s'en vont par-
deuant lesdictz iuges deleguez, ains s'en vont en la Cour de
Parlement. Combien que parcydeuant on eust accoustumē de
releuer au grand conseil les appellations interiectees des com-
missaires commis pour instituer es offices nouuellement creez
par le Roy: toutesfois depuis peu de temps on auoit attribué
la cognoissance de ces causes a la chābre de mesieurs des re-
questes de l'hostel du Roy ou Palais a Paris. Et en ayueu con-
damner par le grand conseil es despēs de la folle anticipation
faicte audict grand conseil en telle cause depuis cinq ans en-
ca. dōt on peut cognoistre cōbien porte de preiudice aux par-
ties

ties de ne publier poit es ſieges inferieurs, & de ne faire point imprimer les ordonnances qu'on faiët par chaſcun iour.

¶ *CA* qui on doit appeller des iuges deleguez.

Et quant es autres iuges commis & deleguez par autres que le Roy, il fault appeller d'eulx, a celluy qui les a delegué & commis: fors quand c'eſt un commiſſaire, auquel eſt commiſe uniuerſelement la cognoiſſance des cauſes d'un ſiege: comme un Official commis par un Eueſque a l'expedition des cauſes de ſa iuriſdiction eccleſiaſtique. Car on ne appelle pas de l'Official a l'Eueſque: mais a l'Archeueſque, ou au Metropolitan ſuperieur. Semblablement des lieutenans & aſſeſſeurs on n'appelle point a leurs ſeneſchaux ou Baillifx, mais au ſuperieur des ſeneſchaux ou Baillifx.

¶ *CA* qui on doit appeller d'un iuge faiſant enqueſte venant de ſon ſiege.

Autresfois eſt aduenue doubte. Vn iuge preſidial retient la confection d'une enqueſte de ſon ſiege, en la production des teſmoings pardeuant luy: on appelle de luy: pardeuant qui il falloir releuer c'eſt appel. Aucuns diſoyent qu'il falloir le releuer pardeuant le iuge preſidial autre que celluy duquel on eſtoit appellant, comme pardeuant ſon aſſeſſeur, tout ainſi que ſi on eſtoit appellant d'un enqueſteur d'un ſiege preſidial. Car il fault en ce cas releuer pardeuant le iuge preſidial l'appel interiecté de l'enqueſteur d'un meſme ſiege preſidial. Les autres tenoient qu'il falloir releuer c'eſt appel en la Cour de Parlement, tout ainſi que ſ'il euſt eſté donné par le iuge preſidial en iugement, & en autre partie de la cauſe. & ceſte dernière opinion me plairoit plus que la première.

C ij

¶ *CA* qui

¶ **CA** qui on appelle d'un iuge exerçant la iurisdiction temporelle de la seigneurie appartenant aux eglises.

Il faut entendre que anciennement selon le droit canon on appelloit de l'Euesque tenant & exerçant sa iurisdiction laye a luy appartenant a cause du temporel de son euesché, a l'Archeuesque superieur. Mais ce ne fut iamais receu en France: pource que les iurdictions sont patrimoniales, & communement les Euesques tiennent en droit de fief leur temporel du Roy, ou d'autre seigneur. Et parce ne iugent les Euesques les causes de leur iurisdiction temporelle, ains ont leurs Chastellains, & seneschaux. Desquelz Chastellains on appelle a leurs seneschaux: & de leurs seneschaux, aux iuges du seigneur duquel tient l'Euesque sa iurisdiction temporelle.

¶ **On** appelle comme d'abus en la Cour de Parlement a Paris.

Il y a un autre cas auquel on appelle sans moyen en la Cour de Parlement a Paris, scauoir est quand on est appellé cōme d'abus. Mais il n'est pas loysible d'appeller en toutes matieres comme d'abus, ains seulement quand la iurisdiction ecclesiastique entreprend sur la laye, ou la laye sur l'ecclesiastique: ou quand on contrevient aux saincts decretz des conciles: ou aux ordonnances royaux. Cōme si le iuge ecclesiastique decrete citatiō contre une personne laye, hors les cas dōt il luy est permis de cognoistre contre les personnes layes, & qu'elle est mise a execution, lon se peut porter appellant cōme d'abus de l'oictroy & execution de la citation. Ou si es cas desquelz la cognoissance en appartient a l'Euesque, comme cause de mariage, le iuge lay faisoit inhibition au iuge d'eglise d'en cognoistre, le iuge d'eglise s'en pourroit porter appellant comme d'abus. Et n'y ha que la Cour de Parlement a Paris, qui puisse cognoistre

cognoiſtre d'appel comme d'abus, fuſt il interiecté de l'Archeueſque de Bourdeaux, ou d'autre Prelat eccleſiaſtique n'eſtât du reſſort du Parlement de Paris : ainſi que nagueres a eſté dict par areſt du grand conſeil du Roy.

¶ L'exemple de la cōtrauention es ſaincts decretz par la pragmatique ſanction.

L'exemple de la contrauention es ſaincts decretz des conciles peut eſtre prins ſi on contreuient a la pragmatique ſanction faiçte on concile de Baſle, laquelle n'eſt abolie, ains reſnouuëe en la plus grād part, entre le Pape & le Roy, fors quāt es electiōs: leſquelles ſōt abolies par leſdictz cōcordatz.

¶ L'exemple de la contrauention es ordonnances royaux.

Quand a l'exēple de la contrauention des loix ou ordonnances royaux, nous admenérons un: ſcauoir eſt, que un chanoine appelle cōme d'abus de quelque ordonnance faiçte par le chapitre de ſon eglise iniuſtemēt au preiudice du chanoine. Apres il ha lettres royaux pour mettre ſon appel cōme d'abus au neant: & eſt mandé au ſeneſchal de Poictou ou ſon lieutenant a Poictiers le receuoir a former complaincte en cas de ſaiſine & nouuelleté pour raiſō de quelque exploict faiçt en ſon preiudice par uertu de ladiçte ordonnance capitulaire. Le deſendeur en complaincte dict, qu'il eſt queſtion d'une choſe eccleſiaſtique & entre perſonnes eccleſiaſtiques: & demande la cauſe eſtre renuoyee pardeuant l'Eueſque de Poictiers ou ſon Official: qui eſt empeſché par le demandeur, atēdu qu'il eſt queſtion de complaincte, laquelle peut eſtre intentee pardeuant le iuge royal pour raiſon du poſſeſſoire d'une choſe ſpirituellē. le iuge denie le renuoy: dont le deſendeur appelle. & par areſt donē es grands iours d'Angiers le xvij iour de ſeptembre M.D.XXXIX. l'appellāt gaigne ſa cauſe,

parce qu'il auoit laissé le remede d'appel comme d'abus, dont il debuoit user: & s'estoit pourueu par complaincte, ce qu'il ne pouuoit faire, uenue que c'estoit un acte faict en forme de iustice, & par ordonnance capitulaire: ainsi que nous auons dict au premier liure cy dessus.

¶ Autre exemple de la contrauention es loix & saincts decretz.

Vn autre exemple quant a la contrauention des loix & saincts decretz est, que si l'Official d'un Euesque condamne quelqu'un en amende a appliquer a l'aumosne de monsieur l'Euesque: le condamné ha matiere d'appel comme d'abus. ou bien si par le relief d'appel obtenu du metropolitain ou Archeuesque est mādē faire inhibitiō & desense de non attenter ne innouer au preiudice de l'appellant a la peine de quelque amende a appliquer a l'aumosne dudit Archeuesque: celluy contre lequel on execute ledict relief, se peut porter appellāt de l'octroy & execution dudit relief comme d'abus formellement en la Cour de Parlement. Et fauldra faire intimer celluy a la requeste duquel ledict relief d'appel aura esté mis a execution, & non l'Archeuesque. A ce moyē ie conseilleroye a celluy qui auroit obtenu ledict relief, de faire declairer par l'executeur d'icelluy, en l'executant, qu'il ne s'entend ayder de ladicte commination d'amende contenue par ledict relief: & qu'il n'entend executer ledict relief en ce regard.

¶ Appel comme d'abus des octroys des reliefz d'appel baillez par les prelatz ecclesiastiques, & de l'execution d'iceulx, comme estans contre la pragmatique sanction, & concordatz.

semblablement on peut appeller comme d'abus de l'octroy

¶

Et execution des reliefz d'appel donnez par les metropolitains, ou Archeueſques, ou Primatz es cas eſquelz il eſt prohibé par les cōcordatz de noſtre ſaiēt pere le Pape Et le Roy d'appeller de iuges ordinaires eccleſiaſtiques: comme ſi l'Archeueſque de Bourdeaux confirmeroit un appoinctemēt interlocutoire de l'Official de Maillezay, duquel auroit appellé: Et auſſi appelle de l'appoinctement confirmatif: Et que le primat baillast relief d'appel a l'appellāt dudiēt appoinctemēt confirmatif: celluy au proſiēt duquel auroit eſté donné lediēt appoinctement confirmatif, pourroit ſe porter appellant de l'oētroy Et execution dudiēt relief d'appel donné par le primat comme d'abus: parce que par la pragmatique ſanctiō Et par leſdiēt concordatz il eſt prohibé de non appeller en Cour d'Egliſe deux fois d'un appoinctemēt interlocutoire: cōme nous auons diēt cy deſſus on premier liure uers la fin

¶ Appel comme d'abus de l'oētroy & execution d'un relief d'appel, par lequel on tire en Cour eccleſiaſtique hors le reſſort du Parlement.

Pareillement on peut appeller comme d'abus de l'oētroy Et execution d'un relief d'appel donné par l'Archeueſque de Bourdeaux, par lequel eſt mādē citer celluy au proſiēt duquel eſt dōnée la ſentence a cōparoir pardeuant l'auditeur dudiēt Archeueſque en ſon auditoire a Bourdeaux: quand celluy qui eſt cité par uertu dudiēt relief, eſt demourant audedens le reſſort du Parlement de Paris. Car la Cour de Parlement de Paris a baillé pluſieurs areſtz par leſquelz elle a ſaiēt inhibition Et deſenſe a l'Archeueſque de Bourdeaux, de non tirer pardeuant luy hors le Parlement de Paris les ſubiectz demourās audedens le Parlement de Paris: Et ordōné

C'iiij que

que ledict Archeuesque bailleroit uicaires au dedens le Parlement de Paris, pour cognoistre des causes des subiectz dudict Parlement de Paris. Ce que toutesfois n'ha encores esté executé. En maniere que presque toutes les appellations interiectées des officiaux de Poictiers Maillezay & Luczō se traictent & terminent a Bourdeaux. Et ay ueu plusieurs poures parties en grād peine de ce. Et entre autres, une auoit obtenu sentence de l'Official de Maillezay. Sa partie aduersē uoulant trouuer moyen de fuyr, se retire pardeuers les grands uicaires de l'Archeuesque de Bourdeaux, lesquels elle requiert de bailler uicaires audedens le ressort du Parlement de Paris, pour cognoistre d'icelle cause d'appel: ce que ilz refusent faire, dont la partie prend acte de notaires: & neantmoins obtient son relief dudict Archeuesque en forme commune & accoustumee. Apres baille requeste a la Cour de Parlement a Paris, a laquelle elle attache ledict acte, & demande delay de six mois pour releuer pardeuant iuges deleguez de nostre saint pere le Pape audedens le ressort du Parlement de Paris. La Cour luy baille trois mois pour impetrer ledict rescript, & releuer ledict appel pardeuant lesdictz deleguez. La partie appellāt laisse passer lesdictz trois mois. icculx passez partie aduersē baille requeste a la Cour: par laquelle elle narre ce que dessus, & que l'appellāt n'ha encores releué. requiert qu'il soit permis a l'Official de Maillezay de passer oultre a l'execution de sa sentēce: Ce qui est permis par la Cour. L'official de Maillezay decerne citation contre l'appellant pour uenir uoir proceder par luy a l'execution de sa sentence, & uoir taxer les despens. la partie appellant declare a l'executeur d'icelle citatiō, qu'elle appelle cōme d'abus de l'ordroy & execution de ladjēte citation: L'appellant releue sondict dernier appel au grand conseil. Mais il en est cōdānné

damné es deſpens de la folle intimation faiçte audiçt cōſeil: & ſauue a luy de ſe pouruoir en la Cour de Parlement a Paris. La partie aduerſe l'anticipe en ladiçte appellation en la Cour de Parlemēt: ou l'appellant acquieſce a l'oçtroy & execution de ladiçte citation. & eſt mandé derechef audiçt Officiel de Maillezay de executer ſadiçte ſentence, nōoſtant lediçt premier appel comme eſtant deſert. Et cōdamné l'appellant es deſpens de ladiçte cauſe d'appel. Vn autre eſtant demandeur auoit perdu ſa cauſe pardeuāt l'Official de Mailleçay: dont il ſe ſeroit porté appellant. Il obtient ſon relief de l'Archeueſque de Bourdeaux ou ſon auditeur, en ladiçte forme accouſtume. Il le faiçt mettre a execution. ſa partie aduerſe, qui auoit mauuiſe cauſe on principal, ſe porte appellāt comme d'abus de l'oçtroy & execution dudiçt relief: parce qu'elle eſtoit demourant audedens le reſſort du Parlement a Paris. Elle releue ſon appel en ladiçte Cour de Parlement. Apres qu'on eut remonſtré a meſſieurs les gens du Roy de la Cour ladiçte uexation, que auoiet les pources parties, a default de bailler par lediçt Archeueſque de Bourdeaux uicaires audedēs le reſſort du Parlement a Paris, & qu'il ſeroit impoſſible a une pource partie de faire executer ladiçte contrainte, & qu'il luy couſteroit plus que tous les fraiz du proces: l'appel & ce dont auoit eſté appellé, fut mis au neant & ſans deſpens de la cauſe d'appel. Et ſur ce poinçt les parties ſ'appointerent.

¶ Des appellations comme d'abus interieçtes par perſonnes eccleſiaſtiques.

Par les ordonnances dernieres faiçtes ſur l'abbreuiation des proces article v. & vi. eſt diçt que les appellations comme

me

me d'abus interiectees par les prestres ou autres personnes ecclesiastiques, es matieres de discipline & correction, ou autres pures personelles & non dependans de realité, n'auroit aucun effect suspensif. Ains nonobstans lesdictes appellatiōs, & sans preiudice d'icelles, pourrōt les iuges passer oultre cōtre lesdictes personnes ecclesiastiques. Et les appellans comme d'abus qui se departiront en iugement de leurs appellations releuees, payeront l'amende ordinaire du fol appel: & hors iugement la moitié de ladiete amende, & plus grande si mestier est, a l'arbitration des Cours souueraines, eu regard a la qualite des matieres & des parties.

¶ La Cour de Parlement cognoist des attentatz faictz par dessus les appellations ressortissans en ladiete Cour.

La Cour de Parlement ha aussi accoustumé de cognoistre des attentatz faictz tant par l'appellant comme par l'intimé. & combien qu'elle ayt uuydé la cause d'appel, toutes fois elle retiēt souuēt la cause des attēatz, mesmemēt quand ilz sont de cōsequēce, & qu'il y ha informatiō des excēs faictz en attendant. Et parce qu'il est assez difficile d'entendre cōment l'appellant peut attenter: car communement c'est cōtre luy qu'on attente: i'en ay bien uoulu toucher un cas que i'ay ueu aduenir. Le seneschal de Poictou ou son lieutenant a Poictiers, auoit ordonné commandement estre faict au lieutenant du seneschal de Poictou au siege de saint Maixēt (par ce que lors il estoit soubz le seneschal de Poictou, a presēt il est soubz le seneschal de Cyuray) de enuoyer un prisonnier estat es prisons de saint Maixent, es prisons de Poictiers, pour estre cōfronté a autres prisonniers es prisons de Poictiers: dont le lieutenant de saint Maixent appelle, d'autāt qu'il disoit le lieutenant du seneschal de Poictou a Poictiers, n'auoir puissance

sance de luy commander: parce que en ſon ſiege il auoit pareille iuriſdiction que l'autre on ſiege de Poictiers. Et parce que nonobſtant l'appel dudiect lieutenant de ſaint Maixent, le ſergent uolut mettre a execution l'ordonnance ſuſdictẽ dudiect lieutenant de Poictiers, le lieutenant de ſainct Maixent auroit faiect commandement audiect ſergent de nõ mettre a execution ladiecte ordonnance ou commandement par deſſus ſon appel, a la peine de certain: groſſe ſomme d'amende a appliquer au Roy: le ſergent ſ'en ſeroit portẽ appellant: Et fut lediect appel plaideẽ es grands iours tenuz a poictiers en l'an M.D.XXXI. le ij. iour de ſeptembre, Et gaigna le ſergent ſa cauſe.

¶ Des quel temps les ordonnances commencent a lier les ſubieetz.

Pourautant que cy deſſus auons dict qu'on peut appeller comme d'abus pour raiſon de la cõtrauention faiectẽ es ordonnances royaux, il fault ſcauoir quãd les ordonnances royaux nouuellement faiectes commencent a lier Et auoir leur force. Et tout ainſi que les conſtitutions du Pape lient apres qu'elles ſont publiees en l'auditoire ſouuerain de noſtre dict ſainct pere: auſſi les ordonnances royaux lient, ſi toſt qu'elles ont eſtẽ publiees Et leues es Cours de Parlement: Et qu'elles ont ordonnẽ qu'il ſera mis ſur icelles ordonnances, qu'elles ont eſtẽ leues publiees Et enregiſtrees en ladiecte Cour. Et en ce regiſtre on met ordinairement les modifications Et reſtrictions que la Cour adioute a l'ordonnance nouuelle: car elle eſt auparavant communiquee aux gens du Roy, qui rapportent a la Cour leur aduis. ſur lequel la Cour modifie ou reſtrainct l'ordonnance, ou la recoit ſimplement. Et quand elle eſt exorbitante de raiſon, Et qu'il y ha ſeconde inſion
du

du Roy de la receuoir, ilz la mettent par ledict registre, a fin que ce donne entendre aux successeurs, qu'ilz ne la trouuoient raisonnable. Et si une ordonnance n'est ainsi receue par la Cour, on n'a accoustumé iuger selon icelle. Et quand elle est receue & publiee en la Cour, on n'a point accoustumé de la faire publier cōmunement es sieges inferieurs: ce qui se deueroit faire, uoire les imprimer, cōme i'ay dict cy dessus, a fin que un chascū en eust cognoissance. Et si ores aucunes fois est ordonné qu'elles seront publiees es sieges inferieurs, ou es uilles du royaume, n'en est rien faict. Toutesfois puis nauieres on ha commencē a les faire imprimer ensemble, & plusieurs arestz notables, plus qu'on n'auoit accoustumé. Et quand c'est ordonnance laquelle concerne le domaine ou aydes du Roy, il fault qu'elle soit publiee en la chambre des comptes, & en la Cour des Generaux Conseillers sur le faict de la iustice des aydes a Paris: & en la Cour de Parlement. Toutesfois selon droit les constitutions ne l'ient en Cōstantinoble, que apres la publication faicte en celle citē, & deux mois apres quant es autres prouinces ou elles n'estoient publiees.

¶ Dedens quel temps il fault releuer les appellations pardeuant les iuges inferieurs pardeffoubz les royaux.

Apres auoir declairē pardeuant quelz iuges il fault releuer les appellations, il conuiēt dire dedens quel temps il fault les releuer. Quāt aux appellatiōs interiectees des iuges estā au dessoubz les iuges royaux ressortissā nuemēt en la Cour: il est necessaire communement, qu'elles soyent releuees dedēs huiēt iours apres l'appel formē. Et esdictz huiēt iours est cōptē le iour que ledict appel ha esté formē, comme il est decisi par la coustume du pays de Poictou article cccxliij. Et en

Poictou

Poictou on doit releuer es mains du sergent du seigneur ou iuge supérieur, pardeuant lequel ressortit l'appel. Et si le sergent bailliagier est occupé ou absent, lors on prend commissiõ du iuge pardeuant lequel doit ressortir ledict appel, pour releuer entre les mains d'autre sergent, qui a ce est par luy commis. Et en releuant l'appel, fault requerir le sergent de faire les adiournemens et intimations dedes les prochaines assises du iuge supérieur, esquelles ressortit l'appel. Et est requis qu'il y ait deux tesmoins presens, quand on releuera entre les mains d'un sergent, et qu'ilz soient nommez par l'exploict du relief. Et conuient que le sergent face les adiournemens et intimations dedens lesdictes prochaines assises: et que l'appel soit enroollé et enregistré on papier et registre desdictes assises. Autrement si on ne le faict enregistrer et enrooller, et qu'on laisse (comme on dict) esiambe r lesdictes assises sans faire lesdictes choses, l'appel est desert: ainsi qu'il est decisi par la coustume de Poictou article iij. xlviii. et xlix.

¶ De releuer appellations au greffe.

En autres pays, comme en la uille et gouvernement de la Rochelle, on doit aussi releuer dedens huictaine: mais on releue au greffe du iuge supérieur: car le greffier au nom du iuge expedie les reliefz d'appel en forme de ceulx de la Chancellerie.

¶ Du temps de releuer appellations en la Cour de Parlement.

Mais en la Cour de Parlement on doit releuer par relief prins en Chancellerie dedens trois mois apres l'appel interieusé. On ha faict par cy deuant difficulté, si on pouuoit prendre en la Chancellerie de Bourdeaux relief ou anticipatiõ pour releuer un appel en la Cour de Parlement a Paris, et tellement que quelque partie ha obtenu par arest qu'elle estoit mal assignee

signee par uertu d'un relief donné a Bourdeaux, & esté enuoyee de l'assignation avecques despens. Mais n'agueres messieurs de Bourdeaux ont obtenu edict du Roy nostre sire, par lequel il ha auctorisé toutes lettres prinſes en la Chancellerie de Bourdeaux: comme si elles estoient donnees en la Chancellerie de Paris, pourueu qu'elles ne soient enenuatiues ou attributives de iurisdiction. Ce qui est bien raisonnable: parce que par fois suruiet neceſſité, qu'on ne pourroit auoir en ce pays de Poictou lettres de la Chancellerie de Paris dedens le tēps de releuer: qu'on peut auoir aysément de Bourdeaux. Et ainsi en use lon de present. & prend on communement lettres de relief d'appel, d'anticipation, & de desertion d'appel a Bourdeaux.

¶ Que doibuent contenir les reliefz d'appel.

Par le relief d'appel qu'on faict entre les mains du sergent, on ne declare sinon qu'on relieue entre les mains du sergent tel appel interiecté tel iour de l'appoinctement donné par tel iuge contre tel au profit de tel.

¶ Comment doibuent estre specifiez les griefz par les reliefz d'appel.

Mais par les reliefz prins aux greffes ou es Chancelleries quand l'appel est interiecté d'un appoinctement interlocutoire, on doibt specifier les griefz par l'ordonnance du Roy Loys XII. article lviij. C'est a scauoir le faict dont resultēt les griefz. car il n'est mestier deduire les droictz ne ordōnances pour lesquelles ha esté mal appoincté & iugé. Encores on recoit bien l'appellant a en alleguer autres: pourueu qu'ilz se iustifient par ce qui ha esté deduiet & allegué pardeuāt le iuge a quo. car on ne peut pas infirmer l'appoinctement d'un iuge, sinon
par ce

par ce qui ha esté deduiet & remonstré pardeuant luy quand l'appoinctement est interlocutoire. Autre chose est de sentence diffinitive : car on peut la reformer & corriger par les choses que de nouuel on alleguera & produira en la cause d'appel. & pource ne fault deduire par le relief aucun grief, ains seulement dire que de certaine sentence diffinitive donnée tel iour par tel iuge contre tel au profit de tel, tel s'est porté appellant.

¶ Difference des reliefz d'appel prins au greffe, & prins en Chancellerie.

Aussi fault par les reliefz d'appel prins aux greffes ou Chancelleries, qu'il soit mandé au premier huysier ou sergent, de adiourner le iuge qui ha donné l'appoinctement : scauoir est par les reliefz d'appel donnez aux greffes, es prochaines grâ des assises du iuge supérieur : & par les reliefz d'appel donnez es Chancelleries, es Cours de Parlement a certain & competent iour ordinaire ou extraordinaire du present Parlement ou prochain a uenir : pour soustenir & defendre les tortz & griefz, iceulx uoir corriger & reparer, si mestier est : si non, proceder en oultre comme de raison. Et intimer l'appel a tel & autres parties aduerses de l'appellant si aucunes sont. Et qu'elles soient & comparent audict iour, s'ilz cuident que bon soit, & que la cause d'appel leur touche ou appartienne en aucune maniere : en leur faisant & a chascun d'eulx inhibition & defenses soubz certaines grandes peines au Roy a appliquer, quant es reliefz prins en Chancellerie, de non attenter ou innouer contre & au preiudice dudit appellant. Ains si aucune chose auoit esté attentee ou innouee, d'icelle reparer & faire remettre incontinent & sans delay au premier estat & deu.

¶ On

¶ On ne peut traicter appellations, que en afsises par deuant les iuges royaux, & inferieurs, sans lettres royaux.

La cause pour laquelle on doit mettre par les reliefz prins au greffe, mandement d'adiourner aux prochaines afsises, est, parce que les appellations ne peuuent estre traictées a plus brief iour que es prochaines afsises, & de afsises en afsises. Cōme en la Cour de Parlement on doit regulieremēt releuer les appellations aux iours ordinaires de chascune Seneschauce, ou Bailliage. & a ceste cause quād on met la clause, a certain & competēt iour ordinaire ou extraordinaire du present Parlemēt ou prochain a uenir, on met ceste clause, nō obstant que par aduēture les parties ne soiēt des iours dont lon plaidera lors, & que le present Parlement sēe. Et pour faire poursuite d'une cause d'appel hors lesdictes afsises, est besoing auoir lettres royaux: par lesquelles soit mandé au iuge de faire proceder les parties en la cause d'appel en afsises & dehors & sans attendue d'icelles, si c'est un iuge royal. & s'il est subalterne, il est mandé par lesdictes lettres royaux au premier huysier ou sergent royal, de faire commandemēt audict iuge subalterne, de faire proceder lesdictes parties hors afsises. Car on n'adresse point lettres royaux, qu'aux iuges ou autres officiers royaux: ainsi que i'ay dict cy dessus on commencement du premier liure.

¶ Comment on se doit pouruoir, si on est intimé a plus brief ou long iour, que ne porte le relief d'appel.

Et s'il est mandé de adiourner & intimer aux iours ordinaires de certain Bailliage ou Seneschauce, & qu'on intime a plus brief iour: l'intimé peut appeller de l'executiō du relief d'appel

d'appel, comme il fut dict par arest le v. iour d'Aoust M. D. XXXVI. Et ne pourroit estre reparé le grief, si apres ladicte executiō faicte, la partie obtenoit autres lettres royaux pour faire ualider l'adiournemēt baillé audict iour, nonobstāt qu'il fust baillé auant lesdictz iours ordinaires: neantmoins elle seroit tousiours condamnée es despēs dudit appel interiecté de ladicte execution. voire ne pourroit euitier lesdictz despens, si dedens la huiētaine baillée pour delaisser appellations, il offroit a partie aduersē les despens fraiz Et mises par elle faictz pour Et au moyen dudit appel, Et de ce qui s'en seroit ensuiuy, Et le sommoit de s'en desister dedens ladicte huiētaine: fust l'offre desdictz fraiz faict d'une certaine somme en general, Et en bloc, ou de plusieurs sommes specialemēt declairees. Car d'autant que la Cour est ia saisie de la matiere, partie aduersē n'est plus tenue de accepter ledict offre. Toutesfois depuis ledict arest seroit aduenū pareil cas, dont aucuns notables aduocatx de la Cour de Parlement consultez ne furent d'aduis qu'on appellast de l'execution du relief, mais que l'intimé comparust au iour assigné: Et demandast les despens de ladicte assignation baillée auant lesdictz iours ordinaires: Et que aucuns auoient obtenu lesdictz despens: Et que l'arest cy dessus mentionné auoit esté donné par expedient Et appoinctement prins entre les parties, Et non par la Cour les parties oyes. Neantmoins ie seroye d'aduis que on pourroit bien appeller de ladicte execution de relief suiuant ledict arest, parce que l'executeur excède ce qui luy est mandé: Et qu'il y auroit plus de raison, que a comparer au iour assigné: car en y comparant il semble qu'on purge tout le uice de l'adiournement: Et la partie n'ha plus d'intereſt apres ladicte comparution, pour proceder au principal, non plus que en l'incident des despens de ladicte assignation

tion. Et me semble que les deux cas ne sont que formalitez, Et qu'il seroit bon de ne se y arrester, uen que la partie n'ha interest d'estre assignee auant les iours ordinaires, plustost que aux iours ordinaires.

¶ Les adiournemens en cas d'appel doibuent estre baillez es iours ordinaires du Parlement present.

semblablement combien qu'il soit mandé par le relief d'appel de intimer a certain iour ordinaire ou extraordinaire : neantmoins s'il y ha temps competent entre le iour de l'adiournement Et les iours ordinaires, il fault bailler l'assignation aux iours ordinaires. Et pource par ordonnance de la Cour de Parlement Et publice en icelle le troisieme iour de Decembre l'an mil cinq cens trente Et quatre, est designé le temps que doibuent contenir les adiournemens baillez en chascune prouince ressortissant en ladicte Cour a comparoir en icelle Cour. ce que ie ne ueuil cy inserer, parce que ladicte ordonnance est imprimee.

Et ondict cas quand l'adiournement esiambe les iours ordinaires de la seneschaucee ou Bailliage : la partie assignee, si les trois mois de releuer sont passez, peut obtenir lettres royaux de desertion d'appel, Et par uertu d'icelles faire adiourner parties aduerses en la Cour. Et en pareil cas par arest donné le dixhuitiesme iour de Ianuier l'an mil cinq cens uingt Et un, fut un appel declairé desert, Et l'amende toutesfois moderee a trente liures parisis : iasoit que l'appellant eust présenté a la Cour lettres royaux, par lesquelles il estoit releué de la desertion. Neantmoins le cas estant depuis aduenu tel Et semblable que dessus :

deſſus : aucuns notables aduocatx de ladicte Cour ne furent d'aduis qu'on print celle uoye de deſertion : pource que ilx doubtoient qu'on en fuſt condamné es deſpens del'inſtance de deſertion: attendu que partie aduerſe auoit releué: combien que l'aſignation du relief euſt eſt. ambé leſdictx iours ordinaires. Parquoy ſeroit bien neceſſaire de arreſter ce que en tel cas faudroit garder, afin que les parties ne tombaſſent en inconuenient pour la contrariété des opinions.

S'il y ha aſignation baillee en la Cour qui eſchoye on tēps des uacations de uendenges (car il fault entendre, qu'il n'y ha point en la Cour uacations pour meſtiues) icelle aſſignation ne ſe continue pas au premier iour plaidoyable d'apres la ſainct Martin: auquel iour finiſſent les uacations, & commence le Parlement : mais ſelon ladicte ordonnance dudit troiſieſme iour de Decembre, ſe continue aux iours ordinaires de la ſeneſchauce dont eſt interiecté l'appel.

¶ **Clauses de relieuement d'illico, ou autres fins de non receuoir gifans en formalité.**

Eſt requis bien aduiſer quand on minute un relief d'appel, ſi l'appel eſt interiecté illico, ou ſ'il y ha autres fins de non receuoir, dont on puiſſe eſtre releué par le Prince: afin de y mettre les clauses neceſſaires pour leſdictx relieuemens. & communement on ha accouſtumé de y mettre clause, par laquelle il ſoit permis de mettre a execution le relief d'appel dedens un mois apres le temps de releuer paſſé. ſouuent on met clause par laquelle eſt mandé au premier huysſier ou ſergēt, que appellé avec luy un notaire de Cour laye, il ſe informe de quel-

que faict seruant a la iustification de l'appel, ou des attentatz faictz au preiudice de l'appel: & que l'informatiō close il porte ou enuoye par deuers ladicte Cour. Ou bien de faire uidimus, collations, ou extraictz de pieces, & tiltres seruans en la cause d'appel. Mais est meilleur adresser ceste commission pour faire extraictz uidimus & copies, aux iuges royaux aux ordinaires des lieux ou sont lesdictes pieces & tiltres.

¶ Des intimations que faict faire la partie aduerser de l'appellant.

On doit faire intimer la partie, a la requeste & au profit de laquelle ha esté donné l'appointement ou sentēce dont on est appellant.

¶ Quand les procureurs des seigneurs ou des corps & communitez, ou des priuees personnes peuuent estre intimez: & s'ilz peuuent releuer appellations.

Car si le procureur fiscal ou general de quelque seigneurie ou Baronnie ha requis quelque appointement, il ne fault pas intimer ledict procureur, ains le seigneur: sinon, que l'appel ressortist pardeuant le iuge du seigneur. comme si ledict procureur general ou fiscal auoit requis quelque appointement pardeuant le iuge Chastellain dudit seigneur Baron, & y en eust appel: parce que ledict appel ressortist pardeuant le iuge seneschal dudit seigneur Baron, lors ledict procureur fiscal peut bien estre intimé: car c'est tousiours en sa iurisdiction, en laquelle il est intimé, parautant qu'il est aussi bien procureur fiscal pardeuant le iuge seneschal, que Chastellain. Par mesme raison les procureurs ou syndiques d'un corps & college, ne doibuent estre intimez, ains le corps & college. Et tout ainsi que ces procureurs ne peuuent estre intimez, aussi ne

ne peuuent ilz releuer ailleurs que en la iuriſdiction ou ilz ſont procureurs aucune appellatiō. Et ſ'ilz ſont intimez, ilz ſont enuoyez comme follement intimez de l'aſſignation, & partie aduerſe condamnée es deſpens. Et ſemblablement ſ'ilz releuent leur appel, partie intimée ſera enuoyée de l'aſſignation, & condamné le procureur ou ſyndique es deſpens de l'aſſignatiō, i'asloit que le corps & college compare, & offre prendre la cauſe d'appel pour le procureur ou ſyndique. Car combien que a ce ſoit receu le corps ou college : neantmoins leur procureur ſera toujours condamnée es deſpens de la folle aſſignation. Et ainſi en fut dict par areſt le xxiiij. iour d'Octobre l'an M. D. XXXI. es grāds iours tenuz a Poiſictis. Toutesfois un procureur d'un religieux de Cluny ayant appellé cōme d'abus de l'exécution de quelques bulles, ou prouiſion apoſtolique d'un benefice, & eſtant intimé en ladiète cauſe d'appel en la Cour de Parlement, tend a ce qu'il ſoit dict que follement il ha eſté intimé, & auoir deſpens de la folle intimatiō: mais il fut dict qu'il plaideroit ſes cauſes d'appel, par areſt donné le xiiij iour de Mars M. D. XXXII. Et la cauſe peut eſtre, parce que difficilement on euſt peu trouuer ledict religieux: ou bien qu'il eſtoit demourant en autre Parlement: car Cluny eſt du Parlement de Rouen. ou que lon auoit fait inquiſition en ladiète Abbaie de Cluny: & qu'on auoit rapport qu'il n'y eſtoit. laquelle dernière raiſon ie penſe eſtre la meilleure. Auſſi un fermier ou tenant a bail a ferme le reuenu d'une terre ou ſeigneurie, doit eſtre intimé en appel formé d'un appoinctemēt donné a ſon proſiēt, & a ſa requête. Et ne doit eſtre intimé le ſeigneur de la terre: car les fruiēt pour leſquelz il agit, & les deſpens du proces, appartiennēt au fermier, & non au ſeigneur.

¶ Les assoieurs d'une taille ou emprunt ne doivent estre conuenuz en surtaux, s'ilz ne sont conuenueuz a leur commission, ou aux ordonnances royaux, en faisant l'assiete de la taille.

De la source susdictie vient la correction d'un mauuais stile, que gardions nagueres en Poictou: c'est que si les assoieurs de la taille auoient surtaxé un de la paroice, il les faisoit conuenir en surtaux pardeuant l'Esleu du pays: & falloit qu'ilz soustinssent le taux par eulx faict, ou consentir les fins & conclusions du demandeur en surtaux. Car ce ha esté corrigé par plusieurs arrestz des Conseillers generaux sur le faict de la iustice a Paris: & ha esté la procedure faicte tant pardeuant l'Esleu, qu'en ladicte Cour des Generaux, mise au neant: & ordonné que le demandeur seroit appeller en surtaux, si bon luy sembloit, les manans & habitans de la paroice, & sans despens. voire qui plus est, comme quelques assoieurs eussent esté conuenuez en surtaux: & apres auoir appellé en gariment les manans & habitans de la paroice: dont aucuns se fussent assisté avecques eulx: & lesdictz assoieurs & eulx eussent perdu leur cause pardeuant l'Esleu: & releué leur appel en la Cour desdictz Generaux, & conclud comme on' proces par escript: est donné arrest interlocutoire, par lequel est dict que auant que proceder au iugement diffinitif, les manans & habitans s'rôt appelez, pour assister avecques les assoieurs, si bon leur semble. Plusieurs apres ledict arrest signifié ne ueulēt bailler procuratio speciale pour assister, craignans si les assoieurs succumboient, payer leur portion des despens: les autres paroiciens assistent. Aduint que les assoieurs & assistants perdent leur cause, & sont condamnéz es despens, sauue leur recours contre les autres paroiciens

roiciens . Depuis lesdictz assoieurs & assisteurs baillent requeste pour auoir commission pour appeller les autres paroiciens , pour leur resarcir les despens dommages & interestz par eulx souffers a la poursuite de ladicte cause. Par uertu de laquelle commission ilz sont appellez , & finalement sont condannez esdictz despens dommages & interestz . Et iceulx taxez & liquidez, est ordonné qu'ilz seront assis & imposez au sold la liure sur lesdictz assoieurs, & assisteurs, & autres manans & habitans : & leuez par les fabriqueurs de la paroice dedens certain temps. Et par ce que lesdictz fabriqueurs furent refusans de ce faire, fut dict par autre arest, qu'ilz le feroient dedens autre temps. Autrement le temps escheu & passé, seroient cōtrainctz en leurs noms priuez payer les sommes de deniers esquelles auoient esté liquidez & taxez lesdictz despens dommages & interestz. Ce que l'ay bien uoulu traicter assez amplement, parce que aduènement souuent semblables cas : a fin que ce serue de riglement. La raison en ce y est bien bonne: car d'autant que les assoieurs sont esleuz par tous les manans & habitans d'une paroice ou ceulx qui la representent , ilz sont approuuez gens de bien & idoines : & a ce moyen tous les paroiciens sont tenuz du faict des assoieurs, & soustenir leur taux, & nō les assoieurs: car il s'ensuiueroit que oultre la peine qu'ilz ont de faire l'assiete, ilz auroient encores la charge de soustenir leur taux. & ladicte charge a laquelle ilz sōt cōtrainctz, les adstraindroit aux proces qui procederoient de leurdicte charge.

¶ Les commissaires ne peuuent estre intimez
ne adiournez que en certain cas.

Et a semblable raison on ne peut intimer les commissaires cōmis a regir quelques choses soubz la main du Roy, ne les faire adiourner : ains se fault adresser a ceulx qui les ont faiēt commettre commissaires. Toutesfois si les assoieurs ou commissaires auoient abusé contre leur commissiō, comme si les assoieurs auoient plus taxé que ne porte leur commissiō: ou que les commissaires n'eussent gardé la forme de l'ordonnāce dōnee pour faire les baulx a ferme : ilz seroiēt bien conuenuez en ce cas, & seroient tenuz d'en respondre.

¶ Le procureur du Roy peut estre intimé, & adiourné.

Mais le procureur du Roy seul peut releuer & estre intimé en qualité de procureur du Roy. Et en la cause d'appel en la Cour de Parlement, monsieur le procureur general du Roy prend la cause pour son substitut. car on appelle tous les procureurs du Roy des sieges inferieurs des Cours de Parlement, substitutz de mondict seigneur le procureur general: iasoit qu'ilz ne soient substituez par luy, ains ayent leurs offices par don du Roy. Sinon que monsieur le procureur general uoye que sans aucune apparence l'appel ayt esté interiecté par son substitut. car lors il declairera qu'il n'entēd prendre la cause. Et en ce cas la Cour ordonnera que ledict substitut en son nom priué sera appellé pour defendre la cause d'appel, s'il estoit intimé.

¶ Le iuge doibt estre adiourné en cas d'appel.

D'auantage fault, que l'appellant face adiourner le iuge ou autre personne publique de laquelle il est appellant, pour
soustēir

soustenir les tortz & griefz, & ce dedens mesme temps & a mesme iour qu'il a faict intimer sa partie aduerse, a la requeste & profit de laquelle l'appoinctemēt a esté donē. autrement l'appel seroit aussi bien desert, que s'il n'auoit faict intimer sa partie aduerse: sinon en matiere d'appel comme d'abus, en laquelle n'ont lieu fins de non receuoir. Mais encore l'appellant qui n'auoit faict adiourner le iuge, seroit cōdamné es despens de la cause d'appel. Et fault adiourner le iuge mesme, qui ha faict le grief: tellement que si l'assesseur auoit faict le grief, il fault l'adiourner, & non celluy duquel il est assesseur. Ce qui me semble estre une grande formalité. Car combien que le iuge soit adiourné, il n'est tenu toutes fois cōparoir ne defendre sōn iugé ou appoinctement. Et par ce semble estre chose superflue de l'adiourner. Et seroit releuer les parties de fraiz, si on ordonnoit que les iuges ne seroient plus adiournez, & qu'ilz seroient seulement intimēz, quand l'appellant les uouldroit prendre a parties.

¶ Les cas esquelz vn iuge peult estre intimé.

Car nous auons plusieurs cas esquelz on peut faire intimer un iuge, & le prendre a partie. Premieremēt, quād nul ha requis l'appoinctement, ou sentence par luy donnee.

¶ Des appellations comme de deny de iustice.

Secondement, quand on est appellant d'un iuge royal comme de deny de iustice. lequel appel on peut interiecter, quād par trois fois lon ha sommé un iuge de uuyder un proces, apres que le temps prefix par l'ordonnance pour le iuger est passé, scauoir est trois mois es incidens & legieres causes, & six mois es grands matieres principales, & qu'on ha prins acte

acte du greffier, ou de notaires de ladicte sommation faicte par trois fois, & par competens interualles. Mais si le iuge n'est royal, duquel on appelle comme de deny de iustice, il ne fault pas intimer le iuge, mais le seigneur de la seigneurie de laquelle il est iuge. & est tenu lors le seigneur soustenir le iuge de son iuge. & si il succube, & soit dict mal denie, le seigneur est condamné es despens de la cause d'appel, comme est le iuge royal en ce cas. Car d'autant que les iurisdiccions sont patrimoniales, les seigneurs d'icelles doibuent iustice: & si elle est deniee, ilz en sont tenez: mais le Roy s'en descharge sur ses iuges. Semblablement si en la Cour de Parlement est dict mal iugé par un iuge des Pairs de France, duquel iuge on appelle nuement en ladicte Cour, le Pair paye l'amende, & non le iuge, ne la partie appellant, sinon que le Pair declaire en la Cour par son aduocat & procureur, qu'il ne ueult soustenir le iugé: car en ce cas il cuite l'amende.

¶ Difference d'entre le pays coustumier, & de droit escript, en causes d'appel.

Ces choses entendues, est a noter qu'il y ha grand difference, si l'appel uient du ressort qui est en pays du droit escript, ou du pays coustumier. Et cōbiē que ie n'aye proposé traicter que du stile du pays coustumier: parce que en pays de droit escript on garde le droit escript, & est aysé a ce moyen de le scauoir: toutesfois il m'a semblé estre necessaire pour plus facile intelligence de ce traicté des appellations, declairer quelques differences de celles que i'ay ueu usiter entre le pays du droit escript, & coustumier. Or doncques en pays de droit escript il fault former l'appel & le releuer selon le droit escript: & cōme on faict encore ce iourd'huy es Cours ecclesiastiques de ce royaume, dōt i'ay touché quelque chose cy dessus en ce secōd liure. Et en pays coustumier, il fault former & releuer

leur l'appel comme i'ay auſſi monſtré cy deuant en meſme lieu. Oultre on pays de droit eſcript anciennement il falloit demander apoſtres. De preſent il n'eſt meſtier de demander apoſtres. Auſſi on pays de droit eſcript on intime le iuge en la cauſe d'appel, & on adiourne la partie pour ſouſtenir. Toutes fois le iuge n'eſt point tenu de ſouſtenir, non plus que on pays couſtumier. Plus au pays de droit eſcript les appels lans pour leur fol appel anciennemēt & nagueres ne payoiēt point d'amende. mais par les ordonnances dernieres faiçtes en l'an M. D. XXXIX. ilz ſont contrainctz payer l'amende.

¶ Quand ſont adiugees pluſieurs amendes, ou vne.

Et quand il y ha pluſieurs appellations interieçtees en adherant, & dependāſ d'une meſme ſource, la Cour ha accouſtumé de condamner en une anende pour toutes.

¶ Appellations en adherant doibuent eſtre releuees.

Mais fault bien aduiſer, qu'on releue toutes les appellatiōs interieçtees en adherāt. car ſi ores la premiere eſtoit releuee, & les autres en adherant ne le fuſſent, elles ſeroient deſertes. Auſſi ſelō diſpoſitiō de droit cōmū, ſi on interieçte pluſieurs appellations d'une ſentence en meſme inſtant ſans intervalle, toutes ne ſont cēſees que une appellation: mais ſi elles ſont formees en diuers temps, & par intervalles, ſont pluſieurs appellations: tellement, que par la derniere on n'eſt pas ueu ſe deſiſter des premieres. Et par les ordōnances dernieres ſuſdiçtes article cxyiij. eſt dict, que pour chaſcune appellation les iuges inferieurs doibuent condamner les apellans temeraires en l'amende, ſans quilz puiſſent les moderer, ou remettre pluſieurs amendes a une. Mais les Cours de Parlement les peuuent bien moderer, ou remettre pluſieurs a une, quand il y a cauſe iuſte & euidente.

Et

Et combien que les intimez ordinairement en la plus grãde partie de la France coustumiere ne payēt amende, & mesme-
ment en la Rochelle : toutesfois en Poictou l'intimé paye l'a-
mende, comme l'appellant, s'il perd sa cause. Et par ordon-
nance nagueres faicte par la Cour de Parlement a Paris, est
dict, que les intimez, soit en appellations uerbales ou en pro-
ces par escript, s'ilz soustiennent trop legierement une sen-
tence, ilz seront condānez en l'amende de dix ou de uingt li-
ures parisis, ou en autre plus grãde a l'arbitration de ladiçte
Cour. D'auantage on pays de droict escript, si la sentence
ou appoinctement est executable nonobstans oppositions ou
appellations quelconques : la Chancellerie ou les iuges supe-
rieurs ne baillēt reliefz d'appel : ains permettent d'executer
les sentences ou appoinctemens, nonobstans les appellations.

Et on pays coustumier, la Chancellerie ou les iuges supe-
rieurs baillent indistinctement reliefz de toutes appellatiōs.

¶ Appellations personnelles.

Aussi on pays de droict escript on peut reformer & corri-
ger le iugé au profit de l'intimé, comme de l'appellant. Et on
pays coustumier on ne le peut reformer, que au profit de
l'appellant.

¶ Voyes de nullité, & de querelle, ou plainte
au iuge superieur, n'ont lieu.

Car uoyes de nullité n'ont point de lieu en la France cou-
stumiere, & ne peut on auoir recours au superieur par uoye
de simple plainte, ains par appel seulement.

¶ Quand l'appel d'une partie peut empescher que
les autres parties ne procedent pardeuant le iuge
a quo en la cause ou ha esté interiecté l'appel.

Toutesfois

Toutesfois quand plusieurs parties contèdent d'une mesme chose, & en y a une appellât de quelque appointemēt ou sētēce interlocutoire dōnee en la matiere: les autres peuvēt dire qu'elles ne sont tenues proceder en ladicte matiere par le moyen dudict appel, iusques ad ce qu'il soit decis d'icelluy appel, si par l'issue de l'appel la procedure qu'elles feroiēt pendant l'appel, pouvoit estre adnullee. Et ainsi en fut dict par arest de la Cour de Parlement a Paris le xvij. iour de Feburier M. D. XVI. Car en certaine matiere beneficiale en laquelle estoient plusieurs contédans, & pendant proces la recreance du benefice est adiugee a un d'iceulx: de laquelle l'une des autres parties contendans appelle. l'un requiert que les autres qui ne sont appellans aillēt auant & procedēt quant au plein possessoire & maintenuēt. Les autres disent qu'ilz ne sont tenuz d'aller auāt iusques ad ce qu'il soit decis de ladicte cause d'appel de ladicte recreance, parce que la Cour en uuydant la cause d'appel pourra adiuger a l'appellant la maintenue: & a ce moyen la procedure qu'elles feroient pendant ledict appel, seroit declairee nulle. fut dict par ledict arest, que les autres parties n'estoient tenues de proceder, ueu l'appel de l'autre, iusques ad ce qu'il en fut decis. qui est un cas notable, parce que si l'un des confortz de proces defaillē, les autres sont tenuz de proceder: car ce doibt estre entendu, quand par le moyen du defaillant, la procedure qui sera faicte entre les autres, ne peut estre adnullee. Autrement si elle peut estre adnullee, les autres ne sont tenuz proceder, comme entre plusieurs opposans es criees de quelques biens immeubles: ainsi que auons dict cy dessus on premier liure,

¶ Comment doibt estre releué vn appel interie.
 Eté de l'executiō faicte on pays coustumier d'ū
 arest, ou sētēce dōnee on pays de droict escript.

Pour

Pour reuenir a la difference du pays de droict escript, & du pays coustumier: si un iuge du pays de droict escript dōne sentence, laquelle il faille executer au pays coustumier, & y ayt appellacion interiectee de l'execution: ladiete appellacion se doit releuer selon le stile & coustume du pays coustumier onquel a esté faicte l'execution, cōme il est decisi es arestz mis a la fin du stile de Parlement escript en Latin en l'arest cxlviij. Car selon droict commun il est requis auoir regard a la coustume du lieu ou lon faict l'execution. mais ce doit estre entendu, comme a faire les criees de quelques biens immeubles, & executant quelque sentence. car il fault faire les criees selon la coustume du lieu, ou lesdictz immeubles sont assis. Aussi fault entendre cecy, quant a la formalité de interiecter l'appel, & le releuer. Mais nō pas qu'il faille releuer l'appel pardeuant le iuge supérieur du lieu où lon faict l'execution. Mais fault releuer pardeuant celluy qui ha donné la sentence, & conunis l'execution d'icelle. Et a ce moyen comme la Cour de Parlemēt de Paris eust commis l'executiō d'un sien arest a un iuge royal de son ressort: & parce qu'il conuenoit executer ladiete sentence on ressort de la Cour de Parlement de Bourdeaux, le poursuiuant de l'execution dudiēt arest, obtient permission dudiēt Parlemēt de Bourdeaux, pour executer lediēt arest audecēs le ressort de Bourdeaux, a la charge toutes fois que s'il en sortoit appellacion, elle seroit agitee & terminee en ladiete Cour de Bourdeaux. L'executeur encomence son execution audecēs lediēt ressort de Bourdeaux. le defendeur en ladiete matiere d'execution appelle de quelque appoinctement donné par l'executeur. pour lequel appel il differe de passer oultre. le demandeur en ladiete execution anticipe l'appellant en la Cour de Parlement a Paris, ou ne compare l'appellant, ains releue son appel en la Cour de Parlement a Bourdeaux

deux, ou il ha default contre l'intimé: & l'un contre l'autre en chascune desdictes Cours ont arest par contumace. Quoy uoyant celluy qui auoit obtenu le premier arest, obtient lettres patentes du Roy, par uertu desquelles il faict assigner partie aduersé au grand Conseil pour y uoir euoquer les deux matieres desdictz deux arestz cōtraires. Et icelles euoquees ledict grand Conseil met au neant & adnulle tout ce qui auoit esté faict par la Cour de Parlement de Bourdeaux: & confirme ce qui auoit esté faict par ladiçte Cour de Parlement a Paris.

¶ Des exempts & exemptions par appel.

Autre difference est entre le pays de droict escript, & le pays coustumier. car on pays de droict escript, l'appellant de quelque iuge que soit, est tenu de proceder pardeuant luy en autre cause, suiuant la disposition de droict escript. mais en pays coustumier l'appellant de quelque iuge non royal, n'est tenu de proceder pardeuant luy en autre cause: ains se peut porter exempt de luy. Laquelle exemption n'ha lieu contre les iuges royaux. Mais le iuge royal du ressort duquel les appellations ressortissent nuement en la Cour de Parlement, doit cognoistre des causes des exēpts par appel. Et pource quand les terres & seigneuries de la couronne sont baillées par le Roy a aucunes personnes, le Roy y met un iuge des exempts par appel interiecté des autres iuges de ladiçte terre & seigneurie, duquel iuge des exempts on appelle nuement en la Cour de Parlement: & ne se peut la iurisdiction de ces iuges des exempts proroger ne étendre a autres causes que a celles des exempts: ou les cas royaux, desquelz la cognoissance leur appartient. & ainsi en a esté dict par arest le neufiesme iour d'Aoust M.D.XXX.

¶ Exempt

¶ Exempt par appel du Chastellain d'une seigneurie non royale s'il peut estre conuenu pardeuāt le Seneschal d'icelle seigneurie.

On ha par cy deuant faict difficulté si celluy qui est exempt par appel du Chastellain d'une seigneurie non royale, peut estre conuenu en autre cause pardeuant le seneschal d'icelle seigneurie : ou s'il doit estre conuenu pardeuant le iuge presidial & royal du ressort. & comme le cas fust aduenue en la Baronnie de Montagu en Poictou, aucuns notables aduocatx noire de la Cour de Parlement, disoient que l'exempt par appel interiecté du Chastellain, pouuoit bien estre conuenu pardeuant le seneschal de ladicte seigneurie de Montagu. pource que par la coustume du pays de Poictou article cccl. on ne se peut porter exempt du successeur du iuge qui ha faict le grief, ne aussi le successeur de l'appellant se peut porter exempt. & pource semble que ladicte exemption soit personele : & consequemment ne s'extend au iuge seneschal. Les autres estoient d'aduis que le seneschal de ladicte seigneurie ne pouuoit cognoistre desdictes causes dudict exempt, parce que l'exemptio concerne toute la iurisdiction de la seigneurie : & que par le stile general n'y ha autre iuge des exempts par appel, que le iuge royal presidial du ressort. Et combien qu'en ceste matiere ladicte difficulté ne soit uuydee, toutes fois ha esté uuydee en pareille matiere par arrest de la Cour, & dict que les exempts par appel ne peuuent estre conuenuz en autres causes, que pardeuant le iuge royal & presidial du ressort.

De ce uient solution a un autre doubte cy deuant aduenue touchant l'interpretation de ladicte coustume de Poictou : sca uoir est si celluy qui est exempt par appel du Chastellain, se peut porter exempt du commis dudict Chastellain. car ueu qu'il n'y ha iuge des exempts que le iuge royal & presidial,

il eſt tout euident que le commis du Chasteſſain n'en peut cognoiſtre. d'auantage ſi les commis en pouuoient cognoiſtre, ſeroit tollu entierement ledict benefice d'exemption.

Voire & ſ'ilz ſont deux parties adiournees pardeuant le iuge royal & preſidial, & que l'une d'icelles demande eſtre renuoyee pardeuant ſon iuge inferieur, & le ſeigneur du iuge demande l'obeiſſance de la matiere & des deux parties adiournees, & l'autre deſdictes parties l'empêche, diſant qu'elle eſt exemptee par appel dudit iuge inferieur, & informe dudit appel deuement: le iuge preſidial peut retenir la cognoiſſance de la cauſe, quant eſdictes deux parties: ſi la cauſe des deux eſt cōnexee. car le priuilegié attraiet a ſoy celluy qui n'eſt priuilegié. Mais telles exemptions n'ont lieu quant eſt des officiers du Conte de Poictou: quand ores ladiete conté eſt hors les mains du Roy. comme il eſt expreſſement decisi en ladiete couſtume de Poictou article cccli.

¶ Comment on procede a contumacer la partie abſente en cauſe d'appel.

Ces choſes preſuppoſees, uoyons comment il fault proceder a donner ſentence par contumace, quand l'une ou l'autre partie ne compare en la cauſe d'appel.

¶ Es Cours inferieures fault deux defaultz contre l'appellant, & contre l'intimé.

En quoy y a differēce entre les Cours royales, & autres inferieures, & les Cours de Parlemēt. Car es Cours royales & inferieures, ſoit contre l'appellant qui ayt releué ou ſoit anticipé, ou contre l'intimé, ne ſont requis que deux defaultz. L'un & le premier ſimple: lequel ſera donné au iour aſſigné a

E celluy

celluy qui comparoistra, alencontre du defaillant: & sera or donné par icelluy, que le defaillant sera adiourné sur default & o intimation es prochaines grans assises.

¶ Des lettres d'abreuiation en causes d'appel.

Ou a certain plus brief & competent iour, s'il y ha lettres royaux de abreuiation, par lesquelles il soit mandé de faire proceder les parties en assises & dehors & sans attēdue d'icelles, & qu'elles ayent esté signifiees au defaillant en l'intimant, ou en l'anticipant. car par le premier default les lettres royaux de abreuiation sont enterinees.

Et au iour baillé par uertu dudiect premier default sur icelluy & o intimation, si le defaillant ne cōpare, sera contre luy baillé default & o tout le profit que de raison, sauf certain temps. & serōt faictz les adiournemens tout ainsi que en la premiere instance, dont auons parlé cy dessus au premier liure. Et si le defaillant ne faict rabatre lediect default dedens lediect sauf, sera donné sentence: par laquelle le defaillant sera declairé contumax, & qu'il ne faict plus a receuoir a empescher les fins & cōclusions de sa partie aduersē. & en icelles adiugeant, sera diēt bien ou mal iugé.

Des sētēces dōnees p cōtumace en causes d'appel.

Scauoir est bien iugé, si l'appellant est contumax: & si l'intimé est contumax, sera diēt mal iugé: sans autrement regarder aux merites de l'appoinctement, ou sentence dont a esté appellé. Car iasoit que l'appoinctemēt dont auroit esté appellé, soit inique: si toutes fois l'appellant se laisse contumacer en la maniere susdictē, sera diēt bien iugé. Et s'il est diēt bien iugé, & qu'il reste quelque chose a faire de la procedure entre les parties: ou que la sentence gise en execution: sera diēt que ce dont a esté appellé, sortira son plein & entier effect.

¶ Des renuoyz qu'il fault faire en iugeant les causes d'appel.

Et avecques ce seront les parties renuoyees pardenāt le iuge a quo, pour proceder entre elles cōme de raison, ou pour ex-
cutter la sentēce. Et condāné l'appellant es despens de la cause
d'appel enuers l'intimé, & en l'amēde enuers la Cour, le tout
telz que de raison, la taxation reseruce pardenuers le iuge de
l'appellatiō. Et s'il est dict mal iugé, il fault faire distinctiō
quant au renuoy de la cause: scauoir est ou le iuge a quo, &
le iuge ad quem appellatum est, sont d'une mesme seigneurie
& a mesme seigneur: cōme le iuge chastellain & le seneschal
d'une mesme Barōnie, ou le iuge chastellain & le iuge senes-
chal d'un mesme siege royal, et que le seneschal dist qu'il ayt
esté mal iugé par le Chastellain d'icelle Baronnie: lors ledict
seneschal peut retenir la cognoissance de la cause, ou l'execu-
tion de la sentence. Ou bien le iuge a quo, & le iuge ad quem,
sont de diuerses iurisdicțiuni: comme si le seneschal d'une Ba-
ronnie est le iuge a quo, & le iuge royal & Presidial est le iu-
ge ad quem: en ce cas le iuge ad quem, est tenu de renuoyer
les parties pardeuant le iuge a quo, autre que celluy qui ha
dōné la sentence. Car les iurisdicțiuni sont patrimoniales: &
pour le mal iugé du iuge, le seigneur ne doit perdre l'emolu-
mēt de sa iurisdicțiō. Et ainsi en fut dict par arest le vi. iour
de May M.D.XXXII. Toutes fois plusieurs iuges royaux &
Presidiaux font par chascun iour le contraire, & retiennēt
la cognoissance de la cause principale, non seulement quand
les appellatiōs par eulx uuydees ont esté interiectees de leurs
Chastellains iuges royaux leurs inferieurs, mais aussi quand
elles ont esté interiectees des iuges seneschaux des Chastellai-
nies & Baronnies de leur ressort.

¶ Cōment on procede a contumacer le defaillāt
en causes d'appel pendans en la Cour de Parle-
ment. Et premierement contre l'appellant.

E ij Mais

Mais quand les appellations sont releuees en la Cour de Parlement, si l'appellāt qui ha releué, & n'ha esté anticipé, ne se presente au iour assigné a sa requeste ou procureur pour luy au greffe des presentations : il y ha congé contre luy, sauf le mois, ou autre temps selon l'ordonnance dudiēt tiers iour de Decembre M. D. XXXIIII. eu regard es pays, dont uienmēt lesdictes appellations. Et si lediēt appellant ne se presente dedens lediēt sauf: le greffier deliure lediēt congé simple a l'intimé, par lequel l'appellant sera declairé cōtūmax: & sera dict bien iugé & mal appelé, & condamné l'appellant es despens de la cause d'appel enuers l'intimé, & en l'amende enuers le Roy: comme il est plus amplement dict par lesdictes ordonnances dudiēt troisiēme iour de Decembre. & iusques ad ce que lediēt congé simple soit seellé, & deliuré a l'intimé, l'appellant sera receu a rabatre lediēt congé, en reffundant les despens d'icelluy, & de tout ce qui s'en est ensuiuy.

¶ Contre l'intimé ou appellant anticipé.

Et si c'est l'intimé, ou l'appellant anticipé qui se default a la premiere, assignation baillee en la Cour de Parlement: sera deliuré a partie aduerse huiētaine escheue apres sa cedula enregistree au greffe des presentations, default congé: par lequel la partie presentee inserera sa demande du profit dudiēt default congé. & sera mandé au premier huysier ou sergent de l'adiourner sur default & o intimation. Et s'il se default de rechef au iour qu'il sera adiourné sur lediēt premier default: sera donné contre luy default second, sauf certain temps selon ladiēte ordonnance: & icelluy sauf passé, la partie presentee mettera lesdictz deux defaultz & les exploictz acte d'appel & sentēce ou appoinctement dont a esté appelé, pardeuers un de messieurs les Cōseillers

seillers de la grand chambre du plaidoyer de ladicte Cour: au rapport duquel la Cour adiugera le profit desdictz deux defaultz. Et n'y ha aucune difference, si c'est appellation uerbale, ou proces par escript.

On auoit accoustumé de garder autre forme en ladicte Cour quāt a donner lesdictz congez simples, Et lesdictz defaultz congez. Laquelle est amplement traictee par ce second liure de noz Institutions Forenses en Latin, parautant que la premiere impressiō d'icelles auoit esté faicte auāt ladicte ordonnance dudiect troiesime iour de Decembre M.D.XXXIIII.

Mais s'il y ha eu presentation par les deux parties, Et qu'il soit question d'une appellation uerbale: Et la cause soit mise au roolle, Et qu'elle soit appelée a tour de roolle: il y aura congé simple, ou default congé: lesquelz seront deliurez en la maniere susdicte.

¶ De porter ou enuoyer le proces par escript au greffe de la Cour: & de la taxe du portage.

Et si c'est un proces par escript, apres quel'intimé aura bail lé copie de la sentence, il fera presiré temps par la Cour, dedens lequel l'appellāt sera tenu de faire apporter les sacz au greffe. Et s'il ne le faict, il y aura congé simple contre luy, sauf quelque temps. Mais pour obuier a la longueur dudiect temps, l'intimé communement faict la diligence de faire porter les sacz au greffe de la Cour, par le messagier du pays. car le messagier faict faire sa taxe du portage a un de mesdictz seigneurs de ladicte grad chambre sur l'appellant entieremēt: sinon que l'appellant ayt esté anticipé par l'intimé: car en ce cas, la taxe se faict sur l'appellant Et l'intimé par moytie. Et doit le greffier mettre par l'Euangile, c'estascauoir pardessus ce qu'il met sur les sacz du proces par escript, quāt proces par escript il ha baillé au messagier pour porter en la Cour ou

ailleurs, a fin qu'il ne se face faire plusieurs taxes du portage de diuers proces par escript, & pour chascun d'iceulx ne se face taxer uoyage entier. Car le greffier du iuge a quo ne doit pas bailler un proces par escript seul a un messagier, mais luy doit bailler plusieurs proces, a fin que le portage n'en couste tant aux parties. Et quand la sentence est executoire nonobstant l'appel, & les despens sont taxez, dont il y a aussi appel: fault que le greffier enuoye la declaration de despens auecques le proces par escript, comme de ce a esté dict par deux arrestz dōnez le vij. iour de Mars M.D.xxix. Et est bon que le messagier face coter par les procureurs des parties le iour que les sacz seront mis au greffe par luy: car apres que le procureur d'une des parties a cotté a l'autre le iour que les sacz ont esté mis au greffe, il est tenu de conclure comme on proces par escript.

¶ De la conclusion comme on proces par escript.

Laquelle conclusion comme on proces par escript, est la contestation en cause d'appel de proces par escript. Et si l'un ou l'autre ne ueult conclure comme on proces par escript: celluy qui ha interest a la poursuite, baille requeste a la Cour, ad ce que le procureur de partie aduerse uienne conclure dedens le temps de l'ordonnance, a la peine de l'amende en son nom priué. Et s'il differe & allegue quelque cause, pour laquelle il n'est tenu conclure, il le fera appeller en iugement en la grand chambre du plaidoyer pour conclure comme on proces par escript. Et luy sera enioinct par la Cour de conclure dedens certain temps, a la peine d'amende en son nom priué. Combien que par l'ordonnance du huietiemesme iour de Ianuier M.D.XXVIII. le procureur dedens trois iours

iours apres la cote dudiect iour sans attēdre qu'on baille requeste. Et par apres ladiēte conclusion le proces par escript est distribué & baillé a un de mesieurs, pour en faire son rapport a la Cour. Et se faiēt tous les mois distribution des proces par escript, scauoir est, qu'il est ordonné, quelz proces, & a qui ilz sont distribuez, pour estre par apres baillez selon la diēte distribution. En ce qui reste de la procedure & cause d'appel, n'y a plus difference entre le stile des Cours de Parlement & des Cours royales & autres inferieures, soit en appellation uerbale, ou en proces par escript, fors quant es defaultz qui se donnent a la barre pardeuant les commissaires. desquelz nous traicterons cy briefuement a fin de paracheuer toutes manieres de contumaces.

¶ De contumacer le defaillant pardeuāt les commissaires a la barre de la Cour.

Dōcques si une des parties a baillé requeste pour auoir commissaires, pour les oyr sur quelques choses, quelle ueult requerrir pardeuant eulx en la cause d'appel: elle fera signifier ladiēte requeste respōdue par ladiēte Cour au procureur de partie aduerse. & s'il ne cōpare a la barre lediēt iour pardeuāt les commissaires: sera donné contre luy default & congé, sauf trois iours. & s'il ne compare dedens lesdiētz trois iours: sera dōné default au congé, sauf l'endemain & sans plus l'appeller, lequel sera signifié au procureur du defaillant. & sera enregistré & deliuré trois iours apres a la partie, pour le profiēt en estre adiugé par les commissaires, ou par la Cour a leur rapport. Et s'il est iugé par les commissaires: il n'y ha point de uoyage pour aller faire taxer les despens. ainsi qu'il est diēt par les ordonnances du Roy faictes sur l'abbreuiation des proces, & publiees le xviii. iour de Iāuier l'an M.D.XXVIII.

¶ Des forclusiōs apres cōtestatiō en cause d'appel.

Et si apres qu'il est conclud en proces par escript, l'une des parties ne faiet ce qu'il est ordonné qu'elle fera: elle en sera forclosse & deboutee, comme si elle auoit a bailler griefs, produire, ou a bailler contredict & saluations: & sera ordonné qu'il sera iugé par ce qui sera trouué pardeuers la Cour.

A pres que auous exposé toutes les formes de contumaces en la cause d'appel, reste a declairer la maniere de proceder quand les deux parties cōparoissent. & en premier lieu quāt es appellations uerbales, les parties sont tenues communiquer les unes aux autres toutes leur pieces pour obuier a surprinse: ainsi qu'il est dict par les ordonnances du Roy Charles VII. article lviij. & lix. Et mesmemēt l'appellant doit fournir de son acte d'appel.

¶ De terminer & vuyder les causes d'appel par expedient.

Et par ordonnances de la Cour publiques le xxiiij. iour de de Ianuier l'an M.D.XXXV. est commandé aux procureurs que dedens quinzaine apres qu'ilz auront escript signé & paraphé de leur main le iour qu'ilz ont receu les procurations, missiues, memoires, instructions ou exploictz des parties, ilz aduisent ou facent aduiser par le conseil, si la matiere est soustenable: soit du costé de l'appellant, ou de l'intimé es appellations uerbales, ou es proces par escript, qui se peuuent uuyder sur le champ par l'ordonnance. & s'ilz trouuēt qu'ilz ne doibuent soustenir, qu'ilz le declairent au procureur de partie aduersé: pour passer l'appoinctement en iugement, ou ilz n'auroient procuracion pour acquiescer: & s'ilz ont procuracion pour acquiescer, qu'ilz le passent hors iugement, sur peine de cent solz parisis d'amende, a prendre & leuer sur icelluy que lon trouuera n'auoir obey a ce que dessus.

Ce

Ce qu'on appelle communement, passer par expedient. Et combien que ladicte ordonnance ayt esté faicte pour le soulagement des parties plaidoyans: toutes fois il ha esté trouué qu'elle uient grandement au dommage desdictes parties. car aucuns procureurs apres auoir faict deliberation d'une cause d'appel avecques notables aduocatx de ladicte Cour, & auoir enuoyé icelle signee desdictx aduocatx a sa partie: quinze iours ou trois sepmaines apres, sans que la cause fust au roolle, ledict procureur passe par expedient, & acquiesce, & donne cause perdue a sa partie, avecques condamnation de despens: lesquels se monterent quatre uingt liures & plus. d'ot appert que c'est bailler trop grand licence aux procureurs & aduocatx, de faire un arest par l'aduis de deux ou trois: combien que par les ordonnances du Roy Charles VII. qui en ce estoient fort louables, pour donner un arest fust la cause petite ou grande, il falloit qu'il y eust dix Conseillers & un President assemblez: car on ha ueu autrefois aduenir, iasoit que l'aduocat d'une partie declairast n'auoir cause ualable pour soustnir, que toutes fois le President a la remonstrance que faisoit la partie qu'elle auoit bonne cause, mais que son aduocat ne uouloit plaider, auroit faict reciter le faict par l'aduocat: & icelluy oy, & partie aduerse en ses defenses au cōtraire, la partie de laquelle la cause auoit esté abandonnee, la gaigné. & ne dict on point pour neant par un commun prouerbe, que plus uoyent deux yeulx qu'un: car ce ha tousiours esté cognu & esprouué, que quād une chose est ueue par plusieurs, la uerité en est tousiours attaincte & trouuee: car Dieu reuele parfois aux moindres: au moyē dequoy n'y ha apparence en une maniere de briefueté de expedition qu'on dict nagueres auoir esté inuentee, & mesinement es grands iours, de uuyder les proces par trois ou quatre personages: car
aucunes fois

aucunes fois pensera lon qu'un proces ne soit de cōsequēce ou de difficulté, ou les choses bien examinees on trouuera le contraire. D'auantage les ordonnances qui permettēt aux iuges royaux de executer leurs sentences nonobstant l'appel & sans preiudice d'icelluy, ueulent qu'ilz appellent quatre ou en aucunes matieres six Conseillers ou aduocatx. Toutesfois y ha encores remede, car on peut faire reparer par appel: ou quand il est dict par arest, il n'y ha plus de remede, aumoins qu'il ne soit fort difficile & de grand coust. ce que i'ay bien uolu cy escrire, a fin qu'il puisse uenir a la notice de ceulx qui y peuuent pouruoir, & que par leur bonne prudence il y soit donné ordre: car ia soit qu'il faille abbrevier les proces, neantmoins il se doibt faire par moyens moins endommageables pour les pources parties, lesquelles ont assēx afflictions d'ailleurs. Et s'il y auoit chambre ou lon plaidoyast par chascun iour les appellations uerbales, on espereroit auoir grande abbreviation de iustice: car au moyen de la lōgueur qui est a faire uuyder appellations uerbales, on est souuēt contrainct par deuant les iuges inferieurs de faire proces par escript de ce qu'on feroit uuyder sur le champ.

¶ L'appellant doibt iustifier son appel.

Mais pour retourner a ce que auons delaiissé, il fault que l'appellant, soit en appellations uerbales, ou en proces par escript, declare ou corte le iour de son appel, & en informe par acte authentique: autrement il doibt decheoir de son appel: comme il est dict es arestx mis en Latin, qui sont en la fin du stile de la Cour de Parlemēt, en l'arest clxxiiij. car il fault que l'appellant iustifie son appel, & qu'il ha appellé illico: ou s'il n'ha appellé illico, qu'il en soit releué. ce qu'il ne peut mōstrer deuement, sans informer du iour & acte de sondict appel

Et

Et combien que ſelō diſpoſition de droit commun l'appellāt ne ſoit point tenu de iuſtifier ſon appel en aucun cas: toutes-fois ſelon noſtre commune uſance & ſtile de ce royaume, l'appellant eſt tenu de monſtrer que ſon appel eſt bon & ſouſtenable, ſoit en appellation uerbale, ou en proces par eſcript: ſinon en un cas, ſcauoir eſt en cas que la ſentence ſoit donnee par contumace: onquel cas l'appel ha accouſtumé ſe uuyder par appellations uerbales en la Cour de Parlemēt, iasloĩt que es Cours inferieures il ſe uuyde cōme on proces par eſcript: car en ce cas il fault quel'intimé monſtre que les adiournemēs & defaultz dont procede la cōtumace, ſoient bien uenuz & entretenuz. & encores eſt neceſſaire en ce cas, que l'appellāt uerifie: qu'il aye appellé illico lors que la ſentence luy ha eſté ſignifiee. Et qu'en autre cas l'appellant ſoit tenu iuſtifier ſon appel, il eſt tout euidēt: car en appellations uerbales il doit informer de l'appoinctemēt duquel il eſt appellant, & en proces par eſcript il doit faire porter le proces, & en appellations uerbales chaſcune des parties enuoye ſes pieces a ſon procureur, qu'elle uoit luy ſeruir pour ſa cauſe d'appel.

¶ De la fin de folle intimation.

Auant que entrer a plaider les cauſes d'appel en appellations uerbales, il fault ſi l'une des parties eſt follemēt intimee ou anticipee, qu'elle l'allegue, & les moyens: & cōclure en folle anticipation ou intimation, & a deſpēs dōmages & intereſtz de l'aſſignation. Et pource par leſdictes ordonnances de ladiēte Cour du iiij. de Ianuier M.D.XXXV. eſt enioinct aux aduocatx, de ne propoſer aucunes parties eſtre follement intimees, ou anticipees en la Cour, que premierement ilz n'ayent bien ueu les exploĩtz, & qu'ilz ayent bonne matiere de ce faire, & ce ſur peine de quarante ſolz parifis d'amende: car bien ſouuent la Cour eſt par ce detenue longuement.

¶ De

¶ De coter par les aduocatz es pieces ce qui fait pour eulx.

Et a mesme fin est enioinct par ladicte ordonnance aux aduocatz, a mesme peine, de coter leurs pieces es endroictz ou elles seruent a la matiere: a fin que promptement ilz le puissent trouuer & lire quand la Cour leur commādera: & silz sont trouuez cōstumiers d'estre en ce negligens ilz, seront puniz de peines arbitraires.

¶ Des audiences a tour de roolle, & par placetz.

L'appellant en appellation uerbale doit estre prest de plaider ses causes d'appel, comme aussi l'intimé de defendre en icelle, quand ilz sont appellez a tour de roolle, soit en la Cour de Parlement, ou en assise deuant les iuges inferieurs. & ne doibuent auoir aucun delay moyennāt despens, ne autrement.

¶ De plaider sur le champ en appellations verbales.

Voire par les ordonnances dernieres publiees en l'an M.D. XXXIX. article cxix. est dict, que iasoit que la cause ne soit au roolle, toutesfois si par placetz le President baille audience, & qu'il ait fait commandement par deux fois a la partie de uenir prest, pour plaider a certain iour: & qu'il ne se y trouue, ou qu'il ne soit prest de plaider: sera baillé contre ladicte partie exploit de congé simple, ou de congé default, selō la qualite de la matiere. Lequel sera de tel effect, comme s'il estoit baillé a tour de roolle: & ne pourra estre rabbatu par lettres royaux, ne autrement.

¶ De defendre a toutes fins en causes d'appel.

L'intimé apres les causes d'appel de l'appellant plaidees, doit

doibt premierement alleguer ses fins de non receuoir, & par-
apres incontinent ses fins peremptoires.

¶ L'vtilité d'alleguer fins de non receuoir.

Et combien que en matiere d'appel comme d'abus, on ne re-
coiue fins de non receuoir pour le regard de dire, bien ou mal
appellé : toutes fois ne y fault oublier de alleguer lesdictes
fins de non receuoir : car par le moyen d'icelles, si elles sont
trouuees bonnes & pertinens, l'intimé eutera condemna-
tion de despens de la cause d'appel, iasoit qu'il soit dict bien
appellé: & ainsi en fut dict par arest de ladicte Cour le vij.
iour de Mars M.D.XXIX.

¶ De vuyder les appellations verbales sur le chāp.

Es Cours royales & autres inferieures, le iuge apres les par-
ties oyees en la cause d'appel, doibt la uuyder sur le chāp, ou biē
ordonner que les pieces seront mises pardenuers luy, sans en
faire proces par escript, pour en ordonner comme de raison:
car puisque le iuge a qu'il la uuyde sur le champ, le iuge ad-
quem ne doibt point faire proces par escript, sinō que les par-
ties le consentent. Et au regard de la Cour de Parlement,
quand elle ne uuyde ses appellations sur le champ, elle ap-
poincte les parties au conseil, aucunes fois sans contredict, &
parfois avecques cōtredict & saluatiōs: & ordōne que les
aduocat & corrigerōt leur plaidoyer dedēs trois iours. lesquel-
les matieres appoinctees au cōseil, sont merueilleusemēt de lon-
gue expeditiō, parce qu'elles ne se uuydent que par les Cōseil-
lers de la grand chambre: combien qu'on dict auoir esté faict
edict par le Roy, par lequel il est dict que lesdictes matieres
pourront estre distribuees aux autres chambres, & uuydees
par icelles, cōme aux autres proces par escript. Lequel edict
est

est treslouable: et seroit l'utilité de la chose publique, & des pures parties, qu'il fust obserué. Et y ha une tresbonne ordonnance du Roy Charles VII. par laquelle est dict que quand une matiere est appoinctee au cōseil, le premier iour de cōseil auāt quelque autre expedition d'autre matiere, le registre des plaidoyries prochaines soit promptement despesché & appoincté tandis que les Conseillers ont fresche memoire, & que a ceste fin audiēt iour le greffier apporte ledict registre: mais ce est mal gardé.

¶ De faire droict des fins de non receuoir sur le champ.

Si le iuge uoit que les fins de non receuoir soient apparens & manifestes, il en doit faire droict promptemēt, & declarer l'appellant non receuable comme appellant, sans regarder ne discuter s'il ha esté bien ou mal iugé par le iuge a quo. & ainsi est practiquee & entendue l'ordonnance du Roy Loys XII. article cix. de laquelle nous parlerons plusamplement en traictant des appellations qui se uuydent comme proces par escript.

¶ Des appellations interiectees des sentences donnees par contumace.

Et pource qu'auons dict cy dessus, que les appellations interiectees des sentences de contumace, sont plaidees en la Cour de Parlement comme appellations uerbales, & que ia en auons commencé a toucher, fault entendre que par les ordonnances dernieres article xxviij. & xxix. est dict que les urais contumax ne seront receuz comme appellans: ains quand a la deduction de leur cause d'appel, & defenses au cōtraire, appert que par uraye desobeissance & contemnement de iustice ilz n'ont uoulu comparoir, seront declarez non receuables comme appellans: & ordonné que la sentence dont

ha

ha eſté appellé ſortira ſon plein & entier effect, & ſera executee nonobſtât oppoſitions ou appellations quelcōques. Toutesfois ſ'il y ha quelque doubte ſur la cōtumace, & que l'appellant allegue aucunes deſenſes peremptoires, dont il fait promptement apparoir, d'tout le moins ſommairement: luy ſera donné un ſeul delay pour informer pleinement de ſedi-ctes deſenſes, tant par lettres que par teſmoings: & ſa partie au contraire, es deſpens d'icelluy appellant. pour le tout rapporté leur eſtre faiēt droiēt ſur la cauſe d'appel, ſans autre delay ne forcluſion.

¶ De l'interpretation de l'ordonnance parlant des vrais contumax.

On faiēt pluſieurs doubtes ſur l'interpretation de ladiēt ordonnance de ſcauoir qui eſt uray contumax: car on diēt en droiēt, que c'eſt celluy qui reſpond au ſergent qui l'adiourne, qu'il ne comparoiſtra point. mais ce ne peut gueres aduenir. Parquoy ſemble qu'il ſe doibt entendre quand la partie ha eſté adiournee en ſa perſonne, & n'allegue excuſe notable pour laquelle n'ha peu comparoir: comme ſi elle alleguoit le meſſagier par laquelle elle ha enuoyé ſes pieces eſtre mort en chemin, ou n'auoir peu paſſer par le moyen des eaues, ou quel que autre empeſchement. L'autre doubte eſt comment ſe doibuent entendre ces motz, quand on faiēt doubte en la contumace, ſcauoir eſt, ſi on faiēt doubte que les defaultz ſoient bien uenanz ou entretenuz. & ſeroye d'aduis, que ainſi ſe deuſſent entēdre. Le tiers & pluſgrād doubte eſt, ſi ladiēt ordonnāce doibt eſtre entēdue des ſentēces dōnees par les iuges royaux & autres inferieurs, & en autres cas q̄ en ceulx eſquelz eſt permis par les autres ordonnances de executer les ſentēces nōobſtant oppoſitiōs ou appellations quelcōques: car ſi elle ne parloit que des cas eſquelz eſt permis par les autres ordonnances

ordonnances executer les sentences nonobstāt opposition, ou appellation, elle seroit superflue. & semblablement si elle ne se entendoit, sinon quand les causes d'appel seroient uuydees en la Cour de Parlement. car lors seroient arestz, qui de leur nature sont executoires nonobstans oppositions ou appellations. Au moyen dequoy me semble, que ladicte ordonnance doit estre entendue des sentences donnees par iuges royaux ressortissans nūement en la Cour de Parlement en autres cas, que en ceulx desquelz par les autres ordonnāces est permis executer les sentences par dessus l'appel, mais non pas des autres iuges royaux inferieurs, ou des iurisdiccions subalternes, a fin que ladicte ordonnance opere de quelque chose.

¶ Des appellations lesquelles se vuydent comme proces par escript es Cours inferieures par dessoubz la Cour de Parlement.

Les appellatiōs uerbales ainsi expediees, uenons aux appellations comme en proces par escript. Nous auons dict cy dessus que auant que conclure comme en proces par escript, il fault que le procureur de la partie qui poursuit ladicte conclusion, cotte au procureur le iour que le proces par escript a esté mis au greffe. Mais es Cours royales & inferieures iasoit que le proces par escript n'ayt esté apporté au greffe du iuge ad quem : l'appellant & l'intimé ne laissent a conclure comme on proces par escript: mais par le registre de ladicte conclusion est dict que l'appellant sera tenu de faire apporter les sacz, & l'intimé fournir de la sentence en forme dedens certain temps. Et oultre l'appellant de griefz, & l'intimé de responses a griefz, dedens autre temps.

¶ Pour quelles causes on peut a droict differer & refuser de cōclure comme on proces par escript.

L'intimé

L'intimé doit regarder s'il y ha point de fins de non recevoir contre l'appellant, avant que le recevoir a conclure comme on proces par escript. Et s'il en y ha, doit dire qu'il n'est tenu de conclure comme on proces par escript, par ce qu'il n'y ha telle fin de non recevoir, iusques a ce qu'il luy soit fait raison de ladicte fin de non recevoir. Et fault qu'il luy en soit fait raison par le iuge, ou par la Cour preallablement. Et si la cause est pendant en la Cour, fault poursuiure audience comme en une appellation uerbale. Et ainsi se doit practiquer & entendre l'ordonnance du Roy Loys XII. article xxix. de laquelle nagueres auons parlé. Toutesfois aucuns iuges inferieurs recoient les parties a conclure comme on proces par escript sans preiudice des fins de non recevoir, desquelles il sera fait raison en iugeant le proces. mais ledict stile est contraire a ladicte ordonnance, laquelle est fondee en bonne raison: car s'il y ha fin de non recevoir, il ne fault point uoir le proces par escript. parce que communement la fin de non recevoir se peut uuyder en uoyant un ou deux registres ou actes. Et fault plus grands espices pour uoir le proces par escript. Neantmoins quand la fin de non recevoir ne se peut uuyder sur le champ, il me semble bon que le iuge recoie les parties a conclure sans preiudice desdictes fins, & qu'il reserve a en faire droit en iugeant le proces: & non pas qu'il appointe les parties en droit sur lesdictes fins de non recevoir, avant qu'elles ayent conclud comme en proces par escript: car il pourra ensuiure appel de la sentēce qui sera dōnee sur ladicte fin de non recevoir, par lequel sera retardé le principal, lequel ne se uuydera par aduenture par ladicte fin de non recevoir, par autānt que l'appellant en sera releué par lettres royaux, ou pour quelque autre cause.

Nullité de sentence empesche qu'on conclue cō-

F me

me en proces par escript.

Plus on peut empescher ladicte cōclusion comme en proces par escript, si l'appellant ueult soustenir la sentēce estre nulle: & apparoit de la nullité par la lecture de la sentēce, ou d'autres actes, dont il fera promptement apparoir, ou que le proces par escript par autre moyē se peut unyder sur le champ. Mais aussi si la cause de ladicte nullité ou ledict proces par escript n'est uuydē sur le chāp, & que la Cour ordonne que les parties concluront cōme on proces par escript nonobstant ladicte nullité, l'appellant sera condamné es despens enuers la partie pour auoir faict apprestier son aduocat & de la plaidoyrie, & en l'amēde enuers le Roy a l'arbitration de la Cour. & le procureur de la partie qui ha refusé temerairement de conclure, & l'aduocat qui l'a conseillé seront condamnēz en xl. solz parisis: comme il est dict par les ordonnances faictes par la Cour le xviij. de Ianuier M.D.XVIII. article ix.

¶ Le recredientaire peut empescher ladicte cōclusion en vn cas.

Semblablement le recredientaire auquel est adiugēe la recreance, si la partie appellant de ladicte sentēce de recreance, depuis la sentēce ha leuē les fruietz: & ledict appellant pour suiue le recredientaire de conclure cōme en proces par escript: le recredientaire peut dire n'estre tenu de conclure comme en proces par escript, iusques a ce que l'appellant ayt mis entre ses mains lesdictz fruietz leuez puis ladicte sentēce, ainsi que ha esté dict par arest le vij. iour de Mars M.D.XXX.

¶ De declairer en concluant cōme en proces par escript, les cheffz de la sentēce de laquelle on est appellant.

Par les ordonnances dernieres article cxliij. & xlv. est dict que

que si la sentēce dont ha esté appellé contient plusieurs chefz, il fault que en concludant on proces par escript, l'appellant declare les chefz esquelz il ueult conclure, & qu'il conclue quant esdictz chefz: & quant aux autres, qu'il cōsente que ce dont ha esté appellé sorte son plein & entier effect. autrement & a faulte de ce faire, sera en tout & par tout déclaré non receuable comme appellant, sans esperance de relief. Et pour chascun d'sdictz chefz & articles separez y aura amende, sinon qu'ilz fussent tellement conioinctz que la decision de l'un emportast la decision de l'autre.

Comment doibt estre entendu, qu'il suffit d'un grief a l'appellant.

Mais ladiette ordonnance selon mon aduis doibt estre entendue quand l'intimé requiert que l'appellant declare lesdictz chefz, & insiste qu'il n'est tenu de conclure, iusques a ce qu'il ayt déclaré lesdictz chefz. Car tous benefices de droit s'entendent quand la partie les requiert. Autrement combien que la sentence contiēne plusieurs chefz, si en un chef l'appellant ha bonne matiere: il obtiendra en la cause d'appel pour ce regard: & aura les despens entièrement de la cause d'appel: car a l'appellant suffit un grief. Toutesfois quant au principal la sentence au parsus mis hors ledict chef sortira son plein & entier effect: car le iuge ad que fera ce que debuoir faire le iuge a quo, parautant qu'il debuoir distinguer les chefz.

La conclusion comme en proces par escript conucre les fins de non recevoir.

Après que les parties ont conclud comme on proces par escript, on n'est plus receuable a alleguer les fins de non recevoir: car elles sont toutes uuydees & tollues par ladiette conclusion: par ce qu'elle equipolle a contestation de cause, cōme dict

est cy dessus. Voire le iuge par ladicte cōclusion recoipt le proces pour iuger: & uault autant ladicte reception que l'appoinctement en droict.

CDifference en ladicte conclusion quant es Cours de Parlement, & inferieures, pour le regard de receuoir production nouuelle.

Et en la Cour de Parlement on conclud cōme on proces par escript, ioinct les griefz & productiō nouuelle de l'appellāt, suyuant l'ordonance du Roy Charles VIII. Mais es cours royales & inferieures on conclud seulement ioinct les griefz, sans adioster la production nouuelle. & ha lon communement lettres royaux pour estre receu a produire de nouuel quelle piece, quand en est mestier. Toutes fois ie pēse que les iuges royaux & inferieurs pourroient aussi bien receuoir les productions nouuelles sans lettres que la Cour de Parlement.

CDe receuoir a articuler & prouuer faictz nouueaux, tant par tesmoins que par tiltres en cause d'appel.

Neantmoins soit en ladicte Cour ou autres inferieures, si on ueult articuler & prouuer faictz nouueaux par tesmoins ou par tiltres, il conuient auoir lettres royaux, & par icelles articuler lesdictz faictz, a fin de y estre receu, soit en la Cour de Parlement, ou es autres Cours. & combiē que selon droict escript on y seroit receu: toutes fois par nostre stile il fault que ce soit avecques benefice du Prince & lettres royaux, & a la charge que partie aduersē y pourra respondre, & faire prouue au cōtraire, le tout es despēs de celluy qui uouldra proposer nouueaux faictz. Ce que aussi il fault offrir par les lettres royaux: autrement elles ne seroient ciuiles. Pareillement isoit qu'on soit receu a produire de nouueau, toutes fois ce doit estre entendu en refundant les despēs des contredictz.

Et

Et par les ordonnances du Roy Loys XII. article xxx. est dict que si les parties cōcluent simplement comme on proces par escript, on ne receuera la partie a produire sans letres royaux: par lesquelles elle sera tenue declarer la piece, le faict, & la fin a laquelle elle ueult la produire. et ne serōt les parties receues a produire que a une fois, & ne serōt recues les productions depuis que le proces sera mis sur le bureau.

¶ De bailler griefz hors le proces, & respondre a iceulx.

Mais quant es griefz hors le proces, on est tousiours receu a les bailler: & ne paye l'appellant que les despens des forclusions, si aucunement il ha esté forclos de bailler griefz, pourueu qu'il les baille dedens le Parlement onquel le proces ha esté conclud. Mais sil les baille apres le Parlemēt, la partie aduersē respondra esdictz griefz aux despens de l'appellant. & celluy qui produict de nouveau, est tenu de bailler copie des pieces qu'il ueult produire a sa partie aduersē, ainsi qu'il fut dict par arrest le xviij. iour de Novembre. M.D. XXVII.

¶ Les manieres de se faire payer des despens des responses es faictz nouueaux, & des contredictz.

On ha deux manieres de se faire payer de ces despens de responses ou contredictz. L'une, si lesdictz despens sont taxez auāt les cōtredictz produictz, on peut empescher qu'ilz ne soient receuz que preallablement lesdictz despens ne soient payez. & s'ilz sont receuz, & produictz, on peut requerir qu'ilz soient reiectez de la production, si les despens ne sont payez dedens certain temps: & a ceste fin commandement estre faict a la partie de les payer. L'autre uoye est, qu'on peut requerir qu'il soit permis proceder par execution sur les biens de celluy qui doit lesdictz despēs. Mais aucuns pour empescher, queque soit differer le payemēt desdictz despēs, se portēt

appellans de la taxe d'icellux: & le semblable font es despēs preiudiciaux deuz en premiere instance.

¶ Celluy qui ha esté receu a faire quelque chose en cause en refundant preallablement les despēs, s'il se porte appellant de la taxe desdictz despens, ce qu'il ha faiēt doibt estre reiecté en cause ciuile, mais non en cause criminele.

Et faiēt on difficulté si nonobstāt lediēt appel il peut estre ordōné que lesdictz griefz ou production nouuelle ne seront receuz, ou seront reiectez. & comme ce fust aduenü de faiēt, ie scay certainement qu'un iuge bien experimenté & scauāt ordōna que telle productiō nouuelle ne seroit receue, ucu l'appel interiecté de la taxe desdictz despēs: ce que ie pēse auoir esté bien iugé, parce que attendu que ladiēte productiō auoit esté receue en refundāt les despens des cōtrediētz: & qu'il tenoit a la partie appellāt de ladiēte taxe, que les despens ne fussent payez, sa production ne debuoit estre receue: car ce seroit bailler occasion de rendre les appointemēs du iuge illusoires. Ou biē selon l'aduiz d'aucuns, il peut estre ordōné que nonobstant l'appel & sans preiudice d'icelluy, il garnira la main desdictz despens en baillant caution de les rendre s'il est diēt en fin de cause que faire se doibue. Autre chose est en matiere criminele, ou un accusé cōtūmax par lettres royaux est receu a cōparoir, & obeyr a iustice, en refundāt les despēs des defaultz & contumaces cōtre luy baillez par preiudice, & auāt entree de plaid: car supposé que le iuge ordonne lesdictz despēs ainsi estre payez, neantmoins si lediēt accusé se porte appellāt de la taxe desdictz despēs, & qu'il soit prisonnier: la partie ciuile demāderesse ne peut delayer d'aller auāt & proceder en la cause criminele, pour raisō de ce q̄ lediēt défendeur ne paye les despēs. La raison de la diuersité est, car en
matiere

matiere criminele le procureur du Roy est la principale partie qui y ha interest pour la chose publique, que les crimes soient punis: laquelle punition ne doit estre differee pour l'interest pecuniaire desdictz despens.

¶ Comment on valide la deposition d'un tesmoing qui ha depose de quelque fait non articulé.

Pareillemēt si une partie a plus mōstré par sō enqueste, qu'il le n'ha articulé par ses escriptures, il fault qu'elle ayt lettres royaux pour estre releuee a articuler ledict fait, a la charge que sa partie pourra aussi respōdre, & faire preuve au cōtraire es despēs de celluy qui allegue nouveaux faitz, cōme nous auōs dict cy dessus on premier liure: car la depositiō d'un tesmoig ne uault en ce qu'il depose oultre les choses articulees.

¶ De faire registre par lequel soit contenu, que l'appellant ha fourny de griefz.

Quād l'appellāt baille griefz es Cours royales & inferieures, il en est fait registre au greffe. Mais quād il les baille en la Cour, il n'en est fait registre au greffe, mais seulement on attache le sac onquelsōt les griefz, au sac du protes par escript de l'appellant, lequel sac on trouue au greffe: & baille l'appellant requeste, par laquelle il declare auoir baillé griefz, desquelz il baille copie a l'intimé: requiert qu'il luy soit fait cōmandemēt de bailler responses a iceulx griefz dedēs le tēps de l'ordonnance, autrement qu'il en soit forclos, ce qui est ordonné par la Cour. & fait l'appellāt signifier ladicte requeste au procureur de partie aduerse, & luy fait bailler copie des griefz par un huysier, dōt il fait mētion par son exploit: par lequel stile l'appellant peut informer auoir baillé griefz. dont il uient grands inconueniens: car bien souuent ces exploits se perdent: & le sac des griefz mis au greffe s'escare: ou bien on le fait soustraire chez le rapporteur. pour a quoy

obuiuer seroit bon que l'appellant feist faire registre au grefse de la Cour, par lequel il peust apparoir qu'il a fourni de griefz. Car j'ay ueu perdre une bonne cause d'appel en ladicte Cour, & l'arest porter que l'appellant auoit esté forclos de griefz, cōbien que ie les eusse ueu attacher au proces par escript par le procureur de l'appellant présent le greffier de la Cour. & si les griefz eussent esté ueux: eust esté autremēt iugé. & fut cōdamné l'appellant es despens, & en l'amēde.

¶ Comment on doit entendre que c'est de bailler griefz hors le proces.

Par les griefz on ha accoustumé ordinairement de les intituler griefz hors le proces. Et par les ordōnances mesmes est dict, que l'appellant pourra bailler griefz hors le proces. Pourquoy aucuns pensēt, qu'il n'est loysible de mettre par lesdictz griefz aucuns faictz raisons & moyens qui soyēt contenus on proces par escript. Toutesfois ie suis d'aduis cōtraire, & ainsi on l'observe. car les griefz ne sont autre chose que un sommaire recit du faict deduiēt on proces par escript, & raisons de droict pour monstrier qu'il ha esté faict grief a l'appellant. Mais on les appelle griefz hors le proces, par auant qu'on les met en un sac apart, qui est attaché au proces par escript. Et si on uouloit mettre faictz nouueaux par les griefz: combien qu'il semble selon droict escript qu'on le puisse faire: toutesfois seroit dangier que la Cour ne les iuges inferieurs n'y eussent regard, attendu le stile observé de temps immemorial: par lequel on ha accoustumé auoir lettres royales a ceste fin en la maniere cy dessus declairee.

¶ De ne poser faictz calumnieux es griefz hors le proces, & de la peine contre ceulx qui les proposent.

Mais doivent bien y aduiser les impetrans desdictes lettres

tres. car si les faictz nouueaux sont trouuez calumnieux, & ne seruir a la decision du proces: serot les impetrans cōdamnez en l'amēde ordinaire du fol appel es Cours souueraines, & uingt liures parisis es inferieures, & moytie mois a partie, & plus grosse si mestier est: ainsi qu'il est dict par lesdictes ordonnances dernieres article cxij.

¶ De faire proceder par forclusions apres le proces conclud & receu pour iuger en la cause d'appel. si l'appellant baille griefz, & ne faict productiō nouuelle, l'intimé l'en doit faire forclore. & s'il enournist, & que l'intimé ne baille responses, ou contredictz, il en doit estre forclos. & fault aussi qu'il ayt forclusion de saluations apres contredictz, & par apres le proces estre couché en droit, comme autresfois. & doit estre semblablement faict iniunction aux parties de dresser les sacz dedens quelque temps: autrement qu'il sera iagé par ce que sera trouué pardeuers la Cour comme en la premiere instance.

¶ Des manieres de vuyder appellations.

Conuient doncques a present traicter comment on donne sentence en cause d'appel. Qui se faict en deux sortes: l'une par acquiescement, l'autre parties oyés en la cause d'appel, ou le proces par escript ueu.

¶ Des acquiescemens.

Et pource qu'il aduient souuent, que l'appel se uuyde par acquiescement pour craincte de l'amende, nous dirons premierement la maniere de acquiescer.

¶ Quand on peut acquiescer sans amende.

si la cause est pendant en la Cour de Parlemēt, & soit appellation uerbale, & ne soit au roolle, on est receu a acquiescer sans lettres royaux & sans amende. Et semblablement dedens huiētaine apres que la cause est au roolle, on peut acquiescer

quiescer sans amēde, & sans lettres. Mais parapres on n'est point receu a acquiescer, que par lettres, & en payant l'amende pour chascun parlement ou annee depuis que la cause ha esté releuee en la Cour. Et pource par l'ordonnance on doit coter en marge du roolle sur chascune cause, quant & Parlemens sont que la cause est releuee & l'assignation escheue. Et est tenu le procureur de l'appellant declairer ledict temps: comme il est dict par les ordonnances publiees ledict xviii. iour de Ianuier. M.D.XXVIII.

Comment on doit acquiescer en proces par escript, & dedens quel temps.

Et si c'est proces par escript, on peut acquiescer sans lettres, auant qu'il soit conclud comme on proces par escript: mais on paye soixante solz parisis d'amende. Mais apres qu'il est conclud comme on proces par escript, il faut auoir lettres, & payer cent solz d'amende pour chascun Parlemēt, comme en appellatiō uerbale. Et peut on acquiescer par lettres royaux, iusques ad ce que le proces soit mis sur le bureau, & cōmencé a rapporter: voire iusques ad ce que l'arest soit deliberé, & conclud en la chambre. & bien souuent, iusques ad ce qu'il soit mis au greffe, & prorogé ou declairé. Mais lors l'acquiescent doit payer les espices de l'arest, & ne saulue que l'amende. Toutes fois par les ordonnances du Roy Loys XII. article lv. est prohibé es Chancelleries, de bailler lettres de acquiescement, sinon que ceste clause y soit, Pourueu que le proces ne soit ueu, consulté, ne iugé.

Comment on peult acquiescer sans amende.

Et quand l'appel est pendant es Cours inferieures, on ne peut acquiescer qu'on ne paye l'amende, sinon qu'on ayt lettres royaux par lesquelles soit mādē au iuge recevoir l'appel lant a acquiescer sans amende. car lors ne payera amende, ia-
soit

soit que la cause d'appel soit pendant en autre Cour que royale. Car attendu que l'amende n'est acquise que par la sentence, le Prince la peut remettre.

- ¶ Quand on doit signifier la procuration receue pour acquiescer.

Par l'ordonnance du Roy Loys XII. article lv. & cxxix. & de ce Roy article xi. il fault que le procureur de l'appellât signifie au procureur de l'intimé la procuration qu'il ha pour acquiescer deux iours apres qu'il l'a receu, & six iours apres doit obtenir lettres royaux pour estre receu a acquiescer a peine de l'amende.

¶ Comment on se doit desister de l'appel, & dedens quel temps.

Autre maniere y a de terminer appellations: qui est que dedens la huitaine apres l'appellation interiectée, on s'en peut desister par l'ordonnance sans payer amende. Mais on paye les despēs ordinaires a partie aduersē pour proces retardé: & aussi les despēs de l'adiournement qui est baillé apres le desistement, pour uenir proceder en la matiere. Et a ccomoyē l'appellant apres qu'il s'est desisté de son appel, doit faire bailler adiournement a sa partie aduersē, pour uenir proceder. Car ce faisant il euit les despens de l'adiournement.

¶ Quand il fault faire signifier le desistement d'appel a partie aduersē.

Et doit on delaisser l'appel au lieu ou il est interiecté. & quand il est interiecté & delassé au greffe, il ne fault point le faire scauoir a partie aduersē, sinō qu'il y eust deux personnes cōmises a l'exercice du greffe. car s'il est delassé pardeuāt autre que celluy pardeuant lequel il ha esté interiecté, il le fault signifier a partie aduersē, comme il fut dict par arrest l'viii^eiesme iour d'Auril M.D.XXI.

Aussi

Aussi quād l'appel est interiecté pardeuāt le sergēt: il fault le delaisser pardeuant icelluy sergent mesme, au parauāt qu'il ayt rēdu son exploict a partie aduersē, & faire mettre ledict desistement par ledict exploict. autrement si le sergent auoit rendu les exploictz, ou ne le uoulust employer par sēs exploictz, il faudroit signifier ledict desistement a partie aduersē. & est le meillcur de faire ladicte signification dedens ladicte huiētaine.

¶ Quelle offre on doit faire, quand on se veut desister apres la huiētaine d'un appel.

Car si on la faict apres la huiētaine: partie aduersē pourra dire auoir enuoyé querir lettres royaux d'anticipation: lesquelles luy cōuendroient payer: tāt le memoire, que le uoyage, & oultre la consultation qu'il auroit i aiēt pour scauoir s'il auoit matiere de soustenir l'appoinctement duquel auoit esté appellé. Mais si dedens la huiētaine la partie aduersē de l'appellant faict aucūs fraiz pour luidict appel, soit pour anticiper l'appellant, ou autrement, l'appellant n'en est tenu, car il ne peut anticiper audeuēs la huiētaine: tellement que s'il auoit anticipé dedens la huiētaine, & que apres icelle huiētaine l'appellant obtint lettres royaux pour mettre son appel au neant, l'anticipant seroit condanné des pēs de la folle anticipation, comme il fut dict par arest le ix. iour d'Aoust M.D.XXX. Toutesfois si l'appellant n'auoit mis son appel au neant, ains le uoulust soustenir: il ne pourroit demander les despens de l'anticipation faicte dedens huiētaine.

¶ En quelles matieres on peut faire anticiper dedēs la huiētaine octroyee pour delaisser l'appel.

Nous auons un stile en la uille de Fontenay: par lequel
quand

quand il est question de causes de foires & entre marchans forains, & que durant les foires qui sont tenues en ceste uille, l'un des marchans appelle du Chastellain de ceste uille: la partie aduersé le peut faire anticiper des le mesme iour de l'appel interiecté a mesme iour a certaine heure, ou au l'endemain, pardeuant le Seneschal dudiect Fontenay iuge superieur du Chastellain, par une prouision ou mandement qu'on prèd dudiect Seneschal, ou de son greffier: par maniere que bien souuent en trois iours l'appellant est contumacé par deux defaultz, & sentence contre luy donnee par contumace. Et soustenons lediect stile, parce qu'il est question de causes requerrans celerité: d'autant que lesdictes foires ne durēt que trois iours: & a fin que les marchans qui sont de loing, ne soient detenuz apres la foire, & ne perdent leur compagnie pour leur retour. Neantmoins ie ne scay si ce stile se pourroit soustenir en la Cour de Parlement: attendu que les parties des la premiere assignation sont tenuz d'eslire domicile. Ioinct que auparauant l'ordonnance de ladiecte election de domicile, on contraignoit lesdictz marchans esdictes causes de foires, d'eslire domicile, ensemble & de bailler caution de ester a droiect des la premiere assignation: autrement on ordonnoit que leurs marchandises & cheual, ou en default de marchandises & cheual, leurs personnes seroiēt arrestees. & par ainsi apres ladiecte election de domicile, & caution bailliee, n'y a pas grand matiere de user de telle precipitation: car encore ne trouue es quitable de contraindre un marchand forain de bailler caution en foires on lieu ou se tient la foire.

¶ A quelles personnes on doit signifier le desistement.

Or pour reuenir a la signification du desistement d'appel que auons intermise, est necessaire de le signifier a la partie aduersé

aduerse mesme de l'appellant, & ne suffit la signifier a son procureur qui auroit mené la cause en laquelle l'appel auroit esté interiecté, ainsi qu'il fut dict par arst le XXI. iour de Ianuier M.D.XXI.

¶ Le procureur ayant charge d'appeller, peut delaisser son appel, iasoit que sa procuracion ne le porte.

Et combien que le procureur qui ha mandemēt d'appeller, n'ayt mandement expres pour delaisser son appel: toutes fois il peut delaisser son appel dedens la huietaine: ainsi qu'il est recité es arētz colligez par maistre Iehan le coq, qui sont a la fin du stile de la Cour de Parlement, en la question clix. pourueu que son maistre n'ayt releué sondict appel, & le sache ledict procureur. car en ce cas il ne peut renoncer a son appel, parce que la chose n'est plus entiere.

¶ Dedens quel temps on peut renoncer a l'appel selon droit commun.

Mais de droit commun on peut renoncer a son appel iusques ad ce qu'il soit relcué pardeuant le iuge superieur.

¶ Apres l'estre desisté de l'appel, si on peut encore appeller: & si lors le iuge nonobstant le second appel, peut executer sa sentence.

Et si une fois on a renoncé a l'appel, on n'est plus receuable a appeller de l'appoinctement a l'appel duquel on a renoncé. Mais ce ne doit estre entendu que par le moyē de la dicte renonciatiō dudiect appel, le iuge duquel on auroit appelé, peut passer oultre a l'execution de sa sentence de laquelle auroit

auroit esté appellé de rechef par le second appel: sinon qu'elle fust des cas de l'ordonnance esquelz il est permis executer les sentences nonobstant appel. Mais en cause d'appel l'intimé peut alleguer ledict desistement pour une fin de non reccuoir. Et ne obseruons pas le droit commun, qui ueult que une partie ne puisse appeller d'une sentence donnee par son consentement. car la partie peut appeller de telle sentence: Et y sera receue: pourueu que en la cause d'appel elle soit releuee par lettres royaux de sondict consentement come donné par erreur, ou faulx se cause. Pour ce n'y a difficulté, que si le condané a quelque peine corporelle en matiere criminele appelle, Et renonce a son appel: Et par apres quand on ueult executer la sentence cõtre luy, il en appelle de rechef: on doit differer l'execution.

¶ Si l'execution encommencee de la sentence on appelle, on doit paracheuer l'execution.

Mais si l'execution estoit encommencee, comme s'il eust commencé a estre fustigüé par l'executeur de la haulte iustice: lors il ne debiroit differer de paracheuer la fustigation es lieux accoustumez. Toutes fois ledict executeur doit differer de pendre Et estrangler, ou autremēt faire mourir, supposé que le condané ne appellast que en l'eschelle, ou sur les chaffaulx. Et au regard du iuge, il doit tousiours differer pour l'appel: sinon es cas esquelz il luy est permis de passer oultre selon l'ordonnance: tellement que s'il ha commencé a bailler la question ou torture, Et le defendeur en appelle, le iuge doit superfeder, car il peut tousiours appeller, parautant que le grief dure tousiours. Tout ainsi que un prisonnier peut appeller tãdis qu'il est prisonnier de la prise de corps Et de son emprisonnement.

¶ De

¶ De mettre vn appel au neant par lettres royaux,
& dedens quel temps.

On obtient par fois lettres royaux, pour mettre l'appel au neant. Et de ce on use, quand on ne s'est desisté dedens la huietaine. Et peut on obtenir lesdictes lettres dedens les trois mois, qu'on ha pour releuer en la Cour de Parlement, ou dedens les grands assises des autres iuges inferieurs, & qu'on n'ha esté anticipé. Voire on obtient bien lettres apres ledict temps. mais en ce cas on met par lesdictes lettres clause de reueliement de ce qu'on n'ha obtenu lesdictes lettres dedens ledict temps, & aussi une autre clause, scauoir est, pourueu que l'appellant n'ayt esté adiourné en desertion d'appel.

¶ Fault estre releué de l'illico, & auoir permission d'executer les lettres hors le temps de releuer, quand on met l'appel au neant par lettres royaux.

Et combien qu'on mette l'appel au neant, toutesfois si on n'ha appellé illico, ou que lon ne puisse faire executer lesdictes lettres royaux dedens le temps de releuer, il fault estre releué par lesdictes lettres de l'illico, & auoir prorogation d'un mois pour faire executer lesdictes lettres, tout ainsi que si on uoloit soustenir l'appel.

¶ S'il est meilleur de adresser l'execution des lettres royaux pour mettre vn appel au neant a vn sergent ou a vn iuge.

Aucuns prennent lesdictes lettres avecques clauses d'icelles signifier a partie aduerse, qu'ilz adressent au premier sergent royal seulement, a fin que la partie aduerse n'en puisse pretendre

pretendre ignorance. Mais ie trouue meilleur que oultre ladicte signification, soit mandé par lesdictes lettres audict premier sergent, de adiourner partie aduersé pardeuant le iuge qui ha donné l'appoinctement duquel a esté appellé, pour le receuoir a acquiescer audict appoinctement, en refundant despens telz que de raison: car si l'appellant ne faict ceste diligence de faire adiourner sa partie aduersé, elle la fera, & coustera audict appellant au double.

¶ Quelle offre on doit faire quand on met vne appellation au neant par lettres sans appeller la partie deuant le iuge qui ha donné la sentence.

On bien fault que l'appellant en luy faisant signifier lesdictes lettres, sans luy bailler adiournement, face faire a ladicte partie aduersé offre real a descouuert de certaine somme de deniers suffisante pour les fraiz & mises qu'elle a faict par & au moyen dudit appel, cōme pour auoir faict consultatiō s'il debuoit soustenir l'appoinctement duquel a esté appellé, & autres choses requises & accoustumées en tel cas: mais bien difficilement les parties entre elles s'en peuuent accorder. Parquoy est meilleur, que ce soit faict pardeuant le iuge.

¶ Quand on peut mettre l'appel, & ce dont a esté appellé, au neant.

Parfois on obtient lettres royaux pour mettre l'appel, & ce dont a esté appellé, au neant. Mais on ne le peut pas faire que en aucunes matieres: scauoir est, quand la sentence dont a esté appellé, est donnée par contumace.

¶ Sentences de contumace ne se mettent toutes au neant.

Et encore fault qu'elle soit donnée auant contestation en cause par default. car si elle est donnée par forclusions apres la

¶ Les iuges inferieurs par dessoubz les iuges royaux, ne peuuent mettre l'appel & ce dont a esté appellé, au neant.

Les iuges royaux & autres inferieurs, par leurs sentences en cause d'appel, ne peuuent mettre les appellations au neant, ains doibuent dire bien ou mal iugé.

¶ Le iuge ad quem ne peut interloquer & adiu-
ger preuue que le iuge a quo debuoit adiu-
ger, sans que le iuge ad quem die bien ou mal iugé.

Et ne peuuent bailler interlocutoire, que le iuge a quo debuoit
bailler de faire preuue ou autre chose, sans dire preallablement
qu'il a esté mal iugé. en quoy plusieurs iuges errent.

¶ La Cour met l'appel & ce dont est appellé,
au neant.

Et au regard de la Cour de Parlemēt, est dict par les ordon-
nances du Roy Loys XII. article XXXI. que ladicte Cour
ne mettera les appellations au neant: mais dira puremēt &
simplement qu'il a esté bien ou mal iugé. fors que au moyen
de la production nouuelle faicte en ladicte Cour, elle pourra
mettre l'appellation au neant sans amende & despens de la
cause d'appel, la sentence dont a esté appellé sortissant son ef-
fect. Et par les ordonnances de ladicte Cour faictes ledict
quart iour de Ianuier M.D.XXXV. ladicte Cour mesme de-
clare, qu'elle ne mettera plus au neant les appellations, sinon
pour grande & euidente cause.

¶ De conuertir appellations en oppositions.

Auparſus y a une autre maniere de mettre fin es appella-
tions. C'est quand on les conuertit en opposition. & ce est
permis en certain cas seulement. scauoir est, quand on appelle
des sergens mettans a execution quelque sentence ou mande-
mēt de iustice. & ne faict on distinction s'il y a eu opposition
preallablement

preallablemēt faicte auparauant l'appellation interiectee, ou non: pourueu que le sergent ayt passé oultre nonobstant opposition.

¶ Appellations interiectees des exploictz des sergens, ont nature d'opposition.

Car toutes appellations interiectees des executions faictes par les sergens, sortissent & ont nature d'opposition: & par la uoye d'icelle opposition lon obtient toutes mesmes choses, qu'on obtiendroir par appellations.

¶ Comment on doit appeller d'un sergent.

Pource si un sergent execute mal, il fault premierement se opposer: & si nonobstant l'opposition il passe oultre, il fault en appeller: & lors sera faict droit de l'appellation, si bien ou mal a esté appelé. Mais bien souuent encore la Cour conuertit telles appellations en oppositions sans dire bien ou mal appelé: & renuoyé les parties pardeuant le iuge ordinaire pour proceder sur l'opposition, comme il fut faict en un arrest donné le tiers iour d'octobre M.D.XXXI. es grâs iours tenuz a Poitiers. Mais le iuge royal ou autre inferieur ne peut couer tir l'appel en oppositiō sans lettres royaux a luy adressās.

¶ Pardeuant quel iuge doit estre traictee l'opposition en laquelle vn appel a esté conuertit.

Et les conuient adresser au iuge ordinaire du lieu auquel l'opposāt ha son domicile, & nō au iuge qui deburoit cognoistre del'appel. Au moyen dequoy comme un personnage se fust porté appellant de l'execution de certaines lettres royaux en forme de mandement de debitis: par uertu desquelles & d'une obligation en forme authentique on auoit pro-

cedé par execution sur ses biens : & eust obtenu lettres royales adressans a la Cour de Parlement, pour conuertir son appel en opposition: & eust faict bailler assignation a partie aduersé en ladicte Cour, pour proceder sur l'enterinemēt desdictes lettres: les parties furent reuoyees par arrest de ladicte Cour pardeuant le iuge royal ordinaire & domiciliaire de l'opposant, & icelluy opposant cōdāné es despēs de l'assignation baillee en ladicte Cour enuers sa partie aduersé. Car la Cour ne cognoist pas de toutes causes en premiere instāce: & estoit luy attribuer la cognoissāce de ladicte cause en premiere instance par lettres royaux. ce qui est prohibé par les ordonnances. Mais si on estoit appellant d'un sergent executeur de certain arrest de la Cour, & qu'il fust requis conuertir l'appel en oppositiō: faudroit adresser les lettres royaux pour ce impetrees, a ladicte Cour. & en ce cas la cour ordinairement enterine telles lettres. car puis qu'il est question de l'execution de ses arrestz, elle peut cognoistre de l'opposition baillee a l'execution d'iceulx.

Desquelz cas on peut conuertir l'appel d'un appoinctement donné par le iuge en opposition.

En aucuns cas est permis de conuertir un appel interieclé d'un iuge en opposition : scauoir est, quand la Cour commet quelque iuge pour executer le sien arrest, & qu'on appelle & quelque interlocutoire, qui n'est de grand preiudice. Mais lors fault adresser les lettres royaux a ladicte Cour dōt est emané l'arrest. Toutesfois en ce cas on ha accoustumé plus souvent mettre l'appel & ce dont est appelé au neant, & mādcr a la Cour par les lettres royaux de pourvoir audict appellāt de ce que auroit denié ou deu pourvoir le iuge a quo,
comme

comme de un delay pour produire nonobſtant la forcluſion contre luy baillee par lediēt iuge a quo, ainſi que nous auons diēt cy deſſus plus amplement en traictant de la forme de mettre les appellations au neant.

¶ De ce qu'il fault obſeruer pour en eſtre releué en conuertiffant l'appel en oppoſition.

Et tout ainſi que en mettant au neāt une appellatiō, auſſi en la cōuertiffant en oppoſition, il fault par les lettres royales a ceſte fin obtenues, que l'appel ſoit cōuertī en oppoſitiō, ſans amēde, & ſans qu'on ſoit plus tenu le pourſuiure en aucune maniere: & qu'il ſoit mandé au premier ſergēt royal de bail-
ler iour a partie aduerſe pardeuant le iuge, pour uenir proceder ſur ladiēte oppoſition. Et eſt requis d'eſtre releué de l'illico, & autres fins de non proceder, & de mettre clause de pro-
rogation du terme pour les executer; tout ainſi que quād on met un appel au neant, dont auons cy deſſus a plein parlé.

¶ Comment on ſe doit pouruoir alencontre d'une taxe faiēte par vn de meſſieurs de la Cour d'un portage de ſacz.

Je ne ueuil icy oublier de aduertir que ſi un ſergent faiēt commandement par uertu d'un executoire d'un portage de ſacz de payer au meſſagier la ſomme y contenue, on ne peut ſe oppoſer au commandement. Mais on doit ſe porter appel-
lant de la taxe contenue pour lediēt executoire, ſ'il y a matie-
re d'appel: comme il fut diēt par areſt donné es grāds iours tenuz a Poictiers le xviij. iour d'octobre M. D. XXXI. Tous
tesfois ce doit eſtre entendu, quand on pretend la taxe eſtre

mal faicte: car lors il se fault pouruoir par appel de ladiète tax.
 xe. Mais si lon pretēd auoir payé ladiète taxe, ou n'estre point
 - condamné par icelle: lors on se peult opposer. & si le sergent
 passe oultre nonobstant l'opposition, on en peut appeller, &
 releuer ledict appel en la Cour de Parlement.

¶ De emender le iugement en disant mal iugé.

Tous iuges doibuent auoir souuenāce en donnant leur sen-
 tence en cause d'appel, que s'ilz disent mal iugé, ilz emen-
 dent & corrigent leur iugement: & en ce faisant ilz facēt
 ou ordonnent ce que le iuge a quo debuoit faire ou ordonner.
 Touchant le renuoy de la cause principale, ou de l'exécution
 de la sentēce que est tenu le iuge ad quem faire & reūoyer
 pardeuant le iuge a quo en uuydāt la cause d'appel, nous en
 auons traité cy dessus en ce second liure asses copieusement,
 en declairant la forme de donner sentēces par contumace en
 causes d'appel. Parquoy n'est plus mestier en ce lieu le repe-
 ter: sinon si le renuoy est omis par la Cour, par ce qu'il n'y ha
 appel de l'arest, il fault auoir commissiō de la Cour par re-
 quēste a icelle presentee, ou par lettres royaux, pour reūoyer
 la cause pardeuāt qui il appartiēdra. Reste a ce moyen pour
 paracheuer ce traité des sentēces en causes d'appel, declai-
 rer comment le iuge doibt condamner es despens: car en ce y
 ha grand contrariété d'opinions entre les docteurs tant du
 droict ciuil que du droict canon.

¶ De la condemnation des despens en cause d'ap- pel pardeuant les iuges inferieurs.

Mais auiourd'huy en ce royaume nous gardons quant aux
 iuges royaux & autres inferieurs, que celluy qui gaigne la
 cause

*cause d'appel, soit l'appellant ou intimé, en appellation uerba-
le ou en proces par escript, doibt obtenir les despens de la cau-
se d'appel : car la sentence des iuges inferieurs par dessoubz
les royaux ressortissans nuement en la Cour, n'est pas reputée
de telle efficace qu'elle sauue les despens de la cause d'appel
aux intimez : parce qu'en aucuns pays les intimez mesmes
payent l'amende, comme les appellans, ainsi qu'auos dict cy
dessus.*

**¶ De la condemnation de despens en causes d'ap-
pel en la Cour de Parlement.**

*Au regard de la Cour de Parlement a Paris, en appellatiōs
uerbales, elle cōdamne l'intimé comme l'appellant es despēs :
& par fois en l'amende de dix liures, ou uingt liures, quand
le iugé est apparemmēt inique. & en ce cas souuent on adiu-
ge reparation a l'appellant comme a l'intimé iusques a cer-
taine somme de deniers pour le retardement du proces, com-
me cy deuant auos dict.*

*Quant es proces par escript, ladiēte Cour ha accoustumé
si elle dict mal iugé, de dire sans despens de la cause d'appel :
& condamne l'intimé es despens de la cause principale. Et le
semblable elle faiēt si elle met l'appellation & ce dōt ha esté
appellé au neant sans amende : combien qu'il n'ayt esté rien
produict de nouueau en la cause d'appel. & ce est faiēt pour
l'excuse qu'ont les intimez par le moyen des sentences des
iuges royaux ressortissans nuement en la Cour. Toutesfois
quand la Cour uoit qu'il n'y ha apparence en la sentēce du
iuge royal, elle cōdamne l'intimé es despēs de la cause d'ap-
pel, cōme de l'instance principale. & ainsi fut faiēt par arest
du dernier iour de Iuing, M.D.XXIX. Ce qui est fort equita-
ble,*

ble, a fin que les parties ne practiquent auoir sentēce a tort pour elles par les iuges royaulx nō plus q̄ par autres iuges. ¶ L'intimé n'est tenu de rendre la moitié des espices a l'appellānr qui gaigne les despēs de la cause principale.

Quand la Cour met l'appel & ce dont est appellé au neāt sans despēs de la cause d'appel, & condāne l'intimé es despēs de la cause principale : l'intimé ne peut estre contrainct de payer ou refondre la moitié des espices auancees par l'appel lāt pour l'arest, iasōit qu'il n'eust peu auoir l'arest sans payer les espices. & ne peut demander l'intimé en la taxe des despens sinon ce qu'il ha baillé au greffier pour l'escripture & seel de l'arest, ainsi qu'il ha esté dict par arest (les chambres pour ce assemblees) le dernier iour d'Aoust M.D.XXX. Mais peut bien bailler l'intimé requeste a ce que le sac & pieces de l'appellant ne luy soit deliuré, que preallablement il n'ayt rendu la moitié des espices payees par l'intimé. & obserue on le semblable quant a raison de la production nouuelle. La Cour compense les despens tant de la cause d'appel que de la cause principale, combien que par ledict arest soit reserué a la partie aduersē de celluy qui aura baillé les espices, son recours a lencontre des autres.

Le iuge en la cause d'appel se peut reseruer la taxation & liquidation des despens dōmages & interestz lesquelz il adiuge par sa sentēce, soient les despens dommages & interestz de la cause d'appel ou de la cause principale: & doit taxer tous lesdictz despens.

¶ Quand le demandeur demande plus qu'il ne luy est deu, & le defendeur n'offre ce qu'il doit, comment se doit faire la condamnation des despēs: & aussi si ledict defendeur offre ce qu'il doit.

Parautant

Parautant qu'il y ha pareillement grāde controuerse entre noz docteurs de droict ciuil & droict canon, si un demandeur n'obtient entierement a ses fins & cōclusions, ains seulement en partie d'icelles, s'il doit auoir entierement les despens de la cause: & que nous n'auons rien touché de ce en traittant la forme de bailler sentence en premiere instance: est bien requis en ce lieu de declairer comment nous en usons. & certes nous faisons une distinction: ou il est questio d'action personnele, ou d'action reale, ou mixte. En action personnele si le defendeur n'ha rien offert, ou n'ha faict offre suffisant, le defendeur est condamné en tous les despens de la cause. & s'il n'ha faict offre suffisant, il est condamné es despens iusques a ladicte offre, & le demandeur es despens puis ladicte offre. Mais s'il est questio d'action reale, & que le defendeur n'ayt faict aucun consentement ou offre, les despens seront cōpenséz. & si le defendeur ha faict offre satisfaietoire, le demandeur sera condamné es despens depuis ladicte offre, & les despens du precedēt cōpenséz. La raison de ladicte diuersité est tresbonne: car en action personnele est questio de ce qui est faict avecques nous, ou avecques nostre predecesseur duquel sommes heritiers. Mais en action reale n'est questio de nostre faict, & pouuons pretendre plus iuste ignorance. Et combien qu'en la Cour on tiēne ceste distinction: neantmoins aucuns iuges inferieurs ne la ueulent receuoir, & font une autre differēce. Scauoir est, si lon demande plus en quantité: comme il n'est deu que cinquante, i'en demande cent: il ne m'appartient que la moitié en une picce de pré, ie demande le tout: & lors si le defendeur n'offre la moitié, ilz le condamnent en tous les despens. Ou bien on demande trop en qualité: comme ie demande cinq solz de cens, ie prouue que cinq solz me sont deux de rente: lors ilz

ilz compensent les despens . ou bien ie demande soubz une condition, & ie ne prouue qu'il me soit deu soubz ladicte condition: semblablement ilz compensent les despens. Et combien que ceste distinctiō soit de Barthole, l'autre toutesfois est fondee en meilleure & plus reale raison . Ausurplus est a noter en cause d'appel, que si on temps de la sentence interlocutoire ou appoinctement donné , n'auoit esté faict grief; & que toutesfois grief depuis par le moyē de ladicte sentēce soit ensuiuy, & pource lors & apres le grief suruenue la partie greuee en appelle: elle gaigne sa cause quāt au mal iuge. mais elle n'aura les despēs de la cause d'appel, parce qu'il auoit esté bien iugé lors & on temps de l'appoinctemēt dont auoit esté appellé: & que le iuge ne pouuoit penser au grief, qui depuis son appoinctemēt estoit suruenue: & aussi auoit l'intimé matiere de le soustenir comme estant bien donné. Tout ainsi que quand en un proces par escript par une production ou enqueste nouuelle faicte en la cause d'appel l'appellant gaigne sa cause: mais il n'ha les despens de la cause d'appel . & ainsi fut deliberé par notables aduocatx de la Cour de Parlemēt a Paris on cas cy apres declairé. scauoir est, comme certaine action petitoire eust esté intentee pour raison de quelques biens immeubles donnez: & tantost apres la premiere assignation, le iuge eust permis au demandeur de faire examen a futur, & le defendeur eust maintenu de faulx la donation, au moyen dequoy eust esté ordōné que le defendeur bailleroit moyens de faulx. Quoy uoyant le demandeur, pour asseurer l'instrument de sa donation, & sa preuue par tesmoings, il ueult faire faire son examen a futur, qui luy auoit esté permis faire . faict bailler assignation au defendeur pardeuant les commissaires commis en ceste partie , pour uoir iurer ses tesmoings. le defendeur cōparoist: & preuoyant l'entreprinse
du

du demandeur, empesche que les tesmoins d'icelluy demandeur soyent receuz, parautant qu'il auoit ia faict inscription de faulx alencontre de ladiete donation: & que ueue ladiete inscription, le demandeur ne pouuoit plus faire examen a futur: & declaire ledict defendeur estre appellant de ladiete permission d'examen a futur. Au moyen dequoy les commissaires renuoyent sur ce les parties pardeuant le iuge qui les auoit commis. Lesdictz aduocatx furent d'aduis que ledict appel n'estoit soustenable en ladiete maniere qu'il estoit interiecté: mais que le defendeur debuoit remonstrer au iuge que ladiete permission ne debuoit sortir effect lors, & empescher qu'elle sortist effect, par le moye de ladiete inscription de faulx suruenue: & que si le iuge eust ordonné que ladiete permission eust sorti effect, le defendeur eust eu bonne matiere d'appel dudit appoinctement, ensemble & de ladiete permission d'examen a futur, a fin qu'elle n'eust preiudicié a sondict dernier appel, comme estant passé ia en force de chose iugee. D'auantage n'estoient d'aduis qu'on soustint ledict appel ainsi formé pardeuant lesdictz commissaires, d'autant que des lors tant auoit esté procedé en ladiete inscription de faulx, que apres les recolemens & confrontations des tesmoins, & proces criminel extraordinairement faict, les parties auoyent esté receues a proces ordinaire: & a ce moye cessoit l'interest de l'appellant, pour lequel il eust eu matiere de soustenir lesdictes appellations, si elles eussent esté interiectees comme elles debuoient. lequel interest gisoit en ce, qu'on ne doibt receuoir aucun examen a futur en matiere criminele. & lors que ladiete permission dudit examen fut baillee, ladiete matiere n'estoit criminele, ains depuis auroit esté faicte criminele par ladiete inscription de faulx. Et combien que ce cas n'aduienne souuent, toutes fois ie l'ay bien uoulu mettre, pour seruir d'exemple.

¶ En decidant la cause d'appel, fault sur tout considerer si l'appellant ha interest ou non.

Pareillement n'est a omettre que le iuge en donnant sentence en cause d'appel, doit sur toutes choses considerer si l'appellant ha interest en l'appointement dont ha esté appelé ou non. car pose qu'il eust esté peché en quelque formalité, neantmoins si l'appellant n'y ha interest, le iuge d'appel doit dire qu'emal & sans grief ha esté appelé.

S'il y ha appel de la sentēce donnee par le iuge d'appel, l'exécution de la sentēce est suspēdue & differee iusques a ce qu'il soit decis dudit appel par arest de la Cour de Parlement: car lors n'y ha plus d'appel. Toutesfois si la sentēce du iuge royal & ressortissant nuement en la Cour est des cas esquelz il est permis par les ordonnances royaux de passer oultre, & executer leur sentēce nonobstant opposition ou appellation quelconque, & sans preiudice d'icelles, elle sera executee, ainsi qu'auons dict cy dessus en la fin du premier liure.

¶ On fait l'exécution par vertu de la sentence ou arest confermāt, & non par vertu de la sentence confermee.

Toutes executions de sentēces & arestz doibuent estre faites par uertu de la sentence ou arest confermant, & non par ce qui est confirmé. Et pourcela Cour apres son arest donné, baille executoire adressant l'exécution de son arest, lequel est daté ordinairement du iour de l'arest.

¶ Executoire d'arest adressant aux iuges & sergēs se doit entendre chascun en son regard.

Et parautant que l'executivoire s'adresse communemēt aux seneschaux, Baillifz & autres iuges & officiers royaux, scauoir

uoir est iuges Chastellains, & Preuostz, & par fois aux enquesteurs ou il est question de faire enqueste: & oultre s'adresse au premier sergent royal, pour mettre l'arest a execution: ce doit estre entendu chascun en son regard: scauoir est ce qui gist en cognoissance de cause, par les iuges susdictz: & ce qui n'est & ne gist en cognoissance de cause, par un sergent royal.

¶ De proposition d'erreur.

Après qu'il est iugé par arest, si l'une des parties se sent greuee, le remede ordinaire est, de se pouruoir par proposition d'erreur. Et pour a ce paruenir, conuient que la partie baille par un brief ou intendit les faictz & moyēs & causes d'erreur, avecques une requeste a monsieur le Chancelier, pour auoir iuges ou commissaires, pour cognoistre & decider de la dictē proposition d'erreur, & le proces estre reueu. Le Chancelier communique ledict brief ou intendit a messieurs les maistres des requestes ordinaires de l'hostel du Roy, pour auoir leur aduis. s'il y ha matiere de proposition d'erreur, on com-met l'un de mesdictz seigneurs pour en communiquer aux autres, & luy en faire son rapport. Et selō leur aduis & rapport il octroye audiect suppliant lettres patētes de par le Roy, par lesquelles est mandē a la Cour de reuoir le proces, & faire droit au suppliant sur les erreurs par luy proposēes en corrigeant l'arest.

¶ Si en retirant son sac, on renonce a proposition d'erreur.

Par les ordonnances dernieres article cxxxv. est ordonnē que auparauāt que receuoir lesdictz articles & faictz, mesdictz sieurs les maistres des requestes uerrōt lesdictz faictz avecques les inuentaires des parties. Et a ceste cause celluy qui

qui ueult proposer erreur, ne doit retirer son sac du greffe: par maniere que aucuns tiennent que en le retirât on renonce a proposer erreur taisiblement: combien que les autres disent qu'on le peut retirer, & qu'on ne renonce point a proposition d'erreur, pourueu que en le retirant il proteste de pouuoir se pouruoir par proposition d'erreur. Mais la premiere opinion est la plus raisonnable. car s'il estoit loysible de retirer ses sacs & pieces, & mesmemēt son inuentaie, on pourroit soustraire ou adioster des pieces, par lesquelles on pourroit bien faire retracter l'arest. A ce moyen me semble qu'il seroit pour le mieulx, que le greffier de la Cour enuoyast les inuentaies desdictes parties clos & scelez a mesdicts seigneurs les maistres des requestes.

N'est permis d'alleguer en proposition d'erreur autres erreurs, que de faict, & non de droict. Combien que souuent on en allegue, qui sont de droict.

Fault que celluy qui propose erreur, consigne la somme de douze uingts liures paris. & au lieu de deux ans qu'ilz auoient par les anciennes ordonnances pour proposer erreur, ont seulement un an pour satisfaire ad ce qu'ilz estoient tenus satisfaire, & fournir dedens les deux ans ordonnez par les anciennes ordonnances, ainsi qu'il est cōtenu par les dernieres ordonnances article cxxxvi. Tellemēt, que apres l'an, ilz ne sont receuables a proposer erreur: tout ainsi que par les ordonnances du Roy Loys xi. publiees en l'an M. cccclxxix. on n'estoit receuable apres les deux ans. Toutes fois on pouoit estre releue de ce par le Roy pour causes iustes & raisonnables: & me semble que encores on en pourroit biē estre releue. Par l'article ensuiuant desdictes dernieres ordonnances est dict, que pour nuyder lesdictes instances de proposition d'erreur, ne sera besoing assembler les chambres, ainsi qu'il

qu'il eſt contenu par les anciennes ordonnances. Mais ſeront iugees leſdictes matieres en telle chambre de la Cour & en telle compagnie & nombre de iuges ou Conſeillers qu'il ſera ſur ce arbitré & aduiſé par la Cour ſelon la grãdeur & qualité des matieres. Et en l'article auſſi enſuyuant deſdictes ordonnances eſt dict que les parties ſeront tenues de faire iuger leſdictes matieres dedens cinq ans: autrement n'y ſeront plus receues.

¶ Dedens quel temps doibuent eſtre propoſez erreurs.

Toutesfois il me ſemble, que ladicte ordonnance derniere doit eſtre entendue que les parties doibuent faire telle diligence, que la matiere ſoit appoinctee en droit, & que les parties ayent conclud & renoncé en cauſe: car apres que ce eſt fait, elles ne ſont plus en negligence, d'autant que le reſte n'eſt plus en leur puiſſance: parce que lon uoit ordinairement qu'a peine en ſi peu de temps on peut auoir expedition d'un petit proces par eſcript, ou d'une appellation verbale.

¶ La forme de proceder en propoſition d'erreur.

La forme de proceder en ces matieres de propoſition d'erreur eſt autre que anciennement: car anciennement on plaidoit en plaine Cour par demãde, deſenſes, replique, & duplique. Apresẽt le demandeur baille par eſcript ſa demande, le deſendeur ſes deſenſes, & conſecutiuemẽt les parties fourniffent de replique, & duplique. & regulierement n'y ha que huitaine a l'une & a l'autre partie pour fournir deſdictes pieces. & par apres les parties ſont appoinctees a produire & en droit. Et eſt leur production faite en ceſte inſtance de propoſition d'erreur, ioincte aux productions ſur leſquelles ha

esté donné l'arest contre lequel on ha proposé erreur.

Cesquelles matieres ha lieu proposition d'erreur.

Proposition d'erreur n'ha lieu contre les arestz interlocutoires, ou ceulx qui sont donnez diffinitiuement en matieres possessoires & crimineles, suyuant l'ordonnance du Roy Loys XII. article lxxxviii. Pendant la proposition d'erreur, l'arest est mis a execution selon sa forme & teneur. voire celluy qui propose erreur, est tenu de bailler caution a sa partie aduersé, le requerant de luy payer les despens d'omages & interestz de l'instance de proposition d'erreur, s'il est dict que faire se doibue. Et si le demandeur a la premiere assignation se default, sera donné congé contre luy portant gaing de cause & despens. Et si le defendeur se default, sera contumacé par deux defaultz, comme en premiere instance. Et ce auant la contestation en cause. Et apres la cause cōtestee, on procedera par forclusions comme en autres matieres.

CDe faire retracter vn arest par requête ciuile.

Autre moyen lon ha pour faire retracter un arest tant en matiere possessoire, petitoire, que personnele ou mixte: scauoir est par lettres royaux en forme de requête ciuile: car par les ordonnances dernieres article cix. est dict, que ceulx qui sans cause baillent requête pour faire corriger, interpreter, changer ou modifier les arestz, & seront deboutez de l'enterinement de leursdictes requestes, seront condannez en semblables amendes que ceulx qui empeschent temerairement l'execution d'un arest par oppositions ou autres uoyes. Et ainsi l'ouy dire a feu monsieur Monthelon (lors Presidēt) en prononceant un arest aux grands iours d'Angiers. Mais on ne
peut

peut ſe pouruoir par requeſte ciuile, ſinon quand par dol, circonuention, ou precipitation la partie aduerſe ha obtenu l'areſt. Neantmoins il me ſembleroit eſtre bien equitable, ſi par quelque erreur ou omiſſion de la partie qui auroit perdu ſa cauſe, l'areſt auroit eſté obtenu: qu'on luy deueroit ſubuenir comme es autres cas ſuſdictz. Et ces uoyes & remedes de faire retracter areſtz ont lieu contre toutes ſentences de commiſſaires commis par le Roy, pour cognoiſtre de quelques cauſes, nonobſtans oppoſitions ou appellatiōs quelconques, & deſquelz le Roy ueult les ſentences eſtre de telle auctorité que les areſtz de ſes Cours ſouueraines, en interdisant a ſesdictes Cours la cognoiſſance d'icelles, & reſeruant a ſoy toute la cognoiſſance, ou a ſon priué conſeil, deſquelles commiſſions on uſe ſouuent.

¶ Areſt des grāds iours d'Angiers par lequel eſt retracté vn areſt des grands iours de Bretagne.

Et l'ay ueu receuoir lettres royaux en forme de requeſte ciuile par les grands iours d'Angiers, pour retracter vn areſt donné es grands iours de Bretagne: iaſoit que les areſtz des grands iours de Bretagne ayent pareille auctorité que les areſtz des grands iours d'Angiers. Et la cauſe pour laquelle on tendoit a la retractation dudit areſt, eſtoit que partie auoit préſenté requeſte pour eſtre receu a faire quelque choſe ſervant a la deciſion du proces pendant eſdictz grands iours: laquelle auoit eſté ſigniſſée a partie aduerſe. & iaſoit qu'il y euſt proces pendant ſur l'enterinement de ladicte requeſte, neantmoins au préiudice de ladicte litispendēce on auoit donné ledict areſt.

H ij

¶ Areſt

CArest par lequel fut receue aux grands iours d'Angiers vne appellation interiectee de l'entreprinse faicte par les Generaux sur le faict de la iustice des aydes a Paris, & tout ce qui auoit esté par eulx faict auroit esté mis au neant, & inhibé aux parties de non se poursuyure pardeuant lesdictz Generaux.

Pareillement ie uey receuoir par lesdictz grands iours d'Angiers le procureur general du Roy comme appellant de l'entreprinse faicte par les Cōseillers Generaux sur le faict de la iustice des aydes a Paris, de la cognoissance de certaine taxe de munitiõs de gendarmes faicte sur aucuns mañs & habit̃s du gouuernement de la Rochelle. Et en faisant droict sur ledict appel, la Cour desdictz grands iours mit au neant tout ce qui auoit esté faict par lesdictz Generaux. & fit inhibition & defense aux parties de non se poursuiure pour raison de ce pardeuant lesdictz Generaux.

Par lesdictes ordonnances dernieres article ci. & cxi. est dict que les arestz doibuent estre faictz & escriptz si clairement qu'il n'y ayt ne puisse auoir aucune ambiguité ou incertitude, ne lieu a demander aucune interpretation. Et a ce moyen par l'article ensuyuant esdictes ordonnances est dict, que tous arestz, registres, & exploictz de iustice, en toutes Cours seront enregistrez, prononcez, & deliurez aux parties en language Francois.

De la forme de donner les arestz, soyent ueues les ordonnances du Roy Loys XII. article xxxi. & du Roy Francois les ordonnances dernieres es articles cxxv. & cxxvi.

Quāt au tēps dedens lequel on doit satisfaire aux arestz, & peines de ceulx qui n'y satisfont ou empeschent l'exécution d'iceulx calumnieusemēt & temerairement, en est amplement

plement escript es articles lxxxv. lxxxvi. & cviij.

CL'ordonnāce parlāt de satisfaire aux sentēces ou arestz donnez en matiere petitoire & possessoire dedens trois iours apres la signification, si elle ha lieu en matiere personnele.

On ha faict doubte si ledict lxxx. article desdictes ordonnāces debuoit estre entēdu des matieres personneles, comme des matieres possessoires & petitoires, desquelles est parlē par ladiēte ordonnance: car selon disposition de droict cōmū celuy qui estoit condanné en action personnele, auoit quatre mois a payer la somme de deniers en laquelle il estoit condanné: ce qui est aujourd'huy aboly, car il n'ha plus que huis étaine par coustumes expresses d'aucuns pays. mais en actiō reale il debuoit incontinent satisfaire a la sentence, & restituer la chose dont il estoit condanné. La raison de la diuersité est, que l'on n'ha pas tousiours les deniers prestz que lon est condanné bailler: mais quand on est condanné a restituer ou a laisser & souffrir iouyr de quelque domaine, on peut incontinent y obeir: car on peut se departir de la possession de la chose. & pource l'execution gist en la puissance du condanné, & n'y gist pas quand il est condanné a bailler deniers. A ce moyen mon aduis est, que ladiēte ordonnance derniere doibt estre entēdue des condānations a payer deniers.

CDe la taxe des despens que font mesieurs de Parlement.

Reste que nous uoyons cōment sont taxēz les despens adiugez par les arestz de la Cour. car quant a la taxation des despens des causes d'appel adiugez par les iuges inferieurs, ilz sont taxēz par la forme que les despens des causes principales iugez par les iuges inferieurs.

¶ La taxe des despens taxez en ladicte Cour de Parlement doibt estre soubzsignee des deux Cōseillers commis pour les taxer.

Les despens iugez par la Cour en appellation uerbale; sont taxez par un des Conseillers de la grand chambre, iasoit que la Cour en cōmette deux, & qu'il faille que la taxe soit soubzsignee des deux commissaires commis: par maniere que s'il est deliuré executoire par uertu de la taxe signee seulement d'un des deux commissaires, & qu'il soit faict commandemēt a la partie condamnée de payer les despens taxez, elle se peut porter pour appellāt de la taxe. & ainsi nagueres en ha esté dict par arest.

¶ L'appel de la taxe d'un article n'empesche point que les Cōseillers ne procedent a la taxe des autres articles. Autre chose est des iuges estans par dessoubz les royaux.

Si en taxant les despens la partie sur laquelle on taxe, appelle de la taxe de quelque article, n'eanmoins les cōmissaires de la Cour ou le iuge royal passe oultre a la taxe des autres articles, suiuant l'ordonnance du Roy Charles VIII. article lxij. Mais les iuges nō royaux desquelz y ha exemptiō par appel, ne procederoient a la taxe des autres articles, si l'appellant d'un article se portoit exempt, ainsi qu'auons dict cy dessus.

¶ De appeller la partie ou le procureur a la taxe des despens.

D'auantage, es Cours royales ou inferieures il fault appeller la partie pour uoir taxer les despens, & ne suffiroit d'adjourner le procureur avecques lequel la condēnation des despens

despens est donnee. Mais en la Cour de Parlemēt il suffit appeller le procureur de la partie condamnée es despens, qui ha comparu en la cause, si c'est audehors le Parlement qu'ha esté donné l'arest. Et si c'est hors ledict Parlement, cōuient adiourner la partie condamnée pour uoir taxer les despens.

¶ Les procureurs contrainctz de comparoir a la taxe des despens a la peine de l'amende.

Mais au moyen de ce que la Cour par ses ordōnances faictes le xix. iour de Decembre l'an M.D.XLIIII. ha ordonné que les procureurs desdictes parties seroient tenuz de assister pardeuant lesdictz commissaires es lieu & heure a eulx assignez sur peine de cent solz parisis d'amende sur les procureurs desobeyssans & delayans: Et si les parties condamnées reuoquent leursdictz procureurs, en faisant leursdictes reuocations ilz serōt tenuz en constituer autres, & le faire signifier dedens le iour au procureur de partie aduersē: Et en default de ce, ladiete taxe de despens sera faicte avecques ledict procureur reuoqué, qui sera tenu de comparoir comme dessus, & comme si n'auoit esté reuoqué.

¶ De mettre a execution la taxe faicte en presence des procureurs des parties.

Quand la taxe est faicte en la presence du condamné, ou de son procureur, & que de chascun article qui sera taxé ele n'en appelle, ladiete taxatiō demourra en sa force & uertu, comme de chose iugée. Et si la partie en ueult executoire, il luy sera deliuré, suiuant l'article. l. des ordonnāces du Roy

Charles huiëtiesme. Mais si on faiët commandement par uer-
tu dudiët executoire desdiët despens ainsi taxex en presen-
ce de leurs parties ou de leurs procureurs, le sergent execu-
teur garnira la main de la somme y cōtenue, nonobstant op-
position ou appellation quelconques, & sans preiudice d'icel-
les. Toutesfois ne seront les meubles executez uenduz ius-
ques ad ce que la partie ayt eu iterato de la Cour, pour per-
mettre de uendre lesdiët meubles nonobstant opposition ou
appellation quelconque, & aucuns prennent prouision de la
Chancellerie seulement.

¶ On n'est receuable comme appellant de la taxe
de despēs faiëte en presence des procureurs des
parties.

Et combien que par ladiët ordonnance dudiët Roy Char-
les VIII. & selō la rigueur d'icelle, l'appellant ne fut pas re-
ceuable en la causē d'appel quand luy ou son procureur ont
estē presens a la taxe : toutesfois i'ay ueu plusieurs lettres
royaux oëtroyes, par lesquelles il estoit mandē a la Cour de
les receuoir comme appellans, & estoient releuez de l'illico
comme en autres matieres. Mais quand la taxe est faiëte par
les iuges royaux ou autres inferieurs, supposé qu'elle soit fai-
ëte en presence des parties ou de leurs procureurs: on est biē
receuable comme appellant, iasoit qu'on n'ayt appellē illico;
pouueu qu'on en soit releuē par lettres royaux. & ne peut
on proceder par execution nonobstant l'appel, sinon es cas de
l'ordonnance: esquelz les sentēces quant au principal & des-
pens, sont executoires par dessus l'appel.

¶ De croiser les articles de la taxe de despens auāt
que conclure comme on proces par escript.

Es causes d'appel interiecté de la taxe de despens , soit faicte par la Cour en absence de partie , ou par autres iuges inferieurs royaux, ou autres, fault auparavant que conclure, que l'appellant croise les articles de ladicte taxe de despens , desquelz il se uouldra dire appellât, & auoir esté greué. & des articles non croisez sera deliuré executoire , suiuant les ordonnances du Roy Charles huictiesme. & quant aux autres sera conclud an bene an male.

¶ Amende pour chascun article mal croisé.

Et pour chascun article croisé, si l'appellant en dechoit, il paye une amende entiere comme d'un autre fol appel: sinon qu'il y eust plusieurs articles connexes dependans les uns des autres: car lors pour tous lesdicts articles connexes, il ne paye que une amende.

¶ De faire offre des fraiz du commandement incontinent apres ledict commandement.

Auât que faire fin a ce traicté, i'ay bien uoulu uous admonester, de uous donner garde de deux choses. La premiere est, que s'il y a aucuns despens taxez contre uous, & executoire d'iceulx leué: uous ayez a les payer auât qu'on uous face commandement de payer, ou incontinent apres le commandement, auant que le sergent commence a prendre des meubles par execution, ou saisisse des immeubles, & y commette commissaires pour en prendre les fruietz. Car par apres, quelque offre que faciez de deniers pour les despens fraiz & mises de l'execution, partie aduerse n'est tenue l'accepter. Mais elle obtiendra lettres royaux, ou autre mandement du iuge qui ha taxé lesdicts despens, pour uous faire adiourner, pour uous uoir condamner es fraiz, mises, & despens dudit commandement, & de tout ce qui s'en est ensuiuy. Lesquelz ne pourrez empescher luy estre adiugez, & uous cousteront bien
souuent

souuent autant que les premiers despens. Et combien que en faisant le payement des despens contenuz par l'executoire, partie aduerse uous rendel'excutoire, neantmoins elle n'est uene uous tenir quicte desdictz fraiz & mises. car il pourra leuer autre executoire. pource ne fault laisser a faire offre pour lesdictz fraiz & mises. & fault que ladiete offre soit reale & de deniers a descouuert & comptez presens notaires ou tesmoins.

¶ Comment on doit faire ladiete offre.

Et conuient offrir pour le salaire de celluy qui ha apporté l'executoire on lieu ou a esté fait le cōmandemēt, la somme de douze solz vi. deniers tournois, a prendre & compter dix lieues pour chascun iour s'il est uenu a cheual, & le cōmandemēt n'ayt esté fait on lieu ou demeure celluy qui ha obtenu l'executoire de despens: & pour le sergent xx. solz tournois pour son salaire par chascun iour, suiuant les ordōnances d'anciens article clxxxiiij. & clxxxiiij. Et le iour encommencé est compté pour iour entier: comme s'il n'y auoit que douze lieues, on doit compter un iour pour les dix lieues, & pour les autres deux lieues un iour. Et oultre si les recordz sont prins sur le lieu ou lon fait l'execution, il fault offrir deux solz vi. deniers tournois pour chascun. & si le sergent n'en a peu trouuer on lieu, & ayt esté contrainct en admenier d'aupres des lieux circūuoisins, s'ilz sont a cheual, il fault offrir douze solz six deniers tournois pour chascun iour: & s'ilz sont a pied, cinq solz tournois, selon la distance des lieux, & difficulté du chemin. Et a ce moyen est bon de sommer celui qui fait faire le cōmandemēt, s'il est uenu a pied, ou a cheual, & de quel lieu, & semblablement les recordz. Et s'ilz ne respondent rien, leur offrir selon que lon pourra penser que au uray ilz soyent uenuz & ayent seiourné. Et deb-

ueroient

ueroient telz cauillateurs, & qui prennent plaifir de uexer leurs parties aduerſes par telz moyens exquis, n'auoir taxe que a la raiſon de la moindre ſomme qu'ilz auroient peu deſpendre: & eſtre condamnez enuers les parties aduerſes pour leur malice en quelque amende applicable a ladiſte partie.

¶ Quand l'offre raiſonnable des fraiz ne peut de rien releuer.

Auſſi me ſemble que c'eſt par trop grand rigueur, que ſi une partie lors elle eſt adiournee pour ſe uoir condamner eſdictz fraiz & miſes, qu'elle ne puiſſe faire offre ualable, pour obuier aux deſpēs de ce qui ſe feroit apres l'offre. car ie ſeroye d'aduis, ſi l'offre qu'on feroit apres l'adiournement, eſtoit raiſonnable: que celluy qui l'auroit reſuſe, fuſt condamné es deſpēs de ce qui auroit eſté faiſt puis l'offre: tout ainſi que quand on faiſt une offre en quelque partie de la cauſe. Car ie n'y trouue aucune diuerſité de raiſon.

¶ La maniere de propoſer en iugement l'offre des deſpens.

Au moyen dequoy ſi une partie qui auroit faiſt offre raiſonnable, eſtoit adiournec nonobſtāt ſon offre, ie ſeroye d'aduis qu'elle alleguaſt a ladiſte aſſignation auoir faiſt ladiſte offre, & perſiſter en icelle. & que neantmoins ſans preiudice d'icelle, elle conſentiſt les deſpens eſtre taxez, a fin de cognoiſtre ſi ladiſte offre eſtoit raiſonnable ou non. Et que oultre elle requiſt les deſpens luy eſtre adiugez de ce qu'elle auroit faiſt depuis ladiſte offre: & non pas empescher la condamnation deſdictz deſpens & fraiz. Car ueu qu'il n'y a que tenir, qu'il eſt deu quelque choſe pour leſdictz fraiz & deſpens, on ne doit empescher la condamnation d'iceulx; uoyre ne la taxation, a telle fin toutesfois que deſſus.

¶ Si

¶ Si pendant proces on appoincte du principal sans faire mention des despens, scauoir si les despens sont remis. & qui les peut demander, le demandeur, ou defendeur.

S'est meu doubte, si pēdant un proces on accorde du principal d'icelluy, & ne faiēt on mention des despens, scauoir se ilz sont remis par ladiēte transaction. Aucuns tiennent, & est la plus commune opinion, qu'ilz ne sont aucunement remis. Mais y a autre difficultē, qui les peut demander, scauoir est le demandeur ou le defendeur. Et en ce fault faire une distinction. ou bien le defendeur consent les fins & conclusions du demādeur par ladiēte transaction: & lors parce qu'il apert que le defendeur auoit mauuaise cause, le demandeur peut demander les despens. ou bien par ladiēte transactiō le defendeur ne consent pas entierement les fins & conclusiōs du demandeur: & en ce cas le demandeur ne peut demander les despens: ains sont censez auoir esté remis d'une part & d'autre.

¶ Fault que toutes sentences ou arestz auant qu'ilz puissent estre executez par vn sergent, soient liquides.

L'autre chose qu'il fault bien uoir auāt que executer une sentēce ou arest, c'est si la sentence est totalement liquide ou non. Car quand elle est entierement liquide: on la peut faire executer par un sergent.

¶ Les Cōseillers ou iuges ne doibuent retenir l'execution d'une sentence, si elle ne gist en cognoissance de cause.

Voire par les ordonnances d Roy Charles septiesme article cxxiiij. est defendu que les Conseillers de la Cour ou iuges royaux retiennent a eulx l'execution de leur sentence, si icelle

icelle execution ne gist en cognoissance de cause. Autrement celluy cōtre lequel sera faicte ladicte execution par un Conseiller ou iuge, ne sera tenu de payer plus grands fraiz & despens d'icelle execution, que si elle eust esté faicte par un sergent. Toutes fois comme un quidam eust esté condāné a payer les arrierges d'un bezāt d'or estimé xxxv. solz tournois, & a continuer, par un iuge royal: & eust esté le condamné adiourné pardeuant le iuge royal en execution de ladicte sentence: & eust le defendeur dict que sans propos il auoit esté adiourné en execution de sentence, parce que le demādeur luy debuoit faire commandement par un sergent: & que s'il luy eust faict faire commandemēt, il l'eust payé: comme lors il offroit reaulment payer, & de faict paya lesdictz arrierges. & sur ce que ledict demandeur requist auoir les despens de l'assignatiō & instāce d'execution, le defendeur les empesche, & dict, que en tous cas il ne doibt que les despens telz qu'il deueroit d'un simple commandement. Le demandeur persiste esdictz despēs. 11z sont sur ce appoinctez en droict. en quoy n'y auoit propos: car ledict iuge le debuoit iuger sur le champ. Parapres il donne sentence: par laquelle il condamne le defendeur es despens de l'instance d'execution, dont il appelle. Par arest donné au commencement des grands iours d'Angiers a ceste chaude, ladicte sentence est confirmee. dont plusieurs furent esmerueillez, car notables aduocatx auoiēt consulté pour l'appellant. Et pour donner plus clairement entendre quand une sentence ou arest est liquide ou non, ie l'ay bien uoulu declairer par cest exemple. Les fruietz d'un membre d'une seigneurie sont baillez au plus offrant & dernier encherisseur, & adiugez a certaine somme de deniers nonobstant l'opposition d'aucunes parties, qui remonstrerēt que au parauant lesdictz fruietz leur auoient esté baillez a ferme
par

par le seigneur de ladiete seigneurie . Et est dict par le iuge que les parties uiendroient proceder sur ladiete opposition. sur laquelle tant fut procedé entre lesdictz opposans d'une part, ledict seigneur & ledict dernier encherisseur d'autre part, que par sentence donnee par le iuge royal ressortissant nuement en la Cour, il fut dict que ledict bail a ferme faict audict dernier encherisseur tiendrait, pour reucnir au profit desdictz opposans. dont ledict seigneur & ledict dernier encherisseur appellent, & releuent en la Cour de Parlemēt . ou le seigneur acquiesce . Et quant audict dernier encherisseur, il soustient. par maniere que par arest ladiete sentence est confirmee. Les parties ayans obtenu ledict arest font faire cōmandement audict dernier encherisseur par un sergent par uertu dudit bail faict audict dernier encherisseur, desdictz sentence & arest, & d'un executoire de ladiete Cour, qu'il eust a leur payer la somme contenue par ledict bail. il se oppose audict commandemēt, & dict qu'il ha garend. le sergent luy declare que nonobstant son opposition, il passera oultre: dont il appelle. vient auant un tiers, qui aussi declare audict sergent, qu'il se oppose ad ce qu'il n'ayt a proceder par execution sur les biens dudit dernier encherisseur par uertu desdictz sentence & arest, parce que lesdictz fruietz dudit membre de ladiete seigneurie luy appartenoyent, & les auoit leué. Le sergēt luy declare qu'il passera oultre nonobstant ladiete opposition, & procedera par execution sur les biens dudit encherisseur cōdamné: dont ledit tiers appelle. Ledit encherisseur & ledict tiers releuent leurs appellations, & sont playdoices es grās iours de poitiers en l'an M. D. XXXI. Ledit encherisseur pour inuoluer la matiere, faict playdoier tout ce qu'il auoit allegué, & produict de nouuel en la cause d'appel ou estoit interuenue ledict arest.

Ledit

Ledit tiers faict playdoier qu'il estoit fermier du total de ladiete seigneurie auparauant ledict bail. Et que pēdant ladiete cause d'appel en laquelle estoit interuenu ledict arest, il auoit obtenu sentēce, par laquelle la iouissance dudit membre de ladiete seigneurie luy auoit esté adiūgee: Et que parce a bonne cause il s'estoit opposé Et appellé. Les intimes quant audict encherisseur defendēt, qu'il y a sentence Et arest contre luy: Et qu'il auoit allegué tout le droict dudit tiers en la cause d'appel: Et auoit produict la sentence de l'adiudication de ladiete iouissance donnee au profit dudit tiers. Et tout ce nonobstant, ledict arest auoit esté dōné contre luy, par lequel il luy auoit esté reserué son recours alencontre dudit tiers Et du sequestre Et commissaire qui auoit esté commis a leuer les fructs des choses contentieuses pendant ladiete opposition. Aussi les intimes quant audict tiers disent qu'il a tresbien scū la cause d'appel pendant entre eulx Et ledict dernier encherisseur en la Cour de Parlement, en laquelle estoit interuenu ledict arest: parce que on proces que ledict tiers auoit intenté contre eulx pardeuant ledict iuge a quo pour le laisser iouyr dudit mēbre de ladiete seigneurie, ilx auoient allegué ladiete sentence Et ledict appel pendant en ladiete Cour, Et tendu a fin de non proceder par le moyen de ladiete litispēdence. Au moyen dequoy lesdicts sentence Et arest auroient preiudicié audict tiers.

D'auantage, que ladiete sentence de iouissance estoit une sentence donnee par maniere de prouision Et sans preiudice des droictz des parties quant au principal: Et auoit esté donnee avecques ledict dernier encherisseur: Et que ledict encherisseur seul y auoit interest, Et non eulx: pource que la iouissance leur auoit esté ia tollue par ladiete premiere sentence: par laquelle auoit esté dict que le premier bail tiendrait pour reuenir

reuenir a leur profit : car par ce moyen ilz ne pouuoient plus auoir que les deniers dudit bail, & n'auoient interest qui ioyst, ou ledict tiers ou ledict encherisseur. ains encores leurs deniers estoient plus asseurez par ladicte sentence provisionale: d'autant que ledict tiers estoit chargé de bailler caution de la somme contenue par ledict bail fait audit encherisseur, & que ledict encherisseur se deuoit porter appellant de ladicte sentence provisionale si bon luy sembloit pour son interest, & non eulx qui n'y auoient interest par les moyens susdictz. Les parties oyés en leurs causes d'appel, parce que l'heure sonna, elles furent appointées au conseil.

Fault icy presupposer que au parauant que lesdictes causes d'appel fussent plaidoyées, les intimez pour crainte de ne pouuoir faire uuyder de long temps lesdictes appellations, auant lesdictz grands iours assignez auoient présenté requeste a la Cour, attaché a icelle ledict bail & lesdictz sentence & arrest, & le proces uerbal dudit sergēt executeur, contenant lesdictes oppositions & appellations dudit encherisseur & dudit tiers: auoient lesdictz intimez obtenu iterato de la chambre ordonnée durant le temps des uacations, par lequel estoit mandé au sergēt de passer oultre nonobstant lesdictes oppositions & appellations dudit encherisseur & dudit tiers, & sans preiudice d'icelles.

Les intimez uoyans ainsi lesdictes causes d'appel appointées au conseil, par uertu dudit iterato font faire de rechef commandement audit encherisseur de leur payer nonobstant lesdictes oppositions & appellations de luy & dudit tiers, & sans preiudice d'icelles. Et parce que ledict encherisseur fut encores opposant & appellant, le sergent saisit des meubles dudit encherisseur, & les uend deuement & solennellement: a la uente desquelz s'oppose de rechef ledict tiers: mais
le

le sergent luy declaire le contenu dudiect iterato, & suiuant icelluy il passe oultre a ladiecte uente desdictz meubles: dõt les dict tiers appelle. Lesdictz encherisseur & tiers releuēt leurs appellations: lesquelles sont plaidoyees en la Cour on mois de Iuillet M.D. XXXII. presidant monsieur maistre Pierre Liset premier Presidēt de ladiecte Cour: & ne alleguēt lesdictz appellans autre chose que ce qu'ilz auoient alleguē esdictz grands iours, fors qu'ilz disoient, ueu que lesdictes causes d'appel auoient esté appoinctees au conseil esdictz grands iours, que a ce moyen lesdictz intimez ne pouuoient plus faire executer leurdict arest, iusques ad ce que lediēt appoincté au conseil fust uuydē.

A quoy lesdictz intimez respondoient que lediēt appoincté au conseil n'empeschoit l'execution dudiect arest, attēdu mesme qu'ilz auoient obtenu lediēt iterato auant lediēt appoincté au conseil, par uertu duquel iterato ilz auoient faict faire ladiecte execution: aussique par lediēt appoincté au conseil n'estoit suspendue l'execution dudiect arest.

Neantmoins la Cour appoincte encore les parties au conseil sans contredictz. & sur ce que apres lediēt appoinctement les appellans requirent inhibitions & defenses estre faictes aux intimez de non executer lediēt arest, qui auroit par lesdictz intimez esté contredict, mōdiect seigneur le President respondit, que ce n'estoit raison. Toutes fois de ce ne fut rien escript par le greffier.

Trois ans apres & que les intimez eurent esté un an a la poursuite pour faire uuyder lediēt appoincté au conseil, la Cour leur baille un arest interlocutoire, par lequel elle ordonne que les parties auroient cōmunication de leurs produetiōs, & bailleroient contredictz & saluations respectiuelement

dedens certain temps: ce qui est depuis faict.

Enablement les sacz de ladicte matiere sont apportez es grands iours de Poictiers. L'un des intimez poursuit le iugement. Le rapporteur luy dict qu'il faict difficulté pour eulx pour trois raisons. La premiere, parce que l'arest n'estoit pas liquidé, & qu'il conuenoit le faire liquider a la barre de la Cour auant que le faire executer par un sergent.

L'autre raison, que le sergent auoit passé oultre nonobstant l'opposition dudiect tiers, qui auoit sentence prouisionale pour luy.

La tierce raison, que au moyen de ce que lesdictes causes d'appel auoient esté appoinctees au conseil, les intimez ne pouuoient plus proceder a l'execution de leurdict arest, iusques ad ce qu'il fust decisi dudiect appoincté au conseil.

Respondoit lediect intimé, que lediect arest estoit liquidé en le referant audiect bail faict audiect dernier encherisseur & a ladicte sentence: par uertu desquelles pieces le commandemēt auoit esté faict. car lediect bail contenoit certaine somme de deniers: pour laquelle, adiudication auoit esté faicte audiect encherisseur. & la sentence portoit, que lediect bail tiendroient pour uenir au profit desdictz intimez: qui estoit autāt, que si lediect encherisseur eust esté condamné payer la somme contenue par lediect bail.

D'auantage si la Cour desdictz grands iours, & la Cour de Parlement eussent ueu lesdictes sentence & arest n'estre liquidé, n'eussent appoincté la matiere au cōseil: ains eussent dict qu'il auoit esté mal executé.

A la seconde raison susdicte respondoit l'intimé, que ladicte sentence prouisionale ne leur pouuoit preiudicier par les moyens cy dessus alleguez. & oultre qu'il apparoissoit par les pieces

pieces produictes, que au principal ilz auoyent meilleure matiere que ledict tiers, parce que leur ferme estoit precedente celle dudit tiers, avec auance de deniers iusques a la somme de cinq cens liures. Et que celle dudit tiers estoit faicte par une femme sans l'auctorité de son mari: Et celle desdictz intimez estoit faicte par le mari Et la femme ensemble: Et que eulx Et ledict tiers n'auoyent entré en la iouissance de ladicte ferme par le moyen dudit proces d'opposition, Et du sequestre faict pendant ledict proces: Et pource n'auoyent lesdictz intimez esté en negligence d'entrer en iouissance de leurdict bail a ferme.

Plus n'auoit ledict tiers interest en ladicte executiō, pource qu'elle n'estoit faicte sur ses biens, ains sur les biens dudit encherisseur condamné: Et si le condamné eust voulu apres repeter dudit tiers ladicte somme, Et que ledict tiers y eust defendu, ledict encherisseur Et condamné eust peu appeller a garend lesdictz intimez. Aussi ledict tiers eust peu lors deduire son droit quant au principal, alencontre desdictz intimez, Et non pas empescher ladicte executiō. Et a ce moyen ne le tiers, ne l'encherisseur n'auoyent interest. Et encores auoyent offert lesdictz intimez en l'execution dudit iterato, bailler caution de garētir ledict encherisseur envers ledict tiers: ioinct que ledict encherisseur auoit commis ondict proces un faulx tout oculaire, car il auoit produict en la cause d'appel une piece, par laquelle il estoit contenu qu'il auoit esté enuoyé absout par le iuge a quo, dudit bail. Et apres que lesdictz intimez se furēt inscriptz en faulx au greffe de ladicte Cour, ledict encherisseur cōsentit le reiect de ladicte piece. Et y auoit on proces plusieurs menees faictes par intelligēce d'entre ledict encherisseur Et ledict tiers. Et si

estoit ladicte piece reiectee datee d'un iour de dimenche, ainsi que les intimez faisoient apparoir par un almanach de l'annee de la date de ladicte piece. En quoy est a considerer en passant, comment Dieu auengle ceulx lesquelz usent de ces faulsetez, combien qu'ilz pensent bien les faire couuertemēt, toutesfois le iour y est transparēt, & se descouuřēt elles mesmes. Esquelles choses il conuenoit auoir regard, a fin qu'elles nuisissent aux appellās, & fissent aux intimez profit: & que les appellās ne rapportassent gain de leur malice & calumnie. Et ueu que les intimez auoient bonne matiere on fond d'icelle, ne falloit se arrester a ces formalitez.

A la tierce raison les intimez disoient, que iasoit que lesdictes causes d'appel eussent esté appointees au cōseil esdictz grands iours: ce n'empeschoit, qu'ilz ne peussent faire executer leur arest, attendu mesmement qu'ilz auoient obtenu iterato en la forme susdicte, & ueues leurs pieces: lequel n'estoit suspendu par ledict appointē au conseil.

En oultre quand lesdictes appellations interiectees desdictes executions faictes depuis ledict appointē au conseil, furent playdees en la Cour de Parlement, si la Cour eust ueu qu'il eust esté mal executé, elle n'eust de rechef appointē la matiere au conseil, ains eust dict mal executé.

Aussi la Cour n'eust baillé arest interlocutoire depuis, par lequel elle auroit ordonné que les parties auroient cōmunication de leurs productions, bailleroient contredictz & saluations, si elle se fust uoulu arrester a ceste formalité, & ne regarder on fond de la matiere.

Pour la fin, si telles uoyes auoient lieu, on accrocheroit & suspenderoit on tousiours une execution d'arest. car en l'appellation qu'on interiecteroit de l'execution, on allegueroit ce
qui

qui auroit esté deduiet auant l'arest, pour faire appoincter la matiere au conseil.

Mais toutes ces raisons n'obstās, fut donné arest es grāds iours tenuz en ladicte uille d'Angiers l'an susdict: par lequel fut dict, qu'il auoit esté mal executé & bien appellé. & cōdamné les intimez es despens enuers lesdictz appellans, dommages & interestz de l'execution reale enuers ledict encherisseur. Et euoque la Cour l'instance en laquelle auoit esté dōnee ladicte sentence prouisionale: & ordonne que sur icela le, ensemble sur leurs oppositiōs ledict encherisseur & ledict tiers uiendrolent proceder comme de raison.

¶ Trois choses notables.

De cest arest font a noter plusieurs choses. premierement, l'incertitude des iugemens humains. car les intimez n'auoient iamais trouué homme, qui fist difficulté, qu'ilz n'eussent bonne cause.

secondement, que ceulx qui ont bonne cause au principal, bien souuent par ces formalitez periclitent, & perdent bien souuent plus qu'ilz ne gagnent au principal. car iasoit qu'il soit question en ladicte matiere on principal de deux mille liures tournois: neantmoins lesdictz despens dommages & interestz de l'execution reale, les fraiz & mises, qu'ilz auoient faict pour l'execution & pour lesdictes causes d'appel, se montēt presque a ladicte somme de deux mille liures. Parquoy semble, qu'une Cour souueraine laquelle iuge d'equité, ne deburoit se arrester a telles formalitez. Et encore s'il eust esté mal executé, toutesfois l'execution dudiect arest ne

debuoit estre suspendue : mais a tout le moins debuoit estre permis ausdictz intimez d'exccuter leur arest sans preiudice desdictes oppositions , en baillant caution de desinteressier ledict encherisseur enuers ledict tiers.

Tiercement est a noter , & qui faict bien a nostre propos, ce qu'on dict en commun prouerbe, qu'un arest est autāt difficile a exccuter que a obtenir : & qu'un arest tire apres soy grāde cōpagnie d'autres petitx arestx. A quoy ladicte Cour debueroit sur tout obuier. Et si ores le rapporteur uoyoit estre necessaire a son iugement de uoir le proces onquel auoit esté donnee ladicte instāce prouisionale, il debuoit plustost aduers tir celluy qui poursuinoit le iugement du proces , qu'il eust a faire apporter ledict proces a la Cour , & que sans icelluy la Cour ne iugeroit lesdictes causes d'appel: ou bien dōner un arest interlocutoire, par lequel la Cour eust euoqué ledict proces , & ordonné qu'il seroit apporté a la Cour, pour icelluy uen estre procedé au iugemēt diffinitif: que de multer si aspremēt les intimez pour un peché de formalité en une executiō. Car c'estoit dōner occasion aux intimez, s'ilx n'eussent eu dequoy soustenir ce faiz , de quicter leur principal pour l'accessoire. Et depuis en ladicte matiere d'opposition, les opposans n'ont point faict apporter ledict proces de l'instāce euoquee, parce qu'il ne leur seruoit de rien, d'autant que depuis ladicte sentence prouisionale n'y auoit esté rien faict. Et n'ont lesdictes parties en ladicte matiere d'opposition rien allegué ne produict, que ce qu'elles auoient produict en ladicte matiere appoinctee en conseil. A ceste cause doit une Cour souueraine & tous autres iuges bien considerer auant que donner un arest ou sentence, & y mettre tel tēps & diligence comme on uouldroit estre faict en sa propre cause

cauſe , a fin de garder ce commandement diuin & naturel, de ne faire a autruy ce qu'on ne uouldroit a ſoy eſtre faiſt. lequel tant louoit le bon Empereur Alexandre Seuerẽ , ainſi que dict Aelius Lampridius en ſa uie, qu'il faiſoit crier a ſon de trompe ce commandement, quand on puniſſoit quelqu'un du delict par luy commis.

¶ L'epilogue ou concluſion de ce ſecond liure.

En ceſte maniere demourera parfaicte la procedure des cauſes d'appel. Car par la deduction cy deſſus par nous faiſte, cuidons auoir amplement monſtrẽ, comment il fault appeller. En quelles cours conuient releuer, & la maniere d'y releuer appellations, ou auons faiſt traittẽ ſpecial des appellations comme d'abus & de deny de iuſtice. auſſi auons traittẽ la difference eſtant en appellations entre la France couſtumiere, & le pays de droit eſcript. D'auantage nous auons declairẽ, quelle procedure on tient pour contumacer les abſens en cauſes d'appel, & quelle entre les preſens. & la difference qu'on faiſt entre les appellations uerbales, & proces par eſcript. comment on eſt receu a articuler & prouuer faiſtẽx nouueaux en cauſes d'appel. En quelle maniere on doit bailler ſentence non ſeulement quant a l'article de l'appel, mais auſſi quant au renuoy deuant le iuge duquel a eſtẽ appellẽ, & quant a retenir la cognoiſſance du principal, & execution de la ſentence, & oultre quant aux deſpens. Plus auons declairẽ les autres manieres par leſquelles ſe peuuent terminer appellations, comme par deſiſtement & renunciation d'appel. Les mettre au neant par lettres royaux, & les conuertir en oppoſition. Par apres ſom-

mes uenuz a monst^rer quelz remedes on ha pour faire re-
 tracter un arest. Comment on taxe les despens en la Cour
 de Parlement, & met on a execution les taxes & executoi-
 res de despens, & les sentences des iuges inferieurs & a-
 restz de la Cour de Parle^ment, & ce qu'on doibt considerer
 en execution d'iceulx. Par lesquelles choses briefuement des-
 duictes par ces deux premiers liures, nous pouuons cognoi-
 stre quel ordre iudiciaire nous auons accoustumé tenir tant
 en premiere instance, que en causes d'appel des matieres ci-
 uiles. Maintenant declairons quelle est la procedure es causes
 crimineles. Ce que nous traicterons en ces deux derniers
 liures.

Fin du second liure.

PARAPHRASE

DV TIERS LIVRE DES

dictes Institutions par ledict autheur.



LAMACHVS tres excellent capitaine des Grecz, ainsi que Plutarque autheur abundant en plusieurs sciences recite elegamment en ses Apophthegmes, reprochoit quelque fois a un autre capitaine de guerre, qui estoit soubz sa charge, qu'il n'auoit pas bien faict son debuoir, &

auoit commis faulte en une bataille. Lequel capitaine pria icelluy Lamachus de luy pardonner ladicte faulte, promettant qu'il ne luy aduiendroit plus de faire faulte. Lors luy respondit Lamachus: Tout ainsi que si en une bataille apres qu'on ha faict une faulte, on en puisse encores commettre une autre. Par laquelle response ledict Lamachus luy donnoit a entendre, qu'une seule faulte peut estre cause de la perte d'une bataille, & qu'on n'ha loysir d'y faillir deux fois. Semblablement Valerius Maximus narre que scipion l'Africain auoit accoustumé de dire, estre chose fort deshonest & uituperable, de dire par un capitaine en faict de guerre: Je ne le pensoye pas. Scauoir est, parce qu'il luy sembloit que tout faict de guerre debuoir estre faict par conseil soigneusement pourpense auant que l'executer: car l'erreur qui se commettoit en la bataille, n'estoit reparable. En ceste maniere en causes crimineles ou est question de la uie, de l'honneur, & de tous les biens de l'accusé, c'est chose par trop odieuse & dommageable

dommageable de demander pardon d'une faulte y commise: car bien difficilement on la peut reparer, & remettre la chose en bon estat. Parquoy fault mettre toute peine, cure, & diligence, de ne faire faulte aucune en la procedure des causes crimineles.

¶ Diuision des iurisdictioñs de ce royaume repeteẽ.

Auant toutes choses nous fault icy repeter la diuision des iurisdictioñs de ce royaume: car on ne peut pas traicter causes crimineles pardeuant tous iuges indistinctement: mais fault que pour le moins les iuges ayent moyẽne iurisdictioñ.

¶ De quelz delictz cognoissent les iuges des iustices moyennes, & de quelz ceulx de la haulte.

Et ne peuuent telx iuges cognoistre que des causes esquelles les amendes n'excedent soixante solz tournois. & si pour un delict non excedant ladicte somme la personne domiciliaire de la iurisdictioñ en laquelle n'y ha que moyenne iustice, est cõuenue pardeuãt un autre iuge superieur, ce requerrant le procureur de ladicte iurisdictioñ, la personne accusee sera renuoyee auecques ses charges & informations pardeuant ledict iuge ayant moyenne iurisdictioñ. & si elle est prisonniere, elle sera admenee par les sergens du iuge superieur. Et si le delict requiert plus grand punitiõ que de soixãte solz d'amende, le iuge ayant moyenne iurisdictioñ pourra decreter prinse de corps cõtre le delinquãt, si la matiere y est subiecte, & le faire prendre par ses sergens, & le faire mener es prisons de son superieur. & pour ceste diligence il prendra soixane solz tournois pour son amende, sur les deniers qui seront

seront adiugez audiect supérieur pour son amende.

Pource que aux causes qu'on poursuit pardeuant les iuges ayans moyenne iustice, on tient communement telle procedure qu'en causes ciuiles, nous n'en traicterons point, d'autant qu'auons cy dessus traicté l'ordre qu'on garde es causes ciuiles. Et parautant aussi qu'on tient pareille forme de proceder en causes criminelles, tant pardeuant les iuges royaux que autres iuges inferieurs ayans haulte iurisdiction, nous monstrerons la forme de proceder qu'on suyt pardeuant les iuges royaux, & entendrons que pareille forme est gardee pardeuant lesdictz autres iuges inferieurs. Toutesfois s'il y ha aucune difference, nous la declairerons es lieux propres & conuenables.

¶ Deux manieres d'accusateurs.

Nous auons deux manieres d'accusateurs : les uns qui poursuiuent l'interest du Roy, & de la chose publique, que nous appellons les gens du Roy, scauoir est l'aduocat & procureur du Roy, ou des seigneurs ayans haulte iustice. Les premiers tendent a punition corporelle, & a amende honorable & pecuniaire contre le delinquant. Les autres demandent reparatiõ de leur interest ciuil, qu'ilz ont souffert a cause du delict commis en leurs personnes ou en leurs biens : & ne tendent point a punition corporelle par nostre stile : combien que selon droit commun ilz peuuent tendre a punition corporelle, & a reparation de leur interest.

¶ Les solennitez requises en accusation aujourd'huy abolies.

Au moyẽ dequoy aujourd'huy l'accusateur priuẽ, que nous appellõs la partie ciuile, n'est point tenu de se inscrire, ne faire
les

les sollempnitez requises de droict commun en accusation.

¶ Les gens du Roy excusiez de presumption de calumnie.

Et quant es gens du Roy, ilz n'y sont point tenus semblablement: parce que leurs offices les excusent de presumption de calumnie, & n'en sont tenus en leurs noms priuez, sil n'y ha bien euidente calumnie. Et encores en ce cas on ne les condamne pas cōmunemēt par mesme proces criminel qu'on ha faict contre le delinquāt: mais apres l'absolutiō faicte, on cōmence un autre proces criminel contre eulx. Sinon quād en la cause d'appel interiectē de la sentēce absolutoire, le procureur general du Roy ne ueult prēdre la cause pour son substitut: car en ce cas le substitut est tenu de soustenir son appel en son nom priuē, comme nous auons dict cy dessus on traite des appellations.

Le plussouuēt le procureur du Roy & la partie ciuile sont enseble demādeurs. Et lors la partie ciuile faict tous les fraiz du proces criminel: aussi elle ha tous les despens si elle gaigne sa cause: & si elle la perd, elle paye tous les despens, dōmages, & interestz au defendeur. Est defendu par les ordōnances royaux au procureur du Roy de non se ioindre avecques aucune partie ciuile sans informations precedentes. Mais y ha plusieurs cas esquelz le procureur du Roy seul peut estre partie: comme en tous crimes publiques, ou la chose publique ha interest.

¶ Sur qui doibuent estre prins les fraiz du proces criminel.

Et quād il n'y ha partie que le procureur du Roy, le proces criminel doibt estre faict aux despēs du Roy, fors la preuue des

des faictz obiectifz & iuſtificatifz alleguez par le defendeur, laquelle doit eſtre faicte a ſes deſpens, & pour la faire eſtre ordonné qu'il conſignera certaine ſomme de deniers au greſſe, ſi le defendeur ha dequoy: mais ſ'il n'ha dequoy, & la partie ciuile ha biens ſuffiſans pour les faire, les fraiz doibuent eſtre prins ſur la partie ciuile. Mais ſi elle n'ha dequoy, la dicte preuue doit eſtre faicte es deſpens du Roy. & le receueur du Roy par ordonnance du iuge doit conſigner certaine ſomme de deniers, laquelle luy ſera allouee par ſes comptes, comme il eſt dict par leſdictes ordonnances dernieres articles clix. clx. & clxi.

¶ L'inſtigateur eſt tenu des deſpens dommages & intereſtz de l'accuſé eſlargy ou enuoyé abſoult, fors en certains cas cy mis.

S'il aduiēt que le procureur du Roy ſoit ſeul partie, & qu'il y ayt autre qui l'ayt inſtigué d'intenter l'accuſation: & que le defendeur ſoit enuoyé abſoult: il pourra auoir ſon recours de deſpens dommages & intereſtz contre l'inſtigateur. & pource faudra qu'il intente action contre ledict inſtigateur: & ſont a ceſte fin les gens du Roy tenus apres la ſentence abſolutoire declairer au defendeur ce requérant, les noms des inſtigateurs. Toutesfois en aucuns cas l'inſtigateur n'eſt tenu aucunement: comme en crime de faulſe monnoye, & autres telz crimes enormes: ſ'il n'y ha grande preſumption de calumnie contre luy: comme quand les teſmoings oys par l'information ne perſiſteroient en leurs depoſitions on recolement. Mais ſ'ilz perſiſtoient, & que le defendeur prouuaſt ſon alibi, ou quelques obiectz alēcontre deſdictz teſmoings, dont urayſemblablement ledict inſtigateur ne fuſt aduertý, ſembleroit

sembleroit que esdictz cas ou la chose publique ha grand interest, seroit bien raisonnable que ledict instigateur n'en fust tenu.

¶ La difference d'estre receu comme partie ciuile, & comme denonciateur.

Combien que selon droit commun un chascun soit receu a poursuyure l'iniure & excès fait a l'un de ses parens: toutesfois auourd'huy en ce royaume si aucun ha transigé de la mort ou homicide avecques la femme & enfans de l'occis, un autre parèt n'est receuable a poursuyure comme partie ciuile avec le procureur du Roy l'accusation dudit homicide. mais bien sera receu cōme denonciateur, & comme un autre estranger: en maniere que s'il obtient gaing de cause, il n'aura que les despens d'icelle, ainsi qu'il fut dict par arest de Parlemēt a Paris le v.iour de Ianuier M.D.XXXVI. iasoit que les parens ne soyent reccuiz a depōser en cause criminele poursuiue en un excès fait a leur parent.

¶ A quelz heritiers de l'occis appartient la poursuite de l'homicide, ou aux heritiers des meubles, ou aux heritiers des immeubles.

Et s'il y ha plusieurs heritiers, dont les uns succedent aux meubles, & les autres aux immeubles: la reparation de l'homicide du defunct appartient aux heritiers des meubles, & cōsequemmēt la poursuite d'icelle: car le plussouuēt la reparatiō est adiugee en deniers, & l'actiō est cēsee mobiliare ou immobiliare selon la nature de la chose a laquelle elle compete.

¶ Les parties interessees premierement sont satisfaites que le Roy.

Et ou il n'y a partie que le procureur du Roy, si toutesfois le iuge uoit par le proces criminel que la chose desrobée appartenoit

partenoit a certaine personne : il doibt ordonner que ladiète chose luy sera rendue. Aussi met lon communemēt par les sentences quand on adiuge quelque amēde au Roy, que les parties interessees seront premierement satisfaites que le Roy.

¶ La partie interessee se peut rendre partie apres le proces parfait, mais auant la sentence.

Mais pour doubte que le iuge omette l'adiudication de l'interest ciuil de la partie, est pour le mieulx que la partie interessee apres le proces criminel parfait se rēde partie, & baille ses conclusiōs, & employe le proces criminel fait a la requeste du procureur du Roy.

¶ Les parties formees non receues en France, fors en certains lieux.

Est a noter que auourd'huy les parties formees ne sont receues en France. scauoir est qu'on puisse arrester quelqu'un, & faire mettre en prison pour cause de delict, sans informations precedentes: encores que celluy qui se rend partie formee, uueille tenir prison comme l'autre.

¶ Peine de Talion abolie, & autre mise au lieu.

Combien que l'accusateur par nostre stile general de ce royaume ne doibue tenir prison, ne comparoir en personne en la poursuite d'une cause criminele: ce que neantmoins il estoit tenu faire selō droict cōmun: au moyen de ce qu'il estoit tenu se inscrire a peine de Talion, scauoir est de recevoir semblable supplice s'il decheoit de l'accusation: parce que ladiète peine de Talion n'ha point lieu en ce royaume ordinairement: mais seulement la reparation des dommages & interest que l'accuse ha souffert par la calumnieuse accusation: & parsois adiudication d'amende honorable estre faicte a l'accuse.

¶ Jusques

¶ Jusques a quand l'accusateur est tenu prisonnier en partie formee.

Toutesfois on diët que a Paris & a Lyon, esquelz lieux ont accoustumé abunder estrangers, on recoit encores lesdictes parties formees: & que jusques a ce que l'accusateur ayt faict faire informations des cas imposez, & faict recoler quelques tesmoings qui donnent apparence de uerité a son accusation, l'accusateur est detenu prisonnier comme l'accusé: ce que ie trouue fort equitable.

¶ Comment on faict faire information.

Ces fondemens mis, uenons a declarer la structure & forme de proceder en causes crimineles: laquelle est qu'on commément le procureur du Roy & la partie ciuile font faire information du cas commis, par un sergēt royal ou de seigneur hault iusticier, appelé avecques luy un notaire royal, ou de Cour laye. Et en aucuns lieux on prend mandement du iuge pour ce faire: en autres on en prend de l'enquesteur du siege ouquel on ueult les rapporter. En autres il n'y ha que l'enquesteur qui puisse besongner en information. ce qui n'est pas raisonnable, & uient a trop grand foulle des parties. En autres lieux on ne prend point de mandement de iuge. Mais en la Cour de Parlement on n'ha point de decret d'adiournement personnel, ou prinse de corps, si l'information n'est faicte par uertu de mandemēt ou commission obtenue de ladicte Cour, ou par lettres royaux.

En information les tesmoings sont oys comme en enqueste en cause ciuile, sinon qu'ilz peuuent estre oys present la partie qui la faict faire: car c'est son libelle & demande. Et sont les tesmoings iurez comme en enqueste. Et fault que la deposition

sition de chaſcun teſmoing ſoit eſcrite toute au long, & non en telle maniere: Tel teſmoing dict comme le precedent. Et pour ainſi l'auoir faiſt, le iuge doit decreter adiournement perſonnel contre le ſergent & notaire, & n'adiouſter foy a l'information, ſ'il n'y ha nombre ſuffiſant d'autres teſmoings deſquelz les depoſitions ſoyent entierement eſcrites. Et on commencement apres qu'on ha mis les noms des parties a la requête deſquelles, & contre leſquelles, & les an iour & lieu qu'elle eſt faiſte, on met la plaiſte de la partie ciuile a laquelle l'exces ha eſté faiſt, parce qu'elle faiſt indice auecques les autres teſmoings. Tellemēt que la Cour ſouuēt interloque que la plaincte de la partie ſera prinſe par le iuge duquel ha eſté appellé.

¶ Des decretz de prinſe de corps & d'adiournemens perſonnels.

Les informations faiſtes ſont miſes pardeuers les gēs du Roy, qui requierēt decret d'adiournemēt perſonnel, ou de prinſe de corps, ſelon la matiere ſubieſte. Par apres on met les informations, & la requiſitoire des gens du Roy pardeuers le iuge, qui decrete adiournement perſonnel ou prinſe de corps ſelō la grauité du cas. Et quand il decrete prinſe de corps, on ordōne quant & quāt ſi l'accuſé ne peut eſtre apprehendé en ſa perſonne, qu'il ſoit adiourné a comparoir en ſa perſonne.

Et en ce eſt requiſe grande prudence en un iuge, & qu'il ne baille decret de prinſe de corps, ſinon pour crime public, & qu'il y ayt grand matiere. Et combien que ce ſoit beaucoup arbitraire, ſi eſt ce toutesſoīs qu'il ſeroit bon de deſigner par ordonnance expreſſe les cas pour leſquelz on pourroit decreter prinſe de corps, pour reſrener la licence que pluſieurs iuges en ceſt endroict uſurent. Et peut le iuge expedier en ſa maiſon les decretz ſuſdictz ſans que l'accuſé y ſoit appellé.

K

Quand

¶ Quand il est permis de prendre sans informatiōs ne decret precedent.

Mais ne peut le iuge sans informations precedentes par luy ueues & decretees prendre ou commander un homme estre prins au corps en present forfait & delict flagrant: sinon, que ce soit un homme non reseant, poure, & non ayant biens immeubles: ou que le delict soit tel, qu'il fust uraysemblable que quelques biens qu'il ayt il s'absentera: car lors il est permis de le prendre sans information, & par apres la faire. Et si autrement le iuge le fait, s'il n'y ha homme promouant ou requerant, le iuge sera cōdamné aux dommages & interestz souffertz par & au moyen de l'emprisonnement.

¶ Comment on peut empescher la deliurance d'un prisonnier.

Aussi sans charges & informations on ne peut empescher la deliurāce d'un prisonnier. & si on l'empesche, on en est cōdamné aux dommages & interestz a cause de la detention personelle du prisonnier.

¶ Quand on est receu a mettre auāt nouuelle information, & comment.

Mais si on ha informatiōs telles, que pour icelles deust estre decretee prise de corps, on peut empescher la deliurance, si l'informatiō est d'autre cas: que de celluy pour lequel il est prisonnier: car si c'est de mesme cas, ou bien l'informatiō adiouste quelque qualite plus grande, qui rend le cas plus grief & atroce, en ce cas on la recoit, & ordonne lon que le prisonnier sera oy sur icelle, & que les tesmoings uiendront, pour estre recolez & cōfrōtez si besoing est. Mais si le prisonnier auoit esté ia receu a faire preuue de ses obiectz & faitz iustificatifz, il me semble qu'il faudroit ordonner que le prisonnier
pourroit

pourroit bailler obiection, & faict iustificatif au contraire, & en informer aux despens de celluy qui met auant la nouvelle information: comme on faict en cause d'appel, quand on produict de nouuel, ou quād on allegue faict nouueaux, ainsi que cy dessus est dict: car le prisonnier eust faict sa preuue obiectiue & iustificatiue contre la nouvelle information tout par un moyen, si elle eust esté mise auant auparauant la dicté sentence interlocutoire portant adiudication de ladiete preuue. Et encores doit celluy qui met en auant la nouvelle information, payer despens arbitraires pour le retardement de la cause: car si on n'est pas receu en cause ciuile sans lesdicts despens, a plus forte raison on ne doit estre receu en cause criminele. Et si l'information nouvelle concerne un autre delict, soit que mesme partie ciuile ou autre la mette auant, il fault que le iuge face le proces criminel sur ledict delict cōme sur la precedēte accusation, & ne peut le defendeur decliner. & ne peut estre baillee sentence sur une accusation, que le proces criminel ne soit parfaict quant a l'autre. Toutesfois le iuge n'est point contrainct de uuyder le tout par mesme sentence, ains peut bien bailler deux sentences.

¶ Des executions des adiournemens personnelz.

Les adiournemens personnelz doivent estre executez cōme les adiournemens simples en causes ciuiles, sinon que quād l'accusé est homme crainct & redoubté, & coustumier d'exceder sergens, & qu'on n'ose l'aller adiourner en sa personne ou a son domicile, le iuge information sommaire de ce faicte mādē & permet de l'adiourner par cry public a son de trōpe au lieu de marché, ou autre onquel ha affluence de gens plus prochain de sa maison, estant de seur accē, a iour de

marché, ou iour de feste par attache au posteau de la halle dudiect lieu de marché, ou a la porte de l'eglise: & sera faict iniunction a aucuns ses uoifins, si on en trouue audiect lieu, de luy faire scauoir: sinon, a ceulx dudiect lieu ou sera faict lediect adiournement, de luy faire scauoir l'exploict.

¶ Des defaultz en matiere criminele, & profictz d'iceulx.

Et s'il ne compare au iour assigné, sera baillé au procureur du Roy & a la partie ciuile demandeurs ce requerans, default, sauf huietaine ou autre temps, selon la distance des lieux, & la saison du temps, & qualitez des personnes & matieres. Et sera ordonné ueu l'exploict de l'adiournement, que le defaillant lediect iour de huietaine ou autre passé, sera prins au corps, si apprehendé peut estre: sinon, sera adiourné sur default & o intimation.

¶ Du profict du premier default procedant d'adiournement personnel.

Et s'il default de rechef, le iuge donnera aux demandeurs comparens & requerans default o tout le profict que de raison.

¶ Du profict du second default, & de adnotation des biens du defaillant.

Et en adiugeant le profict dudiect default, le iuge ordonnera que le defaillant sera adiourné a trois briefx iours, & que ses biens serot adnotez & saiziz: scauoir est les meubles descriptz par inuentaie & mis entre les mains de gens de bien & sol uables qui en scauront rendre bon compte & reliqua, si & quand & a qui il appartiendra: & les biens immeubles aussi regis par commissaires bons & suffisans, le tout iusques a ce ce que lediect defaillant ayt obey a iustice.

¶ Quand

¶ Quand on peut des le commencement vser d'adiournement a trois briefz iours, & adnotation de biens.

Mais s'il y ha decret de prinse de corps, on peut ordonner par le mesme decret de prinse de corps, que si le delinquant ne peut estre apprehendé en sa personne, il sera adiourné a trois briefz iours avecques adnotation & saisie de ses biens, comme dict est: & ainsi doit estre entendu l'article xxv. des ordonnances dernieres, scauoir est quand du commencement il n'y ha eu qu'adiournement personnel, qu'il conuient obtenir deux defaultz auant que proceder par adiournemēs a trois briefz iours, & a adnotatiō. mais s'il y ha prinse de corps, on peut mettre la clause d'adiournement a trois briefz iours & adnotation par le mesme decret.

¶ Des adiournemens a trois briefz iours.

La maniere de proceder par adiournemens a trois briefz iours est telle, qu'il fault que le sergent adiourne a trois diuers iours, & qu'il y ayt interualle entre chascun iour ouquel il adiourne, & le iour auquel il baille l'adiournement, de trois iours entiers & francz quant aux deux premiers iours. & quāt au dernier & tiers iour, auquel eschoit le dernier adiournement des trois briefz iours, il fault qu'il contienne huiſtaine, ou autre terme competēt selō la distance des lieux, comme dict est quant aux autres adiournemens en matieres ciuiles. Et fault que a chascun desdictz iours assignez les demandeurs cōparent, & prennent default cōtre l'adiourné. & s'il ne cōpare aux deux premiers iours assignez, & cōpare au dernier, il doit les despens des deux premiers defaultz.

¶ Les recolemens par contumace se font apres les adiournemens a trois briefz iours.

Mais s'il ne compare aucunement, le iuge ordonnera que les tesmoings seront recolez: pour ce faiēt, poceder au iugemēt di finitif du proces: car par les ordonnances dernieres article clxv. foy doibt estre adioustee aux depositions des tesmoings contenuz aux informations, quād ilz sunt recolez par aucto rité de iustice, en absence & cōtumace des delinquans & ac cusez, tout ainsi que s'ilz auoiēt esté cōfrontez, & sans pre iudice de leurs reproches, si lesdictz tesmoings parapres de cedēt, ou pour autre cause ne peunēt estre cōfrontez lors que les delinquāz se representēt a iustice. Et est pour le mieulx de faire adiourner les defaillās, pour uoir iurer recoler & cōfrō ter si besoing est, lesdictz tesmoings: car si en cause ciuile apres les deux defaultz il fault faire preuue, & pour icelle uoir fai re iurer les tesmoings, il fault faire adiourner la partie, sembla blemēt il le conuient faire en causes crimineles. Et combien que selō droiēt ciuil on ne peut bailler sentence difinitive alē contre d'un cōtumax en matiere criminele: toutesfois nous usons du cōtraire en ce royaume. Ce qui est conforme a plu sieurs statutz d'italie: par lesquels le contumax est reputé comme s'il auoit confessé le delict dont il est chargé.

¶ Constitué prisonnier pour non auoir comparu au iour qu'il estoit adiourné a cōparoir en personne, peut estre incontinent eslargi en payant les fraiz du decret de prinse de corps.

Quand par default de cōparution personnele au premier iour assigné par uertu d'un decret d'adiournement personnel, ha este baillé decret de prinse de corps, & il est mis a execu tion, & le delinquāt cōstitué prisonnier requiert estre eslargi & receu a cōparoir en personne suiuant la premiere qualité, seauoir est dudidict decret d'adiournemēt personnel, offrāt pay er les fraiz du decret de prinse de corps, & de ce qui s'en est

eſt enſuiuy, il doit eſtre a ce receu: car il fault ſuiure la qualité du premier decret, qu'on dōne ſur l'information. Toutes fois le meilleur ſeroit que le iuge reſeruaſt a luy faire droit du dict eſlargiſſemēt, apres qu'il auroit eſté oy ſur l'information, & en ordōnāt ſ'il ſera receu a proces ordinaire, ou nō. car par les ordōnances dernieres article cl. eſt ordōné que ſi la matiere eſt de petite importance, apres que les parties ont eſté oyes en iugement, le iuge peut ordonner qu'elles ſeront receues en proces ordinaire, & eſlargi le priſonnier a la charge de ſe rendre en l'eſtat au iour de la reception de l'enqueſte, en baillant de ce faire caution. Et parainſi le iuge uuydera tout par un moyen & ledict incident, & fera droit, ſ'il les doit recevoir a proces ordinaires, & n'y aura qu'une ſentence ſur le tout, ou il en conuiendroit bailler deux, ſ'il iugeoit ledict incident ſeparement.

¶ Celluy qui ha briſé la priſon, de quelle peine doit eſtre puni.

Mais ſi celluy qui eſt priſonnier en priſon cloſe euade, & par apres eſt reprins, on faiēt doubte quelle peine il doit auoir. Aucuns tiennēt qu'il doit eſtre puni de meſme peine, que ſ'il eſtoit attainēt & cōuaincu du cas, pour lequel il ha eſté cōſtitué priſonnier: parce meſmement qu'on ha accouſtumé quād on eſlargiſt un hōme, de l'eſlargir a la charge de ſe rendre en l'eſtat, a la peine d'eſtre attainēt & conuaincu des cas a luy impoſez: cōme ſemblablement on faiēt quād on le recoit a cōparoir en perſonne, on luy defend le partir de la uille ou lieu onquel lon luy faiēt ſon proces, a peine d'eſtre attainēt & cōuaincu des cas a luy impoſez. Les autres ſont d'aduis, qu'il ne doit pas eſtre puni de meſme peine, ains de moindre a l'arbitration du iuge: car il ſ'enſuiueroit qu'il ne deuſt plus eſtre receu a alleguer & monſtrer de ſes iuſtifications & des re-

proches des tesmoings de sa partie aduerse contenuz par la principale information: ce qui seroit par trop inique. car celluy qui ha confessé le cas dont il est accusé, peut neantmoins parapres resilir de ceste confession, & alleguer son innocence, & estre receu a la monstrier. A plus forte raison il y doibt estre receu, quand il n'y a que une confession faicte, comme quād il sort de la prison sans congé, qu'on appelle bris de prison. Au moyē de quoy ie seroye de ceste dernière opiniō. voire si plusieurs prisonniers par un cōplot faict entre eulx eussent rompu la prison, & s'en fussent allez. Et ainsi ha lon de coustume d'en user, & de leur bailler moindre peine que le cas a eulx imposé ne requiert, & les reserrer plus a destroiēt qu'ilz n'estoient auparauant.

¶ Par vertu du premier default la prouision d'alimens & medicamens est adiugee, ou pour faire prier Dieu pour l'ame de l'occis.

Par uertu du premier default on ha accoustumé de condamner le defaillant en la prouision d'alimens & medicamens enuers la partie ciuile demanderesse. Et de ordonner qu'elle sera contraincte par saisie & uente de ses biens, & emprisonnemēt de sa personne payer la somme adiugee pour ladicte prouision nonobstā oppositions ou appellatiōs quelconques, & sans preiudice d'icelles. Et le semblable est gardé quant a la prouision pour faire prier Dieu pour l'ame de celluy qui a esté occis, s'il est questiō d'homicide. Car ou est questiō d'exces, ou homicide, le iuge par son decret met, que celluy qu'il trouue chargé par l'information, sera adiourné o intimation quāt a ladicte prouision d'alimens & medicamens, ou quant a ladicte autre prouision. A ce moyen s'il se default, on donne contre luy default, o tout le profit que de raison, sauf quelque iour: & ordonne lon, que le iour passé,

les

les charges & informations ſeront miſes pardeuers le iuge, pour faire droict de ladiète prouiſion.

¶ Le rapport du chirurgien qui ha medicamens té le bleſſé, ou de l'adoubeur des corps humains qui a adoubé, eſt requis en prouiſiõ d'alimens & medicamens.

Pour ceſte cauſe quand il y a excès, il fault faire oyr le chirurgien qui ha penſé le bleſſé, ou l'adoubeur des corps humains, qui l'ha adoubé. & qu'ilz depoſent, quelle ſomme eſt bien neceſſaire pour medicameter & alimenter le bleſſé, iuſques ad ce qu'il ſoit guéri. ou bien, qu'ilz baillēt leur rapport ſigné d'eulx ou de deux notaires, ou d'un notaire preſens teſmoings. & fault que par leur rapport ilz attētent, quelle ſomme eſt requiſe pour leſdictz alimens & medicamens.

¶ Quand on adiuge les deſpens de l'inſtance de prouiſion d'alimens & medicamens : & ſ'ilz ſont executoires par deſſus l'appel.

On ha de couſtume reſeruer les deſpēs de ceſt incidēt en diſſinitue, quād il ſe uuyde par cōtumace. mais ſ'il ſe uuyde parties oyees, on les adiuge par fois. Et cōbien que ceſte ſentēce de prouiſion ſoit executoire nonobſtans oppoſitions ou appellations quelconques, & ſans preiudice d'icelles: toutesfois leſdictz deſpens ne ſont executoires. Mais les fraiz & miſes qui ſont faiēt pour mettre a execution ladiète ſentence de prouiſion, ſont bien executoires nonobſtans oppoſitiōs ou appellations quelconques. Car ſ'ilz n'eſtoient executoires, ladiète ſentence ſeroit inutile : parce qu'on feroit faire plus de fraiz a l'executer, qu'elle ne ſe monteroit.

¶ L'inſtance de ladiète prouiſiõ doit eſtre ſeparée du principal : & quand on peut reſeruer ladiète

dicté prouision apres les recolemens & cōfron-
tations de tesmoings.

si les parties comparent toutes, & qu'on requiere ladiète prouision d'alimēs & medicamēs, & que partie aduersē l'em-
pesche, le iuge ordonne que les picces auecques les informatiōs
seront mīses pardeuers luy. Et doibt estre ladiète instance se-
paree du principal. sinon quand chascune des parties tant
demāderesses que defenderesses pretēdent estre excēdees &
blessees, & ont faict faire information, & mis leurs informa-
tions pardeuers mesme iuge: & obtenu respectiuelement de-
cret d'adiournement personnel: & qu'il n'appert clairement
par les informations, quelle des parties fit l'aggression: en
ce cas le iuge reserue a faire droict de ladiète prouisiō apres
les recolemens & confrontatiōs des tesmoings, quād le pro-
ces doibt estre faict extraordinairement: ou s'il doibt estre
faict ordinairement, il reserue au rapport des enquestes.

¶ Le defendeur peut requerir ledict demandeur
excedē estre visitē par vn chirurgien: & que a
ceste fin il se accorde de chirurgiens.

Le defendeur qui empesche ladiète prouision, peut reque-
rir que le demandeur soit uisitē, & que a ceste fin le deman-
deur ayt a conuenir d'un ou deux chirurgiens pour faire la-
dictē uisitation, & arbitrer la somme requise pour les alimēs
& medicamens. Lesquelz en feront leur rapport au iuge a-
uecques serment. & par fois le iuge ordonne, qu'il sera pre-
sent & assistera a ladiète uisitation.

¶ Comment se doibt proposer exoine en ma-
tiere criminele.

L'adiournē a comparoir en personne, ne peut & n'est re-
ceuable a comparoir par procureur: uoire si aucun compare
pour luy, et propose exoine, scauoir est, qu'il est si fort malade,
qu'il

qu'il ne pourroit uenir a pied, ne a cheual, sans grād dangier de sa personne: neātmoins le iuge dōnera cōtre luy default, sauf toutesfois la raison de son exoine, de laquelle il informera dedens certain temps, & sa partie aduerse au contraire: & au iour assigné fault qu'ilz rapportēt leurs enquestes. autrement & par default de ce, sera ledict defendeur debouté de son exoine, & cōtre luy baillé decret de prise de corps, ou d'adiournement a trois briefz iours, avecques adnotation des biens dudit defaillant. Et ne suffit d'enuoyer procuration pour proposer l'exoine, & l'affirmer par serment con tenir uerité: mais fault que celluy qui la propose, afferme par serment auoir ueu cellay qu'il exoine, & qu'il est si griesue- ment malade qu'il ne pourroit uenir a pied, ne a cheual, sans grand dangier de sa personne. & n'est mestier en ce cas, qu'il informe de procuration dudit exoine. & ainsi en a lon ac- coustumé d'user en la Coar de Parlemēt. Toantesfois es Cours royales, & autres inferieures, on recoit telles procurations, sans que le procureur afferme auoir ueu l'exoiné.

¶ Le seigneur ne peut demander le renuoy si l'accusé ne compare en l'estat qu'il est tenu.

Combien que le seigneur en la iurisdiction duquel est de- mourant le delinquant, demande le renuoy ou obeissance, & le delinquant aussi le requiere par procureur special, neant- moins le iuge leur peut denier ledict renuoy ou obeissance, sauue a leur faire raison dudit renuoy quand le delinquant comparoistera en l'estat qu'il est tenu comparoir.

¶ Le condamné par contumace peut appeller, & faire mettre les defaultz, sentence de contumace, & son appel au neant.

Doncques

Doncques si l'accusé ne compare en sa personne, on donne sentence de contumace contre luy. mais il se peut porter tousiours appellant des defaultz, & sentence de contumace: & parapres auoir lettres royaux adressans au premier iuge royal, qui a donné la sentence: par lesquelles sera mandé le receuoir a comparoir, & ester a droict, & luy faire son proces nonobstans les defaultz & sentence de contumace, lesquels seront mis au neant par lesdictes lettres, en refundant les despens des defaultz, sentence de contumace, & de ce qui s'en est ensuiuy, telz que de raison.

¶ Les arestz confirmatifz des sentences dōnees par contumace doibuent estre executez quant a l'interest de partie ciuile seulement, & non du Roy.

Mais si la sentence est confirmee par arest donné aussi par contumace, lors par les ordonnances du Roy Charles VIII. article lxxvij. & par les arestz de la Cour dont en est recité l'un en l'arest cxvi. aux arestz escriptz en Latin mis a la fin du stile de la Cour de Parlemēt aussi mis en Latin, l'arest doit estre executé quant a la reparation & interest ciuil adiugé a la partie ciuile demanderesse, & non pour le regard de l'interest du Roy. Et encore ladicte partie ciuile est tenue de bailler bonne & suffisante caution de rendre, s'il est dict en fin de cause, que faire se doibue. Et quant a l'interest du Roy, qui est la punition corporelle, ou l'amende a luy adiugée: l'accusé peut auoir semblablement lettres royaux, pour faire mettre au neant les defaultz, sentence, & arest donné par contumace, pour le regard dudict interest du Roy: & pour le receuoir a comparoir, & ester a droict en l'estat qu'il est tenu: en refundant

fudāt les fraix & miſes de iuſtice:quād il n'y a partie demā dereſſe, que le Roy. Car quand il y a partie ciuile avecques le Roy, elle faiēt tous les fraix & miſes du proces: auſſi on adiuge a icelle partie ciuile tous les deſpens. Et leſdictes lettres royaux enterinees, on commence a faire de nouuel le proces, comme ſi iamais on n'y auoit touché. & ſ'il eſt trouué que tūcēt defendeur ſoit coupable:il ne ſera pas condāné en ſi griefue peine, qu'il auoit eſté par la ſentence de contumace. Et ſ'il eſt trouué innocent, apres auoir eſté receu a proces ordinaire, il ſera enuoyé abſout: & ſa partie ciuile cōdamnee en ſes deſpens dommages & intereſt: ainſi que cy apres ſera dict.

¶ L'appel de la partie ciuile n'empêche que le contumax ne puiſſe faire mettre au neant les defaultz, ſentēce de contumace, & les appellations de luy & de ſa partie aduerſe, en reſundant deſpens du tout.

Aucuns pour empêcher que l'accuſé contumax, ne fuſt receu a purger ſa contumace en la maniere ſuſdictē, ſe ſeroient auſſi portē appellans de la ſentence de contumace comme portant en adiugeant moindre reparation & intereſt ciuil, qu'on debuioit adiuger, que nous appellons en noſtre pratique en termes Latins, *tanquam a minima*. Toutes fois ce non-obſtant, la Cour auroit receu le contumax a purger ſadiētē contumace, en le condamnant reſundre les deſpens deſdictz defaultz, ſentence, & de la cauſe d'appel, tant pour le regard dudiēt contumax, que de ſa partie aduerſe. Ce qui eſt bien raiſonnable: car pluſieurs pour la grand haine qu'ilz portent a leurs parties, ne craindroiēt a interieſter telles appellatiōs a tort, a fin d'oſter a leur partie aduerſe la faculté de purger ſa contumace.

¶ La partie ciuile peut empescher que l'accusé ne soit réuoyé a l'Eglise, que l'arest donné par contumace quant a son interest ciuil ne soit executé.

si celluy qui est cōtumacé par sentēce, & par arest portāt adiudication d'interest ciuil, requiert pardeuant le iuge pardeuant lequel il est renuoyé, estre renuoyé pardeuant son iuge d'Eglise : partie ciuile peut empescher qu'il ne soit renuoyé, que preallablement ledict arest ne soit executé quant a l'interest ciuil, suiuant l'ordonnance: ia soit que ledict contumax ne se fust porté appellant de la sentence de contumace, ains seulement sa partie ciuile tanquam a minima: & ainsi en a esté decisi par arest de la Cour de parlement a Paris.

¶ Le clerc ne peut estre renuoyé a l'Eglise, si en personne il ne demande son renuoy.

Et fault noter en cest endroit, que un clerc ou tonsuré ne peut demander pardeuant le iuge lay pardeuant lequel il est adiourné a comparoir en personne, estre renuoyé pardeuant son iuge d'Eglise, s'il ne comparoist en sa personne: combien que son procureur monstrest iudiciairement sa lettre de tonsure ou clericature.

¶ Le seigneur peut demander le renuoy pardeuant son iuge de son iusticiable réuoyé par arest pardeuant iuge royal.

Semblablement si ores le contumax est renuoyé par arest de la Cour deuant un iuge royal, pour purger sa contumace, le procureur fiscal de la iurisdiction en laquelle il est demourant, peut au iour que comparoistra en personne l'accusé, demander le renuoy de l'accusé & de ses charges & informations:

tions: car l'arest ne le priue point du renuoy, d'autant qu'il n'est donné avecques luy.

¶ Si l'accusé compare, & on ne puisse trouuer les informatiōs, quelle expedition luy doibt estre faicte.

Mais si la partie ciuile demanderesse a la requeste de laquelle l'accusé est adiourné a cōparoīr en personne, se default au iour assigné: & l'accusé cōpare: ou biē si les deux parties cōparent, & qu'on ne puisse trouuer les charges & informations, pour oyr sur icelles l'accusé: & que le greffier ayt certifié par son serment ne les auoir point: est donné default & cōgé cōtre la partie ciuile, sauf quelque temps. & ledict temps passé, s'il ne rabat le default, l'accusé est enuoyé de l'instance, & le demandeur partie ciuile condanné es despens, dommages, & interestz d'icelle assignation, ainsi qu'il est mis par le stile de Parlement imprimé en Francoys. Neantmoins es Cours royales & autres inferieures nous n'obseruons ce stile, quand les informations ne se trouuent, & le greffier certifie par son serment ne les auoir: car l'accusé lors n'est enuoyé de l'instance, ains seulement est eslargi iusques a certain iour, dedens lequel la partie ciuile fera diligence de fournir desdictes informations: autrement a default de ce, & ledict tēps passé, sera procedé a l'eslargissement de l'accusé cōme de raison. Et si au iour assigné la partie ciuile ne fournit des informations, le defendeur sera eslargi iusques ad ce que autrement soit ordonné: & la partie ciuile condamnée es despēs dudit default & cōgé, & de ce qui s'en est ensuiuy, & permis aux demandeurs de faire autres informations.

¶ Que lon doibt faire, quād la partie ciuile ne cōpare, & le procureur du Roy cōpare, & requiert estre procedé alencontre du delinquant.

Et si la partie ciuile se default, & le procureur du Roy^s compare & fournisse des charges & informations, lors on donne default & congé contre la partie ciuile, sauf quelque temps. & icelluy passé, a default de rabbat sera le defendeur enuoyé de l'instance pour le regard de la partie ciuile defaillant, & icelle condamnée aux despens de l'instance.

¶ De faire adiourner la partie ciuile a la requeste du prisonnier, pour venir proceder en la cause.

Ce lieu requiert d'aduertir de pouruoir a un grand inconuenient qui aduient souuent en ces matieres crimineles : qui est que le demãdeur partie ciuile faiet constituer l'accusé prisonnier, & par apres ne compare & ne eslit domicile, & ne constitue procureur au lieu ou elle le faiet mettre aux prisons, en maniere qu'il conuient au poure prisonnier enuoyer adiourner sa partie a son domicile, qui est par fois bien loing, & ce pendant on ne luy peut faire autre expedition, sinon de l'oyr sur les charges & informations. Vray est qu'en cause ciuile on ha pourueu par election de domicile, & constitution de procureur, que les parties sont tenues faire on lieu ou elles plaident des la premiere assignation: mais ceste prouision ne peut auoir lieu en cestuy cas: parce qu'il n'y ha encores assignation. Au moyen dequoy il me semble qu'il seroit bien bon que la partie ciuile qui faiet constituer prisonnier l'accusé, fust tenue de eslire son domicile & constituer son procureur au lieu ou il sera mené prisonnier, & par l'escroue mesme de l'emprisonnement, qui sera baillée au consierge par le sergent qui l'admenera prisonnier: car par ce moyen le prisonnier le pourra faire adiourner au domicile esleu, pour venir proceder en la matiere.

Parantant qu'auons aſſez ia touché de la procedure dont on uſe contre les deſaillans en cauſes crimineles, il eſt beſoing que maintenant nous declairons quelle forme de proceder nous gardons, qu'ad toutes les parties tant demãderesſes que deſenderesſes comparēt. Mais auant que entrer plus auant, il fault traicter comment on doit mettre a execution les decretz de priſe de corps: car c'eſt une maniere de paruenir ad ce que les parties ſoyent preſentes, & obeiſſent toutes a iuſtice.

¶ Comment on doit mettre a execution les
priſes de corps.

Selon droit commun il n'eſtoit permis de prendre aucun au corps en ſa maiſon. Mais auourd'huy on le peut prendre en ſa maiſon: pourueu que ce ſoit de iour, & non de nuit, & avecques deux recordz, & non avecques grand aſſemblee de gens, & port d'armes: & qu'on ne rompe rien en la maiſon, & qu'on n'y prenne rien. Toutesfois ſe les portes ſont fermees, ſoit de la maiſon, ou de la chambre ou eſt le delinquant, on peut les rompre. Autrement le delinquant pourra faire faire information de la grand & illicite aſſemblee de gens, & du port d'armes, & de ce qu'on aura prins en ſa maiſon: & auoir decret d'adiournement perſonnel, ou de priſe de corps alencontre des coupables. Car encores qu'on ne face point de force, ne uiolence, uoie ſi on ne faiēt qu'une execution de biens meubles par auctorité de iuſtice: aucuns ſont ſi peuers & malitieux, qu'ilz en font faire information, comme d'une uolerie: & taiſent l'auctorité & mandement de iuſtice. leſquelz il faudroit chaſtier de peine ſeuere, a fin que par ceſt exemple on extirpaſt telle calumnie. Aucuns ſont de ceſte opinion, que ſi aucun contrelequel y a decret de priſe de corps, tient maiſon forte, en maniere qu'on n'oſe y approcher,

L que

que le iuge qui a baillé le decret de prinſe de corps, ou du lieu ou eſt aſſiſe la maiſon du delinquant, puiſſe bailler a la requēſte du procureur du Roy, & de la partie ciuile, permiſſion de faire aſſemblée de gens & de port d'armes, pour mettre a execution le decret de prinſe de corps.

¶ A qui fault demander permiſſion de vſer de main armee & aſſemblée, pour l'executiō d'une prinſe de corps.

Toutesfois ie penſe que le iuge ne peut ce permettre, ſi le delinquant n'eſt homme fort mal famé, & diffamé de pluſieurs grāds & enormes delictz. Et en autre cas fault bailler requēſte a la Cour de Parlement du reſſort, ou au Roy, ou a meſſieurs de ſon priuē cōſeil, pour auoir ceſte permiſſion. car il n'y a ordinairement que eulx qui puiſſent bailler permiſſion de faire aſſemblée & port d'armes. & quand les Cours de Parlement ou ſon priuē conſeil le permet, c'eſt touſiours le Roy qui parle par la permiſſion ou mandement.

¶ Quand on peut prendre le delinquant en franchise d'Egliſe.

Parcydeuant il n'eſtoit loyſible ne permis de prendre un delinquant en franchise d'Egliſe, ou autre lieu ſainct. Mais par les ordonnances dernieres article clxvi. eſt dict, qu'il n'y aura lieu d'immunitē pour debtes ne autres matieres ciuiles: & ſe pourront toutes perſonnes prendre en franchise, ſauf a les reintegrer, quand il y aura prinſe de corps decernee a lencontre d'eulx ſur les informations des cas dont ilz ſont chargez & accuſez, & qu'il ſoit ainſi ordōné. Laquelle dernière partie de l'ordonnance ſuſdicte aucuns interpretent quand le iuge a ordōnné que les delinquans ſeroient prins en lieu ſainct, & dehors. laquelle interpretation me ſemble bien
bonne.

bonne. non pas qu'il faille entēdre, qu'il soit necessaire, quand quelqu'un est obligé a prinse de corps pour debte ciuile, qu'on ayt permissiō de le prendre au corps en lieu sainct: car il suffit que par le mandement de debitis il soit permis comme on permet communemēt & est mandé de contraindre le débiteur par saisie, uente, & exploictation de ses biens, & emprisonnement de sa personne, si ad ce est obligé. & n'est en ce cas requis autre mandement, pour prēdre le débiteur en lieu sainct.

¶ L'accusé comparant est arresté, & oy sur les charges & informations.

Quand l'accusé comparoit en sa personne, soit qu'il ayt esté admené prisonnier, ou adiourné a comparoir seulement en sa personne: les demandeurs requierent qu'il soit oy sur les charges & informations. & s'il n'est que adiourné a comparoir en personne, ilz requierent qu'il soit arresté prisonnier par la uille & faulxbourgs, & qu'il luy soit defendu le partir, a peine d'estre attainct & conuaincu des cas a luy imposez.

¶ Le declinatoire ou renuoy doibt estre proposé, auant que l'accusé soit oy sur les informations.

Lors si l'accusé ueult decliner la iurisdiction du iuge deuant lequel il compare, il doibt le dire. car s'il souffre d'estre oy par le iuge, il ne peut plus decliner.

¶ Le iuge doibt faire prōptement droict du renuoy, sans en faire proces par escript, & auāt que oyr l'accusé sur les informations, fors quand il est clerc ou prestre.

Et si l'accusé demande estre renuoyé avecques ses charges & informations pardeuant autre iuge : si le iuge pardeuant lequel il demande estre renuoyé est iuge royal, ou autre iuge lay, il fault que le iuge luy face droict dudit renuoy sur le champ, & n'en doibt faire proces par escript. Bien peut ordonner que les gens du Roy uerront les charges & informations, pour uenir dire au renuoy avecques la partie civile ce qu'il appartiendra. Et apres auoir oy les parties sur le renuoy, pourra ordonner qu'il uerra les charges & informatiōs, pour y donner son appoinctement sans en faire proces par escript. car il ne peut pas auoir memoire du contenu es informations, iasoit qu'il les ayt decretees. Et ne peut le iuge ordonner qu'il oyra l'accusé sans preiudice de son declinatoire, & fauf a luy en faire raison apres qu'il aura esté oy. car il ne peut de rien seruir lors de l'oyr. parautant que s'il est question d'un cas priuilegié, le iuge s'il est royal, en peut retenir la cognoissance : & s'il n'est cas priuilegié, il est tenu en faire renuoy. Et ainsi en fut dict par arest des grands iours tenuz a Poictiers le xix. iour de septembre M.D.XXXI.

Mais si l'accusé demande estre renuoyé pardeuant le iuge d'Eglise : le iuge pardeuant lequel compare l'accusé, peut ordonner qu'il sera oy sans preiudice de son declinatoire, reserué a luy en faire raison apres son auditio. Car il pourra estre, qu'il confessera quelque chose, dont s'en pourroit ensuyuir condānation pour le regard du cas priuilegié: duquel le iuge royal ha la cognoissance.

¶ Des cas priuilegiez en matieres crimineles dont priuatiuement la cognoissance en appartient aux iuges royaux.

Institutions forenſes.

Les cas priuilegiez ſont certains crimes, deſquelz ſpeciallement & priuatiuement les iuges royaux ont la cognoiſſance: & ne ſont tenuz en faire renuoy aux autres iuges non royaux. Voire ilz peuuent euoquer telles cauſes pendans pardeuant leurs iuges inferieurs non royaux.

Et ſont leſdictz cas priuilegiez, ſcauoir eſt ſauuegarde, ou ſaufconduit donné par le Roy, ou ſes iuges, enſrainēt: force, uiolence, ou excès faiēt a aſſemblee illicite, & port d'armes: le crime de leſe maieſté en ſes trois cheſz, ſcauoir eſt le premier alencontre de la perſonne du Roy, meſſieurs ſes enfans, & princes du ſang royal: le ſecond, alencontre de la choſe publique: le tiers, alencontre de ceulx qui ſont pres de la perſonne du Roy, & de meſſieurs des Cours de Parlement en exerçant leurs offices. Plus le crime de faulſe monnoye. le crime de faulx, quand il eſt queſtion de falſification de lettres royaux, ou de contractz paſſez ſoubz ſeel royal, ou de faulx teſmoignage porté par un clerc deuant le iuge royal ou lay. Plus quand il eſt queſtion de contrauention faiēte es ordonnances royaux concernans la liberté du Royaume. D'auantage quand il y a charge de rebellion, ou excès faiēt a un ſergent royal. ou aux commiſſaires commis de par le Roy ou par ſes iuges ou officiers en exerçant leurs offices, ou a ceulx qui ſont appellez par le Roy pour aller parler a luy, ſ'ilz ſont excédez par les chemins. Et la reinte grande intētee par information faiēte ſur ſpoliation commiſe & perpetree a port d'armes. Et ſont leſdictz cas en partie nombrez on ſtille de Parlement compoſé en Latin ſoubz le tiltre De quelz cas la cognoiſſance appartient au Roy.

¶ De l'effect de ſauuegarde.

Et combien que un homme ſoit en ſauuegarde, toutes fois ce n'empêche que ſon iuge ordinaire ne puiſſe bien decreter

contre luy, s'il delinque: ne aussi que sa partie aduersé qui ha droict & matiere de faire exploict en quelque chose, ne le puisse faire.

¶ Le sergent n'est creu des excès qu'il diët luy auoir esté faictz par sa relation.

Parcillement est a noter que le sergent n'est pas creu par sa relation de l'exces qu'il diët luy auoir esté faict en executât, mais fault faire oyr ses recordz par information. Et la peine ordinaire de celluy qui excède un sergent royal exerceant son office, est, la teste, ou la main dont il a frappé, trenchée.

semblablement si quelqu'un reproche a l'autre qu'il est faulx monnoyeur, ou met faulx monnoye, c'est cas royal.

Aussi fault entendre que toutes assemblees & port d'armes ne sont pas cas royaux: car il fault quant a l'assemblee, qu'il y ayt quatre hommes pour le moins, & qu'ilz se soient assemblez pour mal faire. Car s'ilz s'estoient assemblez a bonne fin, ou pour bon oeuvre, ce n'est pas censé cas priuilegié. Comme si les escolliers pour euitier le danger de peste estant en une uniuersité, s'en uont en autre par bandes, & portent picques ou autres bastons longs, cōme ilz ont accoustumé, & suruiuent entre eulx noise, ou entre eulx & autres, & se y cōmet quelque delict, ce ne sera point cas priuilegié. Et ainsi en a esté diët par arest de la Cour de Parlemēt a Paris entre le procureur general du Roy prenant la cause pour son substitut on Chastellet a Paris d'une part, & l'Euesque de Paris d'autre part.

¶ Le delinquant doibt estre cōuenu on lieu de son domicile en cause criminele, fors en vn cas.

Et iasoit que nous ne gardons pas le droict commun entierement en ce qu'il uouloit qu'on peust conuenir le delinquant

quāt on lieu du delict, ou de son domicile: & qu'il doibue selon le stile general de la France coustumiere estre conuenu on lieu de son domicile: toutesfois cela doit estre entēdu, quād le delinquant a faict le delict audehors le ressort du Parlement onquel il demeure: car s'il a delinquē hors le Parlemēt on ressort duquel il demeure, il sera bien conuenu on lieu du delict, & ne sera renuoyé pardeuāt son iuge domiciliaire. Car les tesmoings scroient mal aysez a faire uenir de si loing on lieu du domicile. comme si un du ressort du Parlement de Toloſe ou de Bourdeaux delinquoit en Poictou: qui est du ressort du Parlement de Paris.

¶ Cōment nous prenons les prouinces de France.

Dont s'ensuit, que en ceste matiere nous prenons une prouince, pour tout ce qui ressortist en une Cour de Parlement. Autre chose est, quant es prescriptions de choses immeubles. car nous prenōs la prouince pour un Bailliage, ou seneschaucee royal ressortissant nuement en la Cour de Parlement. Cōme la Seneschaucee de Poictou. Et la raison de diuersité est en ce fort bonne. car la punition des delictz est favorable. & parautant qu'on ha plus prompte & facile preuue des delictz on lieu ou le delinquant a faict le delict, qu'on lieu de son domicile, il fault extendre les fins & limites de la prouince. Mais en prescription, a fin que facilement on ne perde son domaine, il fault restraindre les fins de la prouince. car biē souuent ceulx d'une seneschaucee ou Bailliage ne scauent ce qui y est faict.

Neantmoins ie entenderoye ce d'une seneschaucee telle qu'anciennement elle estoit, non pas ainsi que puis nagueres ont esté erigees: comme en Poictou ont esté erigez Fontenay, Mōtmorillon, & Cyuray nagueres en seneschaucees: lesquelz lieux estoient de la seneschaucee de Poictou: combien que les

appellations des lieutenāts desdictz lieux ressortissoient sans moyen en la Cour de Parlement a Paris, comme elles font. Et pource au iourd'huy ueue ladicte erection nouuelle desdictes seneschauces, il fauldra prēdre une prouince pour un Cōté royal, cōme tout le Cōté de Poictou quāt aux prescriptions.

¶ L'accusé conueni pardeuant iuge incompetēt ha deux remedes.

Quand l'accusé est conueni pardeuant iuge incompetēt, il ha deux remedes pour se pouruoir. Scauoir est, de se porter appellant de l'oētroi du decret d'adiournement personnel, ou de prinse de corps, comme donné par iuge incompetēt. ou bien cōparoir au iour & lieu assigné en sa personne, & demander le renuoy. Et on premier cas est meilleur de declairer au sergent l'appel susdict ainsi qu'il dōne l'adiournemēt. car on ne sera point en ce cas constrainēt enuoyer homme pour declairer l'appel au iour assigné pardeuant le iuge qui ha decreté. Voire quand on enuoye homme, on donne default, nō-obstant la declaration dudict appel d'incompetēce portee par ledict homme: car cōme i'ay dict cy dessus, on ne recoit point de procureur en assignation d'adiournement personnel. mais le iuge ne passe pas oultre a la facon du proces.

¶ Preuostz des mareschaux passent oultre nonobstant l'appel interiecté d'eulx comme de iuges incompetens.

Toutesfois les preuostz des mareschaux ou leurs lieutenans passent oultre nonobstant la declaration de tel appel cōme de iuge incompetēt : car ilz ont leurs ordonnances, qui leur

leur baillët certaine cognoissance & limitation des qualitez des personnes, & des cas dõt ilz peuuēt cognoistre. dequoy nous parlerons cy apres plus amplement. D'auantage s'ilz receuoient telles appellations, & y deferoient, ilz ne cognoistroient iamais de cas quelconques: car leurs prisonniers interiecteroiēt tousiours telles appellatiōs, a fin qu'ilz ne peussent passer oultre. Et seroit l'ordonnance illusoire, par laquelle leur est permis de faire les proces nonobstant oppositions ou appellations quelzconques iusques a sentence definitive inclusiuement, avecques l'execution d'icelle sentence. Et mesme ment ie penseroye qu'ilz pourroient bien passer oultre nōobstant tel appel, quand il leur apparoiſtroit euidēment & notoirement que tel appel seroit friuol: comme s'il leur apparoiſſoit que l'accusé fust uagabond, ou qu'il fust question de uoleurs tenans les champs, & uiuās sur le peuple, suiuant l'ordonnance du Roy Francois dernier decedé sur ce faicte.

¶ Les decretz de prinſe de corps se mettent a execution nonobſtāt l'appel comme de iuge incompetent.

Nonobſtāt tel appel d'incompetence, on peut passer oultre a l'execution du decret de prinſe de corps, & constituer l'appellant prisonnier: mais on ne peut proceder a luy faire son proces, quant aux iuges ordinaires: car il fault qu'ilz deferent a l'appel comme de iuge incompetent.

¶ Repetition de la distinction des personnes
& iurisdicſtions.

Cōme en cause ciuile nous auons faict distinction des personnes, & icelles mises en deux gēres, ſcauoir est lays & clerics: & auſſi auons mis deux iurisdicſtions, l'une laye, l'autre ecclesiastique

clésiastique, pour mieulx traicter les declinatoires ou rēuoyz, & deuant quel iuge un chascun d'eulx doit estre conuenu: aussi nous le fault il encores en ce lieu repeter.

¶ Des crimes dont la cognoissance appartient indifferemment aux iuges d'Eglise & lays.

Car il y ha certains crimes, desquelz la cognoissance en appartient indifferemment aux iuges royaux & aux iuges ecclesiastiques: scauoir est heresie, blasphemies contre l'honneur de Dieu & des sainctz & saintes de Paradis, sortilege ou sorcerie, combien que dudiect crime soit ensuyue mort ou dommage en la personne de celluy contre lequel ha esté commis le sortilege. Mais cela se doit entendre que les iuges ecclesiastiques cognoissent contre les prestres ou clerics accusez desdictz crimes: & les iuges royaux aussi entreprennent cognoissance contre les lays chargez des crimes cy dessus nombrez. Et ainsi en ha esté diect par arrest de la Cour de Parlemēt a Paris le ij. iour de May, M.D.XXX. Et a ce est conforme l'ordonnance du Roy Francois dernier decedé faicte alencōstre des Lutheriens. Neantmoins ladiecte ordōnance n'en baille aux iuges ecclesiastiques ou royaux, que la facon & instruction du proces quant esdictes heresies, & en reserue la definitiue a la Cour.

¶ Le iuge auquel est commis l'instruction ou facon du proces, peut eslargir celluy qui se trouue innocent apres le proces parfait.

Toutesfois il sembleroit estre bien equitable, que ou le iuge par le proces criminel uerroit clairement l'accuse n'estre coupable

coulpable, qu'après son proces faict & parfaict, il pourroit l'eslargir. pour ce que ce seroit grand rigueur que celluy duquel il apparoiſtroit de l'innocence, ou qui ne seroit trouué coulpable, souffrist le deshonneur & le dommage d'estre mené ou aller prisonnier ou en personne a la Cour, cōme celluy qui seroit trouué coulpable: mesmement qu'on uoit plusieurs qui conuertissent a mal ce qui auoit esté ordonné a bonne fin: & qui quand ilz ne se peuuent autrement uenger de leurs ennemis, ilz instigueront secretemēt le procureur du Roy de l'accuser d'heresie, & luy bailleront les informations, & feront uenir tesmoins, & toutes autres diligences de la poursuyte soubz le nom du procureur du Roy, a fin que si l'accusé ne peut estre cōuaincu dudit cas, il ne s'en puisse adresser a eulx: queque soit, que par mesme iugement d'absolution il n'y ayt condemnation contre eulx comme parties ciuiles des despens de l'instance, & dommages & interestz de la detention personnele de l'accusé.

¶ De punir les accusateurs calumniateurs.

Et tout ainsi que c'est chose tressaincte de punir les coupables desdictz crimes, aussi est bien raisonnable de punir ces calumniateurs, & en ce cas & autres semblablement atroces remettre en usage la peine de Talion.

¶ Les iuges lays non royaux peuuent punir les blasphemateurs deprehendez en blasphemés.

Au regard des blasphemateurs, les ordonnances tant du Roy Loys XII. que dudit Roy Fr. acois faictes contre eulx, en attribuent aussi la cognoissance aux autres iuges lays & inferieurs par dessoubz les royaux, & signamment aux iuges lays des lieux ou sont proferees lesdictes blasphemés.

Idem

¶ Idem des sortileges.

Quant est de sortilege ou sorcerie, j'ay ueu beaucoup de personnes layes en estre poursuiuies pardeuant les iuges lays inferieurs susdictz, & aussi pardeuant les iuges royaux. Et entre autres une femme accusée de sortilege par le commun fame du pays, & d'auoir faict mourir des hommes & des bestes, & les auoir faict malades: & qu'elle auoit touché sur le col d'une femme a nud, laquelle faisoit bonne chere, & que tout incontinent elle se seroit sentie malade, & l'auoit deslors declairé: & oultre qu'elle auoit baillé du pain a un ieune enfant, & que tout incontinent il seroit entré en fureur, & se seroit precipité en une riuere illec prochaine. Et apres le procès extraordinairement faict, elle fut condānee par le seneschal de Maillezay a estre mise en torture, dōt elle appelle pardeuant le lieutenant criminel de Fontenay le conte: qui cōfirme ladiète sentēce, duquel encores elle appelle. Et apres auoir esté oye par sa bouche en la cause d'appel par la Cour de Parlemēt, il est dict que les prisons luy serōt ouuertes, & l'Euesque de Maillezay condāné enuers elle aux despens desdictes causes d'appel. Et faict ladiète Cour ordinairement telz iugemens: dont plusieurs s'esmerueillent, attendu que par les loix ou constitutions de Constantin l'Empereur, qui estoit Chrestien, appert que telz sorciers peuent nuyre aux personnes par leur art magique. Et en auons un exemple notable en Guaguin en la uie du Roy Loys Hutin, comment un sorcier & sa femme a la requeste de la femme de Enguerran feirent une image a la semblance du Roy Charles de Valois lors regnant: par laquelle le Roy fut fort affligé, & receut grand douleur. Et du regne du Roy Frácois dernier mort quelques personages de qualité, pour auoir uoulu attenter contre ledict Roy Francois un tel cas, furent enuoyez aux galeres

galeres . Toutesfois ie n'ay sceu autrement par quelz iugemens ilz y furent condamnez.

¶ Deux crimes dont les iuges ecclesiastiques cognoissent contre les personnes layes.

Il y ha deux crimes desquelz la cognoissance peut appartenir a un iuge ecclesiastique alencontre d'une personne laye. C'est ascauoir quād un lay ha faict excès en la personne d'un clerc ou prestre, pour le regard de la declaration de la peine du canon, si quis suadente diabolo 17. quæstion. 4. par lequel est dict, que ceulx qui excedent un clerc ou prestre, sont excommuniez de droict. L'autre crime est simonie: mais la cognoissance de ce crime uient plus incidẽment en la cause d'un benefice ou office ecclesiastique, que principalement. Et peut a ce moyen tumber ausi bien pardeuant un iuge royal en la complaincte pendant pardeuant luy pour raison du possessoire d'un benefice ou office ecclesiastique, que pardeuant le iuge ecclesiastique en la matiere petitoire du benefice. Mais pardeuant le iuge lay il n'est cogneu dudit crime, sinon a fin de adiuger la possession a partie aduersẽ & demãdereffe on dict crime, non pas punir la partie qui l'ha commise, des peines introduictes de droict canon.

¶ Crimes & autres causes pour lesquelles vn clerc ou prestre peut estre debouté de son priuilege de clericature.

sensuit que nous declairions les crimes & les causes pour lesquelles un clerc peut estre conueu pardeuant un iuge lay ou royal. Premieremẽt il y peut estre conueu en crimes enor-
mes

mes: comme s'il est accusé d'auoir occis son pere ou sa mere, ou auoir par uenin ou poison faict mourir son maistre ou autre duquel il estoit domestique: ou quand il ha occis un homme de guet apens, & en l'aguettant en un chemin ou autre lieu. combien que aucuns dient que ce est suffisant seulement pour priuer de l'immunité de l'Eglise, mais nō du priuilege clerical. Laquelle opinion ie ne trouue raisonnable. Toutesfois j'ay ueu renuoyer a l'Eglise plusieurs clerks mariez accusez de faulse monnoye.

Secondement quand un clerc ha meritē estre priué de son priuilege clerical. Ce qui aduient pour plusieurs causes. Scauoir est, si par long temps il n'ha porté habit clerical, ains habit contraire, comme robe ou autre accoustrement de corps mesparti & bigarré: mais il faudroit qu'il y eust trois monitions precedentes de laisser telz habitz deshonestes par leurs Prelatz ou Euesques. Et encores aucuns tiennent que ce auroit lieu seulement quant aux clerks mariez.

¶ Un clerc marié ne retient son priuilege que quant a estre renuoyé pardeuāt son iuge ecclesiastique en cause criminele.

Car il conuient entendre qu'un clerc marié retient seulement un priuilege de clericature par la commune usance de ce royaume: qui est qu'il ne peut estre conuenu en cause criminele pardeuant un iuge lay ou royal. Et s'il y est conuenu, il sera reuoyé pardeuant son iuge ecclesiastique. mais un clerc solu ayant simple tonsure, iouyst encores aujourd'huy en ce royaume de immunité de tailles, & autres subsides: ce que n'ha un clerc marié. Mais pour uenir a nostre propos, aucuns tiennent qu'un prestre pour porter habitz indecēs n'est point priué. Neātmoins ie seroye d'aduīs cōtraire: & qu'il deburoit pour le moins estre aussi tost priué de son priuilege, quand
apres

après trois monitions il ne laiſſeroit les habillemens deshonneſtes : car il faiët pluſgrand ſcandale a l'ordre clerical, que ne faiët un clerc tonſuré.

¶ Les clerics réuoyez a l'Egliſe, nonobſtant qu'ilz euſſent habillemens de perſonnes layes de leur eſtat.

Auſſi i'ay ueu réuoyer pluſieurs clerics mariez a l'egliſe, iaiſoit qu'ilz euſſent porté habillemens non conuenans a leur ordre: car on ha regard a la mutabilité & changement d'habillemens, qui aduient par chaſcun iour en ce royaume: car il n'y ha nation ſi inſtante en manieres de uestemens que la Francoiſe, ainſi que diët tresbien Guaguin en la uie de Philippes de Valois. Tellement que on temps d'icelluy Roy on euſt diët a uoir leurs habillemens, qu'ilz eſtoient tous batelleurs. Et auons ueu par experience aduenir par pluſieurs fois ce que reprenoient les amis de Alexandre le grand en luy, quād il priſt la maniere des uestemens des Roys de Perſe: car ilz luy diſoient que quand on prend les ſortes des habillemens d'une nation, lon eſt en brief rendu ſubieët a ladiët nation: & que ce n'eſtoit choſe bien ſeant, que le uainqueur priſt les manieres d'habillemens du uaincu. Voire Marius capitaine Romain diſoit, qu'il ne uouloit apprēdre les lettres Grecques, parce que les maiſtres d'icelles ſeruoient & eſtoient ſubieët a autres. Mais c'eſtoit le dire d'un homme ignorant les lettres Grecques: car les lettres ne ſont pas cauſes de faire reduire les gens en ſeruitude, ains par le contraire elles baillent liberté, pour le moins, d'eſperit & entendement.

Toutesfois quand par le moyen du grand eſtude des lettres on uient a tomber en ocioſité, & qu'on ne ſ'exerce point en art militaire, ou en quelque labeur corporel: de ceſte ocioſité enſuit

ensuit une mollesse, & diminution de force corporele, par laquelle on n'est pas si apte aux labours. Parquoy fault s'exerciter aux deux mediocrement: & qu'on ne se addonne tellement a l'un, qu'on laisse l'autre entierement.

¶ L'habillement constituoit en possession de clericature.

Pour reprendre la matiere qu'auons laissée, l'habillement du clerc est de telle consideration, que si un clerc auoit esté prins en habillēmēt indecēt, le iuge lay pouuoit cognoistre s'il estoit clerc, & s'il debuoit estre renuoyé pardeuant son iuge ecclesiastique, ou non. mais s'il estoit prins en accoustrement decent, il falloit le renuoyer pardeuant le iuge d'Eglise, pour cognoistre & decider si le iuge Ecclesiastique ou lay cognoistroit du delict & de la clericature, ou non. car l'habillement constitue le clerc en possession de clericature, ou non, cōme il fut dict par l'arest clxxxiiij. des arestz en Latin mis a la fin du stile de la Cour de Parlemēt escript en Latin, ou il est dict que telle cognoissance de cause doibt estre faicte avec le procureur du Roy, ou luy appellé: autrement la procedure ne uault, & sera declairee nulle, si ledict procureur du Roy en appelle.

¶ Bigamie priue du priuilege de clericature: & comment on encourt Bigamie.

semblablement si un clerc est bigame, scauoir est, qui a esté marié auecques deux femmes, ou auecques une femme ueufue cogneue charnellement de son premier mari, ou qui scientement s'est marié auecques une putain, ou autre femme laquelle il scauoit auoir esté cogneue charnellement par autre, ou s'il souffre sa femme adulterer, ou en est macquereau, il
perd

perd son priuilege de clericature. Combien que aucuns tiennent, que un clerc pour espouser une femme cogneue charnellement par luy, ou par un autre, pourueu que ce ne soit par mariage, il ne perd sondict priuilege. Laquelle opinion comme plus fauorable semble meilleure, d'autant que facilement on ne doit priuer de ce priuilege. Toutesfois elle ne me semble raisonnable, parce que ueu que mariage qui est conuëction licite, rend l'homme bigame, & le priue dudit priuilege, a plus forte raison le doit faire une conuëction illicite. Plus si le clerc a faict train de marchandise uile & sordide, comme s'il a esté bouchier, ou chirurgien, ou de quelque mestier mecanique, & qu'il ayt delinqué en ce mestier, il en pourra estre puny nonobstant son priuilege.

¶ Les officiers royaux ayans charge de criminalité, perdent le priuilege de clericature.

Pareillement les officiers royaux ayans charge des causes crimineles, comme il ha esté oëtroiyé au Roy Francois premier de ce nom nagueres decedé, par le Pape Clement vij. de ce nom. Lequel oëtroiy auroit esté leu & publié en la Cour de Parlement a Paris le xx. iour d'Auril l'an M. D. XXXI.

En oultre si le clerc a esté a la soulde du Roy pour le faict de la guerre, ou s'il s'est trouué a plusieurs ribleries, bateries, & homicides, ou faict mestier d'estre a qui plus luy donne pour faire excès : esdicts cas & chascun d'icculx, il dechoit de sondict priuilege.

¶ Le clerc auant que estre renuoyé, doit estre condamné en la prouision d'alimens, & autres.

M Aussi

Aussi le clerc auant qu'il luy soit fait raison de son renuoy es cas esquelz il doibt estre renuoyé pardeuant son iuge ecclesiastique, peut & doibt estre condamné par le iuge lay ou royal en prouision d'alimens & medicamēs, ou pour la nourriture d'une fille qu'il aura engrossie, & de son fruiet procréé de son fait. Et a payer ladicte prouision sera contrainct par saisie & uente de ses biens meubles & immeubles, & emprisonnement de sa personne, nonobstans oppositions ou appellations quelconques, & sans preiudice d'icelles. Mais il ne doibt pas tenir prison pour ladicte prouision en Cour laye, mais en la Cour de son diocessain ou Euesque.

¶ On peut appeller d'un iuge deniant ce qui est de son arbitre.

Et iasoit que aucuns dient qu'il est arbitraire d'adiuger la dicte prouision, ou non: toutesfois s'il ne la'diuge, la partie ciuile demandresse en peut appeller, & par le iuge suzerain ladicte prouision sera adiugee. car combien qu'on die n'estre permis appeller du iuge deniant faire ce qui est de son office: neantmoins on peut en appeller, a fin de faire reformer le iugement par le iuge superieur, & qu'il face de son office ce que l'inferieur pouuoit faire, & n'a fait.

¶ Comment vn clerc est renuoyé pardeuant son iuge d'Eglise.

Auant que passer plus oultre, est besoing declairer cōment un clerc ou prestre est renuoyé pardeuant son iuge ecclesiastique. surquoy fault entendre qu'il y a deux genres & manieres de delictz & crimes. car il y a delict commun, & cas priuilegié. Le delict commun est comme homicide, ou autre crime.

crime . Et le cas priuilegié est le port d'armes, l'assemblée illi-
cite, & generally les autres cas & crimes cy dessus de-
clarez, desquelz la cognoissance appartient aux iuges royaux
seulz. A ce moyen quand le clerc demande estre renuoyé, il
fault que les demandeurs demandent uoir ses lettres de ton-
sure ou d'autre sainct ordre: & icelles ueues, si elles sont en
bonne forme, scauoir est signees du secretaire ou greffier de
l'Euesque ou du suffragant, il fault que les demandeurs adui-
sent s'il y ha cas priuilegié ou non . Et s'il y ha cas priuile-
gié, fault qu'ilz consentent qu'il soit renuoyé a la charge du
cas priuilegié, & de non l'eslargir iusques a ce qu'il soit decisi
du cas priuilegié.

¶ Comment se doibt faire le proces quant au cas
priuilegié, & quant au delict commun.

Et le renuoy ainsi faict, le iuge ecclesiastique oyt le clerc,
& recole & luy confronte les tesmoings, & faict tout le
proces criminel, assisstant avecques luy le iuge royal, & aussi
le procureur du Roy ioinct avecques le promoteur des causes
d'office . Et ainsi fut faict un renuoy par arest de la Cour
de Parlement a Paris le xi. iour de Decembre M. D. XXXIII.
ce requerant feu mon seigneur maistre Erācoys de Monthelon
lors aduocat du Roy, qui depuis fut second President, & est
mort garde des seaux de France : des louanges duquel est
mieux se taire, que d'en parler peu, & non pas si dignement
qu'elles le requerent. Par lequel arest fut renuoyé un clerc
pardeuant l'Euesque de Luczon a la charge du cas priuilegié.
pour lequel assisteroit le plus prochain iuge royal dudit
lieu de Luczon, appellé aussi le procureur du Roy. Lequel iu-
ge royal decideroit dudit cas priuilegié, & assisteroit a la
M ij sentence

sentence qui seroit donnee sur le delict commun, & inhibitiō faicte audiect Euesque de nō l'eslargir, iusques ad ce qu'il fust decisi dudiect cas priuilegié. Mais le iuge royal ne peut faire pareille inhibitiō, ne aussi iniunction de terminer ladiect cause dedens certain temps, ainsi que parfois faict la Cour. car le dict iuge royal n'ha aucune puissance sur l'Euesque, ou la Cour y ha puissance: parautant que c'est un corps composé de gens d'Eglise, & de layes.

¶ Si le iuge d'Eglise interroque mal vn prisonnier clerc renuoyé a la charge du cas priuilegié, comment le iuge royal, & procureur du Roy y peuuent pouruoir.

Et ne peut le iuge royal oyr sur les informations, ne faire autre interrogatoire au clerc renuoyé. Toutes fois par conuenance des iuges ecclesiastiques bien souuent il le faict. mais s'il uoit que le iuge ecclesiastique ne oye & interroque bien le prisonnier, il peut le sommer de l'interroguer, ou le faire sommer par le procureur du Roy. Et si le iuge ecclesiastique est refusant ou delayant, le iuge ou procureur du Roy en peut appeller comme d'abus.

¶ Quelle sentence le iuge royal doit bailler quant au cas priuilegié.

Mais peut le iuge lay donner sentence sur le cas priuilegié, & priuer l'accusé de tous offices royaux, confisquer ses biens immeubles, & le condamner en amende pecuniaire, mais non pas en honorable. toutes fois la Cour le peut bien condamner a amende honorable, comme elle faict ordinairement, parce que comme dict est, c'est un corps mixte.

¶ Punction du delict commun n'empesche la punction du cas priuilegié.

Et ſi un clerc a eſté puny ſimplement du delict commun, il peut bien eſtre puny par le iuge royal, quant au cas priuilegié.

CEſlargi quant au delict commun, ne peut eſtre reſtrainct par le iuge royal.

Mais ſ'il a eſté renuoyé quant audiect delict commun a la charge du cas priuilegié, & que au moyē de ce que le demādeur partie ciuile n'ha faiect diligence de fournir des officiers royaux pour le cas priuilegié, le deſēdeur ayt eſté eſlargi quāt au delict commun: le iuge royal ne peut le faire plus conſtituer priſonnier ou reſtraindre: uoire fuſt le renuoy faiect a la charge de non eſlargir, iuſques ad ce qu'il fuſt decis du cas priuilegié: car cela ſ'entend, pourueu que les demādeurs fa-cent diligence de fournir des officiers royaux pour aſſiſter a la facon du proces criminel.

CRemede pour pouruoir, quād les officiers royaux ne veulent aſſiſter quant a la facon du proces pour le cas priuilegié.

Et ueu que leſdicts officiers royaux ne les demandeurs ne font leur debuoir, le iuge d'Egliſe peut faire le ſien. Toutesſois eſt le plus ſeur de ſommer le iuge royal, & le procureur du Roy, de ſe trouuer es iours aſſigneꝝ pour faire l'audition & interrogation du priſonnier, & les recolemens & confrontations de teſmoings, autrement que leur abſence nonobſtāt ſera procedé par le iuge eccleſiaſtique comme de raiſon. Et eſt le meilleur, que ladiecte ſommation ſoit faiecte par uertu du mandement dudiect iuge eccleſiaſtique.

¶ De l'appel comme de deny de iustice des iuges royaux & ecclesiastiques ne voulans faire le proces du renuoyé a la charge du cas priuilegié : & des intimations en cas d'appel, comme de deny de iustice.

Et si le iuge ecclesiastique & le royal ne ueulent faire expedition au prisonnier renuoyé, comme il aduient souuent: fault apres trois interpellations ou sommations a eulx faites a la requeste du prisonnier de luy faire expedition de iustice, se porter appellans comme d'abus formellement en la Cour de Parlement du deny de iustice, tant du iuge royal, que du iuge ecclesiastique. Et ne fault intimer l'Official, ou autre iuge ecclesiastique, ains l'Euesque duquel il ha l'office de iudicature en ladicte cause d'appel, comme les seigneurs desquelz les iuges denient faire iustice: comme cy dessus nous auons dict au second liure. Et au regard des parties ciuiles aduerses dudiect appellant, il fault les sommer, si possible est en leurs personnes, si elles ont agreable lediect deny, ou le ueulent soustenir: & si elles respondent que oy, on les pourra intimer: & si elles respödent que non, lors il les fault adiourner en la Cour de Parlement pour uoir reigler les parties de iuges. Mais si on ne les peut sommer en leurs personnes, ou qu'ilz ne uueillent rien respondre, fault les intimer & ondiect appel, on cas qu'ilz entendent & uouldroient soustenir lediect deny: & ou ilz ne le uouldront soustenir, pour uoir reigler les parties de iuges.

¶ Appel comme de deny de iustice du iuge ecclesiastique quand se releue en Parlement.

Et combien qu'il semble que on cas present l'appel comme d'abus

d'abus interiecté du iuge ecclesiastique, ne semble trop soutenable, d'autant qu'il semble que lon deuroit appeller au superieur iuge ecclesiastique: neantmoins pour raison de la connexité de la cause d'entre le delict commun & le cas priuilegié, & que le priuilegié attraict a soy le non priuilegié, il a esté trouué par conseil des plus notables aduocatx de la Cour de Parlement a Paris, qu'on deuoit releuer lesdictes deux appellations en ladicte Cour de Parlement a Paris. Toutesfois fut donné arrest par ladicte Cour de Parlement le quinziésme iour de Decembre, Mil cinq cens trente cinq, sur une appellation interiectee de certaine sentence donnee par les seneschal de Poictou ou son lieutenant ou assesseur a Poictiers & Official de Maillezay, par laquelle auoit esté ordonné que l'accusé uerifieroit les obiectx par luy alleguez a lencontre des tesmoins des parties aduerses, & son alibi. Et fut l'appel interiecté dudit Official mis au neant sans amende, & la cause renuoyee pardeuant ledict Euesque ou son Official autre que celluy duquel auoit esté appellé quant au delict commun.

¶ Separation du delict commun &
du cas priuilegié.

Et quant au cas priuilegié, fut dict par ladicte Cour, que les parties concluroient en icelle comme en proces par escript. dont appert que le delict commun fut separé & disioinct du cas priuilegié. mais cela aduint parauenture parce qu'on remonstra que le proces estoit tout parfait quant audit cas priuilegié: & qu'il apparoiſſoit l'accusé estre en uoye d'absolution, ou d'eslargissement, quant audit cas priuilegié.

¶ Si le iuge ecclesiastique & royal doibuent
pas bailler sentences ensemble.

De ce s'ensuit aussi que iasoit qu'aucuns dient que le iuge ecclesiastique & le royal doibuent bailler leur sentence ensemble, & par mesme moyen, & en mesme dictum, pour obuier a ce que les parties ne soyent cōstituees en plus grands frais en uuydant le tout par diuerses sentēces: neantmoins ie pēse qu'on peut bien donner lesdictes sentences a part & separement, car les frais sont si petits qu'il n'y fault auoir regard, d'autant qu'ilz ne pourroient estre que de sept solz six deniers, ou dix solz d'auantage.

¶ Le iuge du delict commun peut condamner es despens dommages & interestz de l'instance pour son regard.

Aucuns pareillement disent que le iuge de Cour d'Eglise ne peut cōdamner que es despēs de la cause, & non es dommages & interestz, ains qu'il n'y a que le iuge royal qui puisse adiuger lesdictz interestz: mais ie pense que chascun d'eulx peut condamner es despens, dommages, & interestz pour son regard: car ilz uiennent accessoirement avecques le principal: & qui est iuge du principal, est iuge de l'accessoire. Et quand deux des conseillers de la Cour commis par icelle, cognoissent du cas priuilegié, & l'Official du delict commun, lesdictz Conseillers peuuent quant au cas priuilegié liberer ou eslargir l'accusé, combien que l'Euesque ou son Official le contredie.

¶ Le procureur du Roy peut assister en vn proces renuoyé pardeuant le iuge d'Eglise, sans la charge du cas priuilegié.

Peut semblablement le procureur du Roy assister & se rendre partie denonciatereffe en une cause renuoyce pardeuant le iuge

le iuge eccleſiaſtique : uoire ſans la charge du cas priuilegié, pour obuier a collusion , meſmement quand eſt queſtion d'un ſubieſt & iuſticiable du Roy excédé. ainſi qu'il eſt cõtenu par l'areſt clxxxiiij. mis es areſtꝝ Latins du ſtile de Parlement en Latin. Et a plus forte raiſon peut le procureur du Roy bailler ſes cõcluſions contre le clerc accuſé & renuoyé a la charge du cas priuilegié: car pour neãt il y deburoit eſtre appellé, ſ'il ne pouuoit bailler ſes concluſions quant audiẽt cas priuilegié.

¶ Le iuge d'Egliſe hors ſon pretoire ou ſiege de ſa iuriſdiction ne peut faire mettre a execution decret de prinſe de corps, ne transporter vn priſonnier par yne iuriſdiction temporele , ſans le conſeĩgé du ſeigneur, ou de ſon iuge.

Mais le iuge d'Egliſe ne peut faire prendre au corps un clerc hors ſon pretoire ou lieu auquel ordinairement il ſied pour exercer ſa iuriſdiction. Voire ne le peut transporter de lieu en autre ſans lettres royaux le permettant : leſquelles il fault qu'il face ſignifier au Bailli ou Seneschal du lieu , par lequel il ueult le transporter. . Et quant au premier, il en fut dict par areſt le xxij. iour de Nouembre M.D. XXX. Et quãt au ſecond, en y ha areſt aux areſtꝝ colligeꝝ par maiſtre Iehan le Coc en la queſtion xxxv. on ij. notable.

¶ De l'imploration du bras ſeculier.

Mais le iuge royal eſt tenu de luy impartir l'ayde de ſon bras ſeculier en l'implorant par le iuge eccleſiaſtique. Et bail-
ler mandement a ſes ſergens d'executer le decret de prinſe de
corps

corps ou sentence du iuge d'Eglise . Et si le iuge royal ne luy uouloit bailler ledict mādement, il faudroit que le iuge ecclesiastique en appellast comme d'abus formellement en la Cour de Parlement : car nous ne receuons en France , ce qui est permis de droict canon: scauoir est, qu'il puisse defendre sa iurisdiction alencontre des iuges ou personnes layes par inhibitions avecques censure ecclesiastique & excommunicatiō.

¶ Priuilege du Roy & des communitiez du royaume de ne pouuoir estre soubmis a cez ou interdict de diuin seruice ne a excommunie.

Tout ainsi que par priuilege oētroyé par le Pape au Roy de France, le Pape ne peut excommunier le Roy, ne les uilles & communitiez du royaume, ne les soubmettre a cez, scauoir est leur interdire la celebration du diuin seruice: aussi les iuges ecclesiastiques ne peuuent excōmunier les personnes layes, sinon aux cas esquelz ilz ont sur elles iurisdiction. Et si ilz le font autrement, ou qu'ilz facent prendre un lay on territoire d'aucun seigneur, on s'en doit porter appellant comme d'abus : & seront condamnēz a reparer le tout & remettre au premier estat, par saisie de leur temporel , ou de l'Euesque leur maistre. Toutesfois leur est permis, comme a toutes personnes priuees, de prendre un malfaiçteur en flagrant delict.

¶ Le iuge lay ne peut punir vn clerc en sa personne.

Aussi un iuge lay n'ha point de puissance de punir un clerc ou prestre en son corps , sinon es cas cy dessus declairez, ou il ne doit iouyr du priuilege de clericature.

¶ De degradation des prestres.

Mais quand il doit iouyr dudit priuilege, & que neant-
moins

moins le cas est si enorme qu'il doibt mourir: lors par ce que l'Eglise ne donne point sentence de mort, le iuge ecclesiastique ordonne qu'il sera degradé, & baillé a la iustice seculiere pour luy faire iustice, en la priant toutesfois d'auoir pitié de luy.

Quelles solennitez il fault garder en ceste degradation, est a plein decisi par vne constitution de Boniface Pape VIII. de ce nom: qui est mise soubz le tiltre des peines on vi. des Decretales. mais en plusieurs cas on n'use point de la solennité de degradation, comme en prestres uoleurs prins par les preuosts des marschaux. Si le clerc ou prestre ne peut monstrier de sa qualité par escript, il est receu a la monstrier par tesmoings.

¶ Priuilege de l'Euesque de Paris, quant au renuoy qui luy doibt estre faict de tous clerics estans en la conciergerie dudiect lieu.

Cōient noter icy un grād priuilege de l'Euesque de Paris, que tous les prisonniers es prisons seculieres de la uille de Paris, si par priuilege de clericature doibuent estre renuoyez a l'Eglise, il fault les renuoyer pardeuāt lediect Euesque, de quelque autre Euesque qu'ilz ayēt prins les saincts ordres. Mais en autres uilles & lieux on les renuoye tousiours pardeuant les Euesques desquelz ilz ont receu les saincts ordres.

¶ L'Euesque n'est tenu bailler vicaire hors le lieu de son siege iudiciaire.

Et ne peut lediect Euesque qui ha baillé les saincts ordres estre cōtrainct de bailler uicaires hors son diocese, ne hors son siege ordinaire, pour cognoistre du delict cōmun auecques le iuge royal cognoissant du cas priuilegié: car ilz ont leurs iuges ordinaires, & leur feroit on tort d'en bailler autres. Et
ainsi

ainsi en fut dict par l'arest susdict baillé ledict xi. iour de Decembre M.D.XXXIII. & par autre arest du v. iour d'Aoust M.D.XXXVI. par lequel l'intimé fut condamné aux despès de la cause d'appel, dommages & interstz de la detention de la personne dudit clerc pendant ladicte cause d'appel.

¶ Cas special auquel l'Euesque est tenu bailler vicaires hors son diocese, scauoir est quand le diocese est hors du Parlement auquel le delict ha esté faict.

Toutesfois comme l'Euesque de Xaintes demanda a la Cour de Parlement a Paris le renuoy d'un clerc ou prestre ayant de luy receu les sainctz ordres, ladicte Cour luy denia ledict renuoy, & ordōna qu'il bailleroit uicariat a deux des Cōseillers gēs d'Eglise de ladicte Cour, pour cognoistre du delict cōmū quāt & quant le cas priuilegié: ce que ledict Euesque fut contrainct faire. mais la Cour auroit ce ordōné par autant (comme ie coniecture) que c'estoit un homme accusé d'auoir faict mestier de uoleries de benefices sans droict quelconque. & aussi que l'Euesque de Xaintes n'est du ressort du Parlement de Paris, ains de Bourdeaux. Et depuis ledict delinquant auroit esté attainct & conuaincu & condamné en amende honorable, & en plusieurs grosses amendes tant enuers le Roy qu'enuers ses parties aduerses. Mais ie n'ay sceu si l'Euesque de Paris en auroit demādē le renuoy, ou nō. Et fut donné l'arest susdict alencontre dudit Euesque de Xaintes le xxvi. iour de Ianuier. M.D.XXXII.

¶ Le clerc appellant du iuge royal, est renuoyé a son iuge d'Eglise, sans vuyder l'article de l'appel: ains est la procedure mise au neant.

Et si un clerc est appellât d'un decret de prinſe de corps, ou d'adiournement perſonnel contre luy decreté comme de iuge incompetent, iaſoit que maistre Iehan le Coc en ſes areſtꝝ en la queſtion clxxij. on xij. notable die, que la Cour n'ha accoustumé de renuoyer le clerc parduant le iuge d'Eglise, qu'elle ne uuyde l'article de l'appel: toutesſois cecy doit eſtre entendu en ſon cas, ſcauoir eſt, quand le clerc eſt appellant du decret. Mais ſi le clerc ha ſouffert ſon proces criminel eſtre fait ſans ſe dire clerc, & qu'il ſoit cōdamné, & en la cauſe d'appel il allegue eſtre clerc, il y ſera receu. & lors ſans uuyder l'article de l'appel, la Cour met l'appel & ce dont ha eſté appellé, & toute la procedure au neant, & le renuoye parduant ſon iuge eccleſiaſtique. Quant aux deſpēs de ladiète procedure uoluntaire, ſi le clerc y doit pas eſtre condamné, nous le dirons on dernier liure, ou il ſera plus ſeant qu'en en ce lieu.

¶ Que apres le declinatoire vuydé, l'accuſé doit eſtre oy ſur l'information.

ſenſuyt apres la fin declinatoire ou renuoy uuydé, que le iuge ordonne que le deſendeur ſera oy & interrogué ſur les informations, & arreſté par la uille & faulxbourgs, & luy defend le partir iuſques a ce que autrement en ſoit ordonné, a peine d'eſtre attainct & conuaincu des cas a luy impoſez: quand il eſt adiourné a comparoir en perſonne ſeulement. car quand il eſt priſonnier, il tient touſiours priſon, iuſques a ce qu'il ſoit eſlargi par ſentence.

¶ Comment l'accuſé eſt oy & interrogué.

Le iuge oyt & interrogue le priſonnier, ou uenant en perſonne, en la maiſon d'icelluy iuge, ou en la chambre criminele ordonnee

ordonnee pour ce faire. Et en premier lieu luy faiēt faire serment de dire uerité. & apres l'interrogue de quel mestier il est, de son aage, de sa demourāce, ou il ha demouré, & demou-
re, & quel mestier il ha suivi, & de ce qu'il ha faiēt puis l'aage de xiiij. ans iusques au iour qu'il l'interroque. Et par fois & le plussouuent le iuge ne faiēt tant d'interrogatoires, ains uient au faiēt de l'information. Et fault qu'il traueille le plus qu'il pourra a tirer quelque chose qui serue a la uerification du deliēt dont est question. & s'il est uariant, & titubant ou cōtraire, le iuge le doibt faire escrire, & la craincte & paour qu'ha l'accuse, les gestes & manieres de faire, si de ce on peut recueillir quelque argument & indice pour la preuue du crime. Toutesfois le iuge ne doibt monstrer uisage trop seuer, a fin qu'il n'intimide point le confessant, & que par ladiēte intimidation il ne le contraigne point a confesser chose qu'il n'ha faiēt, ou a nier ce qu'il ha faiēt, comme pensant estre puny presentement par la grand austerité du iuge, mais qu'il se monstre plus bening & gracieux que seuer.

¶ Si le iuge doibt promettre impunité.

Et me semble que la cautele dont aucuns usent n'est bonne, scauoir est de promettre impunité & absolution a l'accusé, s'il confesse. uoire ce afferment par serment. car sont plusieurs personnes si simples & craignans tant la prison, ou iustice, que soubx couleur de ceste promesse ilz confesseroient auoir faiēt ce qu'ilz n'auroient faiēt. Et fault que le greffier escriue soubx le iuge tout ce que le iuge luy dictera & nommera.

¶ Quelles personnes doibuent estre presens a l'interrogation

terrogation du prisonnier.

Par les ordonnances du Roy Loys douzième, article cxi. est defendu que le iuge n'ayt avecques luy aucun clerc ou autre qui n'ayt le serment au Roy en interroguant l'accusé. voire ne doibt souffrir que ses sergens ne le consierge soyent presens a ladicte audition. Les aduocat & procureur du Roy y peuuent bien toutesfois estre presens. Et n'est tenu le iuge de commettre ceste audition a l'enquesteur de son siege. parce que par ladicte audition il pourra cognoistre beaucoup de indices, qui luy seruiron au iugement de la matiere. Et de ceste interrogation est traicté aux cxxxi. & cxxvii. articles des ordonnances dernieres.

¶ Les fins de non receuoir doibuent estre allegues en la contestation.

si l'accusé ha quelques fins de non receuoir contre les demandeurs, ou quelques faictz iustificatifz, il doibt les alleguer en ladicte confession: car selon aucuns ladicte confession est au lieu de la litiscontestation, & supplée le iuge l'absence des demandeurs.

¶ Quand est la litiscontestation en causes crimineles.

Toutesfois selon les autres la litiscontestation est quand apres l'audition du prisonnier, les parties comparent pardeuant le iuge, & declare le prisonnier, ou uenāt en personne, auoir esté oy, & son audition communiquee aux aduocat & procureur du Roy, & requiert estre absout, ou a tout le moins estre

estre receu a proces ordinaire, & eslargi en baillant caution, & faisant les submissions au cas appartenans, & eslisant domicile. Et par le demandeur partie ciuile est insisté au contraire, & requis qu'il soit procedé contre l'accusé extraordinairement par recolement & confrontation de tesmoings: & auoir pendant proces, prouision d'alimens & medicamens, iusques a certaine somme de deniers. Et en aucuns lieux, cōme en la Cour de Parlement, l'aduocat du Roy plaide le fait de l'accusation contenue par l'information, & conclud qu'il soit procedé extraordinairement comme dict est. Et en autres lieux ilz mettēt leurs conclusions au pied de l'audition. Surquoy le iuge ordonne que les pieces, scauoir est l'information, confession, & autres pieces que bon semblera esdictes parties, seront mises pardeuers luy dedens le iour ou lendemain, pour en ordonner par luy ce que de raison, & en droit. Et est plus conforme aux ordonnances royaux, & a nostre stile, de prendre ce plaidoyé pour contestation en cause, que non pas la confession seule de l'accusé: car en ce plaidoyé les parties sont presentes, & le iuge les oyt, & y donne son appointement. Au moyen dequoy si le defendeur ba quelques fins de non receuoir, ou de non proceder, iasoit qu'il ne les ayt allegué par sa confession, neantmoins il les peut alleguer en ce plaidoyé ou contestation.

Aucunes fois aduient que le defendeur confesse le fait contenu par les informations: & lors le procureur du Roy, s'il trouue qu'il doibue prendre droit par icelle, communiquera ladicte confession a la partie ciuile si aucune y a, pour scauoir si elle ueult prendre droit par icelle: pour ce fait, bailler par eulx respectiuellement leurs conclusions a leurs fins respectiuemēt, & icelles estre cōmuniuees a l'accusé pour y respondre par attenuation, ainsi qu'il est mis par les ordonnances
dernieres

dernieres article huit uingt & huit.

¶ Fins de non receuoir vſitees en matiere criminele.

Nous auons des fins de non receuoir, qui ſont fort uſitees. L'une quand uingt ans ſont paſſez, que le delict dont on eſt accuſé, ha eſté commis.

¶ Preſcription de vingt ans en matiere criminele.

Car apres uingt ans paſſez on n'eſt pas receuable a faire poursuite de quelques crimes. Et en ay ueu enuoyer abſoultez par ceſte fin de non receuoir aucuns accuſez de rauiſſement de biens & d'homicide, & de ce auoir obtenu ſentéce & areſt.

¶ L'accuſateur partie ciuile n'eſt receuable a accuſer, qui n'obeit a iuſtice en autre accuſation contre elle intentee.

L'autre fin de non receuoir ha commencé n'agueres a eſtre pratiquee: ſcauoir eſt, que l'accuſateur n'eſt receuable a accuſer ne pourſuiure, ſi auſſi il ne compare en une autre matiere criminele, laquelle l'accuſé pourſuit contre luy, combien que l'autre matiere ſoit totalement diuerſe: car eſt bien equitable, puis que ne uoulez obeir a iuſtice en la matiere que ie pourſuy contre uous, que ne ſoyez recen a pourſuyure contre moy. Et combien que ſelon droit commun celluy qui eſtoit accuſé d'un crime, ne pouuoit accuſer un autre d'autre crime: toutes fois nous ne le gardons point en France, parautant que le procureur du Roy en matiere criminele eſt la partie principale. ce qui n'eſtoit de droit commun. Mais pourtant cela que l'accuſé peut accuſer d'autre crime, & a ce eſt bien receuable, ſelon noſtre commune uſance doit eſtre entendu, quand l'accuſateur obeit a iuſtice en la matiere en laquelle il eſt pourſuyui: car lors il peut bien pourſuyure autre matiere cri-

N minele

minele contre sa partie aduerse, ou contre autre.

¶ Fin de non receuoir de retorquution.

Autre fin de non receuoir est frequente, scauoir est de retorquution. Comme, ie uous accuse de port d'armes, & assemblee illicite, & de rauissemens de biens: dont informations faictes i'ay obtenu decret d'adiournement personnel, ou prinse de corps: lequel executé uous estes oy. Et ie fay aussi faire informations des excès que ie suppose m'auoir esté par uous faicts en ce conflict, & qu'auex esté aggresseur ondict conflict. & par uertu desdictes informations ie obtiens aussi decret de prinse de corps, ou d'adiournement personnel, lequel ie fay executer contre uous. Au iour assigné uous pouuez comparoir, & quand on uous oyra & interroguera sur les charges dudit cas, dire & alleguer que n'estes tenu d'y respondre, par ce que c'est retorquution de crime, & que ie ne suis receuable a en faire poursuite iusques a ce qu'il soit decisi de l'accusation qu'auex contre moy intentee. Et si le iuge ordonne que sans preiudice de ladicte fin uous responderex, & sauue a uous en faire raison apres uostre audition, lors n'aurez matiere d'appel. Mais apres ladicte audition faudroit en la contestation de la cause alleguer encores ladicte fin en presence de parties aduerses, & requerir uous en estre faict droict. Et en cas pareil occurrât comme un iuge royal eust ordonné que les deux matieres seroient ioinctes ensemble, & que les parties seroient respectiuement uenir leurs tesmoings, pour estre recolez & confrontez: & que les confrontations faictes, seroit faict raison de la prouision d'alimens & medicamens respectiuelement requise: & en eust esté appelé: la Cour auroit dict, mal iugé: & en emendant le iugement auroit dict, que la seconde accusation seroit sursoyee iusques a ce qu'il fust decisi de la premiere.

La soit

La soit qu'il y ayt raison en cest arest: car par le moyen de la dictée retorquution seroit receuoir le defendeur indirectement a ses iustificacions auant que la uoye extraordinaire fust parfaicte contre luy: neantmoins si auoit il grand equité en la dictée sentence. car s'il fault preallablement terminer l'accusation premierement intentee, il pourra estre que celluy qui a la uerité aura esté excédé, par le moyen desdictz excès ne pourra si tost faire information que sa partie aduerse. Et a ce moyen il demourera le dernier a auoir reparation de son excès. Et cōbien qu'il sera enuoyé absout de ladicte premiere accusation, toutesfois ne luy sera adiugée reparation des excès a luy faictz. Et sera tant attenué a s'estre defendu ondict proces contre luy intenté, qu'il n'aura la puissance de intenter proces contre sa partie pour auoir reparation. Et si lesdictes deux accusations eussent esté agitees et terminees par un moyen, en enuoyant le premier accusé absout, on luy eust aussi adiugé reparation des excès a luy faictz.

¶ Fin de non receuoir de transaçon.

L'autre fin de non receuoir, et qui ha force de peremptoire, est transaçon: quand l'accusé ha transigé avecques la partie ciuile, ou qu'autre transige pour l'accusé, et l'accusé l'ha agreable. Mais ceste fin est dangereuse en regard a nostre cōmune usance de France. Car combien que de droict commun il soit permis de transiger en tous crimes, sauf adultere, et faulx: neantmoins cela ha lieu quāt a l'interest de partie ciuile: car ledict interest est biē remis: mais le procureur du Roy pourra de la transaçon tirer confession, et demander adiusdicatiō d'amēde ou de peine corporele pour l'interest du Roy quand l'accusé baille deniers ou autre chose par la transaçon ou appoinctement: mais quand l'appoinctement est gratuit, il n'emporte point de confession ne d'infamie.

¶ De cession d'action criminele.

Pour a quoy obuier, on auoit trouué un autre expedient: c'est que la partie ciuile demanderesse cedoit son droit & action des excès ou autres delictz par luy pretenduz, a une tierce personne, qui estoit des amis de l'accusé: & par apres le cessionnaire n'en faisoit poursuite: ou bien se laissoit forclorre de faire uenir tesmoings, pour estre recolez & confrontez audict defendeur: & par le moyen de telles forclusions il n'estoit rien prouué contre luy: & ainsi estoit eslargi ou enuoyé. Mais la Cour apres auoir cogneu lesdictes fraudes, ha prins le stile de receuoir le cedant, nonobstant la cession, a faire poursuite des excès: en remboursant le cessionnaire des deniers qu'il ha baillé au cedant, & des autres fraiz & mises faictes pour ladiete cession.

¶ Quand le cedant apres la cession peut agir.

Aussi de droit commun un cedant est bien receuable a faire poursuite de l'action par luy cedee, & le defendeur ne peut len faire debouter pour raison de ladiete cession, d'autāt que les actions directes demeurent tousiours en la personne du cedant en leur efficace, fors quand le cessionnaire ha faict signifier au defendeur sa cession, en luy delaisant copie de l'instrument d'icelle, ou qu'il s'est rendu partie on proces cōme cessionnaire, & informé de sa cession iudiciairement: car lors le cedant ne peut plus rien faire avecques ledict defendeur au preiudice de son cessionnaire, mais il fault lettres royaux pour faire releuer du uice de litige, & pour estre subrogué au lieu du cedant, quand le proces est ia encommencé pour raison du delict, comme cy dessus nous auons dict on premier liure.

¶ On

¶ On peut alleguer transaction par fin de non recevoir, & par fin peremptoire.

Et iasoit que la transaction puisse estre obiicee par fin de non recevoir en la contestation de cause, & peut on dire que ueue icelle le defendeur n'est tenu de proceder, & est le demandeur deboutable : toutesfois ladiete transaction peut bien aussi estre obiicee apres contestation en cause, & iusques a la sentece, come une autre exception peremptoire: combien que les parties ayent conteste en general, & prins appointement a informer ou a escrire: car telle contestation n'est censce tollir les exceptions peremptoires.

¶ La forme d'interloquer apres contestation en cause.

La forme de l'interlocutoire, que donne le iuge apres la contestation en cause en matiere criminele, apres qu'il ha ueu les pieces alleguees par la contestation, & produictes par deuers luy, est double.

¶ De recevoir les parties a proces ordinaire apres l'audition de l'accuse.

Car aucunesfois il recoipt les parties en proces ordinaire, & ordonne que chascune des parties escriua ses faictz a ses fins par intenditz dedens certain temps, y baillerot responses dedens autre temps, & informeront par tesmoings dedens autre temps. Et eslargit ledict defendeur, en baillant par luy caution iusques a certaine somme de deniers, partie presente ou appelee, & a la charge de se rendre en l'estat au iour de la reception desdictes enquestes: & elisant domicile au lieu ou est le proces pendant, & faisant les submissions

au greffe de se représenter ondiēt estat, toutes fois & quātes qu'il sera ordonné. Et ceste forme d'interlocutoire est baillée par les ordonnances dernieres article cxxx. Et ha lieu quād les matieres sont de petite importance, comme il est mis par lediēt article. Et mesmement quād il est qu'estion d'un simple exploiēt faiēt en chose.

¶ De prononcer la sentēce par laquelle les parties sont receues a proces ordinaire premierement au procureur du Roy & a la partie ciuile qu'a l'accusé, tout ainsi que la sentēce difinitive d'absolutiō.

Et fault que ceste sentence, comme la difinitive, soit premieremēt prononcee a la partie ciuile, & au procureur du Roy, que a l'accusé, a fin que s'ilz ueulent en appeller, ilz en appellent: & a ce moyē empeschent l'eslargissemēt du defendeur. Et ainsi en ha esté diēt par plusieurs arestz, & decreté adiournement personnel contre les iuges & greffiers pour auoir faiēt du contraire.

L'autre forme de l'interlocutoire est, que le iuge ordonne que les tesmoings contenuz par les informations seront recolez, & autres oys & examinez, & cōfrontez si mestier est, au defendeur: & que les demandeurs feront uenir lesdictz tesmoingz dedens certain temps, selon la distance des lieux & qualitez des parties & de la matiere.

¶ De appoincter les parties en proces extraordinaire, & que pour ce faire le iuge peut ordonner que les charges & confession seront mises par deuers luy.

Et combien que par les ordonnances dernieres article sept uingt & neuf il soit diēt que le iuge incōtinēt apres que les parties

parties demanderesses ou l'une d'elles ha declairé qu'elle ne ueult prendre droict par la confession du defendeur, doibt donner ladicte sentence interlocutoire : toutesfois cela ne doibt pas estre entendu que le iuge ne puisse bien ordonner, que les charges & cōfession du defendeur serōt mises pardeuers luy avecques autres pieces que bon semblera aux parties pour en ordonner : parce que le iuge n'est pas tenu d'auoir memoire du contenu esdictes informations & cōfession. Aussi que souuent on adiuge quāt & quāt par ceste interlocutoire prouision d'alimens & medicamens: pour laquelle bien arbitrer est mestier de uoir & poiser les informations & rapportx des chirurgiens, si aucuns sont.

¶ Des delaiz pour faire venir tesmoins.

Et iasoit que par les ordonnances susdictes article cxxxi. soit dict que pour admener tesmoins, & les recoler & cōfrōter, on ne doibue bailler qu'un delay, & icelluy passé doibue estre le proces iugé en l'estat qu'il sera trouué apres ledict delay passé sur les conclusions qui sur ce seront prōptement prinſes & baillees par escript respectiuemēt, sinon que pour grāde & urgēte causē on donast autre second delay pour faire ce que dessus: apres lequel passé n'y pourrōt iamais retourner par relieuement, ne autrement: toutesfois ladicte ordonnance n'est point gardee, ains les iuges royaux & autres bail lent encores aujourd'huy trois ou quatre delays comme au parauāt, dōt les pources prisonniers sont fort uexez: & seroit mestier y pouruoir, pour faire entretenir ladicte ordonnance qui est bien equitable: car d'y pouruoir par uoye d'appel, il n'y ha propos. car auparauant que le pource prisonnier peust auoir son relief, les delays seroient passez.

¶ L'accusé ne doit estre eslargi pendant
les confrontations.

Est defendu par lesdictes ordonances article cxxxij. de non eslargir les accusez pendans les delais qui serot baillez pour faire ladicte confrontation, pour obuier que ce pendant les accusez ne puissent suborner tesmoins.

¶ De restraindre l'accusé pendans
les confrontations.

Car quād ores les accusez ne sont arrestez que par la uille & faulxbourgs, neantmoins aucunesfois on les restrainct bien durans lesdictes confrontations. Et pource quand la Cour renuoye quelques accusez uenans en personne seulement par deuant quelque iuge royal, elle leur baille le chemin pour prison, & met la clause, sauue a les restraindre pendans les confrontations, si faire se doit: & leur faict defense de non communiquer auecques les tesmoins par eulx ne par interposites personnes, directement ou iudirectement, a peine de mille liures, & d'estre attainctz & couaincuz des cas a eulx imposez. Et pendans lesdictes confrontations, si le iuge voit que a faire soit, il ordonne qu'ilz tiendront prison en l'hostel d'un sergent, ou qu'ilz seront mis aux prisons ordinaires, selon la qualite des accusez & de la matiere.

¶ Anciennement on ne vloit de voye & proces extraordinaire de recolemens & confrontations de tesmoins, sinon en crimes de lese maiesté.

Est a noter que anciennement, & du temps de l'empire Romain, on n'usoit point de telle uoye extraordinaire en causes criminelles: sinon qu'il fust question de crime de lese maiesté contre l'Empereur, ou la Republique. Et ainsi fut procedé extraordinairement alencontre d'une femme nommee Epi-
charis

charis, & autres chargez d'auoir faict coniuration pour occir l'Empereur Neron, comme recite Cornelius Tacitus au 15. liure de son histoire en la uie de Neron. Et pareillement Ciceron en auoit usé on proces criminel faict de la coniuration de Lentulus, ainsi que recite Saluste en la coniuration Catilinaire.

**¶ De la contraincte de tesmoings
en cause criminele.**

Les tesmoings doibuent estre adiournez pour uenir estre recolez & confronter, si besoing est, audiect defendeur : & s'ilz sont refusans ou delayans de uenir, ilz peuuent estre contrainctz, tout ainsi qu'en cause ciuile : dont nous auons traicté cy dessus on premier liure, Voire des le premier adiournement a eulx baillé, s'ilz ne comparent, le iuge peut ordonner qu'ilz seront contrainctz par emprisonnement de leurs personnes, saisies de leurs biens, & mulctes & amēdes.

¶ Comment vn iuge doibt requierir son pareil, & vser de commandement enuers son inferieur.

Et si le iuge ha mestier de quelque prisonnier detenu es prisons d'un autre iuge, pour le cōfronter a un sien prisonnier: il peut ordonner que le iuge qui ha ledict prisonnier, sera sommé & requis de le bailler, pour estre amené en seure garde au lieu ou il est mestier faire la confrontation, si le iuge n'est point inferieur ne du ressort d'icelluy qui ueult faire ladiete confrontation; mais s'il est inferieur, le superieur peut ordonner commandement estre faict a son inferieur de bailler le prisonnier. Autrement si le iuge ordonnoit commandement estre faict a un iuge non estant de son ressort, il auroit matiere d'appeller de ladiete ordonnance, & du commandemēt qui s'en seroit ensuiuy.

¶ De

¶ De empescher que les coupables de mesme delict, ne puissent decliner du iuge qui ha commence le proces d'un des chargez.

Et ne peut le tesmoing ainsi appelle decliner de la iurisdiction du iuge pardeuant lequel il est appelle. Parquoy si il y a plusieurs coupables de mesme delict, a fin de les tirer pardeuant un mesme iuge, & que la continence de la cause ne soit diuisee, les iuges royaux qui ont commence le proces criminel d'un, ont accoustumé faire appeller & adiourner les autres coupables, pour estre oy, recoier, & confronter. Et ha esté confermé par plusieurs arrest, que les adiournez en ceste maniere ne peuuent demander leur renuoy, si orcs le iuge qui les faict adiourner, ueult apres leurs dispositions ou recolemens & confrontations, entreprendre de faire leur proces.

¶ Comment on appelle ceulx qui incidemment sont chargez en faisant le proces criminel d'un autre.

Semblablement si en faisant le proces criminel d'aucun, suruient charge contre autre, on peut appeller celluy qui se trouue chargé, pour estre oy sur certains poinctz & articles du proces. Et celluy qui ainsi est appelle a droit, ne peut decliner de la iurisdiction, a laquelle il est appelle.

¶ Celluy qui est oy comme tesmoing, & se charge du cas, il n'est attainct & conuaincu par sa confession: ains fault de ce faire son proces criminelement.

A ceste cause cōme par une ordonnance du feu Roy François il fust dict, que les maistres, fussent nobles ou roturiers, seroyent tenez des delictz de leurs seruiteurs, non seulement de peine pecuniaire, mais aussi de peine corporelle: & on
proces

proces faiēt contre le ſeruiteur d'un delict par luy commis, ſon maĩſtre euſt eſtē appellē pour eſtre oy ſur certains pointz & articles du proces, ſcavoir eſt ſi le delinquāt eſtoit ſon ſeruiteur on temps qu'on pretēdoit le delict auoir eſtē commis: & le maĩſtre ſur ce oy auroit confeſſē que ledict delinquant lors eſtoit ſon ſeruiteur: ſe ſeroit meue difficultē, ſi attēdue la diſte confeſſion du maĩſtre, il pouuoit eſtre condannē. Et fut reſolu que non, & qu'il falloĩt ordonner que le maĩſtre uien droit en perſonne pour eſtre oy, & qu'on luy feroit ſon proces, comme d'un autre delict.

¶ La maniere de recoler les teſmoings, & les confronter au priſonnier ou accuſē.

Or traitētons a preſent de la forme qu'il faut tenir en recolement & confrontation de teſmoings. Le iuge faiēt faire premierement ſerment au teſmoing qu'il ueult recoler, de dire ueritē: & ſ'il ſe doubte que le teſmoing ſoit attiltrē ou forgē, il luy demādera qu'il luy die ce qu'il ſcait du faiēt de l'accuſatiō, qu'il luy recitera en brief, ſans luy lire ſa depoſition contenue par l'information: & ſ'il uoit qu'il die au plus pres de ſadiſte depoſition, il la luy fera lire par ſon greſſier, ou luy lira: & apres icelle leue, il luy demādera par le ſerment qu'il ha faiēt, ſi elle cōtient ueritē, & fera eſcrire ce en quoy il perſiſtera, & en quoy il corrigera ſa premiere depoſition. Et ſ'il perſiſte & charge le defendeur, incontinent luy ſera confrontē ledict teſmoing: ſcavoir eſt, le iuge fera uenir par deuant luy le defendeur preſent le teſmoing, & leur fera faire ſerment de dire ueritē: & apres les interroguera ſ'ilz ſe cognoiſſent bien, & ſi le defendeur eſt celluy duquel le teſmoing ha parlē par ſa depoſition & recolement.

¶ Le

¶ Le iuge doibt aduertir l'accusé de dire reproches contre le tesmoing auant la confrontation : autrement qu'il n'y sera iamais receu.

Et s'il diét que oy, le iuge demandera au defendeur au parauant que luy lire la deposition du tesmoing, s'il ha aucuns obiectz ou reproches a dire contre le tesmoing illec present: & luy enioindra de les dire promptement: & luy declairera que s'il ne les diét presentement, par apres il n'y sera iamais receu: & de ce le iuge le doibt expressement aduertir, ainsi qu'il est diét par lesdictes ordonnances dernieres arti. cliij. Et s'il n'allegue aucuns reproches, & declare n'en uouloir alleguer, & qu'il s'arreste a la deposition du tesmoing, ou demande delay pour dire ou bailler par escript les reproches, ou apres icelles auoir mis par escript, le iuge lira presens le defendeur & le tesmoing la deposition du tesmoing: & demandera au tesmoing, & apres au defendeur, si elle contient pas uerité, & fera escrire ce qu'ilz en diront. Et apres que ladiette deposition sera leue, le iuge ne receuera plus le defendeur a dire ou bailler reproches, selonc lesdictes ordonnances, article sept uingt & quinze.

¶ De confronter tous tesmoings, tant ceulx qui chargent, que qui ne chargent point.

¶ Iasoit que par lesdictes ordonnances on precedent article soit diét, que sur ce que le tesmoing persistera & fera a la charge de l'accusé, il luy sera cōfronté: & a ce moyen semble que si le tesmoing ne charge l'accusé, il ne luy doibt estre confronté: toutesfois plusieurs iuges de grand experience confrontent tous tesmoings, tant ceulx qui chargent, que ceulx qui ne chargent point, a fin que le demandeur partie ciuile ne puisse cognoistre si ses tesmoings chargent ou non,

Et que voyant que ses tesmoins ne chargent point, il face son effort d'en suborner.

¶ Si le tesmoing est tenu de persister en sa deposition contenue par l'information.

Le tesmoing n'est point tenu par son recolement et confrontation de persister en sa deposition redigee par escript par l'information: et peut impuneement uarier et muer sa deposition, s'il uoit qu'elle ne soit ueritable ainsi qu'elle est escripte, combien qu'il soit iuré par l'information: car on a trouué par plusieurs fois que les sergens et notaires qui besongnent es informations, ne mettent au uray le dire du tesmoing.

¶ Quand les tesmoins se desdient tous du contenu en l'information.

Et pource quand grand nombre de tesmoins oyx par information se desdient, et dient n'auoir depose le contenu en leurs depositions: le iuge deburoit ordonner que le sergent et le notaire uiendroyent en personne, pour estre oyx sur certains poinctz et articles du proces: et s'ilz estoyent trouuez coupables, les chastier bien. Car auioürdhuy ce crime pullule et at, qu'il n'y a si homme de bien qui ne soit mis en peine et en dangier par ces sergens et notaires. Voire en y a tant meschans, qu'ilz demanderont a celluy qui faict faire l'information, s'il ueult auoir prinse de corps ou adiournement personnel: et font l'information grasse ou maigre selon le desir de la partie, non pas selon que les tesmoins ueritablement dient.

¶ Si le tesmoing qui ha signé sa deposition peut uarier.

Mais si le tesmoing ha signé sa deposition, il ne peut plus impuneement uarier. Toutesfois aucuns tiennent qu'il peut encores uarier sans dangier de peine, mesmement quand il dict

dict auoir signé par surprinse, ou circonuention, & qu'il en faict apparoir en quelque sorte, pource qu'il est requis que la variation soit faicte par dol, a ce qu'elle soit punissable, mais on n'y adiouste pas si grand foy. Et est a noter que le iuge doit recoler & confronter tous les tesmoings oyz par l'information, ou les contumaccr.

¶ Des conclusions des gens du Roy apres les recolements & confrontations faictz.

Après les recolements & confrontations parfaictz, le iuge ordonne que le proces sera communiqué aux gens du Roy, pour y prendre leurs conclusions dedens le temps de l'ordonnance: lesquelles seront preparatoires ou definitiues, & telles que la sentence doit estre: & les doivent bailler par escript on pied du proces. Et s'il trouue que l'accusé ait allegué aucuns faictz peremptoires seruans a sa descharge, ou innocence, comme alibi, ou aucuns faictz de reproches legitimes & receuables: il requerra que l'accusé ait a nōmer prōptement les tesmoings par lesquels il entend prouuer lesdictz faictz, soyent iustificatifz ou de reproches: ou sinon prendra conclusions de torture ou definitiues, comme est dict par lesdictes ordonnances, articles vij.xx.xvi. & vij.xx.xvij.

¶ De la sentence interlocutoire, par laquelle est ordonné que l'accusé nōmera les tesmoings par lesquels il entend prouuer ses iustificatiōs & reproches, & qu'ilz seront oyz ex officio.

Le iuge suyuant les conclusions des gens du Roy si elles sont raisonnables, donnera sentence. car il n'est tenu de suyuir leurs conclusions, sinon partant qu'elles sont ciuiles. & s'il uoid la matiere a ce disposée, il ordōnera par sa sentence que l'accusé nommera les tesmoings, par lesquels il entend monstrer sesdictz faictz iustificatifz & de reproches, & lesquels
seront

seront par luy examinez ex officio: & que pour ce sera con-
signer a l'accusé certaine somme de deniers au greffe. Et par
apres le iuge sera extraict des faictz des iustifications & re-
proches reccuables de l'accusé, lequel il enuoyra monstrier
par son greffier a l'accusé, pour nommer promptemēt ses tes-
moings. ce qu'il sera tenu faire: autrement n'y sera iamais re-
ceu, ainsi qu'il est mis par l'article vij. xx. xviij. desdictes or-
donnances dernieres. Lesquelles ordonnances sont merueil-
leusement rigoreuses: & est aduenue a l'autheur d'icelles comme
a Perillus. car c'est chose fort seueres & dures, qu'un poure pri-
sonnier ennuyé de la prison d'un an ou demy an, soit tenu
nommer promptement sesdicts tesmoings, uen qu'en cau-
se ciuile qui n'est beaucoup si dangereuse, les parties ont de-
lay pour faire oyr leurs tesmoings. Aussi que le prisonnier ne
autre pour luy ne pourra parler aux tesmoings qui uiendront
pour estre oyz pour luy: & qu'il fault que le procureur du
Roy, qui est partie aduerses, les face uenir. & paraduēture on
en baillera la charge a un sergent, qui sera attiltré & practi-
qué par la partie aduerses du prisonnier. Et par ce seroit bon
de moderer un peu lesdictes ordonnances. Encores estoit beau-
coup plus equitable & benigne l'ordonnance faicte sur la re-
formation du stile de Bretagne composee par mesme autheur,
par laquelle estoit dict, que si celluy qui apres les confronta-
tions a luy faictes alleguoit aucuns obiectz, estoit hōme sim-
ple, & tel qu'il n'estoit uraysemblable qu'il eust forgé ses
faictz iustificatifz, ou de reproches, & ne fust suspect de fai-
re fabriquer tesmoings pour en faire preuue, cōme une fem-
me simple, ou un poure homme rustic, en ce cas il debuoit e-
stre receu a alleguer & faire preuue de sesdictz faictz. Et
au regard de la crainte de subornation de tesmoings, y a e-
sté pourueu par l'ordonnance du feu Roy Francois, publiee
en la

en la Cour le xxiiij, iour d'Auril. l'an mil cinq cens xxxij. par laquelle quiconque portera faulx tesmoignage en iugement, doibt estre puny de peine de mort.

¶ L'accusé n'est eslargi, que la voye extraordinaire ne soit parfaicte.

L'accusé ne doibt estre eslargi pour faire sadicte preuue. mais tient tousiours prison en l'estat qu'il estoit on temps des confrētations: parautāt que la uoye extraordinaire n'est encores parfaicte. mais quand le iuge uoyoit que la matiere estoit legiere, & que l'accusé estoit seulēmēt arresté par la uille & faulxbourgs; aucunes fois du consentement des gens du Roy, auparauint lesdictes ordonnances dernieres, il eslargissoit l'accusé pour faire sadicte preuue: ce qu'il ne peut faire de present, ueue ladicte ordonnance derniere.

¶ Le iuge cōmet aux iuges du pais ou sont les tesmoings, pour les oyr, appellé auecques luy son greffier ou autre adioinct.

si les tesmoings nommez ne peuuēt uenir, le iuge peut commettre au iuge des lieux ou ilz sont & a son greffier, pour les oyr: & l'inquisition faicte, la réuoyer close & scellée feablement pardeuers luy. Et en ce nous gardōs le droit canon, par lequel est permis aux iuges de commettre toutes parties qu'ilz ueulent de la cause: ce qu'ilz ne peuvent faire de droit ciuil.

¶ Le commissaire commis pour faire les enquestes des iustificacions & reproches, ne doibt receuoir les obiectz, ains seulement la protestation de les bailler.

Et ne peut le commissaire commis pour faire ceste enqueste reccuoir les obiectz que la partie aduersé baillera contre ses tesmoings, ains seulement receuera a protester de bailler lesdictes

Et les reproches deuant le iuge duquel il a esté commis commissaire. Mais si les demandeurs requierent estre receuz par le iuge a bailler obiection alencontre des tesmoins oyz pour les iustificacions & reproches dudit defendeur: le iuge doit ordonner qu'ilz les bailleront en un sac a part, pour y auoir tel regard que de raison en iugeant le proces.

¶ On n'a accoustumé auoir regard aux reproches baillez contre les tesmoins oyz sur les iustificacions & reproches, sinon es cas cy apres declarez.

Toutesfois on n'a point accoustumé y auoir regard, parce que entant que touche les obiection & reproches baillez contre les tesmoins oyz sur les reproches dudit defendeur, ce seroit recevoir tesmoins reprobatoires contre les reprobatoires. Et quant aux reproches des tesmoins oyz sur les iustificacions, on ne les recoit point, parce que ce seroit une chose sans fin: car il faudroit encores recevoir les obiection que le defendeur bailleroit contre les tesmoins que les demandeurs feroient oyr pour obiection les tesmoins du defendeur. car autrement ce seroit chose inique, qu'on receust les demandeurs a obiection, & qu'on ne receust le defendeur aussi a obiection. Et est encores plus equitable de arrester & restreindre la faculté d'obiection aux demandeurs qu'au defendeur. car les droictz sont plus fauorisans au defendeur que au demandeur, & tendent plus a absolution qu'a condamnation. Mais si les obiection estoyent telz dont il peust apparoir promptement & par escripture authentique, comme par sentence irrogant & portant infamie contre le tesmoing, ou par lettre de traslacion non gratuite faicte par le tesmoing sur un crime, lors le iuge doit recevoir ledict obiection.

o

¶ Quand

¶ Quand & comment on delibere & on adiuge la torture.

Le iuge parapres met le tout au conseil. & si le cas dont est question est presque uerifié & prouué, par maniere qu'il ne reste plus que la confession du defendeur, & que le cas soit enorme, & tel que s'il estoit uerifié, il requerroit grand punition corporele: le iuge fera deliberer la question en quelque lieu secret par gens notables & lettrez, non suspectz & fauorables, qui n'auront esté au conseil des parties, presens ou appellez les aduocatx du Roy, suyuant les ordonnances du Roy Loys douzieme, article cent douze. Et selon la deliberation il donnera sentence; par laquelle il ordonnera que auant que proceder au iugement definitif du proces, le defendeur sera mis en question de torture, pour scauoir plus amplement par sa bouche la uerité du cas a luy imposé.

¶ Quelle preuue est requise pour adiuger la torture.

Et sur ce conuient scauoir que selon l'opinion d'aucuns docteurs de droit ciuil, il suffit de la deposition d'un tesmoing deposant du faict dont est question par un des sens du corps, comme de la ueue. ou bien s'il n'y a que indices, fault que les indices soyent prouuez chascun par deux tesmoings. Et a ce concorde l'ordonnance du Roy saint Loys, publice en l'an quatre cens cinquante & trois, qui est mise es ordonnances escriptes en Latin, mises a la fin du stile de Parlement aussi escript en Latin. Et suyuons le droit ciuil en ce que une femme est creue en tesmoignage en cause criminele, comme il est contenu par les arestz recueilliz par maistre Iehan le Coc, en la question cent soixante deux. Combien que de droit canon elle ne soit receue en tesmoignage.

¶ Toutes

¶ Toutes personnes en ce royaume sont subiectes a la torture, de quelque dignité qu'elles soyent.

Et iasoit que selon le droict ciuil & canon aucunes personnes pour l'excellence de leur dignité ne puissent estre torturez, comme les decurions & prestres: neantmoins auourd'huy nous n'en usons point, car indistinctement tous sont subiectz a torture, d'autant que quand il y ha semipleine preuue du crime, icelle charge exclut tout honneur. Et mesmement quant aux prestres, les iuges d'Eglise les mettent en torture quand le delict est enorme.

¶ De la prononciation de la torture, & execution d'icelle.

Par les ordonnances du Roy Loys douzieme, es articles six uingt & deux & six uingt & trois, il fault que le iuge apres auoir faict prononcer la sentence de torture a l'accusé, incontinent & sans diuertir a autre acte, il la face executer: sinon qu'il fust si deuers le soir, qu'on ne le peust commodement faire, ou pour autre iuste cause: onquel cas il fault differer la prononciation de la sentence & execution d'icelle iusques au lendemain matin, & ce pendant tenir la deliberation & sentence secreete. Pource me semble quand la Cour confirme par son arest une sentence de torture, qu'elle ne deburoit point renvoyer l'accusé pardeuant le iuge a quo, pour executer la torture, ains qu'elle la deburoit executer: car bien difficilement on pourroit faire que par les chemins en retournant l'accusé, il ne fust aduertit de l'arest, & ne se preparast contre la douleur de la question.

¶ De la maniere de bailler la torture.

○ ij

Le iuge

Le iuge en presence des aduocat & procureur du Roy, deux aduocatx de son siege, & deux de ses sergens, fera mettre l'accusé en torture, fera escrire par son greffier la maniere de la torture. car il y ha diuerses manieres de tortures. L'une & dont nous usons communement en Poictou, qu'on nomme Brodequins, qui sont aix qu'on lasse es iambes des prisonniers avecques cordes, & puis on met entre les aix & iâbes trois coings l'un apres l'autre. Et fault que le iuge dicte au greffier quants coings on a baillé, & quants coups sur chascun coing, & ainsi des autres manieres de torture. Et ne fault que le prisonnier soit laissé en la torture, ne qu'elle luy soit baillée par interualles, mais que l'un coing soit baillé incontinent apres l'autre, & incontinēt doibt estre osté. Aussi escri-
ra le greffier a la nominatiō du iuge les interrogatoires qu'il fera a l'accusé, & les responses, avecques la perseuerance du prisonnier, sa constance, ou uariation.

¶ De interroguer le prisonnier le lendemain hors du lieu ou ha esté baillée la question, pour ueoir sa perseuerance de la confession faicte en torture.

Et le lendemain de la question sera derechef interrogué le dict prisonnier hors du lieu ou il aura eu ladicte torture, pour ueoir sa perseuerance: & sera le tout escript par le greffier a la nomination du iuge, a fin que la crainte de la question & torture, & douleur uehement d'icelle cesse, & soit quelque peu appaisée, & qu'on puisse ueoir si en liberté il perseuerera en la confession faicte en la gehenne & torture.

¶ De ceulx qui confessent en la question, &
apres

apres qu'ilz ſont interrogez le lendemain,
ilz nient.

Et parautant qu'il y ba pluſieurs ſi fins & malitieux, que quelque choſe qu'ilz ayent confeſſé en la torture, quand ilz ſont le lendemain interrogez, ilz nient tout: lors on ba accouſtumé eſter a la confeſſion faiëte en la torture, ſi elle eſt urayſemblable, & conforme ou approchant au contenu des informations & de la preuue faiëte on proces criminel. Autrement on n'ha regard a la confeſſion faiëte en torture, ſil n'ha perſeuerance lors qu'il eſt interrogué hors la queſtion.

¶ De adiuger la queſtion, ſans ce que les indices reſultans du proces ſoyent purgez.

Au moyen dequoy quand le iuge uoit qu'il n'y ba preuue ſuffiſante pour aſſeoir punition corporele, mais pecuniaire ſeulement, a ſin qu'en niant tout par la queſtion il n'euade la peine pecuniaire qu'il deburoit ſouffrir, & que a raiſon de ce il ne ſ'endurciſſe plus a ſouffrir la queſtion, il ordonne que le delinquant ſera mis en torture, ſans que pour ce les indices reſultans du proces ſoyent purgez.

¶ Peine corporele ne ſe adiuge par indices violentz.

Car iſoit que par indices uoie indubitables on ne doitue aſſeoir punition de mort, ou autre corporele fort griefue: toutesſois on peut adiuger peine pecuniaire, & quelque corporele legiere.

¶ De repeter la torture.

Le iuge ne peut repeter la torture sans nouueaux indices & charges suruenans contre le prisonnier . Et parce il peut retenir l'accusé es prisons quelque temps apres la torture soufferte , si ores il n'ha rien confessé, ou n'ha perseucré . Lequel temps est arbitraire , & suffit qu'il soit de douze ou quinze iours.

¶ De l'autre deliberation qui se faict avecques le conseil apres la question.

Tout le proces criminel ainsi faict , doibt estre mis par le iuge en deliberation avecques le conseil de son siege tel que dessus, en presence des aduocat & procureurs du Roy, pour prédre le conseil de ce qui est a faire. & doibt escrire le grefsier les opinions & deliberations : & fault que le tout soit tenu secret sur peine de punition corporele cōtre les reuelās, ou autrement selon l'exigence des cas , ainsi que portent les ordonnances du Roy Loys douziesme, article cent seize.

¶ De receuoir les parties a proces ordinaire quand on n'ha peu rien gagner par l'extraordinaire.

Si par le proces extraordinaire deuement faict on n'ha peu riē gagner , & que l'accusé ne demeure chargé du cas a luy imposé: le iuge pourtāt ne le doibt enuoyer absolt, ains doibt ordonner que les parties seront receues a proces ordinaire, & escriront leurs faict & d'une part & d'autre dedens certain temps , respondront a leurs escriptures dedens autre temps ensuyuant, & seront preuues: & sera eslargi l'accusé
comme

comme nous auons dict cy dessus, ainsi qu'il est contenu par les ordonnances du Roy Loys douzième, article cent dix-huitiesme. Laquelle ordonnance me semble fort rigoureuse & seuer pour les accusez: car combien qu'il apparaisse de l'innocence de l'accusé, il n'est toutes fois enuoyé absout. Et obseruela Cour de Parlement a par fort estroictement ceste ordonnance: car en certaine cause en laquelle les defendeurs auoyent prouué a suffire leurs faictz iustificatifz & obiectifz, & pource auroyet esté enuoyez absoulz, & le demandeur partie ciuile condamné en leurs despens du proces dommages & interestz de leur detention personnele, dont le demandeur se porte appellant: par arest de la Cour l'appel & ce dont ha esté appellé auroit esté mis au neant: & en emendant le iugement la Cour auroit receu les parties a proces ordinaires en maniere susdicte, & icelles renuoyees en autre siege, les despens dommages & interestz reseruez en definitiue.

Toutes fois ladicte ordonnance n'est pas obseruee du tout selon sa forme: car par icelle est dict que au parauant que appointer les parties en proces ordinaire, le iuge doit ordonner que les parties seront oyes par le conseil a certain iour, auquel le prisonnier sera amené en iugement: & la matiere plaidee publiquement, seront les parties oyes, & l'advocat ou procureur du Roy le prisonnier present: & s'il est porteur de remission ou pardon, il sera de genoulx, & appointera le iuge la matiere au conseil.

¶ Quand les parties sont prestes a veoir les enquestes en publication, on assigne iour, auquel l'accusé est tenu de comparoir en l'estar quil estoit au temps de l'essargissement.

Les parties ainsi receues a proces ordinaire poursuyuent le reste de la procedure cōme en cause ciuile iusques au rapport des enquestes: auquel iour l'accusé qui ha esté eslargi iusques a ce temps, doibt comparoir en personne: autrement ce requerant sa partie aduersé, seroit baillé contre luy default, sauf quelque iour: Et seroit ordonné qu'icelluy passé, il seroit prins au corps. Mais parce que pardeuant les iuges royaux on ne prend iour pour rapporter les enquestes, ains pour les uoir en publication: au parauant qu'il soit ordonné que les parties uerront les enquestes en publication, les demandeurs requierent q'au defendeur soit assigné iour pour comparoir en sa personne en l'estat qu'il estoit quand il fut eslargi, ou par la uille, ou en prison close. Aussi si l'accusé ainsi eslargi ne cōpare, les demandeurs peuuent poursuyure les pleiges moyennans lesquelz il ha esté eslargi, a ce qu'ilz soient condamnés a le représenter, ou a payer la somme pour laquelle ilz l'ont pleigé.

¶ Les pleiges ne doibuent pas estre necessairement des lieux ou est le proces pendant.

Toutesfois n'est pas requis que les pleiges soient des lieux ou est le proces conduict: mais doibt estre ordonné apres qu'il aura fait serment n'en pouuoir trouuer audict lieu ou est men le proces, qu'il pourra bailler caution pardeuant le iuge de son pays, qui pour icelle receuoir sera commis: Et la caution receue par le iuge, partie presente ou appelée, sera enuoyé l'acte de la reception de caution au lieu ou il est prisonnier.

¶ Dequoy est tenu vn pleige qui ha promis représenter toutes fois & quantes.

Et quand un pleige ha promis représenter un prisonnier toutes fois & quantes: iasoit que sentence soit baillée en pre-

m: etc

miere instance: & qu'il l'ayt representé lors de la sentence: neantmoins il n'est point deschargé de le représenter en la cause d'appel.

¶ Du pleige pour ester a droict.

Mais s'il l'ha cautionné pour ester a droict seulement, il en est deschargé en le représentant on temps de la sentence.

¶ Du pleige pour ester & fournir a droict.

Et s'il est pleige & caution pour ester & fournir a droict simplement sans limitation iusques a certaine somme, il est tenu entierement en tout ce en quoy est condamné l'accusé.

¶ L'obligation du pleige pour représenter l'accusé quand elle passe aux heritiers du pleige.

Et pour ce par les ordonnances dernieres article cl. est dict que les eslargis bailleront caution limitee selon la qualité des parties, & de la matiere: & l'obligation procedant de telle caution, passe aux heritiers du pleige: ou si la caution n'est limitee, ladicte obligation n'est point transitoire aux heritiers.

¶ Le procureur du Roy est tenu faire registre des eslargis.

Par les ordonnances du Roy Loys XII. article cxx. le procureur du Roy est tenu de faire registre des prisonniers qui sont eslargis: soit qu'ilz fussent prisonniers en prison close, ou eussent l'arrest de la uille.

¶ De l'escroue des geoliers.

Et par lesdictes mesmes ordonnances du Roy Loys par les articles ciij. ciij, & cv. est dict que le geolier ou consierge de la prison doit faire escroue de tous ceulx qui sont cōstituez prisonniers, & ne doit eslargir aucun qu'il ne pregne la sentence

tence ou appointement signé du greffier par lequel le prisonnier est eslargi.

¶ Du registre que doit faire le greffier de ceulx qui sont admenez prisonniers, & des eslargis, ou mis hors prison.

Et doit le greffier faire registre du iour qu'un chascun des prisonniers est mis aux prisons, par l'ordonnance de quel iuge, & a la requeste de quelle partie: & semblablement du iour qu'il aura esté mis hors de prison: & declairer par ledict registre si c'est a fin d'eslargissement, absolution, ou cōdānation. mais ce est mal practiqué, comme plusieurs autres bōnes choses.

¶ De constituer procureur & eslire domicile en faisant constituer prisonnier l'accusé.

Et seroit bon que a ladiète ordonnance on adioustast que la partie qui seroit constituer une partie prisonniere, seroit tenue de uenir par luy ou par procureur le declairer au greffe du lieu ou il faict constituer sa partie aduersé prisonnier: par uertu dequoy il l'ha faict constituer prisonnier: & que par mesme registre il constituast procureur, & esleut domicile en la cause audiēt lieu: ainsi que i'ay dict cy dessus en ce tiers liure: a fin que le poure prisonnier ne fust point en peine de enuoyer adiourner sa partie aduersé, comme biē souuēt il est. & seroit bon d'y mettre quelque peine de cinquāte liures ou autre somme applicable au Roy, & au prisonnier par moitié, contre ceulx qui contreuendroient.

¶ Si les defēdeurs receuz a proces ordinaires doivent auoir publication d'enqueste.

En ceste procedure ordinaire le iuge ne doit pas ordonner que les parties uerront les enquestes en publication, a tout le moins des demādeurs, ains seulement le procureur du Roy les

uerra, lequel consentira apres auoir ueu les enquestes que elles soient communiquees aux parties, s'il uoit que par icels les le defendeur ne soit point chargé, ou qu'il soit chargé si legierement que cõtre luy n'y ayt aucune suspition de fuite. Autremẽt doit empescher publicatiõ d'enquestes estre faicte esdictes parties : uoire doit requerir au iuge qu'il ayt a restraindre l'accusé en prison close, a fin que iustice soit assuree de sa personne lors qu'on luy prononcera la sentence, s'il uoit qu'il soit grandement chargé & suspect de fuite. Combien que ladiète ordonnance du Roy Loys XII. article cxx. charge le iuge d'aduertir le procureur du Roy de faire restraindre lors le prisonnier.

¶ Si le iuge doit en la voye ordinaire receuoir les obiectz alleguez en l'extraordinaire par l'accusé.

Et auparauant que donner sentence definitive en ceste procedure ordinaire, selon l'opiniõ d'aucũs le iuge doit adiuger preuue aux demandeurs des obiectz par eulx alleguez cõtre les tesmoins examinez pour la preuue des iustifications & reproches alleguez par le defendeur s'ilz sont cõcluãs & receuables : & disent que a ceste fin ladiète uoye ordinaire ha esté introduicte. & autres disent que les demandeurs en ceste uoye ordinaire doibũt articuler leursdictz obiectz par leurs intenditx, & en faire preuue avecques les autres faictez cõcernans le principal. Mais ie ne trouue bonne ne l'une ne l'autre opinion: car tousiours on reuiendroit a l'inconueniẽt que i'ay cy dessus dict : scauoir est que si on receuoit en une sorte ou autre a faire preuue desdictz obiectz par tesmoins, ce seroit une chose infinie. Ou bien le defendeur demoureroit plus greué que le demandeur.

Parautant

Parautant que le defendeur se uoyant attainct & conuaincu par confrontation de tesmoins, quand le delict est d'importance, obtient remission ou pardon du Roy : nous traicterons de ces lettres de remission ou pardon, & de la forme de proceder a l'enterinement ou priuation de l'effect d'ice lles, auant que parler des sentences de ceste premiere instance criminele.

¶ De deprecation ou remission, & de purgation ou innocence.

Anciennement chez les Romains on usoit plus souuent de pardon qu'ilz appelloyēt purgation, que de demander remission, qu'ilz nommoient deprecation: car il estoit permis d'user de purgation deuant tous iuges, mais de deprecation deuant le Senat seulemēt, parce que le Senat pouuoit user de misericorde & bailler grace, & les autres iuges inferieurs ne pouuoient bailler grace : ains estoient tenuz suiure la rigueur du droict. Car en deprecation le delinquant confesse auoir delinquē d'industrie & sciētement: mais il demande luy estre pardonné pour raison de la noblesse de son lignage, ou pour le seruice faict par luy ou ses predecesseurs a la Republique, ou parce qu'il ha par cy deuant bien uescu, & en bone reputatiō. Au moyē dequoy nous appellōs ces lettres remissio ou grace. Et en purgation le delinquant confesse auoir delinquē par cas fortuit, ou par ignorance, & non a son escient. Et pour ce nous les appellons lettres d'innocēce. Mais en Frāce d'autant que soit remission ou pardō il fault qu'ilz soient obtenuz du Roy, soit pour les presenter deuant les iuges royaux, ou Cours souueraines, nous usons plus de remission que de pardon: car la remission est plus seure, parce que le Prince en remission pardonne le cas de sa pleine puissance & auctorité

auſtorité royal: & par le pardon il ne remet que de grace ſpeciale. Et a ce moyen la remiſſion eſt ſcellée du grand ſecl dont on ſeelle les lettres patentes: & eſt le ſecl de cire uerd pendu a laſſetx de fil de ſoye uerde & rouge, & couſte ledict ſecl *unze* liures tournois. Et quant au pardon, il eſt comme une ſimple lettre de iuſtice, & a ſimple queue & de cire iaulne. & n'y ha difference, ſinon qu'il couſte ſoixātetrois ſolz & neuf deniers tournois.

¶ De la difference des lettres de remiſſion & de pardon.

Et different leſdictes lettres de remiſſion & de pardon encores en ce, que aux lettres de remiſſion on ne met point le iour de l'impetration, ains ſeulement le mois & l'an: & ſi l'accuſé eſt priſonnier, ſes parens charnelx les peuuent obtenir. Mais en pardon, il faut que l'accuſé l'obtienne: & que le iour ſoit mis aux lettres, comme en autres ſimples lettres de iuſtice.

¶ En quoy conuiennent les lettres de remiſſion & de pardon.

Toutesfois leſdictes lettres de remiſſion & pardon conuiennent en pluſieurs choſes: car par les unes & les autres lettres le Roy reſtitue l'accuſé a ſes eſtatx, biens, & bon fame: & mande mettre au neant tout ce qui ha eſté faiât contre luy par contumace ou en ſa preſence: ſoit qu'il ayt eſté banny & exillé: ou condamné a autre peine corporele. D'auantage le Roy impoſe ſilence a ſes officiers, & leur faiât deſenſe de non le moleſter du crime en aucune maniere en ſes corps & biens: ſauf toutesfois le droit du Roy & de tout autrui.

Qui,

Qui est a dire que le Roy n'entend point remettre les biens ia confisque par sentence : car nommeement on le met par les lettres qu'on remet l'impetrant en ses biens confisque : par le moye dequoy est ostee & resequee une grãde disputatiõ qui est entre les docteurs du droit ciuil, si le Prince en restituant est ueu restituer aux biens ia confisque par sentence.

¶ Si quand le corps est confisqué, les biens sont confisque.

Et de ceste forme de remissions pouuons cueillir qu'en France confiscatiõ ha lieu : & qui confisque le corps, confisque les biens regulierement & plus communement. Toutes fois y ha diuerse coustume on royaume, Car a Bourges & on ressort n'y ha confiscatiõ de biens pour quelque cas que ce soit, de lese maiesté, ou autre, comme aussi y ha en Guienne. Combien que aucuns en Guienne ueulent excepter le crime de lese maiesté, pour ce que par icelluy le Roy ha attraiët a soy Bourdeaux & autres pays de Guiene. Et en Poictou y ha confiscatiõ de meubles en tous crimes publiques, & confiscatiõ de biens immeubles en crime de lese maiesté diuine, qui est heresie, qui est contre le Prince & la republique.

¶ L'amende ne doit equipoller aux biens, ou il y ha confiscatiõ.

Mais aujourdhuy on rend illusoires & inutiles les benefices desdictes coustumes: parce que iasoit qu'on ne puisse confisquer les biens, toutes fois on condamne les delinquans en si grosses amendes, qu'elles equipollent presque la ualeur des biens: ce qui n'est raisonnable.

¶ Les

¶ Les Romains ne conioingnoiēt point punition pecuniaire auecques la corporele.

Car ainsi que diēt Marc Tulle Cicero en l'oraison qu'il ha faict pour sa maison, chez les Romains qui estoient gens de grands uertus & discipline politique, iamaïs on ne conioingnoit peine pecuniaire auecques peine corporele. & quand le delinquant estoit puni corporelement, il n'estoit point puni en biens: parce qu'il n'est pas equitable que les enfans qui n'ont rien delinquē, soient priuez du bien de leur pere, uoïre & des heritages de leurs ayeulx uenux a leur pere par nul sien labour ou merite, puisque leur pere souffre en corps.

¶ La Cour confisque les biens a qui il appartiendra.

si l'accusé demeure en lieu ou il n'y ha point de confiscation, & il ayt des biens on pays ou confiscation ha lieu, & il soit condamné a peine de mort: le iuge doibt cōfisque les biens a qui il appartiendra. & par ainsi seront confisqueulx seulement les biens estans on pays ou confiscation ha lieu. & en ceste maniere la Cour de Parlement a Paris, ha accoustumé de bailler ses arestz.

¶ A qui appartiennent les biens confisqueulx.

Et les biens confisqueulx appartiennent au seigneur ayant haulte iustice, ou autre, selon les coustumes des lieux on sont assis les biens immeubles confisqueulx pour quelque crime que ce soit: uoïre fust ce heresie, qui est crime de lese maïesté diuine: fors pour crime de lese maïesté humaine: car lors ilz sont confisqueulx au Roy.

¶ Un prestre obtient lettres du Roy pour estre restitué a ses immeubles.

Et si un prestre ha commis quelque crime, pour lequel il y auroit confiscation de biens: le Roy luy peut donner grace, & le restituer a ses biens.

¶ Le Roy peut remettre la publication ou cōfiscation applicable a autre que a luy, auāt que elle soit iuee.

Et ne peut l'Euesque auquel appartiendroyent les meubles dudict prestre, empescher l'enterinement de ladicte remission pour son interest desdictz meubles: car le Roy luy peut en ce preiudicier, d'autant que c'est une chose encorcs non acquise a l'Euesque. Comme semblablement le Roy peut ce faire au preiudice du seigneur ayant haulte iustice, on fief duquel seroyent les biens immeubles de celluy qui auroit commis crime emportant confiscation de biens.

¶ Les meubles du prestre appartiennent en cas de confiscation a l'Euesque.

Et au regard des meubles, soyēt des clerics prestres ou personnes layz, appartiennent, scauoir est les meubles des clerics ou prestres a l'Euesque du lieu ou ilz sont trouuez, & les meubles des layz aux seigneurs ayans haulte iustice on lieu ou ilz sont aussi trouuez.

¶ Les immeubles confisquezz par le iuge d'Eglise appartiennent au seigneur hault iusticier.

Et si ores le iuge d'Eglise baille sentence de confiscation de biens:

biens : neantmoins les biens immeubles du preſtre condamné appartiendront au ſeigneur ayant haulte juſtice au lieu ou ilz ſont aſſis. Voyre ſi le iuge d'eſliſe condānoit un clerc ou preſtre en quelque amende pour le regard du cas Royal & priuilegié ſans dire a qui l'amende ſe doit appliquer, elle ſe deueroit appliquer au Roy. Mais ce ne aduient pas ſouuent, car le iuge royal condāne ordinairement le clerc en ladiſte amēde.

¶ Le Roy ne doit vnir a ſon domaine les biens immeubles conſiſquez.

Quand aucuns biens immeubles ſont conſiſquez, le Roy ne les doit mettre ne vnir a ſon domaine : mais les doit transporter a autres, pour deux raiſons. L'une, que par ordonnance le Roy ne peut eſtre fait uaſſal de ſon inferieur. Ce qui a luiendroit ſ'il retenoit tous les immeubles a luy conſiſquez. L'autre raiſon eſt, a fin que le Roy ait toujours homme pour porter les charges du fief, ou autres choſes immeubles conſiſquees.

¶ A qui ſe doiuent adreſſer les lettres de remiſſion.

Les lettres de remiſſion ou pardon doiuent eſtre adreſſees aux iuges royaux, qui ſont du reſſort du Parlement, au dedens lequel reſſort ha eſté commis le cas. Et ſi elles y ſont adreſſees, on ſe peut porter appellant de l'executiō des lettres. Et ne peuuent eſtre adreſſees en premiere inſtāce aux Cours de Parlement : ne auſſi par le moyen d'icelles lettres leſdictes Cours de Parlement ne peuuent euoquer les cauſes pendātes es iuriſdictions ordinaires, & les comettre a autres : ne ſemblablement par lettres de rappeau de ban. & ne doit on auoir regard eſdictes lettres : ains doiuent les impetrans eſtre condamnēz en l'amende tant enuers le Roy que enuers la

P partie:

partie comme il est dict par les ordonnances dernières, article huiet uingt dix, & huiet uingt unze.

¶ De n'obeir aux lettres de remissio si elles ne sont donnees pour cas requerant peine corporele.

Et par l'article clxxij. d'icelles ordonnances est defendu de ne bailler grace ne remissio des cas pour lesquels ne seroit requise peine corporele: & si elles estoient donnees au cōtraire, est defendu aux iuges d'y auoir esgard, & commandé en debouter la partie impetrant auccques condānation d'amēde.

¶ Les remissions se doibuent obtenir pour les homicides taiētz pour le salut & defense de la personne.

Semblablement par lesdictes ordonnances articles clxviij. & clxix. est defendu de ne bailler aucune grace ou remission, fors celle de iustice: c'est ascauoir aux homicidiaires qui auroient esté cōtraincts faire les homicides pour le salut & defense de leur personne: & autres cas ou il est dict par la loy que les delinquans se peuuent ou doibuent retirer parduers le souuerain Prince pour auoir grace. & si autres graces estoient donnees, est ordonné que les impetrans en serōt debouterz, & puns selon l'exigence des cas. Lesquelles ordōnances ie trouue fort rigoureuses: car il me semble que tout ainsi que le Prince remet bien l'infamie quand elle est encourue ou declairee par sentence: aussi il la deburoit remettre auant qu'elle fust encourue. Et pareillement les lettres de remission me semblent superflues a ceulx qui pour leur salut & defense ont commis homicide: car ueu que le droit diuin, naturel & ciuil permet la defense a un chascun, il n'est point mestier d'obtenir benefice du Prince: & lors suffiroit auoir en tous cas lettres de pardon ou d'innocence.

¶ Des

¶ Des citez de refuge.

Mais il me sembleroit qu'on pourroit bien & licitement bailler remission d'un homicide faict en une querelle suruenue sans y penser par un couroux & chaulde cole: comme nous auons en penultime chapitre des Nombres six citez baillees pour refuge a ceulx qui fortuitement & non par haine & inimitié auoient tué un homme.

¶ De la forme de proceder sur l'enterinement d'une remission.

Celluy qui ueult demander l'enterinement de lettres de remission, doit premierement les faire signifier a sa partie aduersé, & la faire adiourner pour uenir proceder sur l'enterinement d'icelles. & au iour assigné fault qu'il se rende prisonnier, & qu'il presente estat nud teste & a genoux on parquét & auditoire sesdictes lettres de remission, ainsi que porte l'ordonnance du Roy Loys XII. article cxxvi. & cxxvij. Et lors le iuge luy fera faire sermēt si le contenu en ses lettres est ueritable, & s'il s'en ueult ayder. Et apres qu'il aura respondu que oy, le iuge ordonnera qu'il sera ramené en sa prison, & par luy oy sur les charges & informations: ce que promptemēt le iuge doit faire, a fin qu'on ne luy face le bec. Combien que ordinairement ilz n'obtiennent point remission qu'ilz ne sachent bien le contenu des informations ou du proces criminel contre eulx faict.

¶ De proceder extraordinairement sur l'enterinement des remissions.

Et la confession cōmuniquée aux gens du Roy, s'ilz uoyent que les charges & informations ne soient semblables au contenu en la remission, & qu'il soit beaucoup plus chargé par l'information que par sa grace, ilz requierēt qu'il soit procedé

P ij contre

contre luy par recolement & confrontations: ce qui est fait. Et par apres le iuge ordonne que le defendeur nommera tesmoins pour uerifier le contenu de sa remission: lesquels seront oyx ex officio: & qu'il consignera deniers pour les faire uenir, dont le procureur du Roy fera diligence.

Et ce ha lieu quand on presente lettres de remission auant l'accusation intentee: ou on commencement du proces criminel. Mais si apres le proces fait l'accusé presente ses lettres de remission, si les demandeurs ueulent, ilz pourront encores faire oyx autres tesmoins, & les faire recoler & confröter, pour monstrier du contraire du contenu en ladicte grace. Et si les demandeurs uoyent qu'ilz ayent fait assez ample preuue pour destruire le contenu en ladicte remission, & que le defendeur n'ayt encores fait assez ample preuue de ses iustificatiöns, il la pourra encores faire par la maniere que dessus. Et si les demandeurs originaux ne ueulent informer au contraire du contenu en la grace, ou qu'ilz pensent auoir informé assez au contraire, & qu'ilz uueillent debatre seulement la grace d'inciuité: apres l'auoir debatü & defendu a l'entierement, le iuge ordonnera que ladicte grace avecques les charges & informations ou le proces criminel seront mis pardeuers luy avecques un aduertissement de chascun costé pour y faire droit, attendu qu'il n'est plus question de contrariété de fait, ains de droit seulement.

¶ De n'estre a la confession d'un accusé, s'il n'appert du cas confessé par ailleurs.

Et combien qu'on ne s'arreste point a la confession d'un accusé, ne aux charges & informations, s'il n'y ha recolement & confrontation de tesmoins par lesquels apparaisse de la uerité

uerité du faiēt & crime commis, parce qu'un homme uolāt perir ne doit point en ce eſtre oy ſi autrement il n'en ap- pert : Toutesfois par ce que en ce cas ladiēt confession eſt premierement contenue par la grace, & affermie par ſermēt en iugemēt, & par apres reiteree deuant le iuge avecques ſer- uient, le iuge auroit regard a ladiēt cōſeſſion, ſans autremēt en informer : ſimon que la partie aduerſe uouluſt dire que le confeſſant fiſt ladiēt confession pour deſcharger un autre du cas dont eſt queſtion: car lors il faudroit faire recoler & confronter teſmoings.

Aucuns ſont d'opinion que quand les informations & le contenu en la grace ſont cōtraires, il faut apres que les par- ties ont conteſté, les appoinēter a informer de leurs faiēt ſur intendit ſpectiuelement. Toutesfois la premiere forme de proceder eſt meilleure, & plus conforme aux ordonnances & areſt de la Cour, & eſt plus uſitee. Car comme un accu- ſé euſt preſenté grace, & ſur icelle les parties euſſent cōteſté, & eſté appoinētees a informer, & les gens du Roy euſſent cō ſenti l'eſlargiſſement de l'accuſé: & euſt obtenu a l'enterine- ment de ſa grace: & de la a xij. ans ou enuiron par uertu de informations nouuelles faiētes du meſmes cas il euſt eſté con ſtitué priſonnier : & pour ſes iuſtifications & deſenſes euſt mis auant ladiēt procedure, eſlargiſſemēt, & ſentēce: le pro- cureur du Roy ſe porta appellant de ladiēt ſentence. Par a- reſt de la Cour de Parlemēt a Paris eſt l'appel & ce dont auoit eſté appellé mis au neant, & l'accuſé renuoyé par de- uant autre iuge, pour eſtre procedé de nouueau contre luy ſur l'enterinement de ſa remiſſion comme de raiſon. Et fut le- diēt areſt donné le v. iour de Ianuier l'an M.D. XXXVI.

ſe porteur de remiſſion doit tenir priſon

¶ L'accu

p iij

pendant

pendant l'enterinement de sa remission: & s'il est eslargi, la partie aduerse demanderesse s'en peut porter appellant.

Doibt l'accusé pendant l'enterinement de sa remission tenir prison. Tellement que comme le iuge eust eslargi un porteur de remission iusques a certain temps du consentement des gens du Roy, la partie ciuile s'en porta appellant. Et combien qu'e la cause d'appel on luy obiiceast qu'il estoit sans interest, parce que la detention personnele de l'accusé appartient aux gens du Roy: neantmoins ledict appellant obtint gaing de cause par arest donné le dernier iour de Decembre mil cinq cens quinze.

¶ De ne rien prendre pour l'eslargissement d'un prisonnier, ne pour l'enterinement de sa remission.

Est a noter que par les ordonnances du Roy Loys XII. arti. xxxix. est prohibé de ne prendre aucune chose par les iuges pour l'eslargissement du prisonnier ou l'enterinement des lettres de remission. mais ladiète ordonnance est mal gardee comme plusieurs autres. ou bien la faudroit entendre selon l'ordonnance du Roy Charles VII. articles xliij. xliij. & xliij. par laquelle est prohibé que les parties demanderesse & defenderesse en matiere criminele, ne leurs solliciteurs ne donnent aucune chose au iuge de la cause.

¶ La partie ciuile demanderesse doibt payer le salaire du iuge.

Et si le iuge se taxe quelque somme de deniers pour son salaire d'auoir oy le prisonnier, ou pour quelque autre uacatio faicte en la cause, la partie ciuile demanderesse le doibt payer. Et s'il est trouué que l'accusé ayt faict au cōtraire, il sera tenu pour conuaincu des cas a luy imposez, & le demandeur decherra de son accusation, & le iuge priué de son office.

¶ Que

¶ Que les aduocatx & procureurs du Roy ne peuvent rien prendre soubz couleur de leur peine en vne cause criminele.

Et les aduocatx & procureurs du Roy ne peuuent rien prendre soubz couleur de la peine ou labeur qu'ilz pourroent auoir prins en une cause criminele, a peine de priuation de leurs offices, & amendes arbitraires. Toutesfois ie pense que cela doit estre entëdu de mes seigneurs les aduocatx & mon seigneur le Procureur general de la Cour, lesquelz ont fort gros gages & suffisans pour leur entretienement: & non pas des aduocatx & procureurs du Roy qui n'ont gages, ou n'ont que uingt & cinq liures de gages: car ilz peuuent bien prendre salaire modéré des parties ciuiles demãdereffes selõ mon aduis, mais non de l'accusë: comme les iuges par ladiëte ordonnãce du Roy Charles. Toutesfois aujourd'uy les accusëz desirans auoir expedition, payët leurs auditiõs aux iuges & greffiers, & les repetent parapres des demandeurs. Et payent semblablement les espices des sentences interlocutoires & disinitiuë, qui sont donnees pour eulx.

¶ De prendre conclusions en matieres crimineles par les parties demanderesses.

Quand le proces est parfaict, le iuge ordonne qu'il sera communiqué aux gens du Roy, pour y prendre leurs conclusions dedens trois iours, ainsi qu'il est contenu par l'ordonnance de la Cour, faicte le deuxiesme iour de Ianuier l'an M.D.XXXII. Par laquelle est aussi ordonné, que les sentëces en matiere criminele se bailleront au matin. Ou s'ilz ne ueulent point prendre conclusions, ains assister a la deliberation qui sera faicte avecques le conseil, & selon l'aduis d'icelluy prendre lors leurs conclusions: aussi la partie ciuile demanderesse prendra ses conclusions.

¶ De la clause accoustumee en conclusions.

Et fault qu'elle soit aduertie que n'est chose superflue de mettre par lesdictes conclusions une clause accoustumee, scauoir est, Ou autres fins & conclusions miculx ualables par raison luy estre adiugees. car si la qualite de l'accusation n'est bien prouuee, si neantmoins il y ha quelque cas bien prouue dont elle doibue auoir reparation, icelle luy sera adiugee.

¶ De respondre par le defendeur aux conclusions des demandeurs par attenuation.

Selon droit cōmun le defendeur auoit communication du proces criminel cōtre luy faict: mais selon nostre stile il ne la doibt auoir, sinon quād apres la cōfession de l'accusé le procureur du Roy & la partie ciuile uulēt prēdre droit par la confession du defendeur. car lors le defendeur doibt auoir communication de leurs conclusions, & de sa cōfession, pour y respondre par attenuation, comme auons dict cy dessus.

¶ Le greffier assiste au iugement du proces pour escrire les opinions des consultants.

Le iuge met le proces criminel avecques lesdictes conclusions en deliberation avecques notables aduocatx de son siege non suspectx ne fauorables, comme dict est. Et cōbien que par l'ordonnance du Roy Loys XII. article. cxv. cy dessus alleguee soit dict que le greffier doibt escrire les opiniōs des deliberans: toutesfoys on ne l'obserue point, car le greffier n'assiste point a ladiete deliberation, sinon ou il y a des Conseillers que le iuge est cōtrainct appeller es iugemēs des proces, & conclure a la pluralite des opinions desdictx Conseillers.

¶ De la

¶ De la maniere de prononcer sentence
selon les ordonnances.

Aussi par ladiète ordonnance, article cent seize, est dict que si le prisonnier est condamné a mort, ou a autre peine corporele, le iuge prononcera sa sentence en plein auditoire, ou en la chambre du conseil, ou sera amené le prisonnier: & luy sera leue sa sentence en presence du greffier, qui l'enregistrera au liure des sentences. Et s'il n'en est appellé, assistera avecques le prisonnier, & l'accompagnera iusques a ce que la sentence soit executee: ce qui sera fait le mesme iour. mais on ne garde pas auourd'huy ceste forme, ains le iuge enuoye son dictum au greffier, lequel le prononce au prisonnier en la chambre du concierge ou il fait uenir le prisonnier.

¶ S'il fault par la sentéce criminele declairer le cas
duquel le prisonnier est attainct & conuaincu.

Conuient entendre que en sentence criminele il fault spécialement declairer pour quel crime on condamne l'accusé: & que ainsi l'observe la Cour de Parlement a Paris, a tout le moins en general: toutesfois les iuges royaulx ne le gardent point, ains mettent par leurs sentences ceste clause, Pour la punition & reparatiō des cas dont il est trouué attainct & conuaincu par le proces.

¶ De limiter la condemnation de
dommages & interestz.

Et semblablement si le iuge condamne la partie civile desmanderesses dommages & interestz, le iuge doit limiter lesdictz dommages & interestz, scauoir est de la detention personnele de l'accusé. Pareillement auourd'huy les peines sont arbitraires en re royaume.

¶ Il n'y ha conclusion ne renonciation
en cause criminele.

Et n'y ha aucune conclusion en cause, ne appoinctement en droit en cause criminele, qui empesche que les demandeurs ne soient receuz a faire oyr, recoler, & cōfronter tesmoings, s'ilz les ont presentement: & sont tousiours ad ce receuables iusques a la sentence diuinitue donnee pour raison de l'interest qu'ha la chose publique, que les crimes soient punis. Toutesfois s'il y auoit partie ciuile, & l'accusé eust faict preuve de ses faictz iustificatifz & obiectifz, en ce cas il seroit dict que la partie ciuile seroit ad ce faire receue: scauoir est a faire oyr autres tesmoings, moyennant ce, que l'accusé pourroit faire preuve iustificatiue & obiectiue au contraire, es despens de la partie ciuile, si la matiere se trouuoit ad ce disposee. comme cy dessus nous auons dict au commencement de ce tiers liure.

¶ La forme des amendes honorables.

Nous auons des manieres de punitions, qui ne sont point escriptes au droit: que que soit, ne sont specialment declarees, ne traictees. Car nous auons les amēdes honorables, scauoir est que le delinquant ist condamné a dire & declarer estāt en chemise, la teste nue & nudz piēdz, que faulsemēt & cōtre uerité il ha dict ou faict telle chose, & qu'il nrequiert pardon a Dieu, au Roy, a iustice, & a la partie offensee.

¶ En quelz cas on condamne en amende honorable.

Et auons accoustumé infliger telle amende, quand le delict est faict contre l'auctorité & honneur de Dieu, du Roy, & de la chose publique, ou d'une partie priuce. Et regulie-
rement

rement on ha de coustume de cōdamner en grosse amende pecuniaire, quand on condamne en l'honorable sans supplice ou peine corporele. Et si aucun est trouué auoir poursuiuy calumnieusement une accusation de quelques gros crimes & d'importance, & en dechoit, il est ordinairement condamné en telle amende honorable. Car nous n'usons point de peine de talion, ainsi que cy dessus auons dict.

¶ Le prince remet l'amende honorable.

Et peut le Prince remettre l'amende honorable, iasoit qu'elle concernela partie ciuile demanderesse comme le Roy.

¶ De l'amende pecuniaire.

Et quand on adiuge amende pecuniaire a la partie demanderesse, on n'ha point coustume d'adiuger de dommages & interestz, car l'amende est au lieu des dommages & interestz. & l'adiuge lon a la raison qu'on pense se monter les dommages & interestz. Et mesmement depuis les ordonnances dernieres, par lesquelles est dict que les iuges arbitreront les dommages & interestz a certaine somme, comme auons dict cy dessus. Laquelle ordonnance est tresbonne. car par ce moyē les parties sont deschargees des fraiz & ennuyz d'une instance separee, qui'il faudroit faire pour les liquider. laquelle souuent couste plus que la principale.

¶ Du profit d'arbitrer & liquider les dommages & interestz a certaine somme pour les parties.

Et combien que la Cour & plusieurs iuges quand ilz condamnent es dommages & interestz pour raison de la detention

detētiō personelle de l'accusé, ou d'exécution reale, ilz ne les arbitrent point : toutesfois ilz feroient beaucoup pour les parties, s'ilz prenoient un peu de peine pour les arbitrer. car il me semble que par le proces criminel ou par le proces uerbal de l'exécution on pourroit bien les arbitrer & reduire a certaine somme, aussi bien que en autres cas : & seroit plus utile aux parties leur faire quelque peu de tort en les arbitrant, que de les laisser en proces. Mesmemēt que apres que elles ont fait preuue, encores fault il que le iuge arbitre, d'autant que la preuue ne peut pas estre certaine ne elaire.

¶ Si le demandeur en liquidation de dommages & interestz prouue certains articles, & non tous, s'il doit auoir tous les despens de l'instance.

Et y ha difficulte & controuerse, si le demandeur prouue partie de ses articles, & n'en prouue aussi partie, ains le defendeur prouue partie des siens, & obtiennent respectiuemēt en certains articles, si les despēs doibuent estre cōpensez. car i'ay ueu arrest de la grand chambre du plaidoyer a Paris, par lequel sans auoir regard aux obiectz alleguez par les defendeurs alencontre des tesmoings des demandeurs, qui toutesfois estoient de fait & concluans, on condamne les defendeurs en deux cens liures parisis pour les dommages & interestz d'une execution reale, dont les meubles executez n'auoyent esté uenduz a l'encant au plus offrant & dernier encherisseur a plein marché que quatre uingts cinq liures tournois: & pour lesdictz interestz & dommages lesdictz defendeurs eussent offert bailler la somme de soixante liures parisis ualant soixante quinze liures tournois, & ne s'en failloit que dix liures que cene fust autant que toute la ualeur

ualeur & uente deſdictz meubles: & ſi eſtoit queſtion de l'e-
xecution d'un areſt ſur les condamnez, meſme par areſt dõt
i'ay parlé on ſecond liure cy deſſus. Et oultre les defendeurs
ſont condānez es deſpens de l'inſtance, iaſoit que les deman-
deurs euſſent tort en plus de cinquāte ou ſoixante articles,
& qu'ilz demandaffent des choſes impertinentes. Et ſon-
de lon ceſte opinion en ce qu'ilz diſent que tous les intereſtz
procedent d'une ſource, ſcauoir eſt de la ſentence, & qu'ilz
ſont deux par action perſonnele: & parce ſi le demandeur
obtient en un chef, il doit obtenir au tout & es deſpens, ſi
l'offre du defendeur n'eſt trouuee ſuffiſante. I'ay ueu autre
areſt donné en la grand chambre des enqueſtes, par lequel
d'autant qu'il ſ'eſtoit trouué que le demandeur auoit tort en
la tierce partie des articles de ſa declaration de dommages
& intereſtz, il n'obtint que les deux pars des deſpens de l'in-
ſtance: ce que ie trouue eſtre bien iuſte & raiſonnable: car un
demandeur pour embourrer ſa partie aduerſe comme au ieu
de la paulme, ne craindra point a mettre pluſieurs articles
ſuperfluz ou non ueritables, ſe conſiant qu'il ſuffiſe qu'il en
uerifie l'un. D'auantage la raiſon ſuſdicte qu'en action per-
ſonnele il ſuffit que le demandeur obtienne en partie de ſa
demande pour auoir tous les deſpens, c'eſt une deciſion qui
n'eſt pas accordee de tous, ains y ha pluſieurs qui y diſſentēt,
ainſi qu'auons dict cy deſſus en noz Institutions latines &
on ſecond liure. Mais quand ce ſeroit une choſe tenue pour
cōſtante & arreſtee, ladicte raiſon ne ſe pourroit adapter au
cas preſent: car elle ha lieu quand ce n'eſt que une demande.
Mais en ce cas autant qu'il y ha d'articles, autāt y ha de de-
mandes. Parquoy fault ſ'y gouuerner tout ainſi que ſi c'e-
ſtoient pluſieurs demandes. Et quand ſont pluſieurs deman-
des, il eſt euident qu'il fault faire compensation de deſpens, ſi
le

le demandeur obtient en l'une, & succumbe en l'autre.

¶ De la punition de l'impression de la fleur du liz.

Il y a une autre maniere de punition qui est contraire au droit ciuil. Car on fleurte & imprime lon par un fer chaud une fleur de liz on front du delinquant. & de ceste punition on use regulierement contre ceulx qui ont falsifié les seaux des lettres patentes ou lettres de iustice octroyees par le Roy, ou les seelz royaux establi aux contractz.

¶ De la peine de la mitre & du pillory.

Plus y a une autre maniere de peine, qui est qu'on baille une mitre en la teste du delinquant, & le met on a une eschelle a laquelle il est attaché. & est la tant que le marché dure au lieu ou il y a plus grand assemblee de gens. ou bien le delinquant est mené au pillory, & la tourné par certain nombre de fois.

¶ De la peine de fustigation & de amputation d'aureilles.

Aussi la peine ordinaire des larrons attainctz de larcin qualifié, est de fustigation, par fois la corde au col: & l'une ou les deux aureilles coupees. Toutesfois parce que on ha cogneu par experience que apres que un homme auoit une ou les deux aureilles coupees, il ne pouuoit plus trouuer a se mettre a seruir: au moyen dequoy estoit contrainct a se retirer es bois, & se mettre a uoler: on a laissé ladicte peine de couper les aureilles, & prins une autre dont on use en Italie: qui est de fleurter les delinquans au dos d'une ou deux fleurs de liz, parce que cela ne se uoit point, & denote aussi bien

bien qu'ilz ont esté attainctz par iustice, comme s'ilz estoient efforuillez.

¶ De la punition de fondation de chappelles.

Quand un homme est attainct & conuaincu d'auoir occis un autre proditoirement, on ha de coustume de le cōdamner oultre la peine corporele en quelque somme de deniers pour la reparatiō ciuile: & en oultre a fonder une chappelle d'une ou plusieurs messes, pour estre dictes pour l'ame du defunct, & iusques a certaine somme de deniers payable par chascun an par les heritiers du delinquant au chappellain. de laquelle chappelle la presentation ou collation appartient aux heritiers de l'occis. & souuentesfois a faire amende honorable, & assister a un seruice ou la figure de l'occis sera mise en lieu euident.

¶ De bannissement.

D'auantage on ha de coustume quant aux delinquans non chargez de cas de mort, que chascun iuge les bannist hors son territoire & iurisdiction. Et parce qu'il aduiert ordinairement, que quand l'accusé est condamné a peine corporele, il en appelle: au moyen dequoy l'exécution de la sentence doit superseder: nous ne traicterons point icy de l'exécution desdictes sentences, ains reseruerons a en traicter on dernier liure, onquel nous exposerons la procedure des appellations en causes crimineles.

¶ Epilogue ou sommaire du tiers liure.

Et sera icy terminee la forme de proceder que gardons esdictes causes crimineles. Tellemēt que pouuons cognoistre par ce traicté, que doit premierement faire la partie demanderesse, soit le procureur du Roy, ou la partie ciuile. Par apres cōment on doit cōtumacer l'accusé. Quelle procedure on tiēt, quand l'accusé compare, & comment il doit demander son renuoy:

renuoy: comment il doibt estre faict tant pardeuāt le iuge lay, que le iuge d'eglise. Puis comment doibt estre oy l'accusé. En quelle maniere doibuent estre recolez & confrontez les tesmoins. La forme d'adiuger preuue des faictz iustificatifz & obiectifz alleguez par l'accusé. Plus d'adiuger & bailler la question & torture audiect accusé. Par lesquelles choses est clairement demonstré comment se doibt faire le proces criminel extraordinairement alencontre de l'accusé. Sensuit apres la maniere comment on recoit les parties a proces ordinaire. Aussi la forme de presenter & enteriner lettres de remission, ou de pardon & innocence. De la nous sommes uenus a parler des sentences, comment on les donne & prononce lon en matieres crimineles: & auons declairé plusieurs manieres de supplices, esquelz les delinquans sont condamnez en ce royaume, qui n'estoient point inuentez de droict commun.

Fin du troisieme liure.

PARAPHRASE

DU QUART LIVRE DES- dictes Institutions par ledict autheur.



PUIS qu'auons mis fin a la forme de proceder, & donner sentences en la premiere instance des matieres crimineles en ce tiers liure precedent : reste que en ce quart liure nous declairions la maniere de proceder, & donner sentēces en la seconde instance desdictes matieres: laquelle concerne les appellations interiectees des senten- ces difinitives donnees en causes crimineles.

¶ Le prisonnier est releué tousiours de l'illico.

Conuient entendre en premier lieu, que en ces matieres il fault appeller comme es matieres ciuiles : sinon que quand l'accuse est prisonnier, il est releué tousiours de l'illico.

¶ Quād l'accusé appellant n'est tenu de releuer.

Quant a releuer appellations, elles doibuent estre releuees dedens mesme temps que en la cause ciuile, sinon que quand l'accusé est condamné, le plus souuent il ne releue point. car s'il est condamné a peine corporele, il est mené avecques son pces criminel a la Cour, ou pardeuāt le iuge moyē superieur.

¶ En quelz cas l'appellāt peut releuer en la Cour omis le moyen, & fault mener le prisonnier a la Cour.

Q Et

Et en ce y a eu plusieurs ordonnances contraires en peu de temps, & de mesme Roy, scauoir est du Roy Francoys premier de ce nom: parce que par les ordonnances faictes par le dict Roy sur la distinction de la iurisdiction des iuges Presidiaux & Preuostaux, l'accusé condamné a auoir la torture ou par sentence definitive en quelque peine corporelle, ou d'amende honorable, pouuoit appeller formellement en la Cour de Parlement a Paris, omis tous les moyens iuges.

Par les ordonnances dudit Roy publiees an l'an M. D. XXXIX. au mois d'Aoust, en une queue d'un article desdictes ordonnances estoit dict, que le Roy uouloit toutes appellations en matiere criminele ressortir & estre releuees en Cour. Mais ladicte ordonnance estoit si preiudiciable a chose publique, qu'elle a esté reformee par edict du Roy, par lequel il auroit declairé qu'il n'entendoit ladicte ordonnance auoir lieu, sinon es cas susdictz contenuz & declairez par ladicte premiere ordonnance faicte sur la distinction des iuges Presidiaux & Preuostaux.

¶ En quelz cas il ne le fault point mener.

Si l'accusé est appellant d'une sentence interlocutoire, laquelle n'est reparable en definitive, & empesche qu'on ne puisse proceder au principal: il ne fault point que l'accusé soit mené prisonnier pardeuant le iuge de la cause d'appel. mais s'il n'est prisonnier, & qu'il soit seulement comparant en personne, il fault seulement qu'il compare en personne pardeuant le iuge d'appel.

Toutesfois si l'accusé prisonnier en cedit cas ueult estre mené prisonnier pardeuant le iuge d'appel aux despens d'icelluy prisonnier, il y pourra estre mené, quand par le moyen del'appel on ne peut proceder au principal. Car si nonobstant l'appel on procedoit au principal, il n'y auroit apparence d'

Ly mener: d'autant que ce pendant on ne pourroit proceder contre luy.

¶ Comment on doit mener vn prifonnier a la Cour.

Et quand il conuient mener le prifonnier condamné appellant, le ſergent qui prend ceſte charge, ne le doit laiſſer ſejourner aux hoſteleries par les chemins, ou en la uille es priſons de laquelle on le mene, plus qu'un autre paſſant: Et ains fault que incontinent qu'il eſt uenu audict lieu, il le mene aux priſons dudit lieu: Et fault qu'il prenne deſcharge du greſſier comment il a mis le prifonnier aux priſons, Et ſon proces au greſſe du iuge d'appel: comme il eſt dict par les ordonnances du Roy Charles huiſtieſme article iij.

¶ De bailler le prifonnier a mener au rabais.

Et ſ'il n'y a partie que le Roy, on ha de couſtume de bailler au rabais a mener le prifonnier pardeuant le iuge d'appel: Et faiſt le procureur du Roy aſcauoir par cry public Et ſon de trompe a iour de marche, que tel prifonnier eſt a mener au rabais en la uille de Paris avecques ſon proces au iour du marche enſuiuant. Et audict iour aſſigné le iuge ordonne que le prifonnier Et ſon proces ſeront baillez a celluy qui pour moindre pris de deniers le voudra mener Et conduire en la uille de Paris en bonne Et ſeuere garde.

¶ L'appellant n'eſt tenu faire groſſoier le proces criminel, ne le porter, ſinon qu'il ſoit demandeur, ſoit le Roy, ou partie ciuile

Combien que en cauſes ciuiles l'appellant ſoit tenu de faire porter les ſacz du proces par eſcript au iuge d'appel, ou a ſon greſſier: neantmoins en cauſe criminele le demandeur

Q ij

deur

deur soit le Roy, quand il n'y a partie civile, ou icelle partie civile est tenue a ses despens de faire grossoier le proces criminel, & l'enuoyer au greffe du iuge d'appel. Lequel iuge fera la taxe tant de la grosse que du portage dudit proces. Et par les ordonnances du Roy Charles huitiesme article xxxij. estoit dict que le iuge bailleroit ledict proces par escript au sergent qui l'adiourneroit par uertu du relief d'appel, pour soustenir & defendre les torts & griefs. mais on n'use point de present de ladicte ordonnance.

¶ La taxe du menage du prisonnier, & portage du proces, se faict par le iuge d'appel : & la faict la Cour sur le receueur du domaine, sauf a recouurer sur la partie civile, ou sur le prisonnier.

Quand on n'ha point baillé au rabais le prisonnier a mener, la taxe du menage se faict par le iuge d'appel, comme du portage du proces par escript. & est mandé par la taxe de la mettre a execution sur les deniers du domaine du Roy au lieu, duquel est enuoyé le prisonnier : sauf au receueur du domaine du Roy audict lieu, d'en auoir recours alencontre de la partie civile, ou du prisonnier, comme de raison.

¶ En quelz cas l'accusé est tenu comparoir en l'estat en la cause d'appel.

s'il n'y a que la partie civile appellât de l'eslargissement du defendeur, ou de la sentence par laquelle les parties sont receues a proces ordinaire, ou de la sentence portant absolution du defendeur: icelluy defendeur n'est point tenu de comparoir
en l'estat

en l'eſtat qu'il eſtoit au parauant ladiſte ſentence pardeuant le iuge d'appel. Mais ſi le procureur du Roy eſtoit appellant, lors l'accuſe ſeroit tenu de comparoir en la cauſe d'appel en l'eſtat qu'il eſtoit auparauant ladiſte ſentence: ſçauoir eſt ou priſonnier, ou uenant en perſonne. Car la detention de la perſonne de l'accuſé appartient au procureur du Roy, & non a la partie ciuile demandereſſe: que que ſoit, principalement. cō bien que la partie ciuile ſoit bien receuable ſeule a ſe porter appellant de l'eſlargiſſement de l'accuſe, quand il eſt tortionnaire: comme quand il ſeroit faiſt pendant les recolemens & confrontations de teſmoings. Car elle y ha lors intereſt, d'autant que lediſt eſlargiſſemēt pourroit empeſcher la uerification du cas & delict dont eſt queſtion. & auſſi ſ'il aduenoit que l'accuſe fuſt condanné en quelque ſomme enuers lediſt demandeur partie ciuile, l'accuſé tiendroît priſon iuſques au parfait payement de la ſomme.

¶ Quand il n'y a que la partie ciuile appellant de l'eſlargiſſement, comment le priſonnier ſe doit pouruoir.

Et pource quand le procureur du Roy n'eſt appellant de l'eſlargiſſement, & qu'il n'y a que la partie ciuile qui en ſoit appellant, l'accuſé ha de couſtume auoir lettres royaux adreſſans au ſiege ou a eſté donnee la ſentence d'eſlargiſſemēt pardeuant autre iuge que celluy qui la donnē: par leſquelles eſt mandé, que ſ'il appert qu'il n'y a que la partie ciuile appellant, & que les gēs du Roy n'en ayent appellé: il en ce cas procede a l'eſlargiſſement real & aſtuel du priſonnier, ou a l'executio de ladiſte ſentēce d'eſlargiſſemēt comme de raiſon.

¶ Si audict cas il fault ſe pouruoir pardeuant le iuge a quo, ou ad quem.

Q iij 1 ſemble

semblablement si l'accusé estant prisonnier est absout par sentence, dont il n'y ha que la partie ciuile appellât: ledict accusé obtient ordinairement pareilles lettres royaux que dessus, tendans a faire eslargir l'accusé desdictes prisons. Tout fois me semble qu'en l'un ne en l'autre cas n'est necessaire de obtenir lettres royaux: & que si l'eslargissement est fait par sentence interlocutoire, le iuge qui ha donné l'appoinctement de eslargissement, peut executer son appoinctement nō obstant l'appel de la partie ciuile. Pareillement si la sentence definitive d'absolutiō, ou d'eslargissement est telle qu'on puisse passer oultre non obstant l'appel, dont nous parlerons cy apres: le iuge d'appel sur la requeste a luy presentee peut eslargir le prisonnier. Mais on ha accoustumé de se pourvoir a siege ou ha esté dōnée ladicte sentence: parce qu'on en ha plus facile expedition que pardeuant le superieur.

¶ Si la partie ciuile seule est appellant, & face intimer l'accusé a cōparoir en l'estat qu'il estoit auant la sentence, comment on y doibt pourvoir.

Et quand il n'y ha que la partie ciuile appellant, si elle obtient lettres royaux de relief d'appel, pour faire comparoir l'accusé en l'estat qu'il estoit lors de l'eslargissement de la sentence: & qu'elle luy face intimer qu'il soit & compare audict estat: l'accusé se pourra porter appellant de l'execution d'audit relief d'appel. & ainsi en fut dict par arest le xxiiij. iour d'Octobre M.D.XXXI. aux grands iours tenez a Poitiers. Toutesfois me semble qu'il seroit aussi bon, que au iour assigné il feist cōparoir son procureur, & remonstrast a la Cour ou autre iuge superieur, qu'il n'est tenu de comparoir en personne: car lors il seroit receu a comparoir par procureur.

Quand

- **¶** Quand le procureur du Roy est appellant, comment l'intimé doit comparoir.

Mais ou le procureur du Roy est appellant, s'il est appellant d'une sentence interlocutoire, & que lon ne puisse passer oultre nonobstant son appel, & que l'accusé soit prisonnier en prison close, ou en la maison d'un sergent: il demeure tousiours ondicié estat iusques a ce qu'il soit decisi dudié appel: & n'est point mené pardeuant le superieur, sinon qu'il soit appellant de la torture, ou qu'il requiere qu'il soit mené a ses despens, comme dié est cy dessus. Mais si l'accusé n'a que la uille pour prison: il fault qu'il compare en personne en la cause d'appel.

- **¶** Appellant du decret d'adiournement personnel, ou de prinse de corps, doit comparoir en l'estat dudié decret.

Le semblable est gardé, quand l'accusé est appellant du decret d'adiournement personnel, ou de prinse de corps: car il fault qu'il compare en personne, ou se rende prisonnier, combien qu'il soit appellant comme de iuge incompetent: sinon qu'il apparust oculairement par le decret, ou par l'exploict de l'execution dudié decret, de l'incompetence: comme si le seneschal de Poictou, ou son lieutenant a Poictiers, decretoit une prinse de corps contre un homme, & qu'il mist par le dié decret, demourant a Fontenay le conte.

- **¶** Quand le procureur du Roy se porte appellant du decret comme de grief contraire, n'est l'accusé tenu comparoir en l'estat du decret

Car en ce cas i'ay ueu monsieur le Procureur general de la Cour se porter appellant dudiect decret avecques l'accusé cōme de grief oculaire, & par le moyen dudiect appel l'accusé n'estoit point contrainct de descendre en la conciergerie au parauant qu'on plaidoyast la cause d'appel.

¶ Quand l'accusé est condamné en quelque somme de deniers, il doibt consigner, a ce qu'il ne soit tenu comparoir in l'estat, & ce quant a l'amende du Roy, & bailler pleiges quant a l'amende de partie ciuile.

Et si l'accusé est condamné en quelque somme de deniers, & qu'il en appelle: il est tenu de comparoir pardeuant le iuge superieur en l'estat qu'il estoit au temps de la sentence. & a defaut de telle comparition, sera contre luy donné congé en la Cour de Parlement: sinon qu'il monstre par registre du greffier du iuge a quo ou ad quem, qu'il ait consigné les sommes esquelles il estoit condamné enuers le Roy: ou qu'il baille pleige de payer la somme en laquelle il est cōdamné enuers partie, quand ores l'accusé n'estoit que uenant en personne pardeuant le iuge a quo. Et est on receu a rabatre le congé en informant de ladiecte consignation de l'amende du Roy, & baillant pleige de celle de partie ciuile, iusques a ce que le congé soit seellé. Et ordonne la Cour souuentes fois, que l'accusé pourra bailler pleiges au lieu de son domicile quant a la diecte amēde de partie ciuile, & cōmet au iuge dudiect pays pour receuoir la caution partie presente ou appelée. Et parce ordinairement quand l'accusé prisonnier est condamné en quelque somme, il se porte appellant, & neantmoins sans preiudice de son appel il consigne la somme au greffe.

¶ De

¶ De faire canceler ou rayer les congez a default de comparition.

Mais il fault bien que l'accuſé prenne garde, qu'il face caſceler le congé au registre du greffier de la Cour, apres qu'il eſt rabatu. Car le greffier n'ayant memoire du rabat, le baille par fois au receueur des amendes du Roy en la Cour de Parlement: lequel le baille a ſes ſerges: leſquelz nonobſtant quelle areſt de rabat qu'on puiſſe monſtrer, mettent les pources gens priſonniers pour l'amende, & exigent d'eulx l'amende, & les fraiz du commandement: & les plus gracieux encores ſe font payer entierement deſdictz fraiz.

¶ Des exactions qu'on faiet en leuant les amendes du Roy

Et combien qu'ilz ayent pluſieurs amendes a leuer, neantmoins pour chaſcune ſe font payer uoyage entier de Paris: & pour le moins ilz en ont quatre ou cinq eſcutz. Et aucunes fois pour une amende de ſoixante ou cent ſolz parisis, ſe font payer my uoyage de Paris: dont le poure peuple eſt fort ſoulé & opprimé. Ce que i'eſcrips, a fin que ceulx a qui appartient en faire la correction, puiſſent ce entendre par eulx, ou par rapport d'autres qui uerront ceſt endroict, & qu'ilz y pouruoyent.

¶ L'appellant d'amende honorable eſt tenu ſe rendre priſonnier, & iuſques a ce la partie aduerſe n'eſt tenue de conclure en proces par eſcript.

Et ſi l'accuſé uenant en perſonne eſt condamné en amende honorable, ou autre choſe qui la ſonne ou equipolle, & qu'il n'ait eſté reſtrainet en priſon cloſe par le iuge a quo, il fault qu'il ſe rende priſonnier es priſons du iuge ad quem, ou
en la

en la Cour: sil est appellé comme tenu comparoir en cest estat: ou autrement y aura contre luy congé, & ne sera tenue la partie ciuile a conclure on proces par escript, ne rien dire iusques a ce qu'il soit prisonnier. Et ainsi en fut dict contre une femme de noble lignee, & de bonne qualité, par arrest donné le xvi. iour de Septembre l'an mil cinq cens trente & six. Sauue toutesfois a la mettre en la maison d'un huysier de la Cour, si la Cour uoit que faire se deust, ce que ladicte Cour feit apres qu'elle eust esté trois ou quatre iours en la consiergerie, par une requeste presentee a ladicte Cour.

Vous auez entendu comment & en quel estat, l'accusé appellant est tenu comparoir en la cause d'appel, qui est le commencement pour paruenir a le contumacer. Parquoy conuiēt de present parler de la maniere de contumacer tant l'accusé appellant, que ses parties aduerses. Et certes en ce nous deuiens uiser de telle procedure entierement que en causes ciuiles, soit que l'accusé ayt esté prisonnier iusques a definitive, & par apres soit euadé des prisons: ou qu'il ayt esté seulement comparāt en sa personne: ou que ledict accusé soit appellant, ou sesdictes parties aduerses.

A ce moyen uenons a declarer la forme de proceder que nous gardons, quand toutes les parties sont presentes. Et semblablement nous y tenons telles procedures que aux appellations des causes ciuiles, sinon que l'accusé prisonnier appellant est oy sur ses griefs & causes d'appel par sa bouche par le iuge d'appel en l'absence des intimes. De laquelle auditiō lesdicts intimes n'ont aucune cōmunication: ains est attachee par le greffier au proces criminel principal en un sac a part & separement. Apres qu'il est conclud comme on proces par escript si l'accusé ne compare, & qu'il soit appellant de cōdamnation de somme de deniers a appliquer au Roy & a la partie

tie, & qu'il n'ayt consigné l'amende du Roy, ne baillé caution de l'amende de la partie: l'intimé le pourra faire appeller cōme tenu de comparoir en l'estat qu'il estoit lors que la sentence ha esté donnee. Et s'il ne compare, la Cour ha accoustumé bailler congé contre luy. mais en adiugeant le profit dudit congé, la Cour ne dict pas qu'il ha esté mal iugé: ains seulement, que l'appellāt sera tenu de cōsigner entre les mains du receueur du Roy au lieu ou ha esté donnee la sentence, la somme adiugee au Roy, & qu'il baille pleiges de la somme adiugee a la partie dedens certain temps: & a default de ce, ledict temps passé, il soit admené aux prisons de la Cour.

Toutesfois ladiēte Cour, combien que l'accusé ayt faict ladiēte consignation & baillé ladiēte caution, ordonne quād le cas le requiert, que l'accusé comparoistra en personne, ou se rendra prisonnier. Et mesmement quand le procureur general du Roy est appellant tanquam a minima.

Ceste difference est entre les appellations en causes ciuiles & en causes crimineles, que iasoit que l'accusé appellant n'ayt tenu prison pardeuant le iuge a quo, ains seulement comparu en personne: neantmoins il n'est receu a bailler griefs hors le proces, n'a faire production nouuelle, si non a la charge que le tout sera mis en un sac a part, pour y auoir par la Cour tel regard que de raison. Et n'y est pas receu simplement, comme il est en matieres ciuiles. Mais pourtant l'intimé baille tousiours responses a griefs & contredicts aux despens de l'appellant, comme en causes ciuiles.

Quant a donner sentēce en cause d'appel de matieres crimineles, on si gouerne comme en matieres ciuiles, soit quant a faire renuoy, ou autres choses dependans de la sentence: sinon, que si le iuge royal renuoye l'accusé pardeuant l'inférieur

ferieur iuge a quo, & que lediēt accusé encores en appelle, nō obstant lediēt appel & sans preiudice d'icelluy, lediēt iuge royal ressortissant nuement en la Cour, ordonnara que l'accusé sera mené ou comparoistra en sa personne pardeuant lediēt iuge a quo inferieur: suyuant l'ordonnance du Roy Loys XII. article cxliij. Et lediēt iuge inferieur paracheuera de faire le proces criminel selon les arremens derniers precedens lediēt appel. mais s'il y ha appel dudiēt inferieur, il supersedera, & y sera prinse telle prouision que nous dirons cy apres. Et quant aux Cours de Parlement, elles renuoyent les parties pardeuant telz iuges qu'elles aduiuent, pour s'ire par eulx procedé au principal comme de raison, ou pour exccuter leurs arrestz.

Le iuge royal en donnant sentence en ces causes d'appel doit diligemment considerer si le procureur de la seigneurie du iuge de laquelle ha esté appellé, pour suyuoit seul l'accusation: ou avecques partie ciuile. Car s'il pour suyuoit seul, il ne doit estre condamné es despens dommages & interestz de la poursuyte qu'il ha faict en la Cour de laquelle il est procureur: tout ainsi que le procureur du Roy en son siege ou Cour dont il est procureur, n'est condamné en aucuns despens dommages ne interestz de la poursuyte qu'il faict en sa Cour ou siege: comme nous auons dict cy dessus. Et iasoit que l'accusé offre les despens dommages & interestz en cas qu'il succube, toutesfois si le procureur ueut il n'acceptera point cest offre, & ne sera condamné esdictz despens, combien qu'il dechoye de l'accusation.

Mais le seigneur de la seigneurie de laquelle le procureur ha seul pour suyui, s'il succumbe en la cause d'appel, il doit estre condamné aux despens dommages & interestz de la cause d'appel: car le seigneur lors est censé & réputé de par
reille

reille condition qu'une autre partie civile demanderesse.

Et s'il y ha partie civile ioincte avecques le procureur de la seigneurie, ledict seigneur d'icelle seigneurie ne son procureur ne payent aucuns despens dommages ne interest, non plus que le procureur du Roy en sa Cour. Aussi ne leur sont adiugez aucuns despens dommages & interest, ne reparation, ains seulement une legiere amende contre le delinquant iusticiable d'icelle seigneurie on tēps du delict par luy cōmis.

Et si le procureur du Roy ou d'autre seigneur est appellant, l'accusé pendant la cause d'appel demourera en l'estat qu'il estoit lors de la sentence: combien que l'accusé le face anticiper, & le prenne a partie en son nom priué: car autrement il seroit en la puissance de l'accusé se deliurer de la prison quand il uouldroit, en prenant le procureur du Roy a partie en son priué nom. Si le procureur du Roy est anticipé & prins a partie en son nom priué, & que monsieur le Procureur general prenne la cause pour luy: ledict procureur sera enuoyé de l'assignation ou anticipation folle: & la partie adverse cōdamnee enuers luy aux despens d'icelle anticipation.

Combien que monsieur le Procureur general declare en la cause d'appel qu'il ne uult prendre la cause pour son substitut, toutes fois la Cour ne condamne pas deslors ledict procureur du Roy en son nom priué aux despens de la cause d'appel, ains elle ordonne que ledict procureur du Roy sera intimé, ou autrement appelé en son nom priué, pour y dire ce que bon luy semblera, ainsi qu'auos dict cy dessus on traicté des appellations des causes civiles. Au parsus nous ne parlerons gueres de la forme des sentences qu'on donne en cause d'appel en matiere criminele: car ladicte forme est telle presque totalement qu'en causes civiles, quand l'accusé est enuoyé absout, ou condamné en amende pecuniaire, ou en
prine

peine corporele par les iuges inferieurs des Cours de Parlement. Et quant a ceulx qui sont condamnez par lesdictes Cours, aucunesfois elles les renuoyent aux lieux ou ilz ont esté condamnez, & pardeuant les iuges qui les ont iugez, pour mettre a execution leur sentences de punition corporele ou amede honorable. Et parfois mesmemēt quand on crainct que lesdictz prisonniers soient rescous & ostez par force par les chemins en les ramenant: ou qu'on corrompe le sergent & autres esquelz ilz seroient baillez a ramener: lesdictes Cours les font executer de pardela en leurs uilles, & ordonnēt que la teste ou autre partie du corps sera portee & affichee en lieu ou le delict a esté fait.

Auant que traicter des executions des sentences criminelles, sera plus commode declarer quelles sentences en matieres criminelles s'excutent nonobstans oppositions ou appellations quelconques, & sans preiudice d'icelles. Parquoy conuient icy repeter la partition ou diuision des Cours & iurisdicctions de ce royaume. Car si la cause est traictee en premiere instance pardeuant les iuges seneschaux des seigneurs Barons, Chastellains, ou autres ayans haulte iustice: & qu'il soit appellé de quelque appoinctement ou sentence interlocutoire, ou definitive: il fault differer de passer oultre, mesmement quand l'appellant se declare exempt par le moyen de son appel de la iurisdiction du iuge. Voire quand il y a appel seulement du decret d'adiournement personnel, ou de prinse de corps, le iuge qui a decreté, ne peut plus cognoistre de la cause. Vray est, que le decret de prinse de corps, ou d'adiournement personnel, s'excute nonobstant l'appel, & sans preiudice d'icelluy.

Semblablement quand la cause est pendant pardeuant les Chastellains royaux, on superjede: sinon quant a la sentēce de
prouision

prouision d'alimens & medicamens: laquelle est executee nõ obstant opposition ou appellation, & sans preiudice d'icelles, quand ellen'excede uingt liures parisis, suiuant les ordonnances royales dernieres article xci. Et si le iuge Presidial superieur du iuge a quo confirme la sentence interlocutoire de son inferieur, & renuoye la cause pardeuant luy, & au iour du renuoy la partie declare estre appellant de l'appoinctement ou sentence interlocutoire du iuge Presidial: lors il fault prendre prouision du iuge Presidial, par laquelle il mandera d'adiourner la partie appellant, pour uoir declarer que nõ obstant l'appel & sans preiudice d'icelluy, ledict appoinctement tiendra: & estre enioinct audict inferieur de passer oultre a paracheuer le proces criminel: comme il est contenu par les ordonnances du Roy Loys XII. article xciiij.

Mais quand la cause est pendants pardeuant les iuges royaux Presidiaux, il n'y a que trois manieres d'appellations, qui puissent empescher qu'on ne passe oultre. Scauoir est, l'appel comme de iuge incompetent, ou recusé: l'appel de la torture: & l'appel de la definitiue. Et parfois l'appel de la torture n'empesche point que la torture ne soit executee: cõme quand le prisonnier est uagabond, ou si pour crime il ha esté auparauant banni, fustigüé, ou souffert autre punition corporele: pourueu que au iugement de ladicte torture, soient appellez six ou pour le moins quatre notables aduocatx du siege par le iuge, comme il est contenu par lesdictes ordonnances du Roy Loys xij. article xciiij. & xciiij.

Et si la partie ciuile ou le procureur du Roy appelle d'une interlocutoire non reparable en definitiue, il fault superseuer: comme s'ilz appelloient de ce que le defendeur seroit receu a proces ordinaire. car on doit lors surseoir, & differer par le moyen de l'appel.

Combien

Combien que en causes ciuiles s'il y a appel interiecté de forclusion d'enqueste, ou de production, lon ne doibue passer oultre comme non estant ladiète forclusion reparable en difinitue, ainsi qu'auons dict cy dessus plus amplement on premier liure: neantmoins en causes crimineles si les demãdeurs ores appellent de forclusion d'enqueste, ou de faire uenir tesmoings pour estre recolez & confrontez, le iuge royal ressortissant nuement en la Cour passe oultre nonobstans & sans preiudice desdictes appellations. Parce que s'il differoit, ce seroit un moyen par lequel un prisonnier a la merci & uolunté de sa partie aduersé seroit contrainct de demourer en prison. Mais les Preuostz des Mareschaux de France ou leurs lieutenans peuuent faire les proces criminelz de ceulx qui sont de leur gibier, nonobstans oppositions ou appellations quelconques, iusques a difinitue & execution d'icelle inclusiuement: pourueu que au iugement de la torture ou difinitue de punition de mort, ou autre peine corporele & de bannissement ilz appellent quatre ou six aduocatx fameux du plus prochain siege royal. Et iasoit que par arest de la Cour donné le ix. iour de Feburier M.D.XXIIII. il soit enioinct esdictz preuostz de exercer par eulx mesme leurs offices, & de non y commettre lieutenans: neantmoins ilz font tous les iours le contraire. Ceulx sont du gibier des Preuostz des Mareschaux, qui sont uagabons. Aussi par l'ordonnance du Roy Francoys premier de ce nom dernier decedé, est baillee puissance a tous ayans iurisdiction, de pouuoir proceder contre les gens d'armes tenans les champs & mangeans la poulle du bon homme & uiuans sur le peuple, nonobstans oppositions ou appellations quelconques, sans auoir regard s'ilz ont domicile ou non, tout ainsi que pourroient faire les Preuostz des Mareschaux, & lesquelz par ladiète ordonnance sont creez

creer Preuost des Mareſchaux, & ſi les declaire ennemis de la choſe publique, & baille puissance de les maſſacrer. laquelle ordonnance eſt receue par la Cour.

Mais ledict feu Roy feit une autre ordonnance, par laquelle il attribua la cognoiſſance de l'infracſion de ſes ordonnances faiſtes ſur les chasſes aux Preuost des Mareſchaux aleancontre de toutes perſonnes, tant nobles que roturieres, avecques puissance de pouuoir executer leurs ſentences de torture & de mort, pourueu qu'ilz fiſſent le proces du delinquant avecques le iuge ordinaire.

Toutes fois ladicte ordonnace n'ha eſté receue par la Cour de Parlement: tellement que les iuges ordinaires encores en cognoiſſent. Et ſ'il y ha aucun de la iuriſdiction ordinaire, contre lequel ceſdict Preuost ueillent entreprendre cognoiſſance, le procureur du Roy & la partie en demandent le renuoy pardeuant le iuge ordinaire. Et oultre les iuges ordinaires decernent mandement pour faire commandement auſdict Preuost, de leur renuoyer les priſonniers avecques leurs charges & informations, ſoubz groſſes peines & amendes a appliquer au Roy. Ce que la Cour ha accouſtumé confermer: car elle abhorre telle boucherie que font leſdict Preuost des mareſchaux. Et ſi les Preuost denyent de renuoyer les priſonniers pardeuant les iuges ordinaires, on en appelle en la Cour.

Et apres qu'un iuge ordinaire ha encommencé a faire un proces contre quelque delinquant, il ne le peut mettre entre les mains du Preuost des Mareſchaux: & ſ'il le met, le priſonnier, ou ſes heritiers apres ſa mort ſ'en peuuent porter appellans, & releuer en la Cour.

Reſte maintenant traicter de l'execution des ſentences en matiere criminele.

La sentence doncques, s'il n'y ha appel, doit estre executee des le iour mesme, quand c'est sentence de mort, ou de punition corporele, ou d'amende honorable, si elle n'est assignee a autre iour, comme il est dict par les ordonnances du Roy Loys douziesme, article cent uingt cinq & cent uingt six. A ce moyen, incontinent apres la sentence prononcee lon baille un confesseur au condamné. & le sacrement de confession a luy administré, & la question a luy baillee pour declairer par sa bouche ses complices, le bourreau ou maistre des haultes œuures mene le malfaieteur au lieu destiné par la sentence, & vont apres luy la Crie du lieu ou se faiet l'exécution, & le greffier list a ladicte Crie le dictum de la sentence par les carrefours accoustumez a faire cris publiques. Et par fois le iuge qui ha donné la sentence, & le procureur du Roy, accompagnent des sergens Royaux, assistent a l'exécution. & doit le greffier y demourer iusques a ce que l'exécution soit paracheuee.

Et doit la sentence estre executee s'il n'y ha appel, quand on doit deferer a l'appellation, ou s'il n'ya ha remission du Prince, ou que le prisonnier informe de son priuilege de clericature, & appelle de la sentence, comme il est contenu par les ordonnances. & ce quant aux sentences donnees par les iuges Royaux, & autres inferieurs. Mais quant aux arrestz de la Cour, il n'y ha que la remission du Prince, qui en puisse differer l'exécution. Et biē souuent la Cour apres auoir ueu les lettres de remission, si elle ne les trouue raisonnables, ordonne l'arest estre executé nonobstant lesdictes lettres.

Et si le condamné apres l'arest donné presente au greffier sa lettre de tonsure, neantmoins le greffier sans y auoir regard passe oultre, & le bourreau aussi a l'exécution.

Toutesfois

Toutesfois si le prisonnier bailloit requeste a la Cour a ce qu'il fust renuoyé a l'eglise, & a icelle attrachoit sa lettre: la Cour y deuroit auoir regard selon disposition de droit commun: mais le clerc deuroit estre condamné es despens de toute la procedure uoluntaire faicte pardeuant les iuges layx: laquelle condamnation est faicte par le iuge lay, & non par le iuge ecclesiastique.

Et si le defendeur est condamné en quelque somme de deniers d'amende enuers le Roy, ou de reparation enuers la partie ciuile demanderesse, il tient prison iusques au parfait payement de la somme contenue par la sentence: scauoir est l'homme lay en la prison du iuge lay, & le clerc en la prison du iuge d'eglise.

semblablement si une partie est condamnée en quelque somme de deniers enuers une autre, pour les dommages & interestx de l'emprisonnement, ou de la detention personnelle souffertx par l'autre: en ce cas elle doit tenir prison, ainsi qu'il est dict par les ordonnances du Roy Loys douzième, article 126. Autre chose est des despens de la cause, parce que la partie ne tient point prison pour iceulx.

Combien que par arrest donné es grands iours tenuz a Poitiers le 23. iour d'Octobre, iour de Lundi, l'an M.D. XXXI. fut une partie receue a faire cession de biens pour certaine somme de deniers, en laquelle il estoit condamné pour cause de delict: toutesfois depuis par arrest donné en la Cour de Parlement a Paris un quidam estant condamné en certaine somme de deniers pour auoir esté a une assemblée illicite, & raiuisement des biens d'un prieuré, ne fut receu a faire cession de biens, ains fut dict qu'il seroit fustigüé: & a ce moyē la peine pecuniaire fut cōuertie en la corporele selon disposition de droit commun: ce que ie pense estre plus conforme a raison.

R ij

Parcil-

Pareillement celluy qui est condamné en amende enuers le Roy, n'est point receu a faire cessiō de biens: ainsi qu'il ha esté dict par plusieurs arestz. mais la peine pecuniaire est conuertie en corporele, si le condamné ueult isir de prison.

De ce que dessus ha esté deduiet, nous pouuons entendre comment il fault appeller en matiere criminele, & releuer appellations: & en quelz cas il fault seulement enuoyer le proces criminel faict contre le prisonnier, & en quelz il fault enuoyer le prisonnier avecques son dict proces: & en quel estat le prisonnier doibt estre pendant la cause d'appel: & en quelles prisons, ou en celles du iuge a quo, ou du iuge ad quē. Plus nous auons dict commēt il fault contumacer les defail-lans en cause d'appel: & quelle forme de proceder on tient quand toutes les parties comparent: & ce que le iuge doibt considerer pour bailler sentēce en ces appellations: & quand on ha accoustumé renuoyer le condamné au lieu ou il ha delinquē pour l'executer: & quand le procureur du Roy ou autre procureur general ou fiscal d'un autre seigneur, ou le seigneur doibt estre condamné es despens, dommages & interestz de l'accusé eslargi, ou absolt. Parapres nous auons declairé les cas esquelz on passe oultre quant a faire le proces criminel, & a executer les appointemens ou sentences donnees en matieres crimineles, nonobstans oppositions ou appellations quelconques, & sans preiudice d'icelles: soit pour le regard des iuges ordinaires, ou des Preuostz des Mareschaux: de la iurisdiction & pouuoir desquelz auons traicté sommairement. Finablement nous auons declairé comment on procede a l'execution des sentēces donnees en matieres crimineles, & en quel cas sans appel on surseoit l'execution d'icelles.

Parquoy doncques ueu ce qu'auons traicté on premier &
second

second liure, on peut clairement cognoistre quelle forme de proceder nous tenons en causes ciuiles, tant en premiere instance, qu'en causes d'appel. Et par ce qu'auons dict es tiers & quart liures, pareillement il est aisé a scauoir quelle maniere de proceder on ha de coustume garder en causes crimineles. Et a ce moyen tout l'ordre iudiciaire, tant en ciuilité, qu'en criminalité, est complet & absolu.

Je n'ignore point que plusieurs n'eussent peu traicter ceste matiere plus elegamment & copieusement, mesmement en ce siecle fertile & abondant en gens de scauoir & d'eloquence. Toutesfois parautant que nul l'entreprenoit, i'ay bien voulu l'entreprendre. Car tout ainsi qu'en un corps y ha plusieurs membres: dont les aucuns sont fort & puissans, les autres debiles: & les uns honestes, & les autres deshonestes: & tous neantmoins font leurs offices: & ceulx qui sont debiles ne cessent, pource qu'il en y ha de plus puissans: cōme dict trefelegamment S. Paul au 12. chap. de la 1. epistre aux Corint. aussi la Repub. est un corps, dont nous sommes tous membres. Et combien qu'en icelle y en ayt plusieurs plus excellens les uns que les autres: toutesfois les moindres ne doibuent estre ocieux, & differer ce qu'ilz peuuent faire pour l'utilité de la Republique. Pour ceste cause Marc Tulle Cicero nous admoneste, que si aucun est destitué des souuerains dons de nature, ou n'est pas instruit de science des plus nobles artz, qu'il tienne le reng qu'il pourra acquerir. Car encores est chose honeste (dict il) qu'un homme qui pretend aux premiers reings, puisse paruenir & demourer es secōds & es tiers. Certes au temps iadis a Rome Cn. Flavius greffier ou secretaire d'Appius Claudius, receut grand gré & loyer du peuple Romain, parce qu'il manifesta & communiqua au peuple le liure des actions ou formes de proceder en iugemens,

pour raison des differens qui suruiennent entre les hommes: lesquelles actions ledict Appius auoit mis par ordre. Car au parauant les Pontifes Romains seulx les auoyent en leur puissance: & n'estoit pas permis au peuple de les scauoir, ne les inteter ainsi qu'il uouloit: tellemēt que ledict Flavius pour raison dudit furt, premierement fut Tribun du peuple, par apres Edile, & au dernier Senateur. En ceste maniere par auant que ceste pratique iudiciaire par cy deuant ha esté retenue en la puissance des practiciens & aduocatx: lequelx ne la communiquoyent en public a tous, ains seulement a ceulx qui les en alloient consulter avecques dons, & salaires honnestes: il m'a semblé que feroye chose agreable si nō a tous, pour le moins aux gens de biē studieux du proſict public, & mesmemēt aux ieunes gens qui uulēt ſuyuir cest estat, si ie mettoye en lumiere le talent qu'il ha pieu a Dieu me departir de la cognoissance de ceste pratique. Voire i'ose dire ma cause estre meilleure que celle dudit Flavius. Car il fut desloyal enuers son maistre, en luy ſoustrayant son liure. Par maniere que si le droict eust esté superieur sur la force du peuple, tant ſ'en fault qu'il n'en eust receu loyer, qu'il en eust eu peine, comme il auoit meritē. Mais quant a moy, ie n'ay rien ſoustraiēt a autrui: mais ce que les autres tenoyēt par deuers eulx caché, & que de public ilx auoyent faiēt propre, i'ay traouillē à le retirer d'eulx, & le communiquer a un chascun. Car combien que depuis ladiēte communication faiēte par ledict Flavius, lesdictes actions eussent esté communes, & semblablement la pratique iudiciaire: neantmoins aucuns l'auoyēt faiēt ppre a eulx, de sorte qu'ilx en retiroyēt grans proſictx, & cōme usures non ſeulement par moys ainsi que anciennement elles se payoient: mais aussi par iours & heures, dont ilx auroyent acquis grosses seigneuries & possessions.

*seſſions. Toutesſois l'euenement du loyer n'ha pas eſté en mō
 endroict tel que enuers ledict Flauius. Car combien que l'aye
 adreſſé ceſtuy mon œuure a gens de grād credit & autho
 rité: neantmoins par leur moyen ne autrement, ie n'eu ia
 mais promotiō en aucun eſtat, ne receu autre proſiect, ſinō des
 libraires, qui ſe uoyans recevoir gaing de mes œuures, m'en
 ont faiēt quelque participatiō. Qui eſt choſe biē indigne d'un
 tel tēps que le preſēt florifſāt en tāt de bōnes lettres, & gēs
 de ſi grād ſcauoir, q̄ les pōures libraires promeuuent plus les
 lettres & gēs lettres, que les princes & ceulx qui ont credit
 avec eulx: ains on voit promouuoir plus de gēs en eſtat &
 offices par autres moyens, que par lettres & uertuz: iaſoit
 qu'aucū ſoiēt gēs ſcauās & uertueux. laquelle pl'ainte ie p
 teſte deuāt Dieu & le mōde ne faire tāt pour moy, que pour
 pluſieurs gēs ſcauās & de lettres, qui ont fort biē merite de la
 Republique, & ne ſont aucunemēt auāce. Et afin qu'on co
 gnoiſſe pour l'aduenir l'ingratitude de ce ſiecle: & qu'on n'en
 attribue point laus & hōneur a ceulx qui ne lōt merité: auſ
 ſi que noz ſuccęſſurs ſoyēt plus enclins a remunerer les hō
 neſtes labeurs, qui ſcrōt mis pour profiter a la Repub. & que
 par le moyen du loyer qui ſera propoſé pour ſuyuir les actes
 uertueux & utiles au biē public, la poſterité ne ſoit poīt oy
 ſeuſe. Cōbien que le loyer de Vertu ſoit aſſez ample, qui repoſe
 es cieulx, & que Vertu ſoit a ſoymeſme aſſez grād & ma
 niſte theatre & eſchafault pour eſtre ueue & admiree, ſans
 chercher autre predicatiō & louāge: toutesſois le loyer que
 lon en recoit encores des hommes, anime touſiours a plus tra
 uailer en faiēt uertueux. Dōcques unchaſcū puiſſe librement
 uſer & fruir de ceſte praētique iudiciaire, par noſtre diligēce
 miſe & reduiēt en ordre & maniere d'art, & expoſee en pu
 blic nō ſeulement en Latin, mais auſſi en noſtre lāgue Frācoiſe.*



Table sur les quatre liures des Institutions forenses.

A.

D eux manieres d'accusateurs. 491	n'obeist a iustice en autre accusation contre elle intentee 545
Les solénitez requises en accusation aujourdhuy abolies. 491	L'accusé ne doit estre eslargi, ains restrainct, pendans les confrontations 552
Iusques a quand l'accusateur est tenu prisonnier en partie formee. 496	De n'estre a la cōfession d'un accusé, s'il n'appert du cas confessé par ailleurs 580
L'accusé comment doit comparoir. Cherchez en Comparoir. 496	Quand l'accusé appellât n'est tenu de releuer 593
L'accusé comparant est arresté, & oy sur les charges & informations. 515	Des acquiescemens 441
L'accusé conuenu pardeuant iuge incompetent, ha deux remedes. 520	Quand on peut acquiescer sans amende 441. & 442
De punir les accusateurs calumniateurs 523	Commēt on doit acquiescer en proces par escript, & de dens quel temps 442
Après le declinatoire uuydé, l'accusé doit estre oy sur l'information 541	Quand on doit signifier la procuracion receue pour acquiescer 443
Comment l'accusé est oy & interrogué 541	Diuision des actions, & definition d'icelles 2
L'accusateur partie ciuile ne est receuable a accuser, qui	Il n'est mestier exprimer le nom de l'action 61
	Si apres auoir formé demāde simple, on peult accumuler l'action

L'action hypothecaire 85
 Cessio d'actio criminele 548
 L'action hypothecaire ioincte
 a la personnele n'empesche
 le renuoy d'un clerc parde-
 uant son iuge d'Eglise 129
 Action d'iniures annuele: &
 comment on y doit proce-
 der 168
 Action sur offre de retraict
 annuele 169
 Lon n'est poit releue de perē-
 ptio d'actio annueles 169
 Le defendeur en actio peti-
 toire peut tendre a fin de
 non proceder iusques a ce
 qu'il soit aetuellemēt posses-
 seur, s'il est empesché par
 le demandeur 172
 De action negatoire: & des
 actio ressemblas petitoires,
 lesquelles ne le sont 172
 Comment on doit prendre
 adioinct, & du serment des
 tesmoins, & de la forme
 de les examiner 207
 Quelles personnes peuuent
 estre prises pour adioinct
 en comisio d'enqueste 203
 Quand il fault mādēmēt du
 iuge pour faire adiourne-
 mens 2

Qui expedie les manders
 pour adiourner, & des
 iournemens libelles
 Comment on doit faire
 iournemens
 Quand on peut bailler adio-
 nemens ailleurs que au cō-
 micile 2
 Cōmēt on doit proceder
 faire adiournemens a son
 de trompe 2
 Les mādemens pour adiour-
 ner en la Cour de Parlemēt
 s'obtiennēt par lettres roy-
 aux: mais les Cōseillers bail-
 lēt les mādēmēs pour ad-
 iourner pardeuant eulx a la
 barre 26
 Esquelz cas on use d'adiour-
 nemēs a son de trōpe 26
 Du premier adiournement a-
 uec intimation, ou sans inti-
 mation 30
 En quelles matieres ou faict
 faire le premier adiourne-
 ment avec intimation 31
 Reigle generale pour bailler
 adiournement avec intima-
 tion 33
 Comment doibuent estre les
 adiournemens garētix 43
 Adiour-

Adiournemēs sur default, en quelles matieres doibuet cō tenir quinzaine 43	si en adueu on traicte la pro- prieté avec la possesiō 78
Si l'adiournement est ualable quand il est baillé au procu- reur de la partie qui ha cō paru une fois 45	si un colō on fermier peut for- mer adueu pour les fruietz de sa ferme ou de sō bail 79
Le iuge peut bailler adiourne- mēt a la partie en personne de son procureur 46	Raison pourquoy preuue d'a- libi est receue en criminali- té apres cōfrōtations de tes- moigs, & nō en ciuilité 241
Quand l'adiournement mal faict est purgé par compa- rition 99	Condamnation d'amēdes an- nuele 169
Des executiōs des adiourne- mens personnelz 499	Qu'ād sōt adiuagees plusieurs amendes, ou une 411
Qu'ād on peut des le cōmēce- ment user d'adiournemēt a trois briefz iours, & adno- tation de biens 501	Amende pour chascun arti- cle croisé 473
Des adiournemens a trois briefz iours 501	La forme des amendes hono- rables 586
Les recolemēs par cōtumace se font apres les adiourne- mēs a trois briefs iours 501	En quelz cas on cōdamne en amende honorable 586
Adnotation de biens 500 & 501.	Le Prince remet l'amende ho- norable 587
De la maniere de former ad- ueuz 76	Amende pecuniaire 587
Delirance doibt estre faicte au possesseur q. auoit la cho- se aduouee auparauāt l'ad- ueu, en baillāt caution 77	On n'est tenu de demander Apostres 378
	Trois manieres d'Apostres en Cour d'eglise 380
	Cas au quel on peut appeller omisso medio 124
	Quand on peut appeller en parlemēt d'un appoictemēt donné par les Esleuz 124
	Mesieurs

Messieurs des requestes & Cōseruateurs ne cognoissent des causes d'appel interie. Eté des executeurs de leurs sentences	151	De n'appeller omis le moy. en	385
Appel de l'adiournement du sergent, n'empesche point la contumace	366	En quelz cas la Cour de Parlement cognoist du principal avecques l'article d'appel	385
Appel d'une prinse de corps, n'empesche point qu'elle ne soit executee	366	En quelz cas on doit releuer niement & sans moyen es Cours de Parlement	386
Appel du decret d'un adiournemēt personnel quand est ualable, ou non	367	A qui on doit appeller des iuges deleguez	387
On ne peut appeller de l'ostroy de lettres royaux	368	A qui on doit appeller d'un iuge faisant enqueste uenāt de son siege	387
Appel de l'execution d'une sentence disinitue a quoy uault	368	A qui on appelle d'un iuge exerçant la iurisdiction tēporelle de la seigneurie appartenant aux Eglises	388
Desertion d'appel	373	On appelle comme d'abus en la Cour de Parlement a Paris	388
Definitio d'appellation	375	Appel cōe d'abus des ostroys des reliefz d'appel baillez par les prelatz ecclesiastiques, & de l'execution d'iceulx, comme estās contre la Pragmatique sanctio & Concordatz	390
On ne peut appeller d'une priuee personne	375	Appel comme d'abus de l'ostroy & execution d'un relief d'appel, par leq̃l on tire en	
Dedēs quel temps il fault appeller	377		
Ou est releué de n'auoir appellé illico	377		
Pardeuāt qui doit estre l'appel formé	379		
On appelle en France de la quatriesme sentence	384		

re en Cour ecclesiastique hors le ressort du Parlemēt	391	uant les iuges royaux, & inferieurs, sans lettres roy- aux	400
Des appellations comme d'a- bus interiectees par person- nes ecclesiastiques	393	Comment on se doit pour- uoir, si on est intimé a plus brief ou long iour, que ne porte le relief d'appel	400
La Cour de Parlement co- gnoist des attentatz faictz par dessus les appellations ressortissans en ladiete Cour	394	Les adiournemēs en cas d'ap- pel doibuent estre baillez es iours ordinaires du Parle- ment present	402
Dedēs quel temps il fault re- leuer les appellations par- deuant les iuges inferieurs pardeßsoubz les iuges roys aux	396	Clauses de relieuement d'illi- co, ou autres fins de non re- cevoir gisans en formalité	403
De releuer appellations au greffe	397	Des intimations que fait fai- re la partie aduersē de l'ap- pellant	404
Du temps de releuer appella- tions en la Cour de Parle- ment	397	Le iuge doit estre adiourné en cas d'appel	408
Que doibuent contenir les re- liefz d'appel	398	Les cas esquelz un iuge peut estre intimé	409
Comment doibuent estre spe- cifiez les griefz par les re- liefz d'appel	398	Des appellations comme de deny de iustice	409
Difference des reliefz d'ap- pel prins au greffe, & prins en Chancellerie	399	Differēce d'entre le pays cou- stumier, & de droict escript en causes d'appel	410
On ne peut traicter appella- tions, que en assises parde-		Appellatiōs en adherāt doib- uent estre releuees	411
		Appellatiōs personnelles	412
		Quand l'appel d'une partie peut	

- peut empescher que les autres parties ne pcedent par deuant le iuge a quo en la cause ou ha esté interiecté l'appel 412
 Cōment doit estre releué un appel interiecté de l'exécution faicte on pais coustumier d'un arest, ou sentence donnée on pais de droict escript 413
 L'appellant doit iustifier son appel 426
 L'appellant comment doit coparoir. Cherchez en Comparoir
 De plaider sur le chāp en appellations uerbales 428
 De defendre a toutes fins en causes d'appel 428
 De uuyder les appellations uerbales sur le champ 429
 Des appellations interiectées des sentences données par contumace 430
 Des manieres de uuyder appellations 441
 Cōmēt on se doit desister de l'appel & dedens quel tēps 443
 Quand il fault faire signifier le desistemēt d'appel a partie aduerse 443
 Quelle offre on doit faire, quand on se ueult desister apres la huiētaine d'un appel 444
 En quelles matieres on peut faire anticiper dedens la huiētaine octroyee pour delaisser l'appel 444
 A quelles personnes on doit signifier le desistemēt 445
 Le procureur ayant charge d'appeler peut delaisser son appel, iasoit que sa procuration ne le porte 446
 Dedēs quel temps on peut resnōcer a l'appel selon droict commun 446
 Apres s'estre desisté de l'appel, si on peut encore appeler: & si lors le iuge nonobstāt le secōd appel, peut executer sa sentence 446
 Si l'executiō encōmēcée de la sentēce on appelle, on doit paracheuer l'executiō 447
 De mettre un appel au neant par lettres royaux, & dedens quel temps 448
 Fault estre releué de l'illico, & auoir permission d'executer

cuter les lettres hors le tēps
de releuer,quād on met la p
pel au neāt par lettres roy-
aux 448

s'il est meilleur de adresser
l'exécution des lettres roy-
aux pour mettre un appel
au neant a un sergent,ou a
un iuge 448

Quelle offre on doit faire
quand on met une appella-
tion au neant par lettres
sans appeller la partie des-
uant le iuge qui ha donné
la sentence 449

Quand on peut mettre l'ap-
pel, & ce dont ha esté ap-
pellé, au neant 449

La Cour met l'appel & ce
dont ha esté appelé, au ne-
ant 452

De conuertir appellations en
oppositions 452

Appellations interiectées des
exploict & des sergens, ont
nature d'opposition 453

Comment on doit appeller
d'un sergent 453

En decidant la cause d'appel,
fault sur tout considerer si
l'appellant ha interest, ou

non 462

Appel comme de deny de iu-
stice 534

Quand il n'y ha que la paro-
tie ciuile appellant de Pestar-
gissement, comment le pri-
sonnier se doit pouruoir
597 & 598

De l'appointement a produi-
re 230

Quand un appointement
est reparable en disinitue
351

De faire retracter un arest
par requeste ciuile 467

Arest des grands iours d'An-
giers par lequel est retracté
un arest des grāds iours de
Bretaigne 467

Arest par lequel fut receue
aux grands iours d'Angiers
une appellation interiectée
de l'entreprinse faicte par
les Generaux sur le faict
de la iustice des aydes a Pa-
ris, & tout ce qui auoit esté
par eulx faict auroit esté
mis au neant, & inhibé
aux parties de non se pour-
suyre pardeuant lesdictz
Generaux 468

Des as-

Des asseurtez 32
Assignatiō a certain iour &
lieu, & generallyment aux
autres iours, lieux & heu-
res qu'on uaquera au faict
de l'enqueste, si elle est ua-
lable 208

Audiences a tour de roolle,
& par placetx 428

B.

De bannissement 591
Comment on procede a con-
traindre le beneficié a faire
les reparations de son bene-
fice 55

Difference entre un heritier
& un successeur en benefi-
ce: & des resignans & re-
signataires, quād mort en-
treuient 317

Bigamie 528

Les iuges lays non royaux
peuvent punir les blasphemateurs
deprehendex en blasphemies 523

Imploration du bras secu-
lier 537

C

Comment doit estre enten-

du que cas sur cas n'ha poit
de lieu 72

Cas priuilegiez en matieres
crimineles dont priuatiues
ment la cognoissance en ap-
partient aux iuges royaux
516

Commēt se doit faire le pro-
ces quant au cas priuilegié,
& quant au delict com-
mun 531

Si le iuge d'eglise interroque
mal un prisonnier clerc re-
uoyé a la charge du cas pri-
uilegié, cōment le iuge royal
& procureur du Roy y peu-
uent pouruoir 532

Quelle sentence le iuge royal
doibt bailler quant au cas
priuilegié 532

Punition du delict commun
n'empesche la punition du
cas priuilegié 532

Eslargi quant au delict com-
mū ne peut estre restrainct
par le iuge royal 533

Remede pour pouruoir, quād
les officiers royaux ne ueu-
lent assister quant a la facō
du proces pour le cas pri-
uilegié 533

De l'appel

De l'appel comme de deny de
iustice des iuges royaux &
ecclesiastiques ne uoulans
faire le proces du renuoyé a
la charge du cas priuilegié,
& des intimations en cas
d'appel, comme de deny de
iustice 534

separation du delict commun
& du cas priuilegié 535

Le procureur du Roy peut as
sister en un proces renuoyé
pardeuant le iuge d'Eglise,
sans la charge du cas pri
uilegié 536

En quel lieu on doit expe
dier les causes 1

Des causes dont la cognois
sance appartient aux iuges
royaux, & non a autres
122

De ceulx qui ont leurs cau
ses cōmises pardeuant mes
seigneurs des requestes du
Palais a Paris 144

Les aduocatx & procureurs
du Roy ne peuvent rien pré
dre soubx couleur de leur
peine en une cause criminele
583

Il n'y ha conclusion ne renō

ciation en cause criminele
586

Caution que baille le recredē
tiaire d'un benefice 373

Cas ou est permis recours
aux censures ecclesiastiques
332

Cessio d'actio criminele 548

Quand le cedāt apres la ces
sion peut agir 548

D'une chambre en Parlemēt,
pour decider par chascun
iour les appellations uerba
les 381

On se peut pouruoir par deux
manieres alencontre des ci
tations donnees contre gēs
layes 134

Les iuges doivent uoir les ci
tations auant que decerner
inhibitions 136

Esquelx cas un clerc peut e
stre conuenu pardeuant un
iuge lay 127

L'action hypothecaire ioincte
a la personne n'empesche
le renuoy d'un clerc parde
uant son iuge d'Eglise 129

Vn prestre ou clerc ne peut
estre cōdamné par un iuge
lay a garnir la main apres
s la

- la recognoissance de sa ce-
dule 129
- Crimes & autres causes pour
lesquelles un clerc ou pre-
stre peut estre debouté de
son priuilege de clericature
525
- Vn clerc marié ne retient son
priuilege que quant a estre
reūoyé pardeuant son iuge
ecclesiastique en cause cri-
minele 526
- Les clerks renuoyez a l'Egli-
se, nonobstāt qu'ilz eussent
habillemens de personnes
layes de leur estat 527
- L'habillement constituoit en
possession de clericature
528
- Bigamie priue du priuilege de
clericature: & comment on
encourt Bigamie 528
- Les officiers royaux ayans
charge de criminalité, per-
dent le priuilege de clERICA-
ture 529
- Le clerc auant que estre ren-
uoyé, doibt estre condamné
en la prouision d'alimens
& autres 529
- Comment un clerc est reūoyé
pardeuant son iuge d'Egli-
se 530
- Le iuge lay ne peut punir un
clerc en sa personne 538
- Le clerc appellant du iuge
royal, est renuoyé a son iuge
d'Eglise, sans uuyder Partis
cle de l'appel: aïs est la pro-
cedure mise au neant 504
- Commissaires ad partes 203
- Les parties doibuent conue-
nir de commissaires auant
que le iuge les commette,
sinon que ce soit luy, l'en-
questeur, ou le greffier
204
- De recusation des commissai-
res, & qu'ilz doibuent fai-
re s'ilz sont refusez 205
- Comment les commissaires
doibuēt passer oultre nōob-
stans aucuns empeschemens
a culx baillez 212
- Les commissaires establis au
regime de chose immobili-
re saisie par execution, com-
ment ilz doibuent exercer
leur commission 287
- De l'opposition que faiēt le
debteur ou un tiers contre
la saisie de ses biens 288

Les com-

Les commissaires establis au
regime d'une chose saisie,
sont tenus rendre compte
par chascune annee 289

Quel doit estre le compte
des commissaires en cest af-
faire 291

Comment l'auditeur de cõpte
condamne les commissaires
a payer le reliqua 293

L'heritier d'un commissaire
mourant durant la commis-
sion, n'est tenu exercer la
mesme commission 293

Committimus. Cherchez en
Debitis.

Si la qualite du committimus
des requestes est nyee, n'en
fault informer pardeuant le
iuge ordinaire: & sans au-
tre discussion fault qu'il re-
uoye, sauf a debatre le ren-
uoy pardeuant mesdicts sei-
gneurs. Autre chose est du
renuoy d'un escholier. 144

Quelles personnes doibnent
auoir clause speciale en leur
committimus 145

De quelles pieces on ha com-
munication en proces 209

Si l'accuse compare, & on ne
puisse trouuer les informa-
tions, quelle expedition luy
doibt estre faicte 511

Que lon doit faire, quand la
partie ciulle ne compare, &
le procureur du Roy com-
pare, & requiert estre pro-
cedé alencontre du delin-
quant 511

En quelz cas l'accusé est
tenu comparoir en l'es-
tat en la cause d'appel
596.

Quand le procureur du Roy
est appellant, comment
l'intimé doit comparoir
599

Appellant du decret d'ad-
iournement. personnel, ou
de prinse de corps, doit cõ-
paroir en l'estat dudit de-
cret 599

Quand le procureur du Roy
se porte appellant du de-
cret comme de grief con-
traire, n'est l'accusé tenu
comparoir en l'estat du de-
cret 599

Quand l'accusé est cõdamné
s ij en quelque

en quelque somme de deniers, il doit consigner a ce qu'il ne soit tenu comparoir en l'estat, & ce quant a l'amende du Roy, & bailler pleiges quant a l'amende de partie ciuile	600	uoir pretendu par aucuns Curez	67
Cas ou ne sont necessaires lettres royaux pour faire compensation, & par quel moyen on empesche la garnison de main	189	De complaincte pour raison d'office de quelque iurisdiction	69
La maniere de proposer en matiere de complaincte en cas de saisine & de nouuelleté	61	Esquelz cas on peut former complaincte contre le seigneur qui ha esté l'office par luy donné	70
On peut former complaincte par lettres royaux	63	Cöplaiete sur cöplaincte n'ha point de lieu, ains se fault opposer a la cöplaincte	71
Que c'est ramener a effect la complaincte sur le lieu, & qu'il sert	64	En defendant en la cöplaincte, on trouble le demandeur	73
Des trois chefz de complaincte	64	En quelz cas complaincte peut estre formee pour meubles	167
Pour quelles choses on peut former complaincte, & de complaincte pour raison de dixmes	65	Prouision extraordinaire n'ha lieu en complaincte	171
De complaincte pour raison de rente	66	On ne peut former complaincte pour un exploict de iustice	187
De complaincte pour raison de boicellage, qui est un de-		Qu'on doit faire quand partie allegue cöpromis ou promesse de non proceder, ou transactiö final: & comēt se doit entēdre que tous iugemens sont absolutaires	89
		Compulsoire	234
		De la conclusion comme en proces par escript.	442
		De prendre	

De prèdre conclusions en matieres crimineles par les parties demanderesses 583	tiennent au seigneur hault iusticier 576
De la clause accoustumee en conclusions 584	Le Roy ne doibt unir a son domaine les biens immeubles confisqueẝ 577
De respõdre par le defendeur aux conclusions des demandeurs par attenuatiõ 584	Des confortemains la saisie tenant nonobstant opposition ou appellation quelconque 8
Si quand le corps est confisque, les biens sont confisqueẝ 574	L'accusè ne doibt estre eslargi pendant les confrontations 552
L'amende ne doibt equipoller aux biens, ou il y ha confiscation 574	De restraindre l'accusè pendās les cõfrontations 552
La cour confisque les biens a qui il appartiendra 575	Confrontation de tesmoings. Cherchez en Tesmoing
A qui appartiennent les biès confisqueẝ 575	De faire canceler ou rayer les congez a default de comparition 601
Vn prestre obtient lettres du Roy pour estre restitué a ses immeubles 576	Comment nous prenons selon nostre stile la cause estre cõtestee 60
Le Roy peut remettre la publication ou confiscation applicable a autre que a luy, auant que elle soit iugee 576	Il n'y ha aucun delay auant contestation en cause, fors le delay de garent 88
Les meubles du prestre appartiennent en cas de confiscation a l'Euesque 576	Contestation en cause 192
Les immeubles confisqueẝ par le iuge d'Eglise appartiennent au seigneur hault iusticier 576	Exceptions qui de droit empeschent contestation en cause 194
	Cõtinuation des causes d'un Parlement a l'autre prochain 194

chain 381
 Rescission de contractz se
 doit demander dedens dix
 ans 181
 L'exemple de la contrauc-
 tion es saintz decretz par
 la Pragmatique sanction
 389
 L'exemple de la contrauc-
 tion es ordonnances roy-
 aux 389
 Exemple de la contrauention
 es loix & saintz decretz
 390
 Contredictz 437
 Contredictz & saluations
 236
 Comment on donne sentence
 par contumace apres deux
 defaultz 41
 S'il fault condamner le con-
 tumax es despens des de-
 faultz auant que doner sen-
 tence definitive 42
 si le contumax est receuable
 a s'opposer a l'exécution de
 la sentence contre luy don-
 nee, ou non 44
 De la contumace apres con-
 testation en cause 58
 Comment on procede a cotu-

macer la partie absente en
 cause d'appel 417
 Des sentences donnees par cō-
 tumace en causes d'appel
 418
 Des renuoyz qu'il fault faire
 en iugeant les causes d'ap-
 pel 418
 Comment on procede a con-
 tumacer le defaillant en cau-
 ses d'appel pendans en la
 Cour de Parlement 419
 & 420
 De contumacer le defaillant
 pardeuant les commissaires
 a la barre de la Cour 423
 Interpretation de l'ordonnance
 parlant des vrais contu-
 max 431
 Sentences de contumace ne se
 mettent toutes au neant
 449
 Les defaultz & sentence de
 cotumace se mettēt au neāt
 en resumdant despens 450
 A quel iuge on doit adres-
 ser les lettres tendans a met-
 tre les defaultz & sentence
 au neant 450
 Sentence donnee parties oyes
 ne se peut mettre au neant,
 sinon

- sinon quand il n'est question
 que d'un delay pour faire
 preuues, ou pour produire
 450.
- Si la sentēce est donnee par-
 ties oyes, & qu'on la mette
 au neāt par lettres royaux,
 par quel remede on y doit
 pouruoir 451
- Peine contre ceulx qui met-
 tent les defaultz & cōtu-
 mace au neant 451
- Le condamné par contuma-
 ce peut appeller. & faire
 mettre les defaultz, sentē-
 ce de contumace, & son ap-
 pel au neant 507
- Les arestz confirmatifz des
 sentences donnees par con-
 tumace doibuent estre exe-
 cutez quant a l'interest de
 partie ciuile seulement, &
 non du Roy 508
- L'appel de la partie ciuile n'e-
 pesche que le contumax ne
 puisse faire mettre au neāt
 les defaultz, sentence de cō-
 tumace, & les appellations
 de luy & de sa partie aduer-
 se, en refundant les despens
 d'autout 509
- Copies ou Vidimus 231
- De cotter par les aduocatx
 es pieces ce qui faict pour
 eulx 428
- Les coustumes du pais de
 Poictou redigees par escript
 & reformees dernièrement
 font foy 219
- Le creancier faict executer
 l'obligation faicte pour luy
 par les notaires stipulans
 pour luy absent: & que l'of-
 fre de bailler acheteur de
 biens, n'empesche que le ser-
 gent ne garnisse la main
 20.
- A la uente des biens immeu-
 bles du condāné saiziz pour
 debte, par crie, toutes les
 solennitez y doibuent estre
 gardees 294
- Le debteur peut renöcer aux
 solennitez des criees 296
- Comment il fault proceder es
 oppositions qui se font con-
 tre lesdictes criees 297
- Le iuge donnera sentence en
 ces oppositions selon l'or-
 dre de priorite & posteros-
 rite que monstrent les-
 dictz opposans 300
- s iij De ceulx

De ceulx qui s'opposent en
uertu des cedules qu'ilz
ont 300

Le poursuuant des crieés
doibt incontinent apres icel
les faictes les faire certifier:

Et la maniere de la certifi-
cation 304

Comment le dernier encheris-
seur est mis en possession
des choses adiugees par
cries 305

L'enchere dure iusques a tāt
que le decret soit scellé 306

Les solēnitēz des crieés pro-
cedans tant par decret ou
adiudicatio, que par lettres
obligatoires passees soubz
seel royal sont pareilles 311

Commēt lon doit adiourner
les heritiers de celluy avec
qui le proces de crieés est
pēdant, quād il est decedé,
pour reprendre ou repudier
ledict proces: Et des des-
faultz q's'y cōmettent 313

Croiser les articles de la taxe
de despens. Cherchez en
Despens.

D.

Debitis. Cherchez en Com-

mittimus.

Des mandēmēs de debitis, Et
de l'exécution d'iceulx 11

De la difference des mande-
mens de debitis de la Chan-
cellerie, Et de ceulx que dō-
nent les iuges royaux ressor-
tissans sans moyen en la
Cour 14

si par uertu d'une cedula re-
cogneue, Et d'un mandēmēt
de debitis on peut executer
19.

si le cēsionnaire Et la fēme
peuent faire mettre a execu-
tion les debtes cedees Et ap-
partenās a la femme a cau-
se de la communauté d'entre
son feu mari Et elle 18

Forme de proceder par execu-
tion sur les debtes deues au
debteur ou condanné 319

De uendre l'office du débiteur
condanné qui n'est solu-
ble en autres biens 321

Tous condannēz de debtes
peuent estre contrainctz a
faire cēsion des droictz Et
actions qui leur competēt a
ceulx enuers lesquelz ilz
sont condannēz 323

Decimes

Decimes imposees sur les benefices, quelle charge c'est, ou reale, ou personnelle 316
 Des matieres esquelles on ne peut decliner de sur & iurisdiction 152
 De empescher que les coupables de mesme delict, ne puissent decliner du iuge qui ha commence le proces d'un des chargez 554
 Des defaultz avec tout le profit, ou defaultz simples 30
 La maniere de proceder au iugement du default uenant de l'adiournement donne avec intimation 35
 Quand on doit appeller d'un default donne avec tout le profit 38
 Des matieres esquelles il fault obtenir deux defaultz pour auoir sentece par contumace 38
 Le iuge n'est contrainct adiuuger le profit des defaultz sur le champ. 43
 Le default duquel on ha paye despēs a partie, si peut seruir avecques un autre de-

fault pour obtenir sentence de contumace ou non 49
 Quand l'une ne l'autre partie compare au iour du premier adiournement qui n'estchoit a iour de Cour: si le default que l'une des parties prend a la prochaine Cour ensuyuant, est bon & ualable 50
 Des oppositions baillees & faictes a ce que aucuns defaultz ne soyent iugez, & si on peut les iuger nonobstant lesdictes oppositions: & si il n'y ha comparition au iour assigne sur l'opposition par l'opposant mesmes, si ce nonobstant partie aduerse peut faire iuger le default. 52
 Defaultz ne peuuent estre iugez apres l'an & iour que ilz ont este baillez 53
 Qui est requis pour faire iuger defaultz 53
 Du profit des defaultz donnez contre l'adiourne, pour declarer si & pour quelle portio il est heritier du defunct 54

Comment

- Cōment on pcede cōtre le demandeur defaillant auant contestation en cause 56
- Le defendeur est enuoyé de l'instance, & non de l'actiō du demandeur defaillant: & quelle difference y ha entre les deux 56
- Le defendeur adiourné en taxation de despens, est enuoyé des despens, si le demandeur default au iour assigné, selon la coustume de Roictou 57
- De la difference des congez & defaultz donnez en la Cour de parlement, & de ceulx qui sont donnez es Cours Royales 57
- On ha regard au temps du default donné, & non au temps du sauf, s'il n'est rabatu dedens ledict temps, & que le default soit iugé 58
- Defaultz en matiere criminelle, & pfect d'iceulx 500
- Du profict du premier default procedant d'adiournement personnel 500
- Du profict du second default, & de adnotation des biens du defaillant 500
- Des exceptions & defenses dilatoires, & des peremptoires, & quand elles se peuuent cumuler, ou se doibuent separeement proposer 156
- Defeses qu'on propose en matiere de complaincte 157
- Degradation des prestres 538
- Degrez de la iurisdiction ou iustice de France 382
- Il seroit utile supprimer les degrez des iurdictions du Royaume 384
- Delaisser son appel. Cherchez en Appel
- De quelz delictz cognoissent les iuges des iustices moyennes, & de quelz ceulx de la haulte 490
- Delict commun 531 & 532 & 533 & 535 & 536
- Le delinquant doibt estre cōuenueu on lieu de son domicile en cause criminelle, fors en un cas 518
- Deprecation ou Remission, & de purgation ou innocence 572
- Desister

Desister de son appel. Cherchez en Appel

Quand aucune de plusieurs parties condamnée en despens pour faire quelque chose, ne la fait dedens le temps, & les autres le fût, ladicte partie delayant doit entierement lesdictz despens 88

Des despens preiudiciaux 113

Purgation de demeure n'est reçue pour rabatre despens, & qu'on ne peut auoir double profit d'un default 114

Des despens de l'adiournement baillé pardeuant iuge incompetent 118

Comment se doibuent taxer les despens de ceulx qui apres l'emprisonnement de leurs personnes sont excoyez absoulz 265

Causés esquelles lon ne adiuage point despens 266

Taxation de despens par qui se fait. 268

Comment & en quel lieu despens doiuent estre taxez 269

Voyages taxables es despens, quatre ou cinq 270

Quel doit estre le salaire du iuge q. taxe les despens 270

Ne fault reiterer taxation de despens une fois arrestee 271

Taxation de despens d'homme & cheual en uoyages, chominage de gaing par emprisonnement, & de perdition de credit par executiõ reale de biens. 272

Celluy qui ha esté receu a faire quelque chose en cause en refundant preallablement les despens, s'il se porte appellant de la taxe desdictz despens, ce que il ha fait doit estre reiecté en cause ciuile, mais non en cause criminele 438

De la condamnation des despens en cause d'appel pardeuant les iuges inferieurs 456

De la condamnation des despens en causes d'appel, en la Cour de Parlement 457

L'intimé

L'intimé n'est tenu de rendre la moitié des espices a l'appellant qui gagne les despens de la cause principale 458

Quand le demandeur demande plus qu'il ne luy est deu, & le defendeur n'offre ce qu'il doit, comment se doit faire la condamnation des despens: & aussi si ledit defendeur offre ce qu'il doit 458

De la taxe des despens que font mesieurs de Parlement 469

La taxe des despens taxez en la Cour de parlement doit estre soubz signee des deux Conseillers commis pour les taxer 470

L'appel de la taxe d'un article n'empesche point que les Conseillers ne procedent a la taxe des autres articles. Autre chose est des iuges estans pardeffoubz les Royaumes 470

De appeller la partie ou le procureur a la taxe des despens 470

Les procureurs contrainctz de comparoir a la taxe des despens a la peine de l'amende 471

De mettre a execution la taxe faicte en presence des procureurs des parties 471
On n'est receuable comme appellant de la taxe de despens faicte en presence des procureurs des parties 472

De croiser les articles de la taxe de despens auant que conclure comme en proces par escript 472

Amende pour chascun article croisé 473

Si pendant proces on appointe du principal, sans faire mention des despens, scauoir si les despens sont remis: & qui les peut demander, le demandeur ou defendeur. 476

L'instigateur est tenu des despens, dommages & interrestz de l'accusé eslargi ou enuoyé absoulz, fors en certains cas cymis 493

De desseuree 107
De ele-

De election de domicile , &
constitution de procureur

91

si une partie elit domicile, si
un tiers avecques lequel ne
ha esté faicte ladiète ele-
ction, s'en pourra bien ay-
der, ou mesme partie en au-
tre instance 92

si plusieurs defendeurs sont
tenus elire domicile en mes-
me maison 92

De constituer procureur &
elire domicile en faisant
constituer prisonnier l'accu-
sé 570

De limiter la condamnation
de dommages & interestz
585

Du profit d'arbitrer & li-
quider les dommages &
interestz & certaine somme
pour les parties 587

si le demandeur en liquida-
tion de dommages & in-
terestz prouue certains ar-
ticles, & non tous, s'il doit
auoir tous les despens de
l'instance 588

E

De demander edition de let-

tres

100

Es despens de quelle partie
doibt estre faicte edition de
lettres 101

Quand on doibt determiner
& uuyder l'altercation qui
aduient en une assignation
d'enqueste, auant que pro-
ceder a la facon d'icelle

212

Quelles enquestes le iuge est
tenu commettre a l'enque-
steur, & quelles il peut re-
tenir 203

Peine contre ceulx qui friuo-
lement empeschent la facon
d'une enqueste 215

Des proces uerbaux des en-
questes 216

Forme d'enquerir & oyr un
tesmoing 217

Quand on peut user d'en-
queste par tourbes 219

Le delay pour faire enqueste
obtenu par une partie, est
commun a l'autre 224

Publication d'enqueste 239

Quand les parties sont pre-
stes a ueoir les enquestes en
publication, on assigne iour
auquel l'accusé est tenu de
comparoir

comparoir en l'estat qu'il estoit on temps de l'eslargissement	567	uēt faire, & du tēps auquel ilz doibuent estre faictz	138
Publicatiō d'enqueste en quelz les Cours & matieres ha lieu	243	De l'ordonnance de ne tirer pl ⁹ loing que de quatre iournees par les escholiers	138
De non recoler ou reoyr tesmoins apres publication d'enqueste	243	Commēt l'escolier doibt demāder le renuoy d'une cause pendant pardeuant le iuge ordinaire	140
De prendre appoinctement en droict apres les enquestes ueues ē publicatiō	245	Comment se doibt pouruoir l'escolier alencontre des inhibitions faictes par le iuge au sergent de non renuoyer la cause	140
Si les defendeurs receuz a proces ordinaire doibuent auoir publication d'enqueste	570	L'escolier se doibt ioindre auāt cōtestatiō en cause	141
Proposition d'erreur	463	Quelles matieres l'escolier ne peut faire renuoyer	141
Si en retirant son sac, on renonce a proposition d'erreur	463	Par quel temps les escholiers doibuent iouyr de leur priuilege de fur	141
Dedens quel temps doibuent estre proposez erreurs	465	De requerrir estre receu a uerifier les escriptures priuees pduictes, ou en requerrir recognoissāce ou niance	232
La forme de proceder en proposition d'erreur	465	Escroue des Geoliers	569
En quelles matieres ha lieu proposition d'erreur	466	Le iuge auquel est cōmis l'instruction ou facon du proces, peut eslargir celluy qui se trouue innocent apres le proces parfaict	522
Difference quand l'escolier intente son action en son nom priuē, ou comme ayant transport: & des transports faictz aux escholiers, & des personnes qui les peu-			L'accusē

L'accusé n'est eslargi, que la
uoye extraordinaire ne soit
parfaicte 560

Des Euesques ou prelatz des
quelz le faict est receu 133

Priuilege de l'Euesque de Pa-
ris, quant au renuoy qui luy
doibt estre faict de tous
clercs estans en la consier-
gerie dudit lieu 539

L'Euesque n'est tenu bailler
uicaire hors le lieu de son
siege iudiciaire 539

Cas special auquel l'Euesque
est tenu bailler uicaire hors
son diocese, scauoir est quand
le diocese est hors du Parle-
ment auquel le delict ha es-
té faict 540

Les iuges royaux peuuent
euoquer les causes dont la
cognoissance leur appar-
tient, non autres 122

Comment doibt estre faicte
euocation de cause 123

Le seneschal peut euoquer la
cause pendant pardeuant
Chastellain estant de mes-
me seigneurie, & non d'au-
tre: & quand le iuge supe-
rieur ha cognoissance sur
son inferieur 123

Exactions qu'on faict en le-
uant les amèdes du Roy 601

Examen a futur 220

Quand on peut obtenir exa-
men a futur 220

De la garde & deliurance
dudit examen 221

Cas esquelz n'est permis fai-
re examen a futur 221

Dedens quel temps apres le-
dict examē on doibt se pour-
voir pour le principal, a la
fin duquel on ha faict ledict
examen 221

Examen a futur doibt estre
faict nonobstant que par-
tie aduersē obijce les tes-
moings n'estre de la quali-
té requise 222

De recoler les tesmoings oy-
z par examen a futur 222

Prouision pour s'aider d'un
examen a futur, si les tes-
moings sont mortz auant
estre recolez 222

Exceptiōs & defenses dilatoi-
res, & des perēptoi- res 156

Pour un default un homme
lay ne peut estre excōmunié
par un iuge ecclesiast. 331

Excommunications ne doib-
uent

- uent tendre a restitution de
meubles ou immeubles : &
que les maledictions des cē
sures ecclesiastiques ne doib
uent estre trop execrables
333
- Reuelateurs par nertu d'excō
munication , s'ilz peuuent
demander despens 336
- Comment on doibt proceder
a execution de sentences
268
- Toutes sentences doibuent es
stre executees par le sergēt
dedens l'an 276
- Comment on doibt proceder
a execution & uēdition des
biens du condamné qui re-
fuse ou delaye a payer: &
de salaire du sergent execu-
teur 278
- Executeurs de sentence recu
sables 312
- Maniere d'excuter les sen-
tences par lesquelles on est
condāné a bailler bled, uin,
huyle, &c. 325
- Condamnez qui empeschent
l'execution , ou se cachent
328
- Condamné en action petitoi-
re ou possessoire, empeschant
l'execution , quelle peine il
souffre 344
- De accumuler plusieurs re-
medes d'execution ensemble
346
- si on peut apres auoir prins
quelques biens du condam-
né par execution, retourner
a en prendre d'autres 346
- On faiēt l'execution par uer-
tu de la sentence ou arest
confermant , & non par
uertu de la sentence confers-
mee 462
- Executoire d'arest adressant
aux iuges & sergēs se doibt
entendre chascun en son re-
gard 462
- Mal executans sont condam-
nez es despens, dommages,
& interest 265
- Execution des sentēces de res-
stitution de biens tant meu-
bles que immeubles 341
- Quād est permis de faire ex-
ecution par main forte, ou
militaire: & des despens d'i-
celle 343
- Toutes executions par uertu
d'obligations soubz seel
Royal

royal & authentique, pro-
cedēt nōobstāt l'appel 369

Fault que toutes sentences ou
arestz auant qu'ilz puissent
estre executez par un ser-
gent, soient liquides 476

Les Conseillers ou iuges ne
doibuent retenir l'executiō
d'une sentence si elle ne gist
en cognoissance de cause
476

Exempts & exemptions par
appel 415

Exempt par appel du Cha-
stellain d'une seigneurie non
royale s'il peut estre conues-
nu pardeuant le seneschal
d'icelle seigneurie 416

Comment se doit proposer
exoine en matiere criminele
504

De terminer & uider les
causes d'appel par expediēt
424

Comment on doit faire ex-
traictz 234

F.

De ceulx qui apres l'appoin-
ctement en droit, produisent
faictz nouueaux 251

De receuoir a articuler &
prouuer faictz nouueaux,
tāt par tesmoings que par
iltres en cause d'appel 436

Les manieres de se faire payer
des despens des responses
aux faictz nouueaux & cō-
tredictz 437

Finales du droit commun
n'ont plus de lieu en ce roy-
aume 380

L'appoinctement en preuue,
s'il uuyde les fins de non re-
cevoir 157

Fins de non receuoir introdui-
ctes de droit commun, &
receues en ce royaume 167

Fins de non receuoir en com-
plainte pour raison du tēps
167

Si le torcionnairemēt executé
peut tendre a fin de nō pro-
ceder iusques a ce que les
choses mal executees luy
soient restituees 173

Fins de nō receuoir introdui-
ctes par les ordonnances
royaux 175

Fins de non receuoir baillies
de droit commun non ad-
mises en ce royaume 188

T L'utilité

L'utilité d'alleguer fins de nō
recevoir 429

De faire droict des fins de nō
recevoir sur le champ 430

Fins de non recevoir doibuent
estre alleguees en la contesta
tion 543

Fins de non recevoir usitees
en matiere criminele 545

Fin de non recevoir de retor
quution 546

Fin de non recevoir de transa
ction 547

On peut alleguer transaction
par fin de non recevoir, &
par fin peremptoire 549

Fin de folle intimation 427

On ne doibt forclorre le de
faillant, sinon de ce qu'il
deuoit faire par le dernier
appointement precedent
60.

On ne peut estre forclos de de
clinatoire par les iuges roy
aux ou inferieurs par uer
tu d'un default 136

De la clause, sans autre inui
ction ou forclusion, qui se
met ordinairement en l'ap
pointement en droict 246

Des forclusions apres contes

station en cause d'appel
423.

De faire proceder par forclu
sions apres le proces con
clud & receu pour iuger en
la cause d'appel 441

Sur qui doibuent estre prins
les fraiz du proces crimi
nel 492

Quand on peut prendre le
delinquāt en franchise d'E
glise 514

G.

Du delay de garendz 107

La maniere de sommer & ad
iourner en gariment & re
queste formelle 108

En quelz cas on est receu a
prendre le gariment for
mel, & le garenti mis hors
proces 109

A quelle fin est bon que le ga
renti demeure en proces, &
quand l'execution de la sen
tence se faiēt contre le ga
renti comme contre le ga
rend 109

Quand on doibt faire mon
stree au garend 110

Le garend ne peut rien dire
pour

pour empescher la poursui-
te du principal. sinon demã
der delay pour attraire au-
tres garendz iusques ad ce
qu'il ayt prins le gariment
110.

Iusques a quel temps on peut
sommier en gariment 111

Quelles personnes doibuent
estre appellees en gariment
112.

Quãd le demideur doibt de-
mander delay de garendz
113.

Peine de n'auoir appellé ga-
rendz dedens le delay 113

Qu'il apres le garimẽt prins
on peut reuenir au garenti
qui a esté mis hors proces
114.

Il fault soy adresser en gar-
mẽt alencõtre de celluy dõt
on ha droict immediatẽt,
et non contre celluy dont
son aucteur ha droict 114

Erreur en praictique de faire
adiourner sur default et
auec intimation en garimẽt:
et que lon ne paye despens
de defaultz en garimens
115.

En prenant delay de garent,
on approuue la iurisdiction
115.

Garnison de main par quel
moyen peut estre empeschee
189.

Generaux sur le faict de la iu-
stice des aydes a Paris 468

Les gens du Roy excusẽt de
presumptiõ de calunie 492

Vn greffier, et un cõmis de
luy pour signer 29

Le greffier doibt porter les
sacz pardeuers le iuge de-
dens huietaine 252

Le greffier assiste au iugemẽt
du proces pour escrire les o-
pinions des cõsultans 584

N'est mestier declairer les
griefz en formant l'appel
379.

Comment doibt estre entendu
qu'il suffit d'un grief a l'ap-
pellant 435

De bailler griefz hors le pro-
ces, et respondre a iceulx
437.

De faire registre par lequel
soit contenu que l'appellãt
ha fourni de griefz 439

Comment on doibt entendre

T ij que

que c'est de bailler griefz
hors le proces 440
De ne poser faictz calūnieux
es griefz hors le proces, &
de la peine contre ceulx qui
les proposent 440

H.

Comment on se doit porter
heritier avec le benefice d'in
uentaive 34

Difference entre un heritier
& un successeur en benefi-
ce 317

A quelz heritiers de Poccis
appartient la poursuyte
de l'homicide, aux heritiers
des meubles ou des immeu-
bles 494

I.

si le iuge doit promettre im-
punité 542

Le iuge doit uuyder les inci-
dens le plustost que faire se
pourra, & les gros proces
dedens trois mois, ou six
mois pour le plus tard 256

Incompetence de lieu & de
temps 98

Difference en la maniere d'al-

leguer incompetence 119

Quelles personnes sont te-
nues informer de leurs
qualitez auant entree de
plaid 101

Comment on doit faire in-
formation 496

Quand on est receu a mettre
auant nouuelle informatiō,
& comment 498

Les instrumens passez soubz
Cours d'Eglise, n'ont garni-
son, execution, ue hypothe-
que 31

La forme d'interloquer apres
contestation en cause 549

Quelles personnes peuuent
estre interroguees 202

Intimer, Intimation. Cher-
chez en Appel.

Les commissaires ne peuuent
estre intimex ne adiournez
que en certains cas 407

Le procureur du Roy peut
estre intimé, & adiourné
408

Le iuge lay faict inuentaive
des meubles d'un prestre,
& les seelle 130

Inuentaives aux despēs. de la
succession, & que prouision
ne

ne se doit ioindre au principal 200
 Inuentaie des pieces 230
 Iouissance prouisionale par uertu d'un contract authentique 191
 Definition de Iugement 1
 Diuision de Iugement 2
 Tous iugemēs sont faictz ou par contumace & absence des parties, ou en leur presence 29
 Tous iugemēs sont absolutoirs 89
 Le iuge superieur quand ha cognoissance sur son inferieur 123
 si le iuge ecclesiastique & royal doibuent pas bailler sentences ensemble 535
 Quelles causes peuuent euoquer les iuges royaux quand elles sont pendans pardeuant le iuge d'eglise 137
 Le iuge d'Eglise doit obēir aux inhibitiōs du iuge royal quāt a sursoir la cognoissance de la cause 137
 En quelz cas les iuges appellent au cōseil des aduocatx de leur siege : & que les uieilx aduocats experts sōt

a preferer aux nouueaux uenuz & nō experts 257
 Quād pourra le iuge demander pour la uisitation des proces par le greffier aucune chose aux parties 258
 Le iuge ad quē ne pcut interloquer & adiuger preuue que le iuge a quo debuoit adiuger, sans que le iuge ad quem dic bien ou mal iugé 452
 De emender le iugement en disant mal iugé 456
 Preuostx des Mareschaux passent oultre nonobstant l'appel interiecté d'eulx comme de iuges incompetens 520
 Les decretz de prise de corps se mettent a execution non obstant l'appel comme de iuge incompetent 521
 On peut appeller d'un iuge deniant ce qui est de son arbitre 530
 si le iuge doit promettre impunitē 542
 Comment un iuge doit requerir son pareil, & user de commandement enuers son inferieur 553

En quelles matieres l'homme
lay peut estre conueni de-
uant le iuge d'Eglise 130

L'homme lay se peut porter ap-
pellāt cōme d'abus de la sen-
tēce cōtre luy donnee par le
iuge d'Eglise es cas desquelz
il ne peut cognoistre, jascit q̄
uolūtairēmēt il ayt procedé
pardeuant luy: mais il paye
les despens de la procedure
uolūtairē 132

Quelz Prelatz ou Euesques
peuent decerner citation cō-
tre personnes layes en actiō
personnelle, & de ceulx des-
quelz le faict n'est receu
133.

La forme des lettres inhibi-
toires & cuocatoires que
decernent les iuges royaux
pour raison des causes pen-
dans pardeuant les iuges
d'Eglise lesquelles appartiē-
nēt aux iuges royaux 134

De l'annullation & cassatiō
de la procedure faicte en
Cour ecclesiastique 135

Crimes dōt la cognoissāce ap-
partiēt indifferēmēt aux iu-
ges d'Eglise & lays 522

Crimes dont les iuges ecclesia-
stiques cognoissent cōtre les
personnes layes 525

Degrē de iurisdiccions. Cher-
chez en Degrē.

Les iurisdiccions en ce roya-
me sont patrimoniales 117

Deux remedes pour se four-
voir alencontre des lettres
royaux enenuatiues de iuris-
diction 117

Si le defendeur peut estre re-
leuē d'un acte approbatif
de iurisdiction 121

Diuision des iurisdiccions de
ce royaume repeteē 490

Repetitiō de la distinciō des
personnes & iurisdiccions
521.

L.

Des lettres royaux attributi-
ues de iurisdiction 10

De l'adresse des lettres roy-
aux 11

Pardeuant quelz iuges on
doibt adiourner les opposās
aux commandēmēs faictz
par uertu de lettres obliga-
toires 15

Quelles choses sont requises
en lettres obligatoires pour
les

les mettre a execution 17
 Des lettres executoriales des
 commissions de la Cour de
 Parlemēt, & des requestes
 pour faire enquestes 206
 De p̄duire lettres sine die &
 consule, ou sans date 231
 Comparaison de lettres 233
 Lettres de compulsoire 234
 Lettres royaux d'estat 250
 Des lettres d'abbreuiation en
 causes d'appel 418
 Edition de lettres. Cherchez
 en Edition.
 Profict de former le libelle au
 greffe 9
 En quelz cas parcydeuant on
 usoit d'adiournemens libel-
 les, & quand on doit com-
 mencer proces par uertu de
 lettres royaux 9
 Le lieutenant ciuil ne peut co-
 gnoistre des causes crimine-
 les, ne le criminel des ciui-
 les 121
 Comment se doibuent liquider
 dōmages & interestz 271
 Liquidatiō des fruiēt, & cō-
 mēt l'estimation d'iceulx se
 peut scauoir & prouuer
273.
 Quand est la litiscontestation

en causes crimineles 543
 Fin de litispēdence 195
 Litispēdēce doit estre pro-
 posée auant autres fins en
 toutes matieres 195
 Quand litispēdence ne se ue-
 risie par actes, & seroit me-
 slier y faire oyr tesmoings,
 quel appoictēmēt y eschoit
195.
 Cas aduenū de faict, touchāt
 tel appoinctement sur litis-
 pēdence 196
 Euocation de cause pour rai-
 son de litispēdence 197
 De iecter un hoste locatif
 hors la maison qu'il tient de
 louage 343

M.

De la mainleuee d'un benefi-
 ce contentieux 164
 Comment on peut empescher
 la main estre leuee 165
 Cōment se doit obtenir main
 leuee 303
 Si maintenue presuppōse trou-
 ble, ou non 74
 La maintenue excusē de resti-
 tuer les fruiēt, fors puis la
 contestation sur le petitoire:
 & que provisiō extraordi-

T iiii naïre

naire n'ha lieu en cōplain-
 ète 171
 Des mandemēs des iuges por-
 tans commandemēs, & en
 cas d'opposition 7
 Contre marchans uendans a
 detail. 176
 Mettre un appel au neant.
 Cherchez en Appel.
 Mettre une sentēce au neant.
 Cherchez en Sentence.
 Meubles ou arrierages deux
 a prestres ou clerics ne sont
 executables 280
 Si par donation de meubles,
 se doibuent entendre debtes
 deues en deniers 281
 Le creācier qui premier faiēt
 mettre en execution le meu-
 ble du debteur, est a preferer
 aux autres creāciers 282
 Cōmēt se doibt porter le ser-
 gent a la uendition du meu-
 ble prins par executiō 284
 Cōment on procede a la saisie
 des immeubles du debteur
 quād les meubles ne se trou-
 uēt, ou ne sont suffisās 285
 De l'ordonance des trente &
 cinq ans quāt aux mineurs
 181.
 De monstree ou ueue, & es-

qlz cas n'eschoit ueue 103
 La maniere de faire monstree
 106
 Qu'ō doibt faire au iour que
 la mōstree est raportee 107
 Du delay de garēdx: & si le
 delay de monstree est tollu
 par les ordonnāces dernie-
 res, ou non. 107
 Moyēs de nullité se baillent
 avecques les obieēt 225
 Moyens de faulx ne se cōmu-
 niquent a partie aduerse,
 mais aux gēs du Roy 242

N

Moyens de nullité se baillent
 avecques les obieēt 225

O

Protestatiō de bailler obieēt 210.

De l'appoinētement a bailler
 obieēt ou reproches de tes-
 moings 226

Cas esquelz on n'est point re-
 ceu a bailler obieēt 227

Le iuge d'appel peut adiuger
 preuue des obieēt baillez
 pardeuāt le iuge a quo 227

Peine cōtre les proposans ob-
 iect calumnieux 228

Quelz obieēt nous receuōs
 en ce

en ce royaume 228
 Le commissaire commis pour
 faire les enquestes des iusti-
 fications & reproches, ne
 doit receuoir les obieçtz,
 ains seulement la protesta-
 tion de les bailler 560
 si le iuge doit en la uoye or-
 dinaire receuoir les obieçtz
 alleguez en l'extraordina-
 re par l'accusé 571
 De faire offre des fraiz du cō-
 mandemēt incontinēt apres
 ledict commandemēt 473
 Comment on doit faire la-
 dicte offre 474
 Quād l'offre raisonnable des
 fraiz ne peut de rien rele-
 uer 475
 La maniere de proposer en iu-
 gemēt l'offre des despēs 475
 Pendant l'opposition faicte a
 la saisie, l'opposant est posses-
 seur: & de l'ordonnance du
 Roy Philipp. de Vallois 173
 Pardeuant quel iuge doit e-
 stre traictee l'opposition en
 laquelle un appel ha este cō-
 uerti 453
 En quelz cas on peut con-
 uertir un appoinçtemēt dō-
 nē par le iuge en opposi-

tion 454
 De ce q'l fault obseruer pour
 estre releuē en conuertissant
 l'appel en opposition 455
 De l'ordonnāce prohibant re-
 leuemēt de peremption d'in-
 stance 170
 Des quel temps les ordōnan-
 ces commencent a lier les
 subiectz 395
 L'ordonnance parlant de sa-
 tisfaire aux sentences ou a-
 restz donnez en matiere pe-
 titoire & possessoire dedēs
 trois iours apres la signifi-
 cation, si elle ha lieu en ma-
 tiere personele 469

P

pardō. Cherchez en Remissiō
 De demander Pareatis au iu-
 ge ordinaire auant que ad-
 iourner son iusticiable par-
 deuant le Cōseruateur d'u-
 ne uniuersité 139
 Comment il fault proceder
 contre ceulx qui sont con-
 damnez a faire partage de
 biens 344
 La differēce d'estre receu cō-
 me partie ciuile, & comme
 denonciateur 494
 Les

Les parties interessees premierement sont satisfaites que le Roy

494

La partie interessee se peut rendre partie apres le proces parfait, mais avant la sentence

495

Les parties formees non-receues en France, fors en certains lieux

495

De recevoir les parties a proces ordinaire apres l'audition de l'accusé

549

De prononcer la sentence par laquelle les parties sont receues a proces ordinaire premierement au procureur du Roy **Et** a la partie civile que a l'accusé, tout ainsi que la sentence definitive d'absolution

550

De faire adiourner la partie civile a la requeste du prisonnier, pour venir proceder a la cause

512

En quel cas le iuge lay cognoit du droit de patronage

130

Remede pour se faire payer

325.

Comment on procede contre ceulx qui n'ont point de quoy payer

329

Forme pour contraindre un homme d'eglise condamné par un iuge ecclesiastique, ou un homme lay par un iuge d'eglise, de payer quelque somme de deniers

331

Peine corporele ne se adiuge par indices uiolentz

565

Peines pecuniaires & civiles introduictes par le droit n'ot lieu en ce royaume

188

Toutes les peines comminees du iuge cōtre le condanné, ne sont pourtant toutes a demander ensemble

347

De la peine de fustigation & d'amputatiō d'oreilles

590

De la peine de la mitre & du pillory

590

On n'est tenu de proceder au petitoire, que la sentence du possessoire ne soit entierement executee

171

Comment on se peut ayder de pieces faictes entre autres parties

232

Si on peut retirer les pieces une fois produictes

232

Les pleiges ne doibuent pas estre necessairement des lieux ou est le proces pedāt

568

De quoy

Dequoy est tenu un pleige
 qui ha promis représenter
 toutes fois & quâtes 568
 Pleige pour ester a droict
 569.
 Pleige pour ester & fournir a
 droict 569
 L'obligation du pleige pour
 représenter l'accusé, quand
 elle passe aux heritiers du
 pleige 569
 Prescription de uingt ans en
 matiere criminele 545
 Prestres non executables en
 leurs personnes, ne en leurs
 meubles 211
 Les causes esquelles y ha pres-
 uention entre les iuges Roys
 aux & autres 125
 Preuostz des Mareschaux pas-
 sent oultre nonobstant l'ap-
 pel interiecté d'eulx, comme
 de iuges incompetens 520
 Du delay pour faire preu-
 ues 198
 Decretz de prise de corps,
 & d'adiournemens persons
 nelz 497
 Quand il est permis de pren-
 dre sans informations ne
 decret precedent 498

Les decretz de prise de corps
 se mettent a execution non-
 obstant l'appel comme de iu-
 ge incompetent 521
 Comment on doit mettre a
 execution les prises de
 corps 513
 A qui fault demander permis-
 sion d'user de main armee
 & assemblee, pour l'execu-
 tion d'une prise de corps
 514.
 Le iuge d'eglise hors son pre-
 toire ou siege de sa iurisdic-
 tion ne peut faire mettre
 a execution decret de prin-
 se de corps, ne transporter
 un prisonnier par une iu-
 risdiction temporele, sans le
 congé du seigneur, ou de
 son iuge 537
 Constitué prisonnier pour non
 auoir comparu au iour que
 il estoit adiourné a compa-
 roir en personne, peut estre
 incotinent eslargi en payant
 les fraiz du decret de prin-
 se de corps 502
 Celluy qui ha brisé la prison,
 de quelle peine doit estre
 puny 503
 Quelles

Quelles personnes doibuent
 estre presens a l'interroga-
 tion du prisonnier 543
 Comment on peut empescher
 la deliurance d'un prison-
 nier 498
 La taxe du menage du prison-
 nier, & portage du proces,
 se faiet par le iuge d'appel:
 & la faiet la Cour sur le re-
 ceueur du domaine, sauf a
 recouurer sur la partie ciui-
 le, ou sur le prisonnier 596
 Le prisonnier est tousiours
 relcué de l'illico 593
 En quelz cas il ne fault poit
 mener un prisonnier 594
 Comment on doit mener un
 prisonnier a la Cour 595
 De bailler le prisonnier a me-
 ner au rabais 595
 Des priuileges des escholiers,
 quant a leur fur & iurisdic-
 tiō, & qu'il y ha deux ma-
 nieres de Conseruateurs des
 priuileges des escholiers 137
 Difference entre les matieres
 priuilegiees, & simples 44
 Quelles causes estoyent priui-
 legiees auant les ordonnan-
 ces dernieres 39
 Le iuge du prochain siege

Royal cognoit des causes
 priuilegiees dont la cognois-
 sance en appartient au Roy
 alencontre des iusticiables
 des iurisdicitions tenues en
 Perrenie 125
 Priuilege du Roy & des com-
 munitiez du royaume de ne
 pouuoir estre soubmis a cez
 ou interdict de diuin seruice
 ne a excommunie 538
 Cas priuilegié. Cherchez e cas
 Priuilege de clericature. Cher-
 chez en Clerc.
 De reprendre ou repudier le
 proces d'un beneficié dece-
 dé 315
 Appellatiōs lesquelles se uuy-
 det cōme proces par escript
 es Cours inferieures par des-
 soubz la Cour de Parle-
 ment 432
 Pour quelles causes on peut a
 droict differer & refuser de
 conclure comme en proces
 par escript 432
 Nullité de sentence empesche
 qu'on conclue cōme en pro-
 ces par escript 434
 Le recredetiaire peut empes-
 cher ladiete conclusion en
 un

un cas

434

De declairer en concluant cō-
me en proces par escript, les
chefz de la sentence de la-
quelle on est appellāt

434

La conclusion comme en pros-
ces. par escript couure les
fins de non receuoir

435

Difference en ladicte conclu-
sion quant es Cours de Par-
lement, & inferieures, pour
le regard de recevoir produ-
ction nouvelle

436

De appoincter les parties en
proces extraordinaire, &
que pour ce faire le iuge peut
ordonner que les charges &
confession seront mises par-
deuers luy

550

Cōment on appelle ceulx qui
incidēment sont chargez en
faisant le proces criminel
d'un autre

554

Derecevoir les parties a pro-
ces ordinaire, quād on n'ha
peu rien gaigner par l'ex-
traordinaire

566

L'appellant n'est tenu faire
grossoyer le proces criminel
ne le porter, sinon qu'il soit
demandeur, soit le Roy ou
partie civile

595

Quand les procureurs des sei-
gneurs, ou des corps & cōs-
munitez, ou des priuees per-
sonnes peuuent estre inti-
mez: & s'ilz peuuent rele-
uer appellations

404

En quelz cas le procureur ge-
neral ou fiscal peut preiudi-
cier a son seigneur

112

De l'adiournemēt donnē pour
constituer nouveau procu-
reur

92

De reuocatiō de procureur

93

Quelz procureurs sont re-
ceurs sans procuration

93

Clause reprouuee en procura-
tion

94

De adueni & ratification d'u-
ne chose faicte par le procu-
reur

95

Comment les loix ciuiles &
imperiales parlans des pro-
cureurs, doibuent estre en-
tendues

47

De produire dedens le delay
sur ce prefix

235

De la proposition de l'adema-
de, & de l'utilité del'insē-
rer par le registre du gref-
fier

61

Proposition d'erreur. Cher-
chez

chez en Erreur
 Comment nous prenons les
 prouinces de France 519
 Prouision ne se doit ioinde
 au principal 200
 Par uertu du premier default
 la prouision d'alimens &
 medicamens est adiugee, ou
 pour faire prier Dieu pour
 l'ame de l'occis 504
 Le rapport du chirurgien qui
 ha médicamenté le blessé,
 ou de l'adoubeur des corps
 humains qui ha adoubé, est
 requis en prouision d'alimens
 & medicamens 505
 Quand on adiuge les despēs
 de l'instāce de prouision d'a
 limens & medicamens: &
 silz sont executoires par
 dessus l'appel 505
 L'instance de ladiēte prouis
 sion doit estre sēparee du
 principal: & quand on peut
 reseruer ladiēte prouision
 apres les recolemens & cōs
 frōtatiōs de tesmoings 506
 Publication d'enqueste. Cher
 chez en Enqueste.
 Les Romains ne cōioingnoiet
 point punition pecuniaire

avecques la corporele 575
 De la punition de l'impresio
 de la fleur du lis 590
 De la punition de fondation
 de chappelles 591

Q

Question. Cherchez en Tor
 ture.

R

Quelles personnes sont tenues
 recognoistre ou nyer le sing
 & rescripture faictz par au
 tres 152

Les quitances d'un commis
 en office public font foy sans
 que autrement elles soyent
 recogneues 153

On doit recognoistre ou nyer
 la cedula, iasoit que le iour
 du payement ne soit escheu:
 & de la protestation qu'on
 faict en recognoissant, qu'on
 recognoit sans approuuer le
 contenu 154

Esquelz cas on est tenu co
 gnoistre ou nyer 154

Recolement de tesmoings.
 Cherchez en Tesmoing

De reconuention, & en quel
 cas elle ha lieu selon nostre
 stile 189

La

La recreance & maintenue
 en complaincte doibuent es-
 stre poursuyues par un
 mesme moyen 199
 De recusation contre les iu-
 ges 96
 Lon n'est tenu a la purgation
 que faict le iuge des causes
 de recusation cōtre luy pro-
 posée par serment 97
 Iusques a quant on peut res-
 cuser 98
 Cause de recusatiō baillee par
 les ordonnans. Royaux 98
 Les commissaires autres que
 les iuges ne peuuent declai-
 rer les causes de recusation
 non receuables 214
 Des matieres de regales 128
 Le procureur du Roy est te-
 nu faire registre des eslar-
 gis 569
 Du registre que doibt faire le
 greffier de ceulx qui sont ad-
 menez prisonniers, & des
 eslargis ou mis hors pri-
 son 570
 De reintegrande 75
 N'y ha releuement touchant
 meubles, ne bail a ferme de
 fructz 187

On ne doibt faire difficulté
 de releuer de l'illico dedens
 six mois 378
 Degrez de releuer appella-
 tions 383
 En quelz cas on doibt releuer
 nuement & sans moyen es
 Cours de Parlement 386
 Releuer, Relief, Relieurement.
 Cherchez en Appel
 De la differēce des lettres de
 remissiō & de pardon 573
 En quoy cōuiēēt les lettres
 de remissiō & de pardō 573
 A qui se doibuent adresser
 les lettres de remissiō 577
 De n'obeir aux lettres de re-
 mission, si elles ne sont don-
 nees pour cas requerant pei-
 ne corporele 578
 Remissions se doibuent obte-
 nir pour les homicides faicts
 pour le salut & defense de
 la personne 578
 L'accusé porteur de remissiō
 doibt tenir prison pendant
 l'enterinement de sa remis-
 sion: & s'il est eslargi, la
 partie aduersē demanderes-
 se s'en peut porter appel-
 lant 582
 De ne

De ne rien prendre pour l'eslargissement d'un prisonnier, ne pour l'enterinement de sa remission 582

La forme de proceder sur l'enterinement d'une remission 579

Renoncer a son appel. Cherchez en Appel.

Si un des teneurs de partie des lieux subiectz a une rete, peut estre conuenu pour le total de la rente 83

Les arrirages d'une rente pour l'annee de l'exposition sont entierement deux, mais pour l'annee de l'admortissement d'une rente ilz sont deux pro rata 85

Le defendeur est tenu de declarer si & quelle portion il retient des lieux subiectz a la rete de laquelle on faict question 102

Des arrirages des rentes constituees a pris d'argēt 176

De la reduction & moderation des rentes a la raison d'un pour quinze 177

Des clauses reprouuees en uedition de rentes a deniers ou a bled 178

De la reduction des rentes a bled uendues pour deniers 179

Rentes se peuuent admortir, & comment 308

Des reuoyz & fins declinatoires : & en quelles matieres on doit conuenir le defendeur pardeuant le iuge de son domicile 116

Quel seigneur peut demander le reuoy ou obeissance de la cause : & que les iurisdicions en ce royaume sont patrimoniales 117

Quand on ne peut demander son reuoy sans l'adionction du procureur de sa iurisdiction 118

Le seigneur peut demander le reuoy de son subiect en la cause d'appel interiecté par son subiect du deny du reuoy : mais ne peut appeller dudict deny, si il n'a requis le reuoy. 119

Le subiect peut poursuyure son appel du deny du reuoy sans son seigneur, si ledict seigneur l'a une fois requis 119

Quand

Quand en faisant le renuoy,
l'instance est renouee 120

Le iuge pendant le proces de
deux seigneurs demandans
le réuoy, ne peut cognoistre
du principal 120

Quād le defendeur peut de-
mander son réuoy sans l'ad-
ionction du seigneur 120

Quand on adiuige preuue sur
le renuoy 121

Le seigneur ne peut deman-
der le renuoy si l'accusé ne
compare en l'estat qu'il est
tenu 507

La partie ciuile peut empes-
cher que l'accusé ne soit ré-
uoyé a l'Eglise, que l'arest dō
né par contumace quant a
son interest ciuil ne soit exe-
cuté 510

Le clerc ne peut estre réuoyé
a l'Eglise si en personne il ne
demande son renuoy 510

Le seigneur peut demander
le renuoy pardeuant son iu-
ge de son iusticiable réuoyé
par arest pardeuant iuge
royal 510

Le declinatoire ou renuoy
doibt estre proposé, auant

que l'accusé soit oy sur les
informations 515

Le iuge doibt faire prompte-
ment droict du renuoy, sans
en faire proces par escript
Et auant que oyr l'accusé
sur les informations, fors
quand il est clerc ou prestre
515

Renuoy doibt estre faict auāt
contestation en cause, Et de-
quelles causes doibt on fai-
re renuoy a mesdictz sei-
gneurs des requestes 145

Renuoy doibt estre faict par
le Conseruateur pardeuant
mesdictz seigneurs desdi-
ctes requestes 146

Du profit du default donné
contre celluy a la requeste
duquel est faict le renuoy,
Et du default dōné contre
sa partie aduersē 150

Reprēdre ou repudier le pro-
ces d'un beneficiē decedē
315.

Reproches des tesmoigns pro-
duictz pour la uerification
des reproches de partie ad-
uersē 256

Reprocher tesmoings. Cher-
cher

chez en Tesmoing.		Resposēs par credit uel non,	
Des requestes personnelles		abolies	201
Et hypotheques, Et la maniere de conclure esdictes requestes	80	Des responsēs de uerité	201
En quel cas on peut former requestes	81	Quand la partie peut estre contraincte respondre en sa personne	202
Lesdictes requestes sont d'estroict droit: Et en quelles matieres qui dechoit d'un poinct, dechoit de toute l'instance	82	Du reſtabliſſement en matiere de complaincte	163
Requestes hypotheques peuvent estre formees pour rentes foncieres	83	En matiere de retraict lignagier ou doibt le defendeur estre conuenu: Et qui est iuge competent en action reale	116
Pendant le proces de rescissio d'un contract, il doibt estre uestu, Et les parties iouyssans ſuyuāt icelluy	174	S.	
Resignans Et resignataires	317.	Quand les ſaisies Et arrest ne ſont ſaietz par auctorité de iustice, comment procede ra le creditur	323
Le condamné par sentence de bailler deniers ou autre chose, quel temps Et respit il ha pour payer	337	Du ſalaire des ſeruiteurs	175
Difference entre trois manieres de respit: Et quelles ſont les personnes miserables	339.	Dedens quel temps doibuent les aduocatx Et procureurs demander leur ſalaire	180
Respit a trois ans	340	Du ſalaire des greſſiers	181
Respit de cinq ans	340	Du ſalaire des iuges uacans a faire les enquestes	204
		Salaires que lon prend pour autres escriptures que sentences	262
		La partie ciuile demanderesse doibt payer le ſalaire du iuge	582
		sal-	

- Saluations 236
 De l'effect de sauuegarde 317.
 Les seaulx aux contractz at
 tributifz de iurisdiction 16.
 Seneschaucees ressortissas sans
 moyen en la Cour de Parle-
 ment 348
 Le iuge ne doibt differer a do-
 ner sentence pour mestiuues
 ou uendenges 250
 Le iuge par sa sentence doibt
 trencher toutes occasions
 de nouueau proces 253
 Sentences interlocutoires en
 matieres de reproches 255
 La forme de bailler senten-
 ces 258
 Sentences se donnent contre
 les parties, non contre les
 procureurs 258
 Deux manieres de leuer sente-
 ce: & que la taxe des espi-
 ces doibt estre mise au dos
 de la sentence 260
 Comment le greffier doibt fai-
 re sentence leuee en forme,
 & y mettre le dictum du
 iuge 260
 sentences executables nonob-
 stant l'appel 347
- si les sentences de recreance
 & de reintegrade sont exe-
 cutoires nonobstans opposi-
 tions ou appellations quel-
 conques 349
 Des iuges qui apres auoir ap-
 poincté les parties a faire
 preuue de quelque fait,
 donnent sentence contre les
 dictes parties 354
 Comment il fault mettre en
 execution les sentences des
 iuges ecclesiastiques par au-
 torité des iuges layz, &c.
355.
 Plusieurs manieres de senten-
 ces executoires nonobstans
 oppositions ou appellations
 quelconques 358
 Sentences donnees en matie-
 re de douaire 359
 Sentences definitiues non ex-
 cedans la somme de uingt
 & cinq liures tournois, en
 matieres pures personnelles
 & ciuiles, sont executoires
 nonobstat appel, &c. 360
 Sentences executoires en ma-
 tiere de rente & reuenu
361.
 sentences donnees pour taxa-
v ij tion

tion d'espices sont executoi-
 res nonobstant l'appel 363
 sentences de uingt & cinq
 liures tournois, & de soixā-
 te solz & un denier d'amē
 de, si sont executoires sans
 appel 364
 sentēces d'arbitres, executoi-
 res sans appel 365
 sētēces de garnison de main,
 &c. executoires sans appel
 369
 sentences dōnees par contu-
 mace executoires sans ap-
 pel 370
 Comment lesdictes sentences
 doibuent estre dōnees, & mi-
 ses en execution. 370
 Pleiges es sentences executoi-
 res 371
 La maniere de prononcer sen-
 tence selon les ordonnances
 585
 s'il fault par la sentence cri-
 minele declairer le cas du-
 quel le prisonnier est at-
 tainct & conuaincu 585
 Quand on doit demander
 sequestre 72
 Le sergent ou executeur de
 bulle ne peut que faire se-

questre uerbal, & bailler
 possession uerbalemēt, auāt
 cognoissance de cause 73
 Cause pour empescher le se-
 questre: & du remede de la
 pragmatique sanction au
 tiltre De pacificis possessio-
 ribus 158
 En quelles matieres n'eschoit
 que sequestre uerbal, & la
 forme du sequestre 158
 Quand le sequestre peut estre
 empeschē par tiltres 159
 La forme de executer une sen-
 tence de sequestre 161
 sequestre se disjoinct des au-
 tres chiefz de la complain-
 te 200
 Le sequestre & cōfectiō d'in-
 uentaire se ioignent en com-
 plainte de succession 200
 Sergens ne peuuent exploi-
 eter hors le ressort 3
 Des sergens a cheual du Cha-
 stellet de Paris 4
 Comment on procede contre
 les sergēs. exploitans hors
 leur ressort 4
 Quand un sergent doit de-
 mander congé d'exploiter,
 qu'on dict Pareatis 5

Quand

Quād le sergēt ne ueult bail-
ler relation de l'adiourne-
ment, comment on y pour-
uoit 5

Des sergens du grand cōseil 6

De la creation des sergēs 28

Sergens peuuent continuer
les exploictz faictz par
autres sergens 28

Comment on se doit pour-
uoir contre un sergent mal
traictant celluy qu'il prend
prisonnier 376

Quand un sergent peut ex-
ceder celluy qu'il constitue
prisonnier 376

Le sergent n'est creu des ex-
ces qu'il diēt luy auoir esté
faictz par sa relation 518

Delation de serment en sup-
plement de semipleine preu-
ue 247

De la communication d'audi-
tion de serment entre les
parties 249

Sortilege ou sorcerie 524

En quelle chābre de la Cour
faut presenter lettres roy-
aux de subrogation 166

T

Les assoieurs d'une taille ou

emprunt ne doibuent estre
conuenuz en surtaux, silz
n'ont contreuenu a leur cō-
mission, ou aux ordonnan-
ces Royaulx, en faisant l'as-
siete de la taille. 406

Peine de Talion abolie, & au-
tre mise au lieu 495

De porter ou enuoyer le pro-
ces par escript au greffe de
la Cour: & de la taxe du por-
tage 421

Cōment on se doit pouruoir
alencontre d'une taxe faicte
par un de messieurs de la
Cour d'un portage de sacz
455

Taxe de despens. Cherchez en
Despens.

Tesmoings comment doibuent
faire serment, & estre exa-
minez 207

En absence de la partie ad-
iournee pour uoir produire
tesmoings, on peut a autres
heures & iours receuoir tes-
moings, que a ceulx aus-
quelz ha esté baillee la pre-
miere assignation pour les
voir iurer, si ladicte partie
n'ya comparu 208

V iij

La

La partie doit estre adiour-
nee pour uoir iurer tes-
moings 209

Reception de tesmoings en iu-
gement a l'audience de la
cause 209

Que doit faire la partie ad-
iournee pour uoir produire
tesmoings 209

Les parties s'accordent de
lieu pour y interroguer les
tesmoings 210

De la contraincte contre les
tesmoings refusans de depo-
ser ou testifier 210

Des tourbes de tesmoings
218.

De examiner tesmoings par
forme de tourbe 218

Quand peuuet les tesmoings
produictz dedens le delay
estre oyx apres icelluy es-
cheu 223

De nommer les tesmoings a-
uant que les produire
223.

De declairer les noms des tes-
moings produictz & non
oyx auant que prendre ap-
pointement a bailler ob-
iectz 225

Comment on ualide la depo-
sition d'un tesmoing qui ha
depose quelque faict non
articulé 439

Delays pour faire uenir tes-
moings 551

Anciennement on n'usoit de
uoye & proces extraordi-
naire de recolemens & con-
frontations de tesmoings,
sinon en crimes de lese ma-
iesté 552

De la cōtraincte de tesmoings
en cause criminele 553

Celluy qui est oy comme tes-
moing, & se charge du cas,
il n'est attainct & conuain-
cu par sa confession: ains
fault de ce faire son proces
criminelement 554

La maniere de recoler les tes-
moings, & les confrōter au
prisonnier ou accusé 555

Le iuge doit aduertir l'ac-
cusé de dire reproches con-
tre le tesmoing auant la
confrontation: autrement
qu'il n'y sera iamais receu
556

De confrōter tous tesmoings,
tant ceulx qui chargent,
que

que qui ne chargent point
556.

Si le tesmoing est tenu de pers-
ister en sa deposition cons-
tenue par l'information
557.

Quand les tesmoings se des-
dient tous du cōtenu en l'in-
formation 557

si le tesmoing qui ha signé
sa deposition peut uarier
557.

Des conclusions des gens du
Roy apres les recolemens
& confrontations faictz
558.

De la sentence interlocutoire,
par laquelle est ordonné
que l'accusé nommera les
tesmoings par lesquels il
entend prouuer ses iustifica-
tions & reproches, & qu'ilz
seront oyr ex officio
558.

Le iuge commet aux iuges
du pays ou sont les tes-
moings pour les oyr, appelé
auecques luy son greffier ou
autre adioinct 560

On n'ha accoustumé auoir re-
gard aux reproches baillez

contre les tesmoings oyr sur
les iustifications & repro-
ches, sinōes cas cy apres de-
clairez 561

Quel temps d'estude est re-
quis pour obtenir testimo-
niale 138

Quand & comment on de-
libere & on adiuge la tor-
ture 562

Quelle preuue est reqse pour
adiuger la torture 562

Toutes personnes en ce roy-
aume sont subiectes a la tor-
ture, de quelque dignité que
elles soient 563

De la prononciation de la tor-
ture, & execution d'icel-
le 563

La maniere de bailler la tor-
ture 563

De interroguer le prisonnier
le lendemain hors du lieu
ou ha esté baillee la questiō,
pour ueoir sa perseuerance
de la confession faicte en
torture 564

De ceulx qui confessent en la
question, & apres qu'ilz
sont interroguiez le lende-
main, ilz nient 565

De ad:

De adiuger la question , sans
ce que les indices resultans
du procès soient purgez
565

De repeter la torture 566

De l'autre deliberation qui se
faict avecques le conseil a
pres la question 566

V

Vene. Voiez en Monstree.

Vidimus ou copies 231

Voyes de nullité, & de que-
relle, ou plaincte a iuge su-
perieur n'ont lieu. 412

Vfucapion tollue 192

Fin de la table.



8/10/00

卷一

卷一